

# CODICIS REGVLARVM

## PARS TERTIA.

IN QVA SANCTORVM PATRV  
REGVLÆ AD VIRGINE S

S. AVGVSTINI EPISC. HIPPONENSIS.

S. CÆSARII ARELATENSIS.

S. AVRELIANI ARELATENSIS.

S. DONATI VESONTIENSIS.

CVIVSDAM PATRIS.

S. LEANDRI HISPALENSIS.

B. AELREDI ABBATIS RIEVALLENSIS

Sacris Christi Virginibus

M A R I Æ I N N O C E N T I Æ,

E T M A R I Æ G R A T I Æ

S O R O R I B V S B A R B E R I N I S

V R B A N I V I I I . P . M .

E T A N T O N I I C A R D I N A L I S

S. Honuphrij Neptibus

F R A N C I S C I E P I S C O P I P O R T V E N .

S. R. E. VICECANCELLARIU.

E T A N T O N I I E P I S C . T V S C V L A N .

S. R. E. CAMERARIU

Germanis

R E G V L A S S S . P A T R V M V I R G I N I B V S

*Sanctimonialibus præscriptas.*

E T A S . B E N E D I C T O A N I A N E N S I A B B A T E

Collectas , & Supplemento Auctas.

*Humillimo Affectu Offert , Dat , Dicat , Consecrat*

L V C A S H O L S T E N I V S .

S. AVRELI  
A V G V S T I N I  
HIPPONENSIS EPISCOPI.  
EPISTOLA CIX.

*Regulam Sanctimonialibus praescriptam continens.*

---

DE REGVLA S. AVGVSTINI  
RO. BELLARMINI S. R. E. CARD. IVDICIVM  
Libro de Script. Ecclesiasticis.

*Ex tribus Regulis sola tertia est certa S. Augustini, sed feminis data, non viris: habetur enim in Epistola CIX. reliquae duae non videntur Augustini.*

SANCTI AVRELII AVGVSTINI  
HIPPONENSIS EPISCOPI  
EPISTOLA CIX.

*Regulam Sanctimonialibus præscriptam continens.*



ICVT parata est severitas peccata quæ inuenietur vindicare; ita non vult caritas quod vindicet inuenire. Hæc causa fecit, ut ad vos non venirem, cum meam præsentiam quæreretis: non ad pacis vestræ gaudium, sed ad dissensionis vestræ augmentum. Quomodo enim contemnerem, & impunitum relinquerem, si & me præsentem tantus vester tumultus existeret, quantus me absente, etsi oculos meos latuit, tamen aures meas vestris offibus verberauit? Nam fortassis etiam maior esset vestra seditio in præsentia mea, cum necesse esset vobis non concedi, quæ in perniciosissimum exemplum contra sanam disciplinam, quod vobis non expedit, petebatis: ac sic quales non volo inuenirem vos; & ipse inueniret à vobis qualem non volebatis. Cum ergo scribat Apostolus ad Corinthios dicens: *Testem Deum facio super animam meam, quia parcens vobis nondum veni Corinthum; non quia dominamur fidei vestræ, sed cooperatores sumus gaudij vestri*: Hoc ego etiam dico vobis; quia parcens vobis non ad vos veni. Peperci etiam mihi, ne tristitiam super tristitiam haberem: & elegi, non ut exhiberem faciem meam vobis, sed effunderem cor meum Deo pro vobis; & causam magni periculi vestri, non apud vos verbis, sed apud Deum lacrimis agerem; ne conuertat in luctum gaudium meum, quo soleo gaudere de vobis, & inter tanta scandala, quibus ubique abundat hic mundus, aliquando consolari: cogitans copiosam congregationem, & castam dilectionem, & sanctam conuersationem vestram, & largiorem gratiam Dei, quæ data est vobis; ut non solum caruales nuptias contemneretis, verum etiam eligeretis in domo societatem vniuersim habitandi, ut sit vobis anima vna, & cor vnum in Deum. Hæc in vobis bona, hæc Dei dona considerans, inter multas tempestates, quibus ex aliis malis quantitur, cor meum solet utique requiescere. *Currobatis bene, quis vos fascinauit?* Suasio illa non est ex Deo, qui vocauit vos. *Modicum fermenti*, nolo dicere quod sequitur, hoc enim magis cupio, & oro, & hortor, ut ipsum fermentum conuertatur in melius; ne tota massa, sicut penè iam fecerat, conuertatur in perit. Si ergo repullulastis sanum sapere, *orate ne intratis in tentationem*,

2. Cor. 1.

Gal. 5.

1. Cor. 5.

Matt. 16.

ne iterum in contentiones, æmulationes, animositates, dissensiones, detractiones, seditiones, susurrations. Non enim sic plantauimus & rigauimus hortum Dominicum in vobis, vt spinas metamus istas ex vobis. Si autem adhuc vestra tumultuatur infirmitas, orate vt eruamini de tentatione. Quæ autem conturbant vos, si adhuc conturbant vos, nisi correxerint se, portabunt iudicium, quæcunque illæ fuerint. Cogitate quid mali sit, vt cum de Deo natis in vnitæte gaudeamus: interna schismata in Monasterio lugeamus. Perseuerate in bono proposito, & non desiderabitis mutare Præpositam; quia in Monasterio illo per tam multos annos perseuerante, & numero & ætate creuistis; quæ vos Mater non vtero, sed animo suscepit. Omnes enim quæ illuc venistis, ibi eam aut sanctæ Præpositæ sorori meæ seruientem, placentem; aut etiam ipsam Præpositam, quæ vos suscepit, inuenistis. Sub illa estis eruditæ; sub illa velatæ, sub illa multiplicatæ; & sic tumultuamini, vt eam vobis mutetis; cum lugere deberetis, si eam vobis mutare vellemus. Ipsa est quam nostis; ipsa est ad quem venistis; ipsa est quam per tot annos habendo creuistis. Nouum non accepistis, nisi Præpositum: aut si propter illum quæritis nouitatem: & in eius inuidiam contra Matrem vestram sic rebellastis, cur non potius id petistis, vt ipse vobis mutetur? Si autem hoc exhorretis, quia noui quomodo eum in Christo venerabiliter diligatis, cur non potius illam? In vobis namque regendis: sic Præpositi rudimenta turbantur, vt magis velit vos ipse desere, quam istam ex vobis famam & inuidiam sustinere, vt dicatur, non vos aliam quæsituras fuisse Præpositam, ni ipsam cœpissetis habere Præpositum. Tranquillet ergo Deus, & componat animos vestros, vt non in vobis præualeat opus diaboli; sed pax Christi vincat in cordibus vestris nec dolore animi, quia non sit quod vultis, vel quia pudet voluisse quod velle non debuistis, erubescendo curratis in mortem; sed potius penitendo resumatis virtutem: nec habeatis pœnitentiam Iudæ traditoris, sed potius lacrymas Petri pastoris.

## S E Q V I T V R R E G V L A .



Ec sunt quæ vt obseruetis præcipimus in Monasterio constitutæ. Primum propter quod estis in vnum congregatæ, vt vnanimem habitetis in domo, & sit vobis cor vnum & anima vna in Deo. Et non dicatis aliquid proprium, sed sint vobis omnia communia, & distribuatur vnicuique vestrum à Præposita vestra victus & regumentum non æqualiter omnibus, quia non æqualiter valetis omnes; sed vnicuique sicut opus fuerit. Sic enim legitis in Actibus Apostolorum, quia erant ipsi omnia communia; & distribuabatur singulis prout cui- Aa. a.  
que opus erat.

II. Quæ aliquid habebant in sæculo, quando ingressæ sunt Monasterium, libenter velint illud esse commune. Quæ autem non habebant, non ea querunt in Monasterio, quæ nec foris habere potuerunt: sed tamen earum infirmitati quod opus est tribuatur; etsi pauperies earum, quando foris erant, nec ipsa necessaria poterant inuenire. At non ideo putent se esse felices, quia inueniunt victum & tegumentum, quale foris inuenire non poterunt: nec erigant ceruicem, quia sociantur eis, ad quas foris accedere non audebant; sed sursum cor habeant, & terrena bona non querant: ne incipiant Monasteria esse diuitibus vtilia, non pauperibus, sed diuites illic humiliantur, & pauperes illic instantur.

III. Sed sursum etiam illæ quæ aliquid esse videbantur in sæculo, non habeant fastidio sorores suas, quæ ad illam sanctam societatem ex paupertate venerunt: magis autem studeant, non de parentum diuitum dignitate, sed de pauperum sororum societate gloriari. Nec extollantur si communi vitæ de suis facultatibus aliquid contulerunt: nec de suis diuitiis magis superbiant, quia eas Monasterio partiuntur, quam si eis in sæculo fruerentur. Alia quippe quæcunque iniquitas in malis operibus exercetur, vt fiant; superbia vero bonis operibus insidiatur, vt pereant. Et quid prodest dispergere dando pauperibus, & pauperem fieri, si anima misera superbior efficiatur contemnendo, quam fuerat possidendo? Omnes ergo vnanimiter & concorditer viuite, & honorate in vobis inuicem Deum, cuius templi factæ estis.

IV. Orationibus instate horis & temporibus constitutis. In oratorio nemo agat, nisi ad quod est factum, vnde & nomen accepit, vt si aliquæ etiam præter horas constitutas, si eis vacat, orare voluerint, non eis singimpedimentum quæ ibi aliquid agere voluerint. Psalmis & hymnis cum oratis Deum, hoc versetur in corde, quod profertur in voce: & nolite cantare, nisi quod legitis esse cantandum: quod autem non ita scriptum est vt cantetur, non cantetur.

V. Carnem vestram domate ieiuniis, & abstinentia esæ & potus, quantum valetudo permittit, quando autem aliqua non potest ieiunare, non tamen extra horam prandij aliquid alimentorum sumat, nisi cum ægrotat. Cum acceditis ad mensam donec inde surgatis, quod vobis secundum consuetudinem legitur sine tumultu & contentionibus audite. Nec solæ vobis fauces sumant cibum, sed & aures percipiant Dei verbum. Quæ infirmæ sunt ex pristina consuetudine, si aliter tractantur in victu, non debet aliis molestum esse, nec iniustum videre quas fecit alia consuetudo fortiores. Nec illas feliciores putent, quia sumunt quod non sumunt ipsæ: sed sibi potius gratulentur, quia valent quod non valent illæ, & si eis, quæ venerunt ex moribus delicatioribus ad Monasterium, aliquid alimentorum, vestimentorum, stramentorum, operimentorum datur, quod aliis fortioribus, & ideo felicioribus, non datur, cogitare debent quibus non datur, quantum de sua seculari vita illæ ad istam descenderint, quamvis vsque ad aliarum, quæ sunt corpore fortiores, frugalitatem peruenire

nequiverint. Nec illæ debent conturbari, quod eas vident amplius (non quia honorantur, sed quia toletantur) accipere; ne contingat detestanda peruersitas, vt in Monasterio, vbi quantum possunt fiunt diuites laboriosæ, fiant pauperes delicatæ. Sane quemadmodum ægrotantes necesse habent minus accipere ne grauentur, ita post ægritudinem sic tractandæ sunt vt citius recteantur, etiam si de humillima sæculi paupertate venerunt: tanquam illis hoc contulerit recentior ægritudo, quod diuitibus anterior consuetudinem suam, quæ famulas Dei tanto amplius decet, quanto minus indigenti: nec ibi eas teneat voluntas iam vegetas, quo necessitas leuaret infirmas. Illæ se existiment ditiores, quæ fuerint in sustinenda paritate fortiores. Melius est enim minus egere, quam plus habere.

VI. Non sit notabilis habitus vester, nec affectetis vestibus placere, sed moribus, nec sint vobis tam tenera caput tegmina, ne retiola subter appareant. Capillos ex nulla parte nudos habeatis, neq; foris vel spargat negligentia, vel componat industria.

VII. Quando proceditis, simul ambulate: cum veneritis quo itis, simul state. In incessu, in statu, in habitu, in omnibus motibus vestris, nihil fiat quod illiciat cuiusquam libidinem; sed quod vestram deceat sanctitatem. Oculi vestri etsi iaciuntur in aliquem, figantur in neminem. Neque enim quando proceditis viros videre prohibemini, sed appetere, aut ab ipsis appeti velle. Nec solo tactu, sed affectu quoque & aspectu appetitur & appetit femina. Nec dicatis vos habere animos pudicos, si habeatis oculos impudicos: quia impudicus oculus impudici cordis est nuncius. Et cum se inuicem sibi, etiam tacente lingua, conspectu mutuo corda nunciante impudica, & secundum concupiscentiam carnis alterutro delectantur ardore, etiam intactis ab immunda violatione corporibus, fugit castitas ipsa de moribus. Nec putare debet quæ in masculum figit oculum, & illius in semetipsam diligit fixum, non ab aliis videri cum hoc facit, videtur omnino & à quibus videri non arbitratur. Sed ecce lateat, & à nemine hominum videatur; quid faciet de illo superno inspectore, quem latere nihil potest? An ideo putandus est non videre, quia tanto videt patientius, quanto sapientius? Illi ergo timeat sancta femina displicere, ne velit viro male placere, illum cogitet omnia videre, ne velit viro male videri. Illius namque & in hac causa commendatus est timor, vbi scriptum est: *Abominatio est Domino desponsus oculum.* Quando ergo simul estis in Ecclesia, & vbicunque vbi & viri sunt, inuicem vestram pudicitiam custodite, Deus enim qui habitat in vobis, etiam isto modo vos custodiet ex vobis.

Pro. 16:

VIII. Et si hanc, de qua loquor, oculi petulantiam in aliqua vestrum aduerteritis, statim admonete, ne ex præprogreantur, sed ex proximo corrigantur. Si autem & post admonitionem iterum, vel alio quocunque die, idipsum eam facere videritis, iam velut vulneratam sanandam prodar, quæcunque inuenire potuit hoc: prius tamen & alteri vel tertie.

demonstratam, vt duarum vel trium possit ore conuinci, & competenti feueritate coerceri. Nec vos iudicetis esse maleuolas, quando hoc indicatis; magis quippe innocentes non estis, si sorores vestras, quas indicando corrigere potestis, tacendo perire permittitis. Si enim soror tua vulnus haberet in corpore, quod vellet occultari, dum timeret secari; nonne crudeliter ab te sileretur, & misericorditer indicaretur? Quanto ergo potius debes eam manifestare, ne perniciosius putrescat in corde? Sed antequam aliis demonstretur, per quas conuincenda est si negauerit, prius Præpositæ debet ostendi, si admonita neglexerit corrigi; ne forte possit secretius correpta innotescere cæteris. Si autem negauerit, tunc neganti adhibende sunt aliæ; vt iam coram omnibus possit non ab vna teste argui, sed a duabus tribusue conuinci. Conuicta vero secundum Præpositæ vel Presbyteri arbitrium debet emendatoriam sustinere vindictam: quam si ferre recusauerit, etsi ipsa non abscesserit, de vestra societate proiciatur. Non enim & hoc fit egrediliter, sed misericorditer, ne contagione pestifera plurimas perdat. Et hoc quod dixi de oculo non figendo, etiam in cæteris inueniendis, prohibendis, indicandis, conuincendis, vindicandisque peccatis diligenter obseruetur, cum dilectione hominum, & odio vitiorum.

IX. Quæcunque autem in tantum progressa fuerit malus, vt occultè ab aliquo lteras, vel quælibet munuscula accipiat; si hoc ultro confitetur, parcatur illi, & oretur pro ea: si autem deprehenditur atque conuincitur, secundum arbitrium Præpositæ, vel Presbyteri, vel etiam Episcopi granius emendetur.

X. Vestes vestras in vno loco habete, sub vna custode vel duabus, vel quor sufficere potuerint ad eas excutiendas, ne à tinea lædantur. Et sicut pascimini ex vno cellario, sic induamini ex vno vestiario. Et si fieri potest, non ad vos pertineat, quid vobis induendum pro temporis congruentia proferatur, vtrum hoc recipiat vnaquæque vestrum, quod deposuerat, an aliud quod altera habuerat; dum tamen vnicuique quod opus est non negetur. Si autem hinc inter vos contentiones & murmura oriuntur, & conqueritur aliqua deterius aliquid se accepisse, quam prius habuerat, & indignam se quæ non ita vestiatur, sicut alia soror eius vestiebatur; hinc vos probate, quantum vobis desit in illo interiore sancto habitu cordis, quæ pro habitu corporis litigatis. Tamen si vestra toleratur infirmitas, vt hoc recipiatis quod posueratis, in vno tamen loco sub communibus custodibus habete quod ponitis: ita sanè vt nulla sibi aliquid operetur, siue vnde induatur, siue vbi iaceat, siue vnde cingatur, vel caput contegat: sed omnia opera vestra in comune fiant, maiore studio, & frequentiori alacritate, quam si vobis propria facere. Caritas enim, de qua scriptum est, quod *non queris qua sua sunt*, sic intelligitur; quia communia propriis, non propria communibus anteponeat. Et ideo quanto amplius rem communem quam propriam curaueritis, tanto amplius vos profecisse noueritis: vt in omnibus, quibus vitur transitura necessitas, supereminet quæ permanet Caritas. Consequens ergo est, vt etiam illud, quod suis



suis vel filiabus, vel aliqua necessitudine ad se pertinentibus, in Monasterio constitutis, aliquis vel aliqua contulerit, siue vestem, siue quodlibet aliud inter necessaria depurandum, non occultè accipiat, sed sit in potestate Præpositæ; ut in commune redactum, cum necessarium fuerit, præbeatur. Quod si aliqua rem sibi collatam celauerit, furti iudicio condemnatur.

XI. Indumenta vestra secundum arbitrium Præpositæ lauentur; siue à vobis, siue à fullonibus: ne interiores animæ sordes contrahat mundæ vestis nimius appetitus.

XII. Lauacrum etiam corporum, vsusque balnearum non sit assiduus. sed eo quo solet intervallo temporis tribuatur, hoc est, semel in mense; Cuius autem infirmitatis necessitas cogit lauandum corpus, non longius differatur; fiat sine murmure de consilio medici, ita ut etiam si nolit, iubente Præposita, faciat quod faciendum est pro salute. Si autem velit, & fortè non expedit, suæ cupiditati non obediatur; aliquando enim, etiam si noceat, prodesse creditur quod delectat. Denique si latens est dolor in corpore, famulæ Dei dicenti quid sibi doleat, sine dubitatione credatur. sed tamen utrum sanando illi dolori quod delectat expediat, si non est certum, medicus consulatur. Nec eant ad balneas, siue quocunque ire necesse fuerit, minus quam tres. Nec illa quæ habet aliquo eundi necessitatem, cum quibus ipsa voluerit, sed cum quibus Præposita iusserit, ire debet.

XIII. Egrotantium cura, siue post ægritudinem reficiendarum, siue aliqua imbecillitate etiam siue febribus laborantium, alicui debet iniungi; ut ipsa de cellario petat, quod cuique opus esse perspexerit. Siue autem quæ cellario, siue quæ vestibis, siue quæ codicibus præponuntur, sine murmure seruiant sororibus suis.

XIV. Codices certa hora singulis diebus petantur: extra horam quæ petuerint, non accipiant. Vestimenta vero & calceamenta, quando fuerint indigenti necessaria, dare non differant, sub quarum custodia sunt, quæ possuntur.

XV. Lites aut nullas habeatis; aut quam celerrimè finiat; ne ira crescat in odium, & iracundiam faciat de festuca, & animam faciat homicidam. Neque enim ad solos viros pertinet quod scriptum est: *Qui odit fratrem suum homicida est*: sed sexu masculino, quem primum Deus fecit etiam femineus præceptum sexus accepit. 1. Ioan. 3.

XVI. Quæcunque conuitio vel maledictio, vel etiam criminis obiectu alteram læserit, meminerit satisfactione quantocyus curare quod fecit; & illa quæ læsa est, sine disceptatione dimittere. Si autem inuicem se læserint, inuicem sibi debita relaxare debebunt; propter orationes vestras, quas ubique quanto crebriores habetis, tanto sanctiores habere debetis. Melior est autem quam quauis ira sapè tentatur, tamen impetare festinat, ut sibi dimittat, cui se fecisse agnoscit iniuriam, quamque tardius irascitur, & ad veniam petendam difficilior inclinatur.

XVII. Quæ non vult dimittere sorori, non speret accipere orationis effectum, quæ autem nunquam vult petere veniam, aut non ex animo petet, sine causa est in Monasterio, etiam si non inde proijciatur. Proinde vobis à verbis durioribus parcite, quæ si emissæ fuerint ex ore vestro, non pigeat ex ipso ore proferre medicamenta, ex quo facta sunt vulnera.

XVIII. Quando autem necessitas disciplinæ minoribus coercendis dicere vos verba dura compellit; si etiam in ipsis modum vos excessisse sentitis, non à vobis exigitur, vt ab eis veniam postuletis, ne apud eas, quas oportet esse subiectas, dum nimia seruetur humilitas, regendi frangatur auctoritas. Sed tamen petenda est venia ab omnium Domino, qui nouit etiam eas, quas plus iusto fortè corripitis, quanta beneuolentia diligatis.

XIX. Non autem carnalis, sed spiritualis inter vos debet esse dilectio. Nam quæ faciunt pudoris inmemores etiam feminis feminæ iocando tarpiter & ludendo, non solum à viduis & intactis ancillis Christi in sancto proposito constitutis; sed omnino nec à mulieribus nuptis, nec à virginibus sunt facienda nupturis.

XX. Præpositæ tanquam Matri obediatur, honore seruato, ne in illa offendantur Deus: multo magis Presbytero, qui omnium vestrum curam gerit, vt ergo cuncta ista seruentur; & si quid seruiant non fuerit, non negligenter prætereatur, sed emendandum corrigendumque curetur, ad Præpositam præcipuè pertinet; ita vt ad Presbyterum, qui vobis intendit, referat quod modum vel vires eius excedit.

XXI. Ipsa vero non se existimet potestate dominante, sed caritate seruiente felicem. Honore coram hominibus prælata sit vobis, coram Deo substrata sit pedibus vestris.

Tim. 2.

XXII. Circà omnes seipsam bonorum operum præbeat exemplum. Corripiat inquietas, consoletur pusillanimes, suscipiat infirmas, patiens sit ad omnes; disciplinam libens habeat, metuens imponat. Et quamuis vtrumque sit necessarium, tamen plus à vobis amari appetat, quam timeri; semper cogitans Deo se pro vobis reddituram esse rationem. Vnde magis obediendo, non solum vestri, verum etiam ipsius miseremini; quæ inter vos quanto in loco superiore, tanto in periculo maiori versatur.

XXIII. Donet Dominus vt obseruetis hæc omnia cum dilectione, tanquam spiritualis pulchritudinis amatrices, & bono Christi odore de bona conuersatione fragrantés, non sicut ancillæ sub lege, sed sicut liberæ sub gratia constitutæ.

XXIV. Vt autem in hoc libello tanquam in speculo vos possitis inspicere, ne per obliuionem aliquid negligatis, semel in septimana vobis legatur: & vbi vos inueneritis ea quæ scripta sunt facientes, agite gratias Domino bonorum omnium largitori, vbi autem sibi quæcunque vestrum videt deesse aliquid, debeat de præterito, caneat de futuro, orans vt debitum dimittatur, & in tentationem non inducatur. Amen.



S. CÆSARII  
ARELATENSIS EPISCOPI  
REGVLA AD VIRGINES.

DE S. CÆSARIO EIVSQUE REGVLA  
veterum testimonia.

MARTYROLOGIVM Rôm. die xxv. Aug.

*Arelate depositio Sancti Casarij Episcopi, mira sanctitatis & pietatis viri.*

GENNADIUS ill. Eccl. script. Cap. LXXXVI.

*Casarius Arelatensis verbi Episcopus, vir sanctitate & virtute celebris, scripsit egregia, & grata valde, & Monachis necessaria opuscula, &c. floruit Anastasio Republicam gubernante.*

CYPRIVS lib. I. de vita S. Casarij.

*Inter hæc autem præcipuum illud Monasterium quod sorori suæ condere ceperat, instar prioris instauravit; & quasi alter quidem nostri temporis Noë, propter tempestates & procellas in latere Ecclesiæ feminarum extruxit Cenobium, tanquam arcam; euocataque è Massiliensi Cenobio venerabili sorore sua Casaria, quam idcirco eo miserat, ut disceret quod doceret; & primus esset discipula, quam magistra; in præparata domicilia cum duabus aut tribus sodalibus introduxit. Confluxerunt autem ad illam multe virginum cateræ, rebus suis & facultatibus, atque ipsis etiam dulcissimis parentibus renuntiantes. Erant autem illo loco adeo ingesse, ut usque ad supremum vitæ diem nulli earum fas esset extra Monasterij ostium progredi.*

IDEM lib. II. sub finem.

*Interea crescit usque exitus Israël de terra Egypti, id est, animæ sanctæ de hoc mundo corporalis vitæ migratio, iubet ergo se in Monasterio Virginum, quod ipse fundauerat, sella famulantium manu gestari, quasi consolaturus anxias, quibus suspitio transitus sui abstulerat somnum, & cibum obliuio. Alloquitur itaque primam quasi mare & dulcedine sua ducentarum puellarum venerabilem Casariam matrem, & consolatur, atque ad palmam tendere supernæ vocationis hortatur, & ut teneant Regulam, quam ipse ante aliquot annos instituerat, mouet.*

GREGORIUS Tur. Hist. Franc. l. ix. Cap. xxxix. In Epistola Euphronij, Prætextati, & aliorum Episcoporum ad Radegundim Reginam.

*Specialiter definimus, si qua de locis sacerdotaliter nostra gubernationi Domino providente commissis in Pictava ciuitate vestro Monasterio meruerit sociari, secundum beata memoria Domini Casarii Arelatensis Episcopi constituta, nulli sit ulterius discedendi licentia; qua, sicut continet Regula, voluntate prodita videtur ingressa: ne vnius turpi dedecore ducatur in crimen, quod apud omnes emicat in honore.*

Ibidem Cap. XL.

*Post hæc cum Pontificis sui sæpius gratiam quæreretur (Radegundis,) nec posset adipisci, necessitate commota cum Abbatissa sua, quam instituerat, Arelatensem urbem expetunt: de qua Regula Sancti Casarii atque Casaria beata suscepta, Regis se tuitione munierunt.*

Ibid Cap. XLII. in Epist. B. Radegundis ad Episcopos.

*Insuper congregationi per me Christo præstante collecta Regulam sub qua sancta Casaria degit, quam sollicitudo B. Casarii Antistitis Arelatensis ex institutione sanctorum Patrum conuenienter collegit, adsciu.*

VENANTIVS lib. VIII. Carm. I. de S. Radegundi.


*Regula Casarii linea nota tibi est.*

Idem Carm. 4.

*Concipiente fidem Christi Radegundis amore,*

*Casarii lambit Regula quicquid habet.*

Meminit quoque huius Regulæ S. Donatus Afer in præfatione suæ collectionis, & S. Benedictus Anianæ Abbas in concordia Regularum.



# INCIPIT PROLOGVS

## SANCTI CÆSARII EPISCOPI

### AD VIRGINES.

*Sanctis & plurimum in Christo venerandis Sororibus in Monasterio quod Deo inspirante & iuuante condidimus, constitutis*

*CÆSARIUS EPISCOPVS.*



**Q**UIA nobis Dominus pro sua misericordia inspirante, & adiuuante dignatus est, vt vobis Monasterium conderemus; quomodo in ipso Monasterio vivere debeatis secundum statuta antiquorum Patrum, monita vobis spiritualia ac sancta condidimus: quæ Deo adiuuante custodire possitis. Iugiter in Monasterij cellula residentes visitationem Filij Dei assiduus orationibus implorate; vt postea cum fiducia pos-

fitis dicere; *Inuenimus quem quæsiuit anima nostra.* Et ideo vos sacras Cant. j.  
 Virgines, & Deo deditas animas rogo, quæ incensis lampadibus cum se-  
 cura conscientia Domini præstolatis aduentum, ut quia tunc pro constituen-  
 do vobis Monasterio laborasse cognoscitis, vestri me itineris socium fieri  
 sanctis orationibus postuletis, ut cum in regno cum sanctis ac sapientibus  
 virginibus feliciter introibitis, me cum stultis non emanere foris vestro  
 suffragio obtineatis: orante pro me sanctimonia vestra, ut inter pretiosissi-  
 mas Ecclesiæ gemmas micantem fauor diuinus & præsentibus repleat bonis,  
 & dignum reddat æternis.

## INCIPIUNT CAPITVLA.

1. *Imprimis obseruandum est, ut de Monasterio usque ad mortem suam nulla egrediat.*
2. *A maledicto & iuramento abstineant.*
3. *De habitu mutando, & obedientia exhibenda.*
4. *Ut nihil ex his quæ secum exhibuit sibi reseruet, nec per seipsam elemosynas faciat.*
5. *Ut nulla infantula nisi à sexto anno excipiat.*
6. *Ut vnaquæque non quod ipsa voluerit, sed quod ei iussu fuerit, operetur.*
7. *Ut nemo cellulam peculiarem habeat.*
8. *Ut dum psallitur, nemo loquatur.*
9. *Nemo filiam cuiuscunque de fonte suscipiat.*
10. *Ut signo tacto nulla tardius veniat.*
11. *Qualis debet esse ancilla Dei dum castigatur.*
12. *Qualiter se debeat, quæ aliquid negligenter egerit, humiliare.*
13. *In vigiliis studendum ut nemo dormiat.*
14. *Ut in lanificiis faciendum suum pensum quotidianum accipiat.*
15. *Ut nemo sibi aliquid proprium iudicet.*
16. *Matri & Præpositæ obediendum: ad mensam penitus non loquen- dum.*
17. *Ut omni tempore duabus horis lectioni vacent.*
18. *Ut sedentes ad opera, aut meditentur, quæ sancta sunt, aut ta- ceant.*
19. *Ut quæ nobiles sunt, de diuitiis vel parentum nobilitate non extol- lantur.*
20. *Ut dum psallitur quod sonat in ore, hoc teneatur in corde.*
21. *De custodia oculorum.*
22. *Ut peccatum alterius non celetur.*
23. *Nihil occultè accipiendum.*
24. *Qualiter distinguere debeant, quæ aut furtum fecerint, aut iniicem sibi manum miserint.*
25. *Ut sollicitudine Præpositæ vestimenta fiant: à Matre dispensentur.*

26. *Vt in vna cellula vestimenta sanctarum Sanctimonialium rependantur.*
27. *Vt nemo sibi proprium aliquid operetur.*
28. *Qualis vel qualiter Celleraria debeat ordinari.*
29. *Qualiter balneo debeant vii.*
30. *Qualis in cella infirmarum Præposita esse debeat, & qualiter cellarium sequestratum ipse infirmæ habeant.*
31. *Qualiter distringi debeat hæc, quæ aut conuictis, aut maledictis, aut quibuscunque criminibus læserit sorores suas.*
32. *Qualiter agere debeat Abbatiſſa.*
33. *Qualiter Prouisorum Monasterij intra Monasterium debeant introire.*
34. *Vt viri aut mulieres seculares in Monasterium non introiant.*
35. *Quomodo Abbatiſſa in saluatorium procedere debeat.*
36. *Vt conuiuium in Monasterio nulli fiat, nisi de aliis aut locis, aut ciuitatibus venientibus religiosis feminis.*
37. *Qualiter ancilla Dei suos parentes debeat salutare.*
38. *Vt Abbatiſſa nunquam nisi infirmitate faciente extra congregationem manduces.*
39. *Admonitio vel contestatio qualiter Abbatiſſa, Præposita, vel Celleraria infirmis debeat obtemperare.*
40. *Vt ancilla Dei nihil à parentibus transmissum sine consilio Abbatiſſe suscipiant: quod plus fuerit quam opus est, illis quæ indigent ministrentur.*
41. *Qualiter tinctura fiat: vel lectualia qualia habere debeant.*
42. *De plumariis, & ornatu monasterij.*
43. *Contestatio ac recapitulatio, vt nihil de institutione minuat.*

Expliciunt Capitula,

## REGVLA S. CÆSARII.



VIA multa in Monasteriis puellarum aut Monachorum instituta distare videntur, elegimus pauca de pluribus, quibus seniores cum iunioribus regulariter viuant, & spiritualiter implere contendant, quod specialiter suo sexui aptum esse perspexerint; hæc sanctis animabus vestris prima conueniunt.

I. Si quæ relictis parentibus suis sæculo renunciare, & sanctum ouile voluerit introire, vt spiritualium luporum fauces Deo adiuuante possit euadere, vsque ad mortem suam de Monasterio non egrediatur, nec de Basilica, vbi ostium esse videtur.



II. Iuramentum & maledictum, velut venenum diaboli, fugere & vitare contendant.

III. Ei ergo quæ Deo inspirante conuertitur, non licebit statim habitum religionis assumere, nisi antea in multis experimentis fuerit voluntas illius approbata: sed vni ex senioribus tradita annum integrum in eo, quo venit, habitu perseueret. De ipso tamen habitu mutando, vel lecto in schola habendo, sit in potestate Prioris; & quomodo personam vel compunctionem viderit, ita vel celerius, vel tardius studeat temperare.

IV. Quæ autem viduæ, aut matris relictis, aut mutatis vestibus ad Monasterium veniunt, non excipiantur, nisi antea de omni facultatula sua, qui voluerint, chartas, aut donationes, aut venditiones faciant: ita vt nihil suæ potestati, quod peculiariter aut ordinare, aut possidere videantur, reseruent; propter illud Domini: *Si vis perfectus esse, vende omnia quæ possides. Et, Si quis non reliquerit omnia, & se-* Matt. 19.  
Luc. 14.  
*cutus me fuerit, meus non potest esse discipulus.* Hoc ideo dico, venerabiles filiæ, quia sanctimoniales quæ possessionem habuerint, perfectionem habere non poterunt. Quam rem etiam illæ, quæ Virgines conuertuntur, si implere noluerint, aut non recipiantur, aut certe vestimenta religiosa non permitrantur accipere, donec se ab omnibus impedimentis mundi istius liberas fecerint. Illæ vero quæ adhuc viuus parentibus substantiam suam in potestatem habere non possunt, aut adhuc minoris ætatis sunt, chartas tunc facere compellantur, quando res parentum in potestate habere potuerint, aut ad legitimam ætatem peruenierint. Ideo hoc sanctis animabus vestris præcipimus, timentes exemplum Ananiz & Saphiræ, qui cum totum se dixissent Apostolis obtulisse, partem obtulerunt, partem sibi infideliter reseruauerunt, quod fieri nec decet, nec licet, nec expedit. Ancillam propriam nulli, nec etiam Abbatissæ, liceat in seruitio suo habere; sed si opus habuerit, de iunioribus in solatium suum accipiat. Act. 5.

V. Et si fieri potest, aut difficile, aut nulla vnquam in Monasterio infantula paruula, nisi ab annis sex aut septem, quæ iam & literas discere, & obedientiæ possit obtemperare, suscipiatur. Nobilium filiæ siue ignobilium, ad nutriendam aut docendum, penitus non accipiantur.

VI. Nemo sibi aliquid operis vel artificij pro suo libitu eligat faciendum: sed in arbitrio Senioris erit, quod utile prospexerit imperandum.

VII. Nulli liceat semotam eligere mansionem; nec habebit cubiculum, vel armorium, aut aliquid huiusmodi, quod peculiariter claudi possit: sed omnes diuisis lectulis in vna maneant cellula. Quæ vero senes sunt & infirmæ, ita illis conuenit obtemperari, vel ordinari; vt non singulæ singulas cellas habeant, sed in vna recipiantur omnes, vbi & maneant.

VIII. Nunquam altiori voce loquantur, secundum illud Apostoli:

Eph. 4.

*Omnis clamor tollatur à vobis.* Similiter dum psallitur, fabulari omnino vel operari non liceat.

IX. Nulla cuiuslibet filiam in baptismum, neque diuitis, neque pauperis, præsumat accipere.

X. Quæ signo tacto tardius ad opus Dei, vel ad opera venerit, increpationi, vt dignum est, subiacebit. Quod si secundo aut tertio admonita emendare noluerit, à communione, vel à conuiuio separetur.

XI. Quæ pro qualibet culpa admonetur, castigatur, corripitur, arguenti respondere penitus non præsumat, quæ aliquid ex iis quæ iubentur implere noluerit, à communione orationis, vel à mensa, secundum qualitatem culpæ, sequestrabitur.

XII. Quæ coquent singuli illis meri pro labore addantur. In omni ministerio, corporali tamen, in coquina, vel quidquid quotidianus exigit vsus, vicibus sibi, excepta Matre vel Præposita, succedere debent.

XIII. In vigiliis, vt nemo per otium somno grauetur, ea opera fiat quæ mentem non retrahat à lectionis auditu. Si qua grauetur somno, aliis sedentibus iubeatur stare, vt possit à se somni marcorem repellere: ne in opere Dei aut trepida inueniatur, aut negligens.

XIV. In ipsis lanificiis faciendum pensum suum quotidianum cum humilitate accipiant, & cum grandi industria implere contendant.

XV. Nemo sibi aliquid iudicet proprium, siue in vestimento, siue in quacumque alia re.

Phil. 2.

XVI. Nemo cum murmuratione aliquid faciat, ne simili iudicio pereat murmuratorum; secundum illud Apostoli: *Omnia facite sine murmurationibus.* Matri post Deum omnes obediunt: Præpositæ deferant. Sedentes ad mensam taceant, & animum lectioni intendant. Cum autem lectio cessauerit, meditatio sancta de corde non cesset. Si vero aliquid opus fuerit, quæ mensæ præest sollicitudinem gerat, & quod est necessarium nutu magis quam voce petat. Nec solæ vobis fauces sumant cibum, sed & aures audiant Dei verbum.

XVII. Omnes literas discant; omni tempore duabus horis, hoc est à mane vsque ad horam secundam, lectioni vacent.

2. Thes. 3.  
1. Cor. 10.

XVIII. Reliquo vero dici spatio faciant opera sua, & non se fabulis occupent: propter illud Apostoli: *Cum silentio operantes;* Et illud: *In multiloquio non effugies peccatum.* Et ideo hoc vobis omnino loquendum est, quod ad ædificationem, vel vtilitatem animæ pertinet. Cum autem necessitas operis exegerit, tunc loquantur. Reliquis vero in vnum operantibus, vna de fororibus vsque ad tertiam legat, de reliquo meditatio verbi Dei & oratio de corde non cesset. Sit vobis anima vna & cor vnum in Domino, sint vobis omnia communia; sic enim legitis in Actibus Apostolorum, *Quia erant illis omnia communia; & distribuebatur unicuique sicut cuique opus erat.*

A. 4.

XIX. Quæ aliquid habebant in sæculo, quando ingrediuntur Monasterium,



rium, humiliter illud offerent Matri, communibus vſibus profuturum. Quæ autem non habuerunt, non ea quærant in Monasterio, quæ nec foris habere potuerunt. Illæ vero, quæ aliquid videbantur habere in ſæculo, non faſtidiunt ſorores ſuas, quæ ad illam ſanctam ſocietatem ex paupertate venerunt: nec ſic de ſuis diuitiis ſuperbiant, quas Monasterio obtulerunt, quomodo ſi eis in ſæculo fruenterent. Quid prodeſt diſpergere, & dando pauperibus pauperem fieri, ſi miſera anima diabolica inſletur ſuperbia? Omnes ergo vnanimiter & concorditer viuite; & honorate in vobis inuicem Deum, cuius templa eſſe meruiſtis. Orationibus ſine intermiſſione inſiſtite, ſecundum illud Euangelij: *Orantes in omni tempore*, vt Luc. 21. *digni habeamini*. Et Apoſtolus; *Sine intermiſſione orate*. 1. Theſ. 5.

XX. Cum vero pſalmis & hymnis oratis Deum, id verſetur in corde, quod proferetur in voce. Quodcumque operis feceritis, quando lectio non legitur, de diuinis ſcripturis ſemper aliquid ruminare. Egrotantes vero ſic tractandæ ſunt, vt citius conualeſcant: ſed cum vires priſtinas reparauerint, redeant ad feliciorẽ abſtinentiæ conſuetudinem. Non ſit notabilis habitus veſter; nec affectetis veſtibus placere, ſed moribus, quod veſtrum decet propoſitum.

XXI. Nulla in vobis concupiſcentia oculorum cuiuſcumque viri diabolò inſtigante conſurgat: nec dicatis vos animos habere pudicos, ſi oculus impudici cordis eſt nuntius. Nec putare debet, quæ in virum non ſimpliciter conuertit aſpectum, ab aliis ſe non videri, cum hæc facit: videtur omnino à quibus ſe videri non arbitrat. Sed ecce lateat, vt à nemine hominum videatur; quid faciet de illo ſuperno inſpectore, cui latere omnino non poteſt? Timeat ergo diſplicere Deo, cogitet ne malè placeat viro. Quando ergo ſimul ſtatis, ſi aut Prouiſor Monasterij, aut aliquis cum eo virorum ſuperuenerint, inuicem veſtram pudicitiam cuſtodite. Deus enim qui habitat in vobis, etiam iſto voſ modo cuſtodiet.

XXII. Si quam vero liberius, quam decet, agere videritis, ſecretius corripite, vt ſororem; ſi audire neglexerit, Matri in notitiam ponite, nec vos iudicet eſſe maleuolas quando hoc ſancto animo indicatis: magis enim nocentes eſtis, & peccati ipſius participes vos faciſtis, ſi ſororem veſtram, quam caſtigando corrigere potuiſtis, tacendo perire permitatis. Si enim vulnus haberet in corpore, & eſſet à ſerpente percuſſa, & veller hoc occultare, dum timet ſecari, nonne crudeliter hoc taceretur, miſericorditer proderetur? quanto ergo & magis conſilia diaboli, & inſidias illius manifeſtare debetis, ne in decretis vulnus peccati augeatur in corde, ne concupiſcentiæ malum diutius nutriatur in pectore: Et hoc facite cum dilectione ſororum, & odio vitiorum.

XXIII. Quæcumque autem, quod Deus non patiat, in tantum progreſſa fuerit malum, vt occultè ab aliquo literas, aut qualibet mandata, aut muſcula accipiar; ſi hoc vltro conſeſſa fuerit, indulgentiam mereatur, & oretur pro ea; ſi autem celans proditor, vel conuincitur, ſecundum ſtatuta Monasterij grauius emendetur. Simili etiam diſtinctioni ſub-

iaceat, si vel ipsa cuicumque literas, aut munuscula transnittere sacrilego auiu præsumperit; pro affectu tamen parentum, aut cuiuscumque notitia, si aliqua transnittere voluerit eulogiam panis, Matri suggerat: & si ipsa permiserit, per Posticiarias det, & ipsæ nonine illius transmittant, cui voluerit: ipsa sine Præposita, aut Posticiaria per se non præsumat nec dare, nec accipere quidquam.

XXIV. Et quamuis non solum cogitari, sed omnino credi nec debeat, quod sanctæ Virgines duris se sermonibus, vel conuiciis mordeant; tamen si fortè, vt se habet humana fragilitas, in tantum nefas aliquæ de fororibus ausæ fuerint diabolo instigante prorumpere, vt aut furtum faciant, aut in se inuicem manus mittant, iustum est, vt legitimam disciplinam accipiant, à quibus Regulæ instituta violantur. Necessè est enim, vt in eis impleatur illud, quod de indisciplinatis filiis per Salomonem prædixit Spiritus sanctus: *Qui diligit filium suum asiduatur illi flagellum*: Et iterum: *Tu virga cum cædis, animam eius de inferno liberabis*. Disciplinam ipsam in præsentia Congregationis accipiant, secundum illud Apostoli: *Peccantes coram omnibus corripe*.

Ecclef. 30.

Pro. 23.

1. Tim. 5.

XXV. Et quia Monasterij Mater necessè habet pro animarum salute sollicitudinem gerere, & de substantiola Monasterij, quod ad victum corporis opus est, iugiter cogitare, salutantibus etiam affectum impendere, & Epistolis quorumcumque fidelium respondere; omnis lanificij cura, vnde vestimenta sanctis Sororibus ministrentur, ad sollicitudinem Præpositæ vel Lanipendix pertinebit. Per quarum industriam ita fideliter, cum zelo & amore Dei, vestimenta quæcumque sunt necessaria præparentur, vt quotiescumque sanctis Sororibus opus fuerit, cum sancta discretione dispense.

XXVI. Quæ tamen vestimenta cum tanta industria in Monasterio fiant, vt ea nunquam necessè sit Abbatisæ extra Monasterium comparare. Et non ad vos pertineat quale vobis indumentum pro temporis congruentia proferatur. Si autem hinc inter vos contentiones & murmura oriuntur, si aliquæ ex vobis minus fortè dignum aliquod acceperint, quam prius habuerint; hinc vos probate, quantum vobis desit in illo interiori sancto habitu cordis, quæ habitu corporis murmuratis. Si vestra tolerat infirmitas, vt ampliùs quam victus quotidianus exigit habeatis, in vno tamen loco sub communi custode quod habueritis reponite, & clauis de arcellis, vel pressoriolis vestris Registoria teneat.

XXVII. Nulla sibi aliquid proprium operetur, nisi cui Abbatisa præceperit, aut permiserit: sed omnia opera vestra in commune fiant, tam sancto studio & fementè alacritate, quomodo si vobis propria faceretis.

XXVIII. Ad cellarium, & ad posticium, vel lanipendium tales à Seniore eligantur, non quæ voluntates aliquarum, sed necessitates omnium cum timore Dei considerent, & ideo quidquid ad manducandum vel bibendum pertinet, nulla de sororibus præsumat circa lectum suum reponere, aut habere. Quæcumque autem hoc fecerit, grauissimam districtio-

nem sustineat. Ante omnia coram Deo & Angelis eius obtestor, vt nulla de sororibus vinum occultè aut emat, aut vnde cumque transmissum accipiat: sed si transmissum fuerit, præsentè Abbatisa vel Præposita, Postliciaræ accipiant, & Canauariæ tradant; & per ipsius dispensationem, secundum institutionem Regulæ, illi cui transmissum est, quomodo infirmitati suæ conuenit, ita dispensetur. Et quia solet fieri, vt cella Monasterij non semper bonum vinum habeat, ad sanctæ Abbatisæ curam pertinebit, vt tale vinum prouideat, vnde aut infirmæ, aut illæ quæ sunt delicatius nutritæ, palpentur.

XXIX. Lauacra etiam, cuius infirmitas exposcit, minimè denegentur: sed fiat sine murmuratione de consilio Medicinæ; ita vt etsi lauare noller illa quæ infirma est, iubente Seniore fiat quod opus fuerit pro salute. Si autem nulla infirmitate compellitur, cupiditati suæ non præbeatur assensus. XXX. Ægrotantium cura siue aliqua imbecillitate laborantium vniuersis fidei & compunctæ debet iniungi, quæ de cellario petat quodcumque opus esse perspexerit: & talis eligi debet, quæ & Monasterialem rigorem custodiat, & infirmis cum pietate deferuiat. Et si hoc necessitas infirmarum exegerit, & Matri Monasterij iustum visum fuerit, etiam cellariolum & coquinam suam infirmæ communem habeant. Quæ cellario siuè canauæ, siue vestibus, vel codicibus, aut posticio, vel lanipendio præponuntur, super Euangelium clauas accipiant, & sine murmuratione seruiant reliquis. Si quæ vero vestimenta, calceamenta, vtenilia negligenter expendenda vel custodienda putarint, tanquam interuersores rerum Monasterialium seuerius corrigantur.

XXXI. Lites nullas habeatis, secundum illud Apostoli: *Seruum Dei non oportet litigare*; & illud: *abstine te à lite, & minues peccata*, aut si fuerint, *Eccles. 28.* quàm celerius finiantur; ne ira crescat in odium, & festuca crescat in trabem, & efficiatur anima homicida, sic enim legitis; *Qui odit fratrem suum homicida est.* Et, *levantes sanctas manus, sine ira & disceptatione.* Quæ *1. Ioan. 3.* cumque conuicio vel maledicto, vel etiam criminis obiectu læserit sororem suam, meminerit culpam satisfactione purgare; quod vitium si iteratè præsumpserit, distictione seuerissima feriatur, vsquequo per satisfactionem recipi mereatur. Iuniores præcipuè senioribus deferant. Si qua verò pro quacumque re excommunicata fuerit, remota à Congregatione in loco, quo Abbatisa iusserit, cum vna de spiritualibus sororibus resideat, quousque humiliter pœnitendo indulgentiam accipiat. Si autem, vt fieri solet stimulantè diabolo, inuicem se læserint, inuicem sibi veniam petere, & debita relaxare debebunt, propter orationes, quas vtiq; quanto crebriores, tanto puriores habere debent. Quod si illa cui venia petitur indulgere sorori suæ noluerit, à communione remoueat, & timeat illud: *Quod si non dimiserit, non dimittetur ei.* Quæ autem nunquam vult *Matt. 6.* petere veniam, aut non ex animo petit; aut cui petitur, si non dimittit, sine causa in Monasterio esse videtur. Proinde vobis à verbis duriusculis parcite: quæ si admissa fuerint, non pigeat ex ipso ore proferre medicamen-

ta, unde facta sunt vulnera. Quando autem vos, quæ Præpositæ estis, necessitas disciplinæ pro malis moribus coercendis dicere verba dura compellit, si etiam in ipsis modum vos excessisse fortasse sentitis, non à vobis exigitur vt veniam postuletis; ne apud eas quas oportet esse subiectas, dum nimium seruatur humilitas, regendi frangatur auctoritas. Sed tamen petenda est venia ab omnium Domino, qui nouit etiam quas plus iuste corripitis, quanta beneuolentia diligatis.

Tit. 2.

XXXII. Matri quæ omnium vestrum curam gerit, & Præpositæ, sine murmuratione obediatis, ne in illis caritas contristetur. Ipsæ vero quæ vobis præsunt, cum caritate & vera pietate discretionem & Regulam studeant custodire. Circa omnes seipsas bonorum operum præbeant exemplum: corripiant inquietas, consolentur pusillanimes, sustineant infirmas; sæpe cogitantes Deo se pro vobis reddituras esse rationem; unde & vos magis sanctè obediendo, non solum vestri, sed etiam ipsarum miseremini: quia inter vos quanto ordine superiores esse videntur, tanto in periculo maiori versantur. Pro qua re non solum Matri, sed & Præpositæ, primiceriæ, vel primariæ cum reuerentiâ humiliter obedite.

XXXIII. Ante omnia propter custodiendam famam vestram nullus virorum in secreta parte in Monasterio, & in oratorijs introeat, exceptis Episcopis, Prouisorie, & Presbytero, Diacono, Subdiacono, & vno vel duobus lectoribus, quos & ætas & vita commendat, qui aliquoties missas facere debeant. Cum vero aut tecta restauranda sunt, aut ostia vel fenestræ sunt componendæ, aut aliquid huiusmodi reparandum, artifices tantum & serui ad operandum aliquid, si necessitas exegerit, cum Prouisore introeant: sed nec ipsi sine scientia aut permissu Matris. Ipse vero Prouisor interiore partem Monasterij, nisi pro iis vtilitatibus, quas superius comprehendimus, nunquam introeat; & aut nunquam, aut difficilè, sine Abbatisa, aut alia honestissima teste: vt secretum suum sancta, sicut decet & expedit, habeant.

XXXIV. Matronæ etiam seculares, vel puellæ, seu reliquæ mulieres, aut viri adhuc in habitu laico, similiter introire prohibeantur.

XXXV. Observandum est, ne Abbatisa ad salutantes in saluatorium sine digno honore suo, hoc est, sine duobus aut tribus sororibus, procedat. Episcopi, Abbates, vel reliqui Religiosi, quos magna vita commendat, si petierint, debent ad orationem in Oratorium introire. Observandum est etiam, vt ianua Monasterij opportunis horis salutantibus pateat.

XXXVI. Conuiuium etiam his personis, hoc est, Episcopis, Abbatibus, Monachis, Clericis, secularibus viris, mulieribus in habitu seculari, nec Abbatissæ parentibus, nec aliqua Sanctimonialis vnquam, nec in Monasterio, vel extra Monasterium præparetis: sed nec Episcopo huius ciuitatis, nec Prouisori quidem ipsius Monasterij conuiuium fiat. De ciuitate vero nec religiosæ femine, nisi fortè sint magnæ conuersationis, & quæ Monasterium satis honorent: & hoc rarissimè fiat. Si

qua tamen de alia ciuitate ad requirendam filiam suam, aut ad visitandum Monasterium venerit, si Religiosa est, & Abbatissæ visum fuerit, debet ad conuiuium vocari, reliquæ penitus numquam, quia sanctæ Virgines & Deo deuotæ magis Christo vacantes pro vniuerso populo debent orare, quam corporalia conuiuia præparare.

XXXVII. Si quis verò germanam suam, vel filiam, aut quamlibet parentem, aut sibi cognitam videre voluerit, præsentè Formaria, vel qualibet seniore, ei conloqui non negetur.

XXXVIII. Abbatissa, nisi inæqualitate aliqua aut infirmitate, vel occupatione compellente, extra congregationem penitus non reficiatur.

XXXIX. Illud ante omnia te, sancta Mater, & te venerabilis quæcumque fueris Præposita, etiam cuiusque cura committenda est infirmarum; Primiceria etiam, vel Formaria, admoneo & contestor, vt vigilantissimè consideretis, vt si sunt aliquæ de sororibus, quæ pro eo quod aut delicatius nutritæ sunt, aut defectionem forsitan stomachi frequentius patiuntur, & si quæ reliquæ abstinere non possunt, aut certè cum grandi labore ieiunant, si illæ propter verecundiam petere non præsumunt, vos eis iubeatis à Cellariis dari, & ipsis vt accipiant ordinetis. Et certissimè confidant, quicquid dispensante aut iubente Seniore qualibet hora percipient, in illa repausatione Christum accipient. Cellaria vero, & illa quæ infirmis seruitura est, super omnem sollicitudinem cura illis & diligentia infirmarum coram Deo & angelis eius denuntietur. Hoc etiam moneo, vt propter nimiam inquietudinem ad ianuam Monasterij quotidianæ vel assiduæ elemosynæ non fiant; sed quod Deus dedit vt possit vltibus Monasterij remanere, Abbatissa per Prouisorem ordinet pauperibus dispensari.

XL. Ante omnia obseruandum est, vt si suæ filiæ aliquis vel aliqua necessitudine ad se pertinenti, vestimenta, vel aliquid aliud dederit, siue transmiserit, non occultè accipiantur: pro qua re omnes quæ ad posticum obseruauerint, contestor coram Deo & angelis eius, vt nihil de Monasterio permittant dari, vel à foris in Monasterio acquiescant excipi, contra conscientiam, vel consilium Abbatissæ: tamen si Abbatissa, vt adsolet, cum saluatoribus occupata fuerit, Posticiaræ præpositæ ostendant quodcunque exhibitum fuerit. Quam rem si implere neglexerint, & illæ Posticiaræ, quæ permittunt, & illæ quæ excipiunt, non solum distractionem Monasterij grauissimam sustinebunt: sed propter transgressionem sanctæ Regulæ causam se mecum ante Deum nouerint esse dicturas. Ipsum vero quod transmissum fuerit, si illi opus ad vsum suum fuerit, ipsa habeat: si vero illa nihil indiget, in commune redactum cui est necessarium præbeatur: propter illud Domini mandatum: *Qui habet duas tunicas det non habenti.* Indumenta vero ipsa cum noua accipiunt, si vetera necessaria non habuerint, Abbatissæ resuadant, pauperibus aut incipientibus, vel iunioribus dispensanda. Omnia vero indumenta simplici tantum & honesto colore habeant, nunquam nigra, non

Luc. 3.

lucida, sed tantum laia, vel lactina, in Monasterio per industriam Præpositæ, vel solitudinem Lanipendæ fiant, & à Matre Monasterij, quomodo cuiusque rationabiliter necesse fuerit, dispensentur.

XLI. Tinctura in Monasterio nulla alia fiat, nisi vt supra dictum est, laia, & lactina: quia aliud humilitati virginum non oportet. Lectualia vero ipsa simplicia sint; nam satis indecorum est, si in lecto religioso stragula secularia, aut tapetia picta resplendant. Argentum in vsu vestro non habeatis, absque ministerio oratorij.

XLII. Plumaria & acupictura, & omne polymitum, vel stragula, siue ornaturæ, nunquam in Monasterio fiant. Ipsa etiam ornamenta in Monasterio simplicia esse debent, nunquam plumata, nunquam holoferica: & nihil aliud in ipsis, nisi cruces aut nigrae, aut lactinae tantum opere sarfurio de pannis aut linteis apponantur. Nam nec vela cerata appendi, nec tabulae pictæ affigi, nec in parietibus vel cameris vlla pictura fieri debet: quia in Monasterio quod non humanis sed spiritualibus tantum oculis placet, esse debet. Si vero aliqua ornamenta, vel à vobis, vel ab alio de fidelibus Monasterij collata fuerint, aut in vsibus Monasterij profutura vendantur, aut Sanctæ Mariæ Basilicæ, si necesse fuerit, deputentur. Acupictura nunquam nisi in mappulis, & facitergiis, in quibus Abbatissa iusserit, fiant. Nulla ex vobis, extra iussionem Abbatissæ, præsumat Clericorum, siue laicorum, vel parentum, nec cuiusque virorum siue mulierum extraneorum vestimenta, aut ad lauandum, aut ad consuendum, aut ad reponendum, aut ad tingendum accipere sine iussione Abbatissæ, ne per istam incautam & honestati inimicam familiaritatem fama Monasterij lædi possit. Quæcumque autem hoc obseruare noluerit, tanquam si crimen admiserit, ita distributione Monasterij feriat.

XLIII. Te vero sanctam & venerabilem Monasterij Matrem, & te Præpositam sanctæ congregationis coram Deo & angelis eius admoneo, & con-testor, vt nullius vnquam vel minæ, vel obloquutiones, vel blandimenta molliant animum vestrum, vt aliquid de sanctæ ac spiritualis Regulæ institutione minuaris. Credo tamen de Dei misericordia, quod non pro aliqua negligentia reatum incurrere, sed pro sancta & Deo placita obedientia ad æternam beatitudinem possitis feliciter peruenire.

## RECAPITVLATIO.



VM Deo propitio in exordio institutionis Monasterij vobis Regulam fecerimus, multis tamen postea vicibus ibi aliquid addidimus, vel minuius: pertractantes enim, & probantes quid implere possitis, hoc nunc definitiuimus, quod & rationi, & possibilitati, & sanctitati conueniebat. Quantum enim diligenti exper-tamento capere potuimus, ita Deo inspirante temperata est Regula ip-



sa, vt eam cum Dei adiutorio ad integrum custodire possitis, & ideo coram Deo & angelis eius contestamur, vt nihil ibi vltra mutetur, aut minuatur. Pro qua re quascumque schedas prius fecerimus, vacuas esse volumus: hanc vero, in qua manu mea Recapitulationem scripsi, sine vlla diminutione rogo & moneo, vt Deo adiutore fideliter ac feliciter impleatis; incessanter Dei adiutorium implorantes, ne vos venenoso consilio suo antiquus hostis impediatur, qui de ipso cæli fastigio sibi consentientes ad inferni profunda consuevit abstrahere. Vnde, sanctæ & venerabiles filiæ, moneo, vt omni virtute & vigilantissima sollicitudine suggestiones illius repellere studeatis; & sic cum Dei adiutorio *currite vt apprehendere valeatis*: quia non qui cœperit, sed qui *perseuerauerit vsque in finem, beatus erit*. Et licet credam quod ea quæ superius scripta sunt, sancta pietas vestra & semper memoriter teneat, & Christo auxiliante non solum fideliter, sed etiam feliciter implere contendat; tamen vt ea quæ constituimus sancto cordi vestro tenacius valeant inhærere, istam paruulam Recapitulationem, quam manu mea scripsi, fieri volumus: quam rogo, vt Deo inspirante & libenter accipere, & iugiter studeatis cum Dei adiutorio custodire.

2. Cor. 6.  
Mat. 14.

I. Hoc enim est quod specialiter absque vlla diminutione à vobis volumus obseruari; vt nulla ex vobis vsque ad mortem suam de Monasterio egredi, vel de ipsa basilica, in qua ianuam habetis, aut permittatur, aut per se ipsam præsumat exire.

II. Vt nulla cellam peculiarem habeat: vt familiaritatem, aut quamlibet societatem nec cum Religiosis, nec cum laicis, seu viris, seu mulieribus, secretam habeat.

III. Nec sola cum solo loqui vel momento temporis permittatur: nec vestimenta eorum ad lauandum, vel tingendum, aut ad custodiendum, vel consuendum accipiat, & sicut in ipsa Regula constituimus, nec quidquam ab intus occultè foris transmittere, aut à foris intus excipere audeat.

IV. Nulla aliquid proprium nec foris possideat, nec intus habeat, nec ad ordinationem suam aliquid reseruet: sed, sicut superius diximus, chartis cui voluerit factis, ab omni impedimento sit libera; propter illud quod Dominus ait: *Si quis non renunciauerit omnibus quæ possidet, non potest meus esse discipulus*. Et illud: *Si quis vult venire post me, abneget semetipsum sibi*.

Luc. 14.  
Mat. 16.

Qui semetipsum sibi iussus est abnegare, qua fronte præsumit sibi aliquid de impedimentis mundi istius reseruare? & non magis quod scriptum est contemnit, quia *impedimenta mundi fecerunt nos ineros*. Et illud Apostoli diligenter attendite: *Volo, inquit, vos sine sollicitudine esse*. Et hæc fideliter obseruans secunda conscientia dicat: *Mundus crucifixus est mihi & ego mundo*. Et illud: *Omnia arbitratus sum vt stercus, vt Christum lucrificarem*.

1. Cor. 7.  
Gal. 6.  
Phil. 3.

V. Conuiuium nec Episcopo istius ciuitatis, nec alterius, nec vlli virorum, sicut in hac Regula statuimus, præparetur.

VI. Epistolæ nullius hominum, etiam nec parentum, occultè accipiantur: aut sine permisso Abbatisſæ vlli qualescunque litteræ transmittantur.

VII. Moneo specialius, vt sicut iam diximus, vestimenta lucida, vel nigra, vel cum purpura, vel bebrina nunquam in vsu habeant, nisi tantum laia, & lactina. Capita nunquam altiori ligent, quam in hunc locum mensuram de incausto fecimus. Omnia opera in commune faciant.

VIII. Quæcumque ad conuersionem venerit, in salutorio ei frequentius Regula relegatur: & si prompta & libera voluntate professæ fuerit, se omnia Regulæ instituta complecturam, tandiu ibi sit, quamdiu Abbatisſæ iustum ac rationabile visum fuerit, si vero Regulam dixerit se non posse complere, penitus non excipitur.

IX. Ianua Monasterij nunquam extra Basilicam cum vestra voluntate, aut cum vestro permisso fiat: & vespertinis & nocturnis ac meridianis horis numquam pateat: ita tamen vt ipsis horis quando reficitur, clauēs apud se Abbatisſa habeat.

X. Ipsam tamen Abbatisſam sanctæ congregationis, cui nihil possidere licet, aut aliquid peculiare habere permittitur, Deo medio contestor, vt in quantum possibilitas fuerit, quæ necessaria sunt suis sororibus prouideat.

1. Tim. 2. XI. Plumariæ, & ornaturæ, & vestimenta purpurea, & omne polymittum nunquam in Monasterio fiat, propter illud apostoli: *Nemo militans Deo implicat se negotiis secularibus, vt ei placeat, cui se probauit.*

XII. Quoties sancta Abbatisſa ad Deum migrauerit, nulla ex vobis carnali affectu, aut pro natalibus, aut pro parentela aliquam minus efficacem fieri velit: sed omnes, Christo inspirante, vnanimiter sanctam spiritalem eligite, quæ & Regulam Monasterij possit efficaciter custodire, & superuenientibus responsum cum ædificatione & compunctione, & cum sancto affectu sapienter valeat reddere; vt omnes homines, qui vos cum grandi fide & reuerentia pro sui ædificatione expetunt, Deum vberius benedicant, & de vestra electione, & de illius quam eligitis conuersatione spiritualiter gratulentur.

1. Cor. 3. XIII. Et licet, sanctæ filiz & vnica mihi in Christo caritate venerabiles, de sanctæ pietatis vestræ obedientia sim securus; tamen pro paterna sollicitudine, quia vos Angelis desidero esse consimiles, iterum atque iterum rogo, & per omnipotentem Deum vos contestor, vt nihil de sanctæ Regulæ institutione minui permittratis, sed totis viribus eam custodiri auxiliante Domino laboretis: scientes quia *vnusquisque propriam mercedem accipiet secundum suum laborem.* Et hoc ante omnia rogo, vt admonitionem nostram non transitoriè accipiat sanctitas vestra: quia non ex nostra præsumptione loquimur: sed secundum quod in scripturis canonicis legitur, & antiquorum Patrum libris abundantissimè continetur, vos cum grandi affectu, & cum vera caritate salubriter admonemus, & quia



quia legitis, quod *qui vnum mandatum minimum neglexerit, minimus* Mat. 5.  
*vocetur in regno cælorum*, nolite humilitatis nostræ verba quasi minima  
 despiciere: propter illud quod scriptum est: *Qui vos spernit, me spernit.* Luc. 10.  
 Et illud: *Qui spernit modica, paulatim desinit.* Quomodo enim in quo- Eccl. 19.

cumque carnali certamine tantum vnusquisque abiectior erit, quantum  
 minor & infirmior persona superauerit; ita & in spiritali certamine in  
 eum qui negligens fuerit in minimis, implebitur illud quod scriptum est:  
*Qui vnuerſam legem seruaauerit, offendat autem in vno, factus est om-* Iac. 2.

*nium reus.* Hoc enim ego cum grandi non solum timore, sed etiam tre-  
 more cogitans, dum pauescit animus meus, ne vobis vel aliqua peccata  
 minuta subrepan, non solum admoneo, sed supplico pariter & contestor,  
 & cum grandi caritatis affectu adiuro; sic in illam æternam beatitudinem  
 ad consortium Angelorum, omniumque sanctorum sine confusione veni-  
 re simul, & cum sancta Maria vel cum omnibus reliquis virginibus coro-  
 nas gloriæ accipere, & cœlestem agnum sequi vos feliciter videre prome-  
 rear, vt toto corde & toto animo mandata superius comprehensa studea-  
 tis implere, per quæ ad æterna præmia possitis feliciter peruenire.

XIV. Illud etiam, quod non credo, nec Deus pro sua misericordia fieri  
 patietur, si quocunque tempore quælibet Abbatisſa de huius Regulæ in-  
 stitutione aliquid immutare aut relaxare tentauerit; vel pro parentela,  
 seu pro quolibet conditione subiectionem vel familiaritatem Pontificis  
 huius ciuitatis habere voluerit, Deo vobis inspirante, ex nostro permisso  
 in hac parte cum reuerentia & grauitate resistite, & hoc fieri nulla ra-  
 tione permittatis: sed secundum Sacram sanctissimi Papæ Urbis Romæ  
 vos auxiliante Domino munire in omnibus studete. Præcipue tamen de  
 infraſcripta Recapitulatione, quam manu mea scripsi atque subscripsi,  
 contestor, vt nihil penitus minuatur. Quæcunque enim Abbatisſa, aut  
 quælibet Præposita aliquid contra sanctæ Regulæ institutionem facere  
 reitauerint, nouerint se mecum ante tribunal Christi causam esse dictu-  
 ras. Et si forte, quod Deus non patiatur, fuerit aliqua de filiabus nostris  
 tam pertinax animo, quæ huius Regulæ recapitulationem, salubriter &  
 secundum institutionem sanctorum Patrum scriptam, implere contemnat,  
 à sanctæ congregationis vestræ conuentu eam accensæ zelo sancti Spiritus  
 remouere: & tandiu in cella saluatorij sit remota, quamdiu dignam pœni-  
 tentiam agens humiliter veniam petat; & donec ad Regulæ instituta se  
 corrigat, intus non regrediatur. Hæc ideo dicimus, quia timendum est,  
 ne dum vnus negligentia palpatur, & secundum Regulam non corrigi-  
 tur, alix, quæ proficere poterant, vitientur. Sed credimus de Dei mise-  
 ricordia, quod dum & vos sanctæ spiritualiter agitis, & eas quæ negli-  
 gentes sunt cum vera caritate corrigitis, feliciter ac pariter ad æterna præ-  
 mia veniatis, præſtante Domino nostro Iesu Christo, cui est honor & im-  
 perium in secula seculorum, Amen.

XV. Ieiunium à Pentecoste vsque ad Kalendas Septembris, quomodo  
 virtutem vel possibilitatem viderit Mater Monasterij, sic studeat tempe-

rare; à Kalendis Septembris vsque ad Kalendas Nouembris secunda, quarta, & sexta feria ieiunandum est. A Kalendis vero Nouembris vsque ad Natalem Domini, exceptis festiuitatibus vel sabbatho, omnibus diebus ieiunari oportet. Ante Epiphaniam ieiunandum septem diebus. Ab Epiphania verò vsque ad hebdomadam Quadragesimæ secunda, quarta, & sexta ieiunandum est. Natale Domini & Epiphania ab hora tertia noctis vsque ad lucem vigilandum est.

XVI. Ordinem etiam conuiuij huic Regulæ inferendum esse credidimus. Cibaria omnibus diebus in ieiunio tria, in prandio bina tantummodo præparentur. In festiuitatibus maioribus ad prandium & ad cœnam fercula addantur: & recedentibus de ea dulcesamina addenda sunt. Quotidianis vero diebus ad prandium in æstate binos caldellos, in hyeme ad prandium binos caldellos; ad refectiorem ternos caldellos accipient; ad cœnam vero bini caldelli sufficiant. Iuniores vero ad prandium, ad cœnam, ad refectiorem binos accipiant.

XVII. Pulli vero infirmis tantummodo præbeantur: nam in congregatione nunquam ministrantur. Carnes vero à nulla vnquam penitus in cibo sumantur. Si fortè aliqua in desperata infirmitate fuerit, iubente prouidente Abbatis accipiat.

XVIII. Vos tandem, piissimæ sorores, coram Domino Deo obtestor & deprecor, vt humilitati meæ, vel sanctarum Matrum vestrarum, id est, institutoribus Regulæ & Monasterij conditoribus, hanc in perpetuum gratiam referatis, vt pro nobis diebus ac noctibus intercessio vestræ caritatis inuigilet, publica oratione vel in diurnis solemnitatibus, vel in nocturnis excubiis deprecatio vestræ sanctitatis obtineat, vt ascendens ad conspectum Domini deprecatio vestra, dignum vel me Ecclesiæ suæ Pontificem, vel illas seruitio sanctarum Virginum constituat & concedat esse præpositas; & cum ante tribunal illius cæperimus creditorum talentorum reddere rationem, si quæ sunt culpæ vel negligentia, siue meæ erga curam Ecclesiæ, siue Matrum vestrarum erga sibi creditas, intercessu vestro Dominus nobis remittere, & culparum vulnera remissionis medicina sanare dignetur. Quia nec emendantur culpæ, nisi sanctorum orationibus ille remiserit; nec remittit, nisi fuerint emendatæ.

XIX. Et quia propter custodiam Monasterij aliqua ostia siue in veteri baptisterio, siue in schola, vel tetrino, aut in turri iuxta pomarium clausi atque damnaui, nullus illa vnquam sub qualibet utilitatis specie aperire præsumat: sed licet sanctæ Congregationi resistere, & quod sanæ vel quieti suæ incongruum esse cognoscunt, fieri non permittant.


*Postrema hæc duo capitula non sunt S. Casarij, sed postea ab alio ad Recapitulationem adiecta videntur ex Regula S. Benedicti.*

XX. Celleraria Monasterij eligatur de Congregatione, sapiens, maturis moribus, sobria, non multum audax, non elaxa, non turbulenta, non

iniuriosa, non prodiga, sed timeus Deum, & omni congregationi sit sicut mater, curam getat de omnibus. Sine iussione Abbatisz nihil faciat: quæ ei iubentur custodiat: Sorores non contristet. Si qua forte soror ab ea aliqua irrationabilia postulat, non spernendo eam contristet, sed rationabiliter cum humilitate malè petenti denegat. Animam suam custodiat, memot semper illud Apostolicum, quod *qui bene ministraverit, gradum sibi acquirit.* Infirmotum, infantium, hospitum, pauperum cum omni solitudine curam getat, sciens sine dubio quia pro his omnibus in die iudicij rationem redditura est. Omnia vasa Monasterij cunctamque substantiam, ac si altaris vasa sacrata, conspiciat; nihil ducat negligendum; neque avaritiæ studeat, neque prodiga sit extirpatis substantiis Monasterij, sed omnia mensuratè faciat, & secundum iussiones Abbatisz; humilitatem ante omnia habeat: & cum substantia non est quæ tribuatur, sermo responsionis porrigatur bonus, ut scriptum est; *sermo bonus super datum optimum.* Omnia quæ ei iniunxerit Abbatisz ipsa habeat sub cura sua; à quibus eam prohibuerit, non præsumat. Sororibus constitutis annonam sine aliquo verbo vel mora offerat, ut non scandalizentur, memor divini eloquij, quid mereatur qui scandalizaverit vnum de pusillis. Si congregatio maior fuerit, solatia ei dentur, quibus adiuta sit, & ipsa æquo animo impleat officium sibi commissum. Horis competentibus dentur quæ danda sunt, & petantur quæ petenda sunt, ut nemo perturbetur & contristetur in domo Dei.

XXI. Ad portam Monasterij ponatur soror senex, sapiens, quæ sciat responsum accipere & reddere, cuius maturitas non sinat eam vagari. Quæ Portanariâ cellam debet habere iuxta portam, ut venientes semper præsentem invenient, à qua responsum accipiant, & mox ut aliquis pulsaverit, aut pauper clamaverit, Deo gratias, respondeat, & benedicat cum omni mansuetudine timotis, reddens responsum festinanter cum festinatione & fervore caritatis; quæ Portanaria, si indiget solatio, iuniorum sororem accipiat. Amen.

*Explicit Regula S. Casarii cum Recapitulatione.*



## SERMO SANCTI CÆSARII EPISCOPI Arelatensis ad Sandimoniales:

**G**audete & exultate in Domino, venerabiles filie, & gratias agite, qui vos de tenebrosa sæculi huius conversatione ad portum quietis & religionis attrahere & provocare dignatus est. Cogitate ingiter vnde existis, & vbi pervenite miseris. Reliquistis fideliter mundi tenebras, & lucem Christi feliciter videre cepistis.

Contempniftis libidinis incendium, & ad caſtita- tis refrigerium perueniſtis. Re- ſpuiſtis gulam & abſtinentiam elegiſtis. Reſpuiſtis auariciam atque luxuriam, & caſtita- tem vel miſericordiam tenuiſtis. Et quamuis vobis uſque ad exitum vitæ non deſit pugna, tamen Deo donante ſecuri ſumus de veſtra victoria. Sed rogo vos, venerabiles filiæ, vt quanto eſtis ſecura de præteritis, tanto ſitis ſolicita de futuris. Omnia enim crimina, vel peccata cito ad nos reuertuntur, ſi non quotidie bonis operibus expugnentur. Audite Apoſto- lum Petrum dicentem: *Sobria eſtote, & vigilate, quia aduerſarius veſter diabolus, tanquam leo rugiens, aliquid deuorare querens circuit.* Quandiu in hoc corpore viuimus, die nocteque Chriſto adiutore vel duce, contra diabolum repugnemuſ. Sunt enim aliquæ, quod peius eſt, negli- gentes, & tepida, quæ de ſolo Chriſtianitatis vocabulo gloriantur, & pu- tant quod illis ſufficiat veſtem mutalſe, & religionis tantum habitum ſuſ- cepiſſe: neſcientes illud Propheticum: *Fili accedens ad ſeruitutem Dei ſta in iuſtitia & timore, & præpara animam tuam ad tentationem,* nec ſententiam Pſalmiſtæ conſiderantes: *Propter verba labiorum tuo- rum ego cuſtodiui vias duras:* & illud quod Apoſtolus dixit: *Per multas tribulationes oportet nos intrare in regnum celorum.* Veſtes enim ſecula- res deponere, & religioſas aſſumere vnius horæ momento poſſumus: mo- res vero bonos iugiter retinere, vel contra malas dulcefque voluptates sæ- culi huius quamdiu viuimus, Chriſto adiutore, laborare debemus, quia non qui cæperit, ſed *qui perſeuerauerit uſque in finem, hic ſaluus erit.* Imprimis ergo omnis anima, quæ religionem ſeruare deſiderat, gulæ con- cupiſcentiam vincere, & ebrietatem vitare tota fidei virtute contendat: & ita temperamentum conuiuium, menſamque mediocrem habere ſtudeat, vt caro illius nec nimietate abſtinentiæ debilitetur, nec per deſiciarum abundantiam ad luxuriam prouocetur. Deinde abiecta ſuperbia, cui Deus reſiſtit, profundæ humilitatis iaciat fundamentum: inuidiam velut vipe- reum venenum deteſtetur, ac fugiat: linguam refrænct, detractiorem qua- ſi venenum reſpuat: verba otioſa, nec ipſa proferat, nec ab alijs prolata auribus ſuis libenter admittat. Veſtimentorum habitum, nec nimis abie- ctum, nec notabiliter pompoſum, aut periculoſè elegantem habere con- ſueſcat: lectionem aut ipſa frequentius legat: aut legentis verba tota pecto- re auditate ſuſcipiat. De diuinis Scripturarum fontibus iugiter aquam ſa- lutis hauriat: illam vtique de qua Dominus dicit: *Qui credit in me, flumina de ventre eius fluent aqua viue.* De paradifi etiam floribus, hoc eſt ſanctarum Scripturarum ſenſibus, anima ſancta ſe iugiter ornare con- tendat, ex ipſis pretioſas margaritas auribus ſuis indefinenter appendat ex ipſis anulos & dextralia, dum exercet opera bona, ſibi componat. Ibi vul- nerum medicamenta, ibi caſtita- tis aromata, ibi compuncti- onis holocauſta requirant. Quæ vero religionem immaculato corde, & puro corpore con- ſeruare deſiderat, aut nunquam in publicum, aut certè non niſi pro grandi & in- evitabili neceſſitate procedat. Nolite, quaſo vos, nolite quibuſcunque aut occaſionem dare, aut familiaritatem tribuere. Quæ vero libidinem

1. Pet. 5.

Eccl. 2.

Pſal. 16.

Act. 14.

Mat. 14.

Ioan. 7.

Christo adiuvante desiderat vincere, familiaritatem debet refugere: & quæ indignam familiaritatem non spreuerit, aut se, aut alium cito perdet. Sed forte dicit aliqua, ideo familiaritatem non fugio, quia volo habere quod vincam, & aduersarium meum cupio tenere captiuum. Vide ne contra te aduersarius incipiat rebellare: vide ne te ducat captiuitas ista captiuam. Audi Apostolum dicentem: *Fugite fornicationem.* Contra re- 1. Cor. 6.  
liqua vitia oportet nos omni virtute resistere: contra libidinem vero non expedit repugnare, sed fugere. Esto ergo libidinis fugitiua, si vis esse castitatis pugnatix egregia. Sed quod dixi diligenter attendite. Quando sola aliqua libidinis stimulis incitatur, Christo adiuvante repugnet quantum præualet contra se; quia non habet quo possit fugere: quando vero per alterius sodalitatem, opportunitatem voluptatis diabolus subministrat, ipsam familiaritatem quantum præualet, vt diximus, sancta anima refugiat. Sed vt hæc omnia seruare possimus, abstinentiam rationabilem teneamus: quia vera est illius sanctissimi viri sententia; *Prout continueris ventrem, ita co- venenosus motus eius.* Humilitatem etiam veram quantum possumus conseruamus. Non enim diu carnis integritas seruatur, vbi animus superbiæ tumore corrumpitur; præcipuè si iracundiæ flamma frequentius surgit, castitatis & virginitatis flores cito consumit. Casta enim & Deo deuota anima non solum extraneorum, sed etiam parentum suorum familiaritatem habere non debet. Si enim vasa quæ Ecclesiæ offeruntur, vt in sacrosanctis altaribus ponantur, sancta ab omnibus appellantur, & nefas est vt de Ecclesia postmodum in domum laicam reuocentur, aut vñibus humanis aptentur, putas qualem dignitatem apud Deum habet anima ad eius imaginem procreata? Sicut ergo vasa sancta humanis vñibus seruitura, nec possunt, nec debent de Ecclesia reuocari; sic Religiosam quanquam non oportet, non decet, non expedit, parentum suorum multis obligationibus implicari; aut quorumcunque extraneorum perniciofa familiaritate constringi. Illud ante omnia admonco, vt amutationis malum, quasi venenum vipereum fugiatis; & ita inter vos caritatis dulcedinem conseruetis, vt vobis inuicem per sancta colloquia medicamenta spiritualia præparetis. Sunt enim, quod pelus est, aliquæ, quæ quando se pariter iungunt, magis sibi detrahendo, vel contra Præpositas murmurando, vulnera faciunt, quam spiritualia medicamenta componunt. Vos vero, sanctæ ac venerabiles filix, si aliquam videtis pusillanimitatem, consolationem impendite: si superbientem, humilitatis medicamentum apponite: si iracundam videritis, refrigerium patientiæ ministrare. Si nobiles natæ estis, magis de religionis humilitate, quem de seculi dignitate gaudete. Tenete ergo firmiter manus in aratro, & nolite respicere Luc. 9.  
retro. *Mementote vxoris Loth,* quæ retro respiciens versa est in statuum Luc. 17.  
salis. Nunquam iuramentum, nunquam maledictum de Virginis ore procedat. Non solum enim corpora, sed etiam corda vestra omni sollicitudine custodite, propter illud quod scriptum est: *Omni custodia serua cor tuum;* Pro. 4.  
& illud quod Dominus in Euangelio dixit: *de corde enim exeunt cogita-* Mat. 15.

- siones male.* Si enim in corde nihil mali cogitatur, quidquid sanctum est ex ore profertur; quia sicut scriptum est: *Ex abundantia cordis os loquitur.* Hoc enim lingua proferre consuevit, quod ex officina cordis conscientia ministraverit. Et ideo si ex ore vultus bona proferre, semper in corde quæ sancta sunt cogitare. Sic lectioni & orationi debetis incumbere, ut antea omnia etiam manibus possitis aliquid exercere: secundum illud quod Apostolus ait: *Qui non operatur, nec manducet.* Meliorem quoque dici partem sancto operi dedicate, lectioni vacare consuefcite. Oratio vestra ita cum silentio procedat ex corde, ut vix audiat in ore. Nam qui alta voce orare voluerit, & sibi & alteri multum nocet, dum per suam garrulitatem alterius mentem ab oratione sancta & secreta suspendit. Pompofa indumenta, quæ non vilitati, sed vanitati seruiunt, fastidite, atque contemnite. Multæ enim quod in moribus diligunt, hoc etiam in operibus suis ostendunt; præparant sibi ornamenta secularia seculum diligentes, & voluptati seruientes, vel luxuriæ. Vobis vero nihil sit commune cum talibus: sed omnia ornamenta, quibus ad luxuriam caro componitur, velut inimica & contraria vestro proposito, respiciantur. Sunt enim, quod peius est, quæ pro vanitate seculi istius plus student terrenis cupiditatibus operari, dare, quam lectioni diuinæ iustitiæ, dum volunt stragula pulchra, & picta tapetia, plumaria etiam, & reliqua his similia, cum ingenti sumptu & superflua expensa, ad oculorum libidinem præparare: nescientes illud quod Dominus per Ioannem Euangelistam clamat, & dicit: *Nolite diligere mundum, neque ea quæ in mundo sunt; quoniam omne quod in mundo est, concupiscentia carnis, & concupiscentia oculorum, & ambitio seculi est.* Quid prodest Virgini integritatem corporis custodire, si oculorum concupiscentias noluerit euitare? Vos vero, sanctæ & Deo dignæ animæ, totum spiritualiter agite. Sequimini Christum, tenendo perseueranter quod voluistis ardentem. Iterum atque iterum, sanctæ & Deo dicatæ animæ, rogo, & cum omni humilitate pro conservando Virginitatis præmio consilium do, ut familiaritatem incongruam à vobis, vel à vestris animis, totis viribus, repellere laboretis. Nam ad conservandam sanctæ religionis dignitatem singularitas testis sanctissima est. Familiaritas enim, cuiuslibet si frequens esse cœperit, nonnisi corruptionem seminat, vitia pullulat, libidinem concipit, ignominiam parit, rabiem concitat, lasciviam pascit, petulantiam nutrit, casus exaltat, ruinas ædificat, confusionem mercatur, thesaurizat opprobrium, criminationem exaggerat, excusationes inflammat, & cateruatim simul in fascem conglomerat. Nam si anima, sancta, secretum suum custodire voluerit, & assidue familiaritatis malum, tota animi, virtute fugerit, ipsa sancta singularitas nutrimentum illi invictum est sanctimonij, expugnatio fortis infamiae, exercitium continentiae, evacuatio luxuriæ, pax secunda virtutum, & impugnatio inquieta bellosum, puritatis culmen, & libidinis carcer, hostilitatis portus, & ignominiae naufragium; Virginitatis mater, & hostis immunditiæ, integritatis dignitas, & fornicationis abdicatio; voluntas bonorum operum, & ad-



licitio vitiorum; refrigerium pudiciæ; acquisitio triumphorum, & facinorum detrimentum; requies salutis, & perditionis exilium; vita spiritus, & carnis interitus. Hæc omnia mala fortiter, Deo adiuuante, repellentur; & illa quæ diximus bona feliciter acquirentur, si ab animabus sanctis familiaritas inordinata respuat. Attendite vos, ô animæ sanctæ, quia inter omnia certamina, quibus semper comes est Christiana militia, sola duriora sunt prælia castitatis, vbi quotidiana pugna est, & rara victoria. Castitatis dura sunt prælia, sed maiora sunt præmia. Castitatis palmam nemo securus accipit, cui quantum duri sunt exitus, tantum gloriosi sunt fructus. Vt ergo castitatis præmia, & virginitatis coronam feliciter, Deo remunerante, possitis accipere, periculofam familiaritatem à vobis semper excludite. Currite fideliter, vt possitis peruenire feliciter, adiuuante Domino nostro Iesu Christo, qui vivit & regnat in sæcula sæculorum. Amen.

---

EX EPISTOLA S. CÆSARII AD ORATORIAM

*Abbatissam, Quales esse debeant dulcifices animarum.*

**A**VDI me dulcissima soror & filia: Tu quantumcunque semper in studiis spiritualibus occupari desideras, propter sorores tamen aliquando etiam exteriora tibi erunt negotia dirimenda. Curandum ergo tibi summopere est, vt si temporalia quasi pro tempore agas; at semper tenacius in spirituali deuotione & amore inhaereas: vt cum temporalia citius dispensaueris, ad orationem illico vel lectionem, quasi ad matris sinum, recurras. Optare quippe debes, vt abiecta solitudine mundi, semper cogites de seruitio Christi, propter illud quod dicitur: *Nemo militans Deo implicat se negotiis secularibus & cætera.* In omnibus, iux- Tim. 2. Tit. 2.  
ta Apostolum, tenetipsum præbe exemplum bonorum operum; vitæque tua velut pennatum animal ad alta semper per desiderium euolet, per verbum resonet, luceat per exemplum. Cum vero ad annuntiandum verbum Dei te sororibus affectaueris, seu pro vtilitate animarum, tenoreque Regulæ constituendo necessitas incubuerit altercandi, prius cauta consideratione pensa, vt quod ore promiss, factis implens: & quod aliis prædicas, operibus præbeas: scilicet vt in tuis humeris atque cervicibus prius sentias, vtrum grauibz aut leuibz oneribus colla sororum onustes: verbi gratia, si ieiunium super quotidianum, vel abstinentiam extra consuetudinem, nec non, vt assolet, plus solito in Synaxi psalmos placuerit decantare, prior in Ecclesia inueniaris, postrema ex eas: primâ suscipias laborem, postior soluas, & in quotidiano corporis alimento atque communi cibo par sis his cum quibus pari in mensa vteris confessu: ipsæ denique quibus sorores ferculorum soporibus delectare; & æqualia vobis cibaria, potionesque communes exhibeant discorsæ vel pincernæ: prima-

Mat. 18.

tumque tuum, quem prior ad mensam tenes, prima ad virtutem parsimoniz vindices: vt abstinentiam quam lingua prædicat, proximæ fauces vel vicinus sentiat stomachus. Ne forsitan subdite audientes tacitis cogitationibus dicant: ô quam pulchrè nobis abstinentiam prædicat plenus venter: & contentas nos iubet esse vilissimis cibis ac poculis, accuratis cibis poculisque refertum guttur, & eructans! Illa enim de abstinentia prædicatio acceptabilis est, quam lurida ieiunij ora decantant. Et in his omnibus hoc noueris conuenire, vt angusti callis itinera, per quæ socias ammones gradientum, prior ipsa gradiaris: omnia quæ agenda sunt ante factis impleas, vt postmodum ductilis tuba ex percussione perducta rectius erumpas in vocem: propter illud Dominicum; *Quicumque, inquit, scandalizauerit vnum de pusillis istis, qui in me credunt, & reliqua.* Non sis vestibus ornatioꝝ cæteris, sed moribus. Inter cætera cum magna tibi cautela custodiendum est, vt omnes in Monasterio, quarum gubernacula tuis æqualiter imposuisti ceruicibus, æqualiter diligas; ne vnâ plus minusue ames: sed cuncta quæ sunt, in quo possibilitas extat, æquo moderamine disponas, parique moderatione dispenses, ac parem eis caritatem impertias: & non quibuscumque per priuatum amorem, sed cunctis secundum merita singularum, quæ sunt necessaria largiaris. Non quæ tibi vultu intuituque placuerit, non quam tibi ad oculum cognoueris, vel cuius blandiori obsequio fueris delinita; sed quam amor Christi, & religiosior demonstrauerit vita, præponas. Oportet enim te propter quasdam cultum nonnunquam habere in gutture, cauterium in lingua gestare, virgam tibi & baculum in manu ferre: vt per cultum defeces vitia, per cauterium vero ad sanitatem secta reducas: per virgæ disciplinam corrigas; per baculum vero disciplinam sustentas. Si quando vero cum secularibus ad conloquendum fueris euocata, prius arma frontem trophæo Crucis, vexillo Christi pectus ingemina, vt cum sua virguncula Christus comitari dignetur. Confabulatio vero tua semper sit mixta gravitate atque dulcedine: & tantum loquaris, quantum opportunitas flagitauerit rei ac temporis. Si quid vero ab eis petitum fuerit, quod præstare deliberas, cum vultu hilari præsta: si quid vero præstare non conuenit, petitionem illorum saltem honestate sermonis mollifica. Nomen tuum plures nouerint, beneficia tua in quantum præuales plures sentiant; vultum rari cognoscant. Si quando autem tibi pro necessitate Monasterij seorsim fuerit conloquendum, cum duabus, vel certè cum tribus electis sororibus facis, quia opinio bonæ famæ, sicut etiam perfectæ vitæ custodia, tibi necessaria est: & tunc primum despicienda humana detractio, cum Christus in causa est. Omnis quoque actio tua semper sit propter Deum, sermo de Deo, cogitatio in Deum. Et exceptis vitiis, quibus non compassio, sed reformatio debetur, omnibus te cupio esse compassibilem, omnibus gratam, omnibus te præfectam piam. Vt videlicet iuxta Paulum sis *sancta corpore & spiritu*, ipso sponso & Domino tuo mentem tuam regente, & vias tuas sanctas disponente, qui viuit & regnat in sæcula sæculorum. Amen.

1. Cor. 7.



TESTAMENTVM B. CÆSARII SANCTÆ ARELATENSIS  
Ecclesiæ Episcopi.


PAX ECCLESIAE ARELATENSI.

CÆSARIUS Episcopvs Presbyteris & Diaconibus, sanctæ ac venerabili Cæsariæ Abbatissæ, quam Dominus per meam paruitatem in Monasterio nostro præposuit, ac vniuersæ congregationi, quam ibi Dominus sua gratia collocauerit, in Domino æternam salutem. Cum Ecclesiastica pietas, consuetudinis suæ rem faciat ordinabiliter, scilicet quo peregrinis & destitutus opem largitionis impendat: quanto magis cum opportunitas aut necessitas fuerit, vt sanctis quibusque & Deum timentibus aliqua largiatur, amplius debet pia misericordiæ suæ viscera dilatare? Et ideo iuxta hanc Epistolam, quam manus nostræ subscriptione roborauimus, cuique diem & Consulem subitus adiecimus, Deo dispensante hoc testamentum meum condidi, vel manu propria subscripsi, atque iure prætorio, vel iure civilis, & ad vicem illorum codicillo firmaui. Ego Cæsarius peccator cum debitum humanæ carnis reddidero, cunctum Monasterium S. Ioannis, quod ego condidi, sub potestate Arelatenfis Pontificis canonicè sit, hæredemque meum esse volo ac iubeo; cæteri cæteræue exhæredes sint. Torum quod cuique aut per hoc testamentum meum dederò, legauero, dariue iussero, vt detur fiat. Cæterum autem Arelatensem Episcopum coheredem meo Monasterio relinquo: quosque liberos, quasque liberas esse iussero, liberi liberæque sint omnes. Ego tamen cum nihil de parentum bonis habuerim, hoc testamentum meum præsumere erubui: illa tamen me sententia compulit, vt pleaque Saluatoris formidanda, qua iniqui audituri sunt dicentem, *ite in ignem æternum*, pietatis affectu aliquid Ecclesiæ meæ contulisse. Et ne forte post obitum meum aliqui de parentibus meis, exceptis ijs rebus, quas illis pro elogijs donaro, inquietare præsumant cui præsum Ecclesiam; ideo hanc voluntatem meam tractare amplius desiderauim, ne qui de parentibus meis vel apud ipsum Monasterium præfatum, vel Pontificem Arelatenfis Ecclesiæ, præter id quod illis dederò ac dederim, præsumant requirere. Sancto & domino meo Archiepiscopo, qui mihi indigno dignè successerit, licet omnia in sua potestate sint, tamen si lubet & dignum ducit, indumenta paschalia, quæ mihi data sunt, omnia illi seruiant, simul cum casula villola, & tunica, vel galnapè, quod melius dimiserò. Reliqua vero vestimenta mea, excepto birro amiculari, mei tam clerici quam laici, cum gratia vel ordinatione domini Archiepiscopi, sibi ipso iubente imò dominante diuidant. Ea vero quæ Monasterio ante per donationem contuli, nunc affirmo: & si cui aliquid per Epistolam, aut per piacium, aut verbo pietatis intuitu contuli, valere volo. Hoc enim assuetè precor, quatenus

cellam quam bonæ memoriæ Augustus Subdiaconus in atrio S. Stephani euntibus parte dextra habuit, Prouisoribus Monasterij propter custodiam illorum firmam D. Archiepiscopus perpetuo dignetur iure concedere: ita ut eam sibi succedendam Monasterij Prouisores habeant. Et hoc specialiter volo, & ita domine Archiepiscope precor, siue prouisorem ad Monasterium, siue presbyterum ad basilicam S. Mariæ, nullum alium habeat congregatio sancta, nisi quem ipsa elegerit, vel ordinari petierit. Et licet de tua D. Archiepiscope pietate præsumam, tamen ne forte contra Monasterium nostrum aliquorum suggestiones importunas habeatis, adiuro vos per Patrem & Filium & Spiritum sanctum, & per tremendum diem iudicij, ne inquam præualeat apud vos hostis antiquus, ut ancillas vestras contristari acquiescatis; aut aliquid illis auferri de ijs quæ possident, eisque contulimus, permittatis: quia Deo propitio non sine discretione vel iustitia quibuscumque secularibus iure directo res Ecclesiæ vendidimus, nisi hoc tantum quod Ecclesiæ minus utile & infructuosum est; & quod animabus sanctis & Deo vacantibus cum sanctorum fratrum consensu vel subscriptione tribuimus, perpetuo illis iure permaneat. Vos vero domine filiole per sanctam Trinitatem inseparabilem, & per Domini nostri Iesu Christi aduentum adiuro, ut Pontificem qui mihi indiguo ordiuante Deo successerit dignè, omni affectu ut dominum rogetis, ac pura mente diligatis, & ne per vestram contristetis inobedientiam. Confidimus enim de Dei misericordia, quod ita omnibus sacerdotibus, quibus religionis collatio est, castum amorem impendat, ut nihil vobis quod ad sustentandum corpusculum opus est, deesse permittat. Te iterum atque iterum Pontifex optime rogo gratia diuina præfati Monasterij ut curam maximam habeas, & familiam illarum cum grandi pietate satagas prouideri. Quod si alicuius persona iniustum tibi dederit consilium, cum auctoritate respondendum deprecor: quia hoc quod Episcopi agitur verbo, non solum auferri non debet, verum nec omnino potest. Tum præcipuè quia & hoc ipsa sanctissimi Papæ Urbicani suasis auctoritas, ut hoc de sancto & domino meo Pontifice credam. Nunquam enim apud te præualebit tam iniqua suggestio, ut contra iustam voluntatem qualicumque Antistitis pro meo studio substantia ad te multum profecerit, & propè duplicata sit. Additur ad hoc quod Deus misericors per parnitatem meam etiam immunitatem tributorum, tam iuxta urbem & infra, quam etiam in suburbanis & villis ex maxima parte concessit. Agellum igitur Aucharianum, unde parvam particulam Monasterio dedimus, multa seruamus; nam plus minus centum aripennes vineæ, & trecentorum modiorum campos reseruauimus: ita quod supradictum Monasterium tantum modiatas de terra quam ego plantauimus, habeat modiatas quadraginta: & de vetere vinea vix triginta aripennes contulimus. Agellum Gallicummanum, Mercloaunum, vel agellum Gemellos cum stagnis & paludibus, eum omni iure & termino suo: & pascua in campo Lapideo: vel si qua alia sunt; vel campum in Trifinitio super viam munitam, vel reliqua quaecun-

que sunt. Agellum Oruedum, & agellum Martinatis, & agellum Siluanum, in quo est sita Ecclesia S. Mariz de Ratis: & agellum Missiamanum, cum omnibus sibi pertinentibus pascuis, paludibus, cum omni iure & termino suo sanctæ tuæ Ecclesiæ reservauimus in stipendiis earum. Unde te sancte Pontifex adiuro, vt si Deus omnipotens per manus seimentum sanctæ matri, Ecclesiæ, Monasterio sanctarum virginum aliquod maius bonum dederit, tua sancta dilectio vnum ab altero non disjungat. Si vero, quod Deus non patiatur, congregatio ibi aut congregata non fuerit, aut forte postea, quod absit, cum congregata fuerit, esse desierit, ad matrem Ecclesiam reuertantur. Hec quidem ego, vt timori meo satisfacere, scripsi. Nam absit vt de tua, piissime Pontifex, inscientia inculperis, quia, vt supra iam dixi, pietas diuina concessit, vt per meam humilitatem immunitas Ecclesiæ in tot capitibus daretur. Quod Monasterio cum fratrū consensu dedimus, per hanc voluntatem meam confirmo. Ancillæ nostræ Cæsariæ Abbatissæ mantum maiorem, quem de cannabe fecit, dari volo. Domino meo Cypriano mantum è cunctis meliorem dari volo. Quidquid seruo meo Eriçiano contuli, nunc per hoc testamentum meum confirmo. Agritia puella mea propria libentissimè Monasterio & Cæsariæ Abbatissæ seruiat: & verè gariolas quas illis vel parentibus eorum dedi confirmo: omnes cubicularios meos tibi, Domine Episcopo, coram Deo & Angelis eius commendo.

*Explicit Testamentum sancti Cæsarii.*



# S. AVRELIANI ARELATENSIS EPISCOPI REGVLA AD VIRGINES.

DE SANCTO AVRELIANO EIVSQVE REG.  
veterum testimonia.

MARTYROLOGIVM Rom. die xvi. Iunij.

*Lugduni depositio Beati Aureliani Episcopi Arelatensis.*

VIGILIVS PP. Epistola ad Aurelianum Arelat.

*Administrationem vicum nostrarum fraternitati vestre animo libenti*

committimus, & credimus caritatis vestrae officio actibus Deo placitis diligenter vniuersa compleri: quando & summi sacerdotij consortio vos dignos diuina esse gratia iudicatis, & glorioſſimi Childeberti Francorum Regis Christiana & Deo placita in perhibendo vobis testimonio voluntas acceſſit, &c.

IDEM ad Episcopos Galliarum.

Quia dudum Auxanio quondam Arelatenſis ciuitatis Antisti vnicum noſtrarum ſolicitudinem dederamus; ſed curſum vite preſentis implendo de hac luce migrauit, in cuius loco Aurelianus frater noſter noſcitur ſucceſſiſſe, neceſſarium valde credidimus, ſolicitudinem hanc, à nobis antefato debere committi, confidentes illum & pro loci ſui qualitate bonis actibus vniuerſa, quæ Deo placeant, poſſe complere: & maxime cum glorioſus filius noſter Childebertus Rex testimonium bonæ conſcientiæ pro Christiana ſua voluntatis deuotione perhibuit.

ITEM Epiſtola ab Italiæ Clericis Francorum legatis directæ. Tomo 1.

Concil. Galliarum I. Sirmondi.

Vnde rogamus & conſeſſamur gloriam veſtram, vt ad Prouincias veſtras hæc omnia velociter indicetis, ne aut iſti ſubripiant qui miſi ſunt, aut Anaſtaſius quidam, quem ſanctus Episcopus Aurelianus Arelatenſis ciuitatis ad beatiffimum Papam ante hoc biennium direxerat, ibidem in Galliis aliqua mentiatur.

S. GREGORIUS M. Epiſtola cxvii. l. vii. Ind. ii. ad Vigilium Arelatenſem Episcopum.

Glorioſæ memoriæ Childebertus Francorum Rex Catholica religionis amore ſuccenſus intra muros Arelatenſis ciuitatis Monasterium virorum, vt ſcripto reperimus, pro ſua mercede conſtituens, quædam ibidem pro habitantium ſuſtentatione conceſſit. Cuius ne voluntas inquam duceretur in irritum, & ea quæ pro quiete Monachorum diſpoſita fuerunt, turbarentur, quæque contulit in iure eiſdem Monasterij, Epiſtolis ſuis Apoſtolica petijt auctoritate firmari. Vnde quia effectum & regia voluntas & res valde deſiderata poſcebat, à prædeceſſore noſtro Vigilio Romane Sedis Antisti ad prædeceſſorem veſtrum Aurelium (leg. Aurelianium) ſcripta tranſmiſſa ſunt.

IOANNES TRITHEMIUS lib. de proprietate Monachorum, cap. v.

Aurelianus Episcopus in Regula ad Moniales cap. iii. ſic dicit: Nihil occultè accipiatis, &c.

Ex hac quoque Regula Sancti Aureliani ad Virgines aliquot capita affert Sanctus Benedictus Anianæ Abbas in Concordia Regularum.



INCIPIT PROLOGVS  
AVRELIANI EPISCOPI  
AD VIRGINES.

*Sanctis & in Christo venerandis Sororibus in Monasterio Beata Maria  
quod Deo iubente intra muros Arelatensis urbis fecimus, constitutis,  
AVRELIANVS EPISCOPVS.*



VIA Deo inspirante qui nos praeuenit ineffabili misericordia sua, visum vobis est, vt repudiatis saeculi voluptatibus, ac temporalibus gaudiis contemptis siue sprete, eligeretis sanctissimae vitae nitorem, & virginitatis ac castitatis gratiam complectentes, amore Dei tota viscerum & cordis aueritate sectantes, configeretur timore diuino carnes vestras, tenentes illud: *Iuravi, & statui custodire iudicia iustitiae*: Et, *mibi mundus crucifixus est, & ego mundo*: disposuimus iubente Domino, atque operante in nobis velle & perficere, vt Monasterium vobis pro profectu animarum vestrarum constitueremus; sicut & fecimus. Et ideo Regulam vobis ad disciplinam instituimus, quae per vos viam mandatorum Dei doceret currere, & ad regna caelorum faceret feliciter peruenire.

*Psalm. 118.  
Gal. 6.*

*Explicit Prologus.*

INCIPIUNT CAPITVLA REGVLÆ.

1. *Quacunque ad conuersionem veneris, & recipi se in Monasterium rogaueris, Regula ei primum in salutorio legatur: & cum suscepta fuerit, usque ad mortem suam de Monasterio non egrediatur.*
2. *Vestimenta religiosa non accipiat, nisi chartas de facultate sua cui voluerit faciat.*
3. *Nihil occultè accipiendum: sed si quid transmissum fuerit, & illi cui transmittitur necesse non fuerit, in commune redactum, cui est necessarium, tribuatur.*
4. *Epistolas nec dandas nec accipiendas siue scientia aut permissu Abbatissae.*
5. *Nulla circa lectum suum, quod manducari aut bibi possit, reponat.*
6. *Nulla cella aut armariolum peculiare habeat.*

7. *Non iurandum.*
8. *Non maledicendum.*
9. *Non mentiendum.*
10. *Iracundiam penitus non tenendam.*
11. *Soror in sororem manum non mittat.*
12. *Nulli liceat ad salutandum exire nisi cum Præposita, aut aliqua seniore.*
13. *Ancilla non excipiat: liberta tamen si est, & Abbatissa visum fuerit, excipiat.*
14. *Nec viri nec mulieres seculares in Monasterium ingrediantur, præter in Basilicam Domine Mariæ, & in salutatorium.*
15. *Ut nec ipsi Pronisioribus liceat in Monasterium introire, nisi pro bis utilitatibus, quas in hac Regula statuimus.*
16. *Infantes de Baptismo non excipiendos.*
17. *Quæ in actu ponuntur desuper Euangelia clauës accipiant.*
18. *In ministerium vicibus sibi succedant, absque Abbatissa & paruulis infantibus.*
19. *Nulla opera pro suo libito eligant faciendæ, sed quod ab Abbatissa vel Præposita imperatum fuerit.*
20. *Cum operantur manibus meditatio sancta de corde non cesset.*
21. *Sint vobis omnia communia, & nulla suum proprium dicere aut vendicare præsumat.*
22. *Vestimenta alio colore non induantur, nisi laica & latina.*
23. *In vigiliis studendum est ut nulla dormiat.*
24. *Signo tacto nulla tardius veniat.*
25. *Dum psallitur nulla loquatur, nec operetur manibus.*
26. *Literas omnes discant.*
27. *Sancta Abbatissa in congregatione maneat.*
28. *Si qua pro qualibet culpa corrigatur aut castigatur, arguenti respondere non præsumat.*
29. *Lites nullas habeatis.*
30. *Superbis, inobedientibus, & iracundiam protrahentibus nunquam parcendum.*
31. *Sancta Abbatissa non liceat de facultatibus Monasterij vendere aut donare; nec aliquid contra Regule instituta agere.*
32. *Sedentes ad mensam taceant.*
33. *Sancta Abbatissa extra congregationem non reficiat.*
34. *Carnes in cibis nunquam sumant.*
35. *Pulli & reliqua altilia infirmis tantum ministrantur & delicatis: pisces vero certis festiuitatibus.*
36. *Extra mensam communem nihil cibi potusue gustare liceat, nisi infirmis & infantibus.*
37. *Qualiter infirmis obtemperandum est.*
38. *Ubi cursum diurnum vel nocturnum dicant.*

39. *Vt sancta Abbatiſſa quicquid neceſſe fuerit cum ſufficientia præbeat.*  
 40. *Vt ſancta Congregatio omnia quæ ſtatuta habet, implere contendat.*

Expliciuſt Capitula.

## INCIPIVNT INſTITVTA SANCTÆ Regulæ Aureliani Epiſcopi.

### CAPITVLVM .I.



**O**c iubente Deo imprimis ſtatuimus inuiolabiliter tenendum, vt ſi qua ad conuerſionem venerit, Regula ei in ſalutatorio legatur, & ſi profeſſa fuerit ſe omnia impleturam, tunc excipiat: excepta vero vſque ad mortem ſuam nec præſumat, nec permittatur de Monafterio egredi: propter illud Propheticum: *Vnam petiſſi a Domino hanc requiram, vt inhabitem in domo Domini omnibus diebus vite mee.* Pſal. 26.

II. Veſtimenta vero Religioſa non accipiat, niſi de omni facultate ſua, ſue grandi, ſue parua, chartas donationis aut venditionis cui voluerit faciat, propter Domini mandata, vbi dicit: *Si vis perfectus eſſe, vende omnia quæ habes.* Et, *ſi quis non reliquerit omnia quæ poſidet, non poteſt meus eſſe diſcipulus.* Matt. 19.  
Luc. 14.

III. Nihil occultè accipiat: ſed ſi quis propinquus aut amicus aliquid in veſtimento aut in auro, vel aliud quodcunque dederit, aut tranſmiſerit, in poſteſtate ſit Abbatiſſæ, & ſi illi cui tranſmittitur neceſſe fuerit, tribuatur; ſin vero illa nihil indiget, in commune redactum cui eſt neceſſarium tribuatur.

IV. Epiſtolas præcepimus nec dandas nec accipiendas ſine ſcientia aut promiſſo Abbatiſſæ.

V. Nulla circa lectum ſuum quod manducare aut bibere poſſit, reponere præſumat: ſed omnes in communi cellario recondant; & ſi inæqualitas exegerit, iubente ſeniore quod neceſſe fuerit non ei negetur.

VI. Nulli liceat cellam aut armariolum, aut aliquid huiuſmodi quod peculiarius claudi poſſit, habere.

VII. Non iuretis, quia Dominus dixit: *Nolite iurare.* Et alia ſcriptura: *Vir multum iurans implebitur iniquitate, & non diſcedet de domo illius plaga.* Matt. 5.  
Eccl. 23.

VIII. Non maledicatis; quia ſcriptum eſt: *neque maledicti regnum Dei poſidebunt.* 1. Cor. 6.

IX. Mentiri omnino non liceat: quia *os quod mentitur occidit animam,* & illud: *Perdes eos qui loquuntur mendacium.* Sap. 1.  
Pſal. 5.



Matt. 5.

Matt. 6.

Luc. 17.

Matt. 18.

Iac. 1.

Eph. 4.

X. Iracundiam nulla usque ad aliam diem protrahere presumat. Et sicue habet humana fragilitas, si sermo durior inter sorores ortus fuerit, inuicem sibi veniam petere, & debita relaxare festinent: propter Domini mandatum, ubi dicit: *Si recordatus fueris, quia frater tuus habet aliquid aduersum te, relinque munus tuum ante altare, & vade prius reconciliatum fratri tuo: & tunc veniens offeres munus tuum.* Et, si non dimiseris hominibus peccata eorum, nec Pater vester celestis dimittet vobis peccata vestra. Item, si septies peccauerit in die in te, & conuersus dixerit, *penitet me; dimitte illi.* Et, Non dico tibi usque septuagies septies. Et alia scriptura: *Ira viri instititiam Dei non operatur.* Et Apostolus: *Sol non occidat super iracundiam vestram.* Quod Deus auertat, si diabolo instigante fuerit aliqua furore repleta, vt ista mandata pertinaci corde contemnat; & vna de illis quæ discordantes sunt prauenerit aliam, veniam ei petens; si illa cui petet non dimiserit, disciplinam accipiat, vt ad caritatem se corrigat. Et si ambo despexerint, ambæ pariter à communione, vel à cibo suspendantur; donec inuicem sibi reconcilientur.

XI. Soror in sororem si ausa fuerit manum mittere, disciplinam accipiat.

XII. Nulli liceat ad salutandum exire, nisi cum Abbatisa, aut Præposita, vel certè alia quacunque seniore, cui Abbatisa præceperit. Et sic propinquos suos videant, aut loquantur, ne altiori voce loquantur.

XIII. Ancilla non excipiat: liberta tamen si fuerit, adhuc adolescens ætate, & cum Epistolis patroni sui venerit, in Abbatisæ sit arbitrio si excipi debeat.

XIV. Nec viri nec mulieres seculares in Monasterium ingrediantur, præter in basilicam B. Mariæ, & in saluatorium.

XV. Prouisores vero Monasterij, si in habitu laico fuerint, nec ipsi permittantur intrare; nisi pro his utilitatibus quas in hac Regula statuimus, cum marcionibus aut carpentariis, si aliquid necesse est fieri aut reparari, aut certè pro aliqua ratione Abbatisæ introeant: de cætero nullam licentiam aut libertatem habeant introeundi.

XVI. Nulla infantem de Baptismo excipiat.

XVII. Quibus clauæ de cellario, canaua, horreo, postico, & oratorio credendæ sunt, probatæ sint personæ; & desuper altario vel Euangelio eas accipiant: scientes se Deo reddituras rationem de ministerio sibi credito.

XVIII. In omni ministerio siue ordine psallendi, aut legendi, vel operandi, vicibus sibi succedant; absque Abbatisa, vel præter satis senes & paruulas infantes, aut certè ita infirmas, vt surgere omnino non possint, non compellantur facere quod non proualent.

XIX. Nulla opera pro suo libito eligant facienda, sed quod Abbatisa imperauit, hoc faciant.

XX. Per



XX. Per totum diem cum operamini manibus, meditatio sancta de corde non cesset: propter illud Apostoli: *Psalmis, Hymnis, Canticis spiritua-* Col. 3.  
*libus cantantes & psallentes in cordibus vestris Domino.*

XXI. Nulla præsumat quidquam suum dicere, aut suum proprium vindicare: sed secundum Actus Apostolorum, sint vobis omnia communia: sit Aet. 4.  
*vobis anima vna & cor vnum in Domino.*

XXII. Vestimenta alio colore non induatis nisi laia & laetina.

XXIII. Ad vigilias nulla dormiat: si vero Dominici aut festi dies sunt cui somnus venerit, aliis sedentibus illa stet, ut possit à se somni marcorem repellere; ne in opere Dei aut tepida inueniatur, aut negligens.

XXIV. Signò tacto omne opus prætermittatur, & sicut apes prudentissimæ ad aluearium, ita veloci festinatione properare contendite; si qua tardius venerit districtioni subiaceat.

XXV. Dum psallitur studeant sanctæ animæ vestræ non vagari animo, verum etiam nec operari aut loqui præsumant; sed *psallite sapienter*, sicut dixit Propheta: *Psallam, & intelligam*, & illud: *Psallam* Psal. 46.  
*spiritui, psallam & mente*, metuentes illud; *Maledictus bono qui facit* Psal. 100.  
*opus Dei negligenter.* 1. Cor. 14.  
Ier. 43.

XXVI. Literas omnes discant.

XXVII. Sancta Abbatisa extra congregationem non maneat.

XXVIII. Si qua pro qualibet culpa aut transgressione Regulæ increpatur, aut disciplinam accipiat, arguenti respondere non præsumat: quia peccatum quod hic distringitur, in æterna examinatione non punitur. Et sic debetis animæ curam excipere, quomodo æger curam medici: tenentes illud sanctæ scripturæ: *Qui abiicit disciplinam infelix est.* Et illud: *Ego* Prou. 15.  
*in flagella paratus sum.* Psal. 37.

XXIX. Lites nullas habeatis, tenentes præceptum Apostoli, qui dicit: *Seruum Domini non oportet litigare, sed mansuetum esse.*

2. Tim. 2.

XXX. Superbis, inobedientibusque, & iracundiam proterahentibus nunquam parcendum, donec corrigantur.

XXXI. Sanctæ Abbatisæ non liceat aliquid de facultatibus Monasterij donare ac vendere; nec aliquid contra Regulæ instituta agere. Quod si facere tentauerit, sancto consilio & vno consensu sororum ex nostro permisso non ei acquiescatis; & hoc fieri nulla ratione permittere: quia causam se ante Deum nouerit esse dicturam.

XXXII. Sedentes ad mensam taceant, & lectio quotidie omni tempore cum cibis sumitur legatur. Vterque homo, & exterior cibo, & interior verbo Dei reficiatur, quia scriptum est: *Non in pane solo uiuit* Matt. 4.  
*homo, sed in omni verbo Dei.*

XXXIII. Sancta Abbatisa, nisi inæqualitate faciente extra congregationem non reficiat.

XXXIV. Carnes in cibo nunquam sumantur.

XXXV. Pulli vel euncta altilia in congregatione non ministrantur; nisi infirmis tantum provideantur & delicatis. Pisces vero certis festiuitatibus,

aut quando Abbatisſa indulgentiam facere voluerit, tunc procurentur. XXXVI. Extra menſam communem nihil cibi potuſue guſtare liceat, abſque infirmis, & illis quæ minoris ætatis ſunt.

XXXVII. Infirmis vero ita obtemperandum eſt, vt ſi ſanctæ Abbatisſæ iuſtum viſum fuerit, etiam cellariolum ſuum in commune, & coquinam ſequeſtratam habeant: & cura illis ſeu ſtudium impendatur, donec conualeſcant.

XXXVIII. Curſum diurnum vel nocturnum, id eſt, matutinos, vigiliæ, nocturnos, veſperam & duodecimam in baſilica Dominiæ Mariæ Congregatio dicat. Quod ſi hyems aſpeta fuerit, matutinos tantum, veſperam & duodecimam in prædicta baſilica dicite: ſecundam vero, tertiam, ſextam & nonam in interiori oratorio: propter illos qui aut orare cupiunt, aut Abbatisſæ occurrunt, aut parentes ſuas requirunt. Quando aliqua defuncta fuerit, viſque mediam noctem eam pauca ſortores in oratorio peruigilent & Miſſæ de Apoſtolo ſiant, poſt mediam noctem quæ uigilauerunt quieſcant; & iterum aliz uigilent, & ponite hoc in notiſſiam ſancto Epiſcopo, vt eam iubeat ad locum ubi ponenda eſt deportari.

XXXIX. Et quia Deo propitio digna & ſufficiens vobis facultas collata eſt, quæ ſufficere Monafterio veſtro poſſit, coram Deo & angelis eius te ſanctam Abbatiſſam, & te venerabilem, quæcunque fueris, Præpoſitam admoneo & conſeſtor; vt ſanctæ Congregationi, quæ Deo inſpirante & iubente ſecundum inſtituta quæ ſecimus regulariter uiuit, omnia quæ eis ſunt neceſſaria in veſtitu & in victu cum ſufficiencia tribuatis. Quam tem ſi neglexeritis, & illæ cœperint aliquid neceſſitate compellente murmurare, aut indigere, cauſam vos antetribunal Chriſti noueritis mecum eſſe dicentis.

XL. Er vos, ſancta Congregatio, per profeſſum veſtrum & pet Deum, omnipotentem coniuro, vt omnia quæ in hac Regula pro remedio animæ noſtræ, & pro animarum veſtrarum ſalute ſtatuiſmus, integra & illibata cuſtodiat. Et ne per obliuionem aliquid negligatis, ſemel ea in menſe relegeſte; id eſt in Kalendis, ac ſi duodecim vicibus in anno.

Ordinem etiam quomodo pſallere debeatis in hoc libello iudicauimus inferendum.

Primo die Paſchæ ad Tertiam, Kyrie eleiſon, pſalmi duodecim, id eſt quatuor ſores binos pſalmos, & alleluaticum tertium dicant, perdictis pſalmis Kyrie eleiſon, Antiphonas ſex, lectiones tres vnam de Actibus Apoſtolorum, aliam de Apocalypſi, tertiam de Euangelio, hymnum, *Iam ſurgit hora tertia*, & capitellum, deinde Kyrie eleiſon. Sic in omni opere Dei tertia vice Kyrie eleiſon dicite, antequam incipiat, & pſalmis dictis & capitulo perdicto. Ad Sextam idem numerus pſalmorum, & Antiphona vna, Hymnus, *Iam ſexta ſenſim voluitur*. Lectio Enangelij, & capitellum. Ad Nonam ipſe ordo teneatur, Hymnus: *Ter hora trina voluitur*. Ad lucernarium directaneus paruulus, id eſt, *Regna terra cantate*

*Deo, psallite Domino.* Alia die: *Laudate pueri Dominum*, antiphonæ pſal. 67  
tres: Hymnus, *Hic est dies verus Dei*, & capitellum, quem Hymnum toto  
Paſcha ad matutinos & ad lucernarium dicite. Ad Duodecimam imprimis  
directaneus paruulus: *Sol cognouit occaſum ſuum.* Sex ſorores binos pſal. pſal. 109.  
moſ cum ſuis alleluaticis dicant; antiphonas tres; lectiones duas, vnam  
de Apoſtolo, aliam de Euangelio. Ad nocturnos Paſchales ipſo numero om-  
nia dicite, ſicut in Duodecima designauimus. Ad matutinos imprimis dire-  
ctaneum: *Exaltabo te Deus meus & rex meus.* Inde, *Iudica me Deus.*  
*Deus Deus meus, ad te de luce vigilo,* cum alleluia: deinde, *Conſitemini Do-*  
*mino,* cum alleluia: deinde, *Cantemus Domino,* cum alleluia: poſtea, *Lauda*  
*anima mea Dominum.* *Laudate Dominum quia bonus eſt pſalmus.* *Lauda*  
*Hieruſalem Dominum:* totos tres cum alleluia, deinde benedictio dicenda  
eſt. Poſt benedictionem, *Laudate Dominum de cælis.* *Cantate Domino can-*  
*ticum nouum.* *Laudate Dominum in ſanctis eius:* cum alleluia. *Magnificat*  
*anima mea Dominum:* aut cum antiphona, aut cum alleluia, hymnum, *Gloria*  
*in excelsu Deo:* & capitellum. Et complebitis matutinos ipſo ordine toto  
Paſcha. Si omni die Dominico, & omnibus maioribus feſtiuitatibus, in  
quibus ab opere vacabitis. Quotidianis vero diebus ad nocturnos imprimis  
directaneus dicatur: *Miserere mei Deus ſecundum magnam miſericordiam*  
*tuam,* deinde pſalmi decem & octo: antiphonæ tres paruulæ, Lectiones Apo-  
ſtoli aut Prophetarum duæ, & capitellum. Completis nocturnis dicetis  
matutinos. In æſtate, id eſt, poſt Paſcha uſque Kalendas Octobris ipſe ordo  
erit. Sexta feria vero poſt nocturnos duæ Miſſæ ſiant in æſtate; in hyeme  
tres. Nam Dominica omni tempore in æſtate & in hyeme poſt nocturnos  
ſex Miſſæ ſiant. Si vero eyenerit vt tardius ad vigilias ſurgatur, quantum  
abbatiſſæ viſum fuerit, tantum legatur. Quando ſignum fecerit abbatiſſa,  
quæ legit ſine mora conſurgat, vt Canonicus Miſſarum numerus poſſit im-  
pleri. A Kalendis vero Octobris alij nocturni addendi ſunt, ad primos di-  
cendum eſt: *Miserere mei Deus ſecundum magnam miſericordiam tuam:* ad  
ſecundos: *Miserere mei Deus, miſerere mei;* pſalmi decem & octo,  
lectiones duæ de Prophetis, aut de Salomone. Hymnus ad primos noctur-  
nos: *Rex æternæ Domine,* ad ſecundos: *Magna & mirabilia.* Vbi poſt ce-  
lebratos ſecundos nocturnos, quia noctes creſcunt, quotidie ad librum fa-  
cite Miſſas tres. Vna ſoror legat paginas aut tres aut quatuor, quomodo  
meſura fuerit libri: ſi minute fuerit ſcriptus, aut maiori forma, tres pa-  
ginas; ſi minori, quatuor, & fiat oratio. Iterum legat tantum, fiat alia ora-  
tio: tertio legat idem tantum; & ſurgite, dicite Antiphonam de pſalmis  
in ordine, poſtea reſponſum, deinde Antiphonam. Iterum legat alia ſo-  
ror: & ſic impletis tribus Miſſis dicite matutinos canonicos: id eſt primo  
canticum in Antiphona: deinde directaneum: *Iudica me Deus. Deus,*  
*Deus meus, ad te de luce vigilo.* *Lauda anima mea Dominum:* *Lau-*  
*date Dominum quoniam bonus eſt pſalmus.* *Lauda Hieruſalem Do-*  
*minum,* deinde, *Laudate Dominum de cælis.* *Cantate Domino can-*  
*ticum nouum.* *Laudate Dominum in ſanctis eius,* cum Antiphona,

Dicite Hymnum : *Splendor paterna gloriæ* ; alia die : *Aterne lucis conditor* , & capitellum , & Kyrie eleison duodecim vicibus . Omnibus diebus quotidianis sic impleatur . Post matutinos ad Primam sex psalmi dicantur , & Hymnus : *Fulgentis auctor ætheris* , lectiones duæ : id est vna de veteri , alia de nouo Testamento , & capitellum . Post hoc omnes lectioni vacent vsque ad horam tertiam ; reliquo vero diei spatio faciant opera sua : secundum illud quod Dominus dixit : *Pater meus vsque nunc operatur , & ego operor* . Et illud Apostoli : *operantes manibus vestris* . Et , *qui non operatur , non manducet* . Quia scriptum est : *Vie otiosorum strata sunt spinis* . Et , *seruum inutilem proijcite in tenebras exteriores* .

Quotidianis iterum diebus ad Tertiam sex psalmos dicite , Antiphonam , Hymnum , *Iam surgit hora tertia* , lectionem & capitellum : *Fiat Domine* . Ad Sextam ipse numerus psalmorum tenendus : Antiphona dicenda , Hymnus , *Iam sexta sensim voluitur* , lectio & capitellum . Ad Nonam iste ordo seruandus : Hymnus vero , *Ter hora trina voluitur* . Ad lucernarium omni tempore , & festis & quotidianis diebus , imprimis directaneus ; postea Antiphonæ duæ . Tertia semper cum alleluia dicatur , Hymnus vna die : *Deus qui certis legibus* ; alia die : *Deus creator omnium* , & capitellum . Ad duodecimam psalmos decem & octo dicite : Antiphonam , Hymnum , lectionem , & capitellum . Quando repausaturæ estis , in schola , in qua manetis , Completa dicatur ; imprimis directaneus , & psalmus nonagesimus dicatur , deinde capitella consuetudinaria . In Natali Domini & in Epiphania tertia hora noctis surgite : dicite vnum nocturnum , & facite sex Missas de Isaiâ Propheta ; iterum dicite secundum nocturnum , & legantur aliæ sex de Euangelio . In Epiphania ita : imprimis vnum nocturnum : deinde de Daniele Propheta facite illas sex Missas , & nocturnos , & iterum de Euangelio sex . Matutinos eo ordine , sicut in Pascha scripsimus , aut Dominicis diebus . In Martyrum festiuitatibus tres aut quatuor Missæ fiant : primam Missam de Euangelio legite ; reliquas de passionibus Martyrum . Omni sextâ feria post Duodecimam sex Missæ ad librum legantur : & post nocturnos tres . Omni Sabbato ad matutinos , *Cantemus Domino : & Te Deum laudamus* . Ad Tertiam tres lectiones : vna de Prophetis , alia de Apostolo , tertia de Euangelio dicantur . Omni Dominica post nocturnos cum prima Missa legitur , id est resurrectio , nulla federe præsumat , sed omnes stent : alia Dominica alia resurrectio : & sic in ordine totæ quatuor resurrectiones per singulas Dominicas legantur . Post Tertiam vero , *Pater noster* , dicite : & psallendo omnes communicent . Sic & in festiuitatibus facite . Missæ vero quando sanctæ Abbatissæ visum fuerit tunc fient .

Ordinem etiam conuiuij huic Regulæ inseruimus . Fercula quotidie ad refectionem tria , ad prandium duo , ad cœnam duæ bibituræ . Ad refectionem in æstate mense Iulio , & Augusto caldillos tres , ad prandium tres , ad cœnam omni tempore binos . Per festiuitates vero , & quando Abbatissa indulgentias voluerit facere , & cibaria quanta ipsa voluerit ordinet , & recentes addat . Quotidianis vero diebus olera formatico & oleo semper *ferculo*


Ioan. 5.  
1. Thel. 4.  
2. Thel. 3.  
Prou. 13.  
Mat. 23.

condiantur. Ieiunium vero à Kalendis Septembris vsque ad Kalendas Nouembrijs secunda, & quarta, & sexta feria. A Kalendis Nouembrijs vsque ad Domini Natale quotidie ieiunandum est, absque Sabbato & Dominica. Ab Epiphania vero vsque ad Pascha quotidie ieiunandum est, absque maiori festiuitate, Sabbato, & Dominica. Post Pascha vero vsque ad Pentecosten sexta fèria tantum ieiunandum est. Post Pentecosten mense Iunio, Iulio, & Augusto in potestate Abbatissæ sit de ieiunio aut prandio: sicut viderit possibilitatem sororum, ista studeat obtemperare,

*Explicit Regula S. Aureliani ad Virgines.*

## IOANNIS EPISCOPI ARELATENSIS Epistola ad eandem.

*Sanctis ac venerandis in Christo sororibus, ipsi quibus sancta memoria prædecessor noster Aurelianus Episcopus Monasterium S. Mariæ intra muros Arelatensis Urbis constituit, & præcepta viuendi sanciuir, IOANNES gratia Domini ac Dei nostri Iesu Christi Episcopus.*

 Vm plenissimè series Regulæ vobis constitutæ victus & vestitus qualitatem & quantitatem vestræ sapientiatum contineat, nihilque indignum in ea, quod ad emendationem formulæ eius pertineat, inueniatur: tamen pro caritate & cura eiusdem, quam Dominus Ecclesiæ suæ commendauit, admonemus, vt cum quanta possumus industria vigilemus, ne aliquam occasionem antiquo hosti subripiendi sanctum gregem relinquamus; nobisque futuro iudicio censura pro torporis negligentia iustissimè inferatur; aliqua vestræ sanctitati addicimus, per quæ, vt nobis videtur, liberis gressibus, nullisque præpedientibus occasionibus iter cælestis Hierusalem, Christo Domino præuiante, incedere valeatis. Præcipimus itaque, postulantes sanctam caritatem vestram, vt in ipsis temporibus, quibus ieiunandi & reficiendi vobis statuta præcepta sunt, nulla sit vobis cum viris aut mulieribus religiosis aut laicis, quamuis quibuscumque propinquis aut extraneis, potandi licentia. Sed & tantum ipsis, quibus præfati sumus, pro caritatis officio, sicut concedet vestram sanctitatem, poculos offerre præcipimus. Vos tamen in eorum præsentia in omnibus abstinete: ne si licentius cum eis indulta occasio potatæ fueritis, in resolutione potandi aut cor vestrum contraria cogitatio subripiat, aut iocus indecens per oculos & aures, & verba aut cachinnos prorumpat. Sed sicut diximus ab huiusmodi licentia in omnibus abstinentes, & per gradus singulos Regulæ constitutæ ambulantes, vitæ præsentis cursum feliciter gradiamini; & vitæ æternæ mansiones permissione Domini nostri Iesu Christi ingredi festinetis. Quod ipse præstare dignetur, qui cum Patre & Spiritu

sancto vnus Deus permanet à sæculis, per sæcula, in sæcula sæculorum.

*Explicit.*



# S. DONATI .

## VESONTIENSIS EPISCOPI

### REGVLA AD VIRGINES.

DE S. DONATO VESONTIENSIS EIVSQUE  
Regula veterum testimonia.

TABVLÆ & Martyrologia Ecclesiæ Vefont. apud Chiffletium, Ferrarium & Sausseium die vii. Idus Augusti.

*Vefonsione depositio S. DONATI Episcopi.*


IONAS Monachus in vita S. Columbanii, cap. xiii. Tomo iii. oper. Venerab. BEDÆ.

*Erat tunc temporis Dux quidam, nomine Vryaldelenus, qui gentes qua inter Alpium septa & Iurani saltus arua incolunt, regebat: huic soboles nulla erat. Hic cum coniuge sua Flauia nomine, & genere & prudentia nobili, ad B. Columbanum ex Vefonsionensi oppido pergit, precantes simul vt pro eis Dominum deprecaretur. Quibus vir sanctus. Si, inquit, voti vestri est, vt largitoris donum eius nomini consecretis, mibique ex lauacro suscipiendum tradatis, pro vobis Domini clementiam implorabo, vt non solum cum quem Domino voueatis, habeatis; verum quanta volueritis post pignora suscipiatis. Mox: Flauia editum puerum ad virum Dei deferit: quem vir sanctus suis manibus receptum sacrauit, sacroque lauacro ablutum ipse suscepit, DONATVM que nomen impouit, matrique ad nutriendum reddit: qui post alitus in eodem Monasterio sapientia imbutus, Vefonsionensis Pontifex est præfectus, nunc vsque superest eandem cathedram regens. Qui post in amore B. Columbanii, ex ipsius Regula Monasterium construxit, quod Palatium nuncupauit. Et paulo post. Tost ista munera mater ipsorum Flauia, post mariti obitum Monasterium puellarum construxit in supradicta vrbe Vefonsionis, & omni munimine roborans, multarum puellarum concionem adunauit. Tanta autem in eis veri Dei gratia flagrauit, vt omnia phaleramenta præsentis vite contemnentes, ad omnipotentis Dei cultum anhelarent.*

MEMBRANÆ antiquæ Vesontinæ apud Ioan. Iac. Chiffletium,  
lib. II. Antiq. Vesont. cap. xxv.

*Apicem tante dignitatis (Epi/copalis) adeptus nullo modo est à suo proposito alteratus; sed idem permanens ipse omnibus proficere cupiens in Christo, non desistebat à cæpto officio. Inter Canonicos denique commorans Monachali schema indutus, sic erat inter illos, quasi Monachus vnus, Canonici implens officium, Monachi non amittens propositum. Et mox: Præterea Monasterium infra Urbis mœnia condidit, & in honore B. Pauli Apostoli sacravit, possessionibus ditauit, priuilegio munivit: atque inibi fideles viros sub B. Benedicti, & B. Columbani Luxouienſis Regula victuros instituit. Suo deſiguo tempore, matre eius Flauia cooperante, ex propria hereditate aliud in eadem Vrbe nobile sanctarum monialium in honore Beatæ Mariæ est edificatum Cœnobium: in quo requiescit eadem Flauia in pace, & Sirudis eius filia, virgo sacratissima, eiusque loci Abbatiſſa.*

S. BENEDICTVS Anianæ Abbas in Concordia Regularum passim citat hanc Regulam à Donato collectam.



# INCIPIT PROLOGVS

## REGVLÆ A DONATO COLLECTÆ.

*Sanctis, & à me plurimum venerandis Christi virginibus Gauthsruæ, omnique suæ Congregationi in Cœnobio à famula Dei Flauia constituto, DONATVS omnium extremus famulorum famularumque Dei seruulus, Salutem.*

**Q**UAMVAM vos iuxta normam Regulæ, vasa Christi preciosissima, egregie nouerim quotidie vitam ducere; attamen qualiter magis excellere debeat sagaci vultis semper intentione perquirere. Quam ob causam sæpius mihi iniungitis, vt explorata S. Cæsarij Arelatenſis Episcopi Regula, quæ specialius Christi virginibus dedicata est, vna cum beatissimorum Benedicti quoque & Columbani Abbatum vt puta quibusdam, vt ita dixerim, collectis in vnum flosculis ad instar Encheridion excerpere vobis, vel coaceruare deberem; & quæ specialius femineo sexui custodienda competerent, promulgarem: dicentes, quod Regulæ prædictorum Patrum vobis minime conuenirent, cum eadem viris potius, & nequaquam feminis edidissent. Et licet sanctus Cæsarius



proprie Christi, ut estis, virginibus Regulam dedicasset, vobis tamen ob immutationem loci in nonnullis conditionibus minimè conueniret. Ad hæc ego implenda diu multumque renisus sum voluntati vestræ, non ut peruicaciter durus, sed mea consicui impossibilitate retentus, dum multorum in hac re minus necessitatem rei, atque opportunitatem loci intelligentium iudicium pertimesco: ne me temerè reprehendant, cur de sanctorum Patrum institutis audeam quidpiam excerpere, vel mutare. At contra deuotionem compellor, dum inhianter salutem vestrarum cupio animarum. Sed taciturnitatem meam, immo tacendi perseverantiam, sedulæ tandem vestræ rupere preces; quibus quantum paruitatis meæ ignauia valet, parere omni ambitione festino: sed timeo ne non tam efficaciter, quam libenter. Et rursus in ancipiti ambiguitate constringor, diuin me impari ad indaganda præfatorum Patrum monita fore censeo, & quotidiano strepitu secularium inquietor. Germano tamen affectu, quia caritas omnia superat, in quantum pro assidua corporali infirmitate diuina pietas possibilitatem dedit, & sensus obtusi caligo permisit, quod bonis vestris desiderijs placuit, cunctoque sancto vel vestro Collegio intra septa istius Monasterij adunata suggestio flagitauit, ea quæ vobis expediunt & loci opportunitas, vel corporis possibilitas præstat, & à norma recti dogmatis non discordant, elegi pauca & plurimis: quemadmodum regulariter rectum Christi tramitem, tam vos, quam ceteræ vobis succedentes, Christo opulante, tenere valeatis. Hæc vero schedula, quæ vobis flagitantibus breuiter succinctèque collecta est, omnes conditiones Monasterij, causæque Regulæ singillatim determinat, & dispensat: & ita per titulos luculentius defflorata est, ut quælibet sit necessitas requirendi prius in capitulis ternatur, & faciliè iuxta ea designata in capitulo suo repetiatur. Quæ capitula vilitatis meæ Apologeticam subsequeuntur. Quæ de re vos sanctas animas, mentesque Deo deditas coram omnipotenti Deo spirituali affectu obsecrate compellor, ut hæc eadem vestræ petitioni statuta, absque vlla dumtaxat refragatione, & indefinèti studio, mentesque sagaci, tempore perpetuo conseruare studeatis: & iuniores, vel etiam negligentes, iuxta tenorem ipsius Regulæ coërceatis, & eam sæpius coram omni Congregatione legatis: ut nulla se de ignorantia excusare possit. Iuniores corrigite: anus obsecrate: Præpositæ vestræ in omnibus obedite; negligencias vestras indefinenter eis aperite: altera alterius onera portate: inuicem vos omnes puro & casto amore diligite; ut veniente sponso vestro, Domino Iesu Christo, plenis oleo ac relucetibus lampadibus occurratis: tripudiantescque dicatis singulæ: *Inueni quem quæsiuit anima mea.* Hoc ergo ego omnium vltimus specialius almitaci vestræ humili & subnixa prece deponco: ut pro me, qui petitioni vestræ obtemperans hæc per cola vel commata temperaui, tam in diurnis, quam in nocturnis officiis, dum in hoc luteo corpusculo dego, creberrimas fundatis pteces, & postquam Domino iubente migrauero, sacras per me hostias offerri Domino faciat: quatenus cum vobis in choro sacratum ac sapientium Virginum, virginis

ginitatis palma, beatitudoque tribueretur; saltem mihi cunctis onerato peccatis delictorum venia tribuatur.

*Explicit Prologus.*

## INCIPIT REGULA.

### CAP. I. *Qualis debeat esse Abbatiſſa.*

**M**ATER Monasterij, quæ præesse digna fuerit Congregationi, cogitet semper quale onus suscepit, & cui est redditura rationem villicationis suæ: sciatque sibi oportere prodesse magis, quam præesse. Oportet ergo eam esse instructam lege diuina; vt sciat vnde proferat noua & vetera: castam, sobriam, misericordem; & sapius superexaltet misericordiam iudicio, vt idem ipsa consequatur. Odio habeat vitia, diligat sorores. In ipsa autem correctione prudenter agat, & ne quid nimis: ne dum cupit eradere æruginem, frangat vas: suauisque fragilitatem semper suspecta sit: memineritque calamus quassatus non contendum. In quibus, non dicimus vt permittat nutrirī vitia, sed prudenter, & cum caritate ea amputet, vt viderit cuique expedire, sicut iam diximus: & studeat plus amari, quam timeri. Non sit turbulenta & anxīa, non sit nimīa & obstinata: non sit zelotypa, & nimis suspiciosa, quia nunquam requiescet. In ipsis imperiis suis sit prouida & considerata: & siue secundum Deum, siue secundum seculum sit, opera quæ iniungit, discernat & temperet. Omnia verò quæ docuerit esse contraria, in suis factis indicet non agenda: ne alijs prædicans ipsa reproba inueniatur: ne quando illi dicat Deus peccanti: *Quare tu enarras iustitias meas, & assumis testamentum meum per os tuum? Tu vero odisti disciplinam, & proiecisti sermones meos post te.* Non ab ea persona discernatur in Monasterio: non vna plus ametur quam altera: nisi quam in bonis actibus, aut obedientia inuenerit meliorem. Non præponatur ingenua ex seruitio conuerenti; nisi alia rationalis causa existat. Quia iuxta Apostoli dictum; *sine seruus, sine liber, omnes in Christo vnum sumus*: & sub vno Domino æqualem seruitutis militiam baiulamus: & non est apud Deum personarum acceptio. Sic autem omnia secundum Deum temperet ac discernat, qualiter in die iudicij de credito talento mercedem accipiat; & vt præsentem Regulam in omnibus conseruet: vt dum bene ministraverit, audiat à Domino quod seruus bonus audire meruit: *Euge serue bone & fidelis, intra in gaudium Domini tui.*

### CAP. II. *De adhibendis ad consilium sororibus.*

**Q**UOTIES aliqua præcipua agenda sunt in Monasterio, conuocet Abbatiſſa omnem Congregationem: & dicat ipsa vnde agitur: & audiens consilium sororum, tractet apud se, & quod utilius iudicauerit faciat.

*Cod. Reg. P. III.*

G

Ideo autem omnes ad consilium vocari diximus, quia sæpè iuniori Dominus reuelat quod melius est. Sic autem dent sorores consilium cum omni humilitatis subiectione, & non præsumant procaciter defendere quod eis vilum fuerit; sed magis in Abbatissæ pendeat arbitrio: vt quod salubrius esse iudicauerit, ei cunctæ obediant. In omnibus igitur omnes Magistram sequantur Regulam, neque ab ea temerè declinetur à quam. Nulla in Monasterio proprii sequatur cordis voluntatem. Non præsumat quæquam cum Abbatissa sua proteruè contendere. Quod si præsumpserit, regulari disciplinæ subiaceat: id est, in cella retrudatur, donec pœnitendo humilietur. Ipsa tamen Abbatissa cum timore Dei & obseruatione Regulæ omnia faciat: sciens se procul dubio de omnibus iudiciis suis æquissimo iudici Deo rationem reddituram. Si qua vero minora sunt agenda in Monasterio vtilitatibus, seniorum tantum vtatur consilio: sicut scriptum est: *Omnia fac cum consilio, & post factum non pœniteberis.*

CAP. III. *Quæ sunt instrumenta bonorum operum.*

**I**N primis Dominum Deum tuum dilige ex toto corde, tota anima, tota virtute: deinde proximum tanquam teipsum. Deinde non occidere, non adulterare, non facere furtum, non concupiscere: non falsum testimonium dicere, honorare omnes homines: & quod sibi quisque facere non vulr, alij non faciat; abnegare semetipsum sibi, vt sequatur Christum; corpus castigare: delicias non amplecti: ieiunium amare: pauperes recreare, nudos vestire, infirmos visitare, mortuum sepelire. In tribulatione subuenire, dolentem consolari: à seculi actibus se facere alienum, nihil amoris Christi præponere. Iram non perficere, iracundiæ tempus non reseruare: dolum in corde non tenere, pacem falsam non dare, caritatem non derelinquere: non iurare, ne forte periuret: veritatem ex corde, & ore proferre, malum pro malo non reddere: iniuriam non facere, sed & factas patienter sufferre. Inimicos diligere: maledicentes sibi non renaledicere, sed magis benedicere: persecutionem pro iustitia sustinere. Non esse superbum, non vinolentum, non multum edacem, non somnolentum, non pigrum, non murmurosum, non detractorem; spem suam Deo committat; bonum aliquid in se cum viderit, Deo applicet, non sibi; malum vero semper à se factum sciat, & sibi deputer; diem iudicii timere, gehennam expauescere, vitam æternam omni concupiscentia spiritali desiderare: mortem quotidie ante oculos suspectam habere: actus vite suæ omni hora custodire: in omni loco Deum se respicere pro certo scire; cogitationes malas cordi suo aduenientes mox ad Christum allidere, & seniori spiritali patefacere. Os suum à malo, vel prauo eloquio custodire: multum loqui non amare: verba vana, aut risui apta non loqui: risum multum, aut excussum non amare. Lectiones sanctas libenter audire: orationi frequenter incumbere: mala sua præterita cum lacrimis, vel gemitu quotidie in oratione Deo confiteri: de ipsis malis de cætero emendare. Desideria carnis non perficere: voluntatem propriam odisse; præceptis Abbatissæ in omnibus obedire, etiamsi ipsa aliter,

quod absit, agat : memor illud Dominicum præceptum ; *Quæ dicunt, facite ; quæ autem faciunt, facere nolite.* Non velle dici sanctum , antequam sit : sed prius esse quod verius dicatur : præcepta Dei factis quotidie adimplere : castitatem amare : nullum odire : zelum & inuidiam non habere : contentionem non amare : elationem fugere : & seniores venerari : iuniores diligere in Christi amore , pro inimicis orare : cum discordante ante solis occasum in pacem redire : & de Dei misericordia nunquam desperare. Ecce hæc sunt instrumenta artis spiritualis, quæ cum fuerint à nobis die noctuque incessabiliter adimpleta, & in die iudicii reassignata, illa merces nobis à Domino recompensabitur, quam ipse promisit, quod *oculus non vidit, nec auris audiuit, nec in cor hominis ascendit, quæ præparauit his qui diligunt eum.* Officina vero ubi hæc omnia diligenter operemur, claustra sunt Monasterij, & stabilitas in Congregatione.

Matth. 23.

1. Cor. 2.

CAP. IV. *Qualis esse debeat Abbatissa.*

**Q**uanta beneuolentia diligatis Matrem quæ omnium vestrum curam gerit : & Præpositæ sine murmuratione obediatur ; ne in illis caritas contristetur. Ipsæ vero vobis quæ præsumt, cum caritate & vera pietate discretionem & Regulam studeant custodire. Corripiant inquietas, pusillanimes consolentur, sustineant infirmas : semper cogitantes Deo se pro vobis reddituras rationem. Vnde & vos magis sanctè obediendo, non vestrum, sed etiam ipsarum miseremini : quæ inter vos quantum in ordinatione superiores videntur, tantum in periculo maiore versantur. Pro qua re non solum Matri, sed etiam Præpositæ, Primiceriæ, vel Formariæ cum reuerentia humiliter obedite.

CAP. V. *De Præposita Monasterij.*

**P**ræposita Monasterij eligatur à matre spirituali de Congregatione cum consilio seniorum suarum, sancta, sapiens, timens Deum, humilitatemque super omnia habens : & in religionis amore deuota, & Regulæ obseruatione sit cognita. Quæ Præposita ea agat cum reuerentia, quæ etiam à Matre spirituali iniuncta fuerint ; nihil contra ipsius voluntatem aut ordinationem faciat, quia quantum prælata est cæteris sororibus, tanto magis eam oportet sollicitè obseruare in omnibus præcepta Regulæ. Quæ Præposita, si in aliquo reperta fuerit vitio, aut elatione fuerit decepta superbiæ, aut contemprix sanctæ Regulæ comprobata, admonetur verbis vsque ter : si non emendauerit, adhibeatur ei correctio disciplinæ regularis : quæ si neque sic correxerit, tunc deijciatur de ordine Præposituræ, & alia quæ digna est, in loco eius subrogetur. Quod si & post hæc in Congregatione quæta & obediens non fuerit, etiam de Monasterio expellatur : aut in cella ob penitentiam condignam retrudatur.

CAP. VI. *Ut quæ ad conuersionem venerit non statim recipiatur.*

**H**æc igitur imprimis vestro sancto Cænobio conseruanda est norma, ut quæcumque Deo inspirante conuerti voluerit, non ei liceat statim habitum religionis assumere, nisi antea in multis experimentis fuerit voluntas illius approbata : sicut ait Apostolus : *Probate spiritus, si ex Deo* 1. Ioan. 4.

1. Theff. 5. *sunt : & alibi : Omnia probate ; quod bonum est tenete.* Ergo si perseverauerit pulsans , & illatas sibi iniurias & difficultates visa fuerit patienter portare , & persistere petitionis suæ , annuatur ei ingressus : & sit in cella ubi meditetur , & manducet , & dormiat. Et senior ei talis deputetur , quæ ei Regulam sæpius legat , & curiosè intendat & sollicita sit , si reuera Deum quærat , si prompta est ad opus Dei , ad obedientiam , ad opprobria sustinenda. Prædicentur ei omnia dura & aspera , per quæ itur ad Deum : & si promiserit de stabilitate sua perseverantiam , tunc demum post anni circulum in Cœnobium ingreditur , & obedientia ac stabilitate promissa in Congregatione societur. Et si potest fieri , aut nusquam , aut difficilè in Monasterio infantula parvula , nisi ab annis sex aut septem , quæ iam & literas discere , & obedientiæ obtemperare possit , suscipiatur.

CAP. VII. *De his quæ relictis maritis ad Monasterium veniunt qualiter recipiuntur.*

**Q**Uæ autem viduæ , aut maritis relictis , aut mutatis vestibus ad Monasterium veniunt , non excipiantur , nisi antea de facultatiola sua cui voluerint chartas , aut donationes , aut venditiones faciant : ita ut nihil suæ potestati , quod peculiariter aut ordinare aut possidere videantur , reseruent : propter illud Domini præceptum : *Si vis perfectus esse , vende me fuerit , non potest meus esse discipulus.* Illæ verò , quæ adhuc vivis parentibus substantiam suam in potestate habere non possunt , aut adhuc minoris ætatis sunt , chartas tunc facere compellantur , quando res parentum in potestate habere potuerint , aut ad legitimam ætatem peruenerint. Ideo hoc sanctis animabus vestris præcipimus , timentes exemplum Ananix & Saphiræ , qui cum totum se dixissent Apostolis obtulisse , partem obtulerunt , partem sibi infideliter reseruauerunt ; quod scilicet nec decet , nec licet , nec expedit. Ancillam propriam nulli , nec Abbatissæ , liceat in suo seruitio habere : sed si opus habuerit , Abbatissa iubente , de iunioribus in solatio suo accipiat.

CAP. VIII. *Ut nulli liceat rem propriam possidere.*

**H**OC præcipuè vitium radicitus amputandum est de Monasterio ; ut nulla præsumat aliquid proprium habere , nec quicquam dare aut accipere , vel tenere , sine iussione matris , nullam omnino rem , neque tabulas , neque graphium , sed nihil omnino : quippe quibus nec corpora sua , nec voluntates licet habere in propria voluntate : omnia verò necessaria à matre Monasterij sperare. Nec quicquam liceat habere , quod ipsa non dederit , aut permiserit. Omniaque omnibus sint communia : ut scriptum est : *Et erant illis omnia communia.* Nec quæque summum aliquid esse dicat , aut vindicare præsumat. Quod si quæ hoc nequissimo vitio deprehensa fuerit delectari , tribus suppositionibus pœniteat.

CAP. IX. *Ut nemo peculiare opus sine iussione faciat.*

**N**EMO sane cuiuslibet operis vel artificij pro suo libito quicquam sine iussione eligat faciendum : sed quod faciunt in commune faciant , tam

sancto studio, & tam seruente alacritate quasi sibi ipsis fecerint; & quod faciunt matri præsentent, & illa cui opus fuerit dispenfet. Quæ autem contumax extiterit, hoc quod fecit priuetur, & centum percussioibus pœniteat. Quæ aliquid habebant in sæculo, quando ingrediuntur Monasterium, humiliter illud offerant matri, communibus vñbus profuturum. Quæ autem non habuerunt, non ea quærant in Monasterio, quæ nec foris habere potuerunt.

CAP. X. *Vt nulla despiciat sororem suam.*

**I**LLæ verò quæ aliquid habere videbantur in sæculo, non fastidiant neque despiciant sorores suas, quæ ad illam sanctam societatem ex paupertate venerunt: nec de suis diuitiis superbiant, quod eas Monasterio obtulerunt, quod eis in sæculo fruerentur. Qui prodest dispergere, & dando pauperibus pauperem fieri, si misera anima diabolica infletur superbia? Omnes ergo vnanimiter & concorditer viuite, & honore in vobis inuicem Deum, cuius templum esse meruistis. Quæ autem in hoc iactantiæ crimine, quod diximus, inuenta fuerit, suppositionem cum silentio faciat.

CAP. XI. *Vt nulli liceat semotam habere mansionem.*

**N**VLLi liceat semotam eligere mansionem, nec habeat cubiculum, armariolum, aut aliquid huiusmodi, quod peculiarius cum clau claudi possit: sed omnes diuisis lectulis in vna maneant domo. Quæ verò aliter agere, aut habere præsumperit, suppositionem sustineat. Quæ autem senes sunt, & infirmæ, ita illis conuenit obtemperare, & ordinate, vt non singulæ singulas cellas habeant, sed in vna recipiantur omnes, vbi & maneant, & studium habeant. Nunquam ibi, sicut & in reliqua congregatione, altiore voce loquantur, vt extra modum à foris audiantur: quod si fecerint, suppositionem silentij, aut quinquaginta percussiones accipiant.

CAP. XII. *Qualiter senes aut infirmæ gubernandæ sint.*

**I**LLud ante omnia sancta Mater, & venerabilis quæcunque fuerit Præposita, etiam cuiusque cura committenda est infirmarum; Primitiam etiam, vel Formariam admoneo, & contestor, vt vigilantissimè consideretis, & si sunt aliquæ de sororibus, quæ pro eo quod aut diligentius nutritæ sunt, aut defectiones forsitan stomachi frequentius patiuntur, & sicut reliquæ abstinere non possunt, aut certè cum grandi labore ieiunant, si illæ propter verecundiam petere non præsumunt, vos eis iubeatis à Celerariis dari, & ipsis vt accipiant ordinetis. Et certissimè confidant, quod quidquid dispensante aut iubente seniore qualibet hora perceperint, in illa repausatione Christum accipiant. Et sicut iam superius diximus, infirmarum cura ante omnia & super omnia adhibenda est; vt sicut reuera Christo, ita eis seruiatur: quia ipse dixit: *Infirmus fui, & visitastis me;* Matt. 25. Et, *quod fecistis vni de his minimis fratribus meis, mihi fecistis.* Sed ipsæ infirmæ sorores considerent in timore Dei sibi seruire, & non superfluitate sua contristent sorores suas seruientes sibi: quæ tamen patienter

portandæ sunt; quia de talibus copiosior merces acquiritur. Ergo cura maxima sit Matri, ne aliqua negligentia patiantur. Quibus infirmis sit cella per se deputata: & quæ eis obsequium impendat, timens Deum ac sollicita sit. Balnearum vsus infirmis quoties expedit offeratur, sanis autem, & maximè iuuenibus, tardius concedatur. Carnes verò à nulla vnquam in cibo manducentur: si fortè aliqua in desperata infirmitate fuerit, iubente & providente Abbatisa accipiat. Cum verò vires pristinas reparauerit, ad feliciorē redeat abstinentiæ consuetudinem. Et si hoc necessitas infirmarum exegerit, & Matri Monasterij iustum visum fuerit, cellariolum & coquinam suam infirmæ in commune habeant.

CAP. XIII. *Qualiter ad officium diuinum curratur.*

**A**D horam diuini officij, mox vt auditum fuerit signum, relictis omnibus qualibet fuerint in manibus, summa cum festinatione curratur; cum grauitate tamen, vt non scurrilitas inueniat fomitem. Nihil tamen operi Dei præponatur. Quæ verò nocturnis vigiliis ad Gloriam primi non occurrerit psalmi, non stet in ordine suo in choro, sed vltima omnium stet, aut in loco quem talibus negligentibus seorsum constituerit Senior: vt videatur ab ipsa, vel ab omnibus, vsque dum completo opere Dei publica satisfactione pœniteat. Ea verò, quam superius diximus, horis diurnis obseruatio consuetur.

CAP. XIV. *De his quæ ad opus Dei vel ad mensam tardè occurrerint.*

**Q**UÆ signo tacto tardius ad opus Dei vel ad opera venerit, increpationi, vt dignum est, subiacebit: quæ si secundò aut tertio admonita emendare noluerit, regulari subiaceat disciplinæ. Similiter quæ ad mensam ad primum capitulum orationis non fuerit, & occupata in aliquo per iussionem non fuerit, non permittatur ad mensam communis participationis sedere; sed sequestrata à consortio omnium reficiatur sola, sublata ei portione sua de vino. Eadem verò patiat, quæ non fuerit præsens ad illum versum qui post cibum dicitur.

CAP. XV. *De significanda hora operis Dei.*

**N**VNCIANDA hora operis Dei die noctuque sit cura Abbatisæ: aut ipsa nunciare debet, aut alicui sollicitæ sorori iniungat hanc curam, vt omnia horis competentibus compleantur. Psalmos vel Antiphonas post Abbatisam ordine suo quibus iustum fuerit imponant; cantare autem & legere non præsumat, nisi quæ potest ipsum officium implere; vt edificentur audientes: quod cum humilitate, & grauitate, & timore faciat, & cui iusserit Abbatisa.

CAP. XVI. *De Oratorio Monasterij.*

**O**RATORIUM hoc sit quod dicitur: nec ibi quicquid aliud geratur aut condatur, excepto opere Dei. Omnes cum summo silentio exeant; & agatur reuerentia Dei, vt soror quæ fortè sibi peculiariter vult orare, non præpediatur alterius improbitate. Sed & si altera vult sibi fortè secretius orare, simpliciter intret & oret, non in clamorosa voce, sed in lacrymis &



intentione cordis. Ergo quæ simile opus non facit, non permittatur expleto opere Dei remanere, sicut dictum est, ne alia impedimentum patiat.

CAP. XVII. *De disciplina psallendi in Oratorio.*

**V** Bique credimus diuinam esse præsentiam, & oculos Domini contemplantis bonos & malos: maxime tamen hoc sine aliqua dubitatione credimus, cum ad opus diuinum assistimus. Ideo semper memores simus, quod ait Propheta: *Seruite Domino in timore*: & iterum: *psallite sapienter*: & *In conspectu Angelorum psallam tibi*. Ergo consideremus qualiter oporteat in conspectu diuinitatis & Angelorum eius esse, & sic stemus ad psallendum, ut mens nostra concordet voci nostræ. Diu in oratorio psallitur: fabulare omnino non liceat. Cum verò psalmis & hymnis vacatis Deo, id versetur in corde quod præfertur in voce, & quæ subriterit in cursu orationum, sex percussionibus; si in sonum eruperit risus, suppositionem.

Psal. 2.

Psal. 46.

Psal. 137.

CAP. XVIII. *De reuerentia orationis.*

**S**I cum hominibus potentibus volumus aliqua suggerere, non præsumimus nisi cum humilitate & reuerentia; quanto magis Domino Deo vniuersorum cum omni humilitate & puritatis deuotione supplicandum est? Et non in multiloquio, sed in puritate cordis & compunctione lacrimarum nos exaudiri credamus. Et ideo brevis debet esse & pura oratio; nisi fortè ex affectu inspirationis diuinæ gratiæ protendatur. In conuentu tamen omnino breuietur oratio: & facto signo à Priore omnes pariter surgant.

CAP. XX. *Qualiter silentio studere debeant sorores.*

**O**Mni tempore omnique loco silentio studere debent ancillæ Christi, maxime tamen nocturnis horis. Et ideo excentes à completo-riis nulla sit licentia denuo loqui cuiquam aliquid, vsque mane post secundam celebratam in conuentu: quod in loco veniam petentes, ac singulæ confessionem dantes pro cogitationibus carnalibus atque turpibus: vel nocturnis visionibus, demum pariter orantes dicant: *Fiat Domine misericordia tua super nos, quemadmodum sperauimus in te*. Sic quoque vicissim dicant ad seniores: da commeatum vestimentum mutare, & quod opus fuerit fieri.

Psal. 32.

CAP. XX. *Quando vacent lectioni.*

**A** Secunda hora vsque ad tertiam, si aliqua necessitas ut operentur non fuerit, vacent lectioni: reliquo verò spatio diei faciant opera sua, & non se fabulis occupent, propter illud Apostoli: *Cum silentio operantes*; & illud: *In multiloquio non effugies peccatum*. Et ideo hoc vobis omnino loquendum est, quod ad ædificationem vel vtilitatem animæ pertinet: cum autem necessitas operis exegerit, tunc loquantur. Reliquis verò in vnum operantibus vna de senioribus legat: de reliquo meditatio verbi Dei de corde non cesset. Si autem, ut diximus, aliqua compellit necessitas, ut infra hunc terminum operari debeat, in arbitrio sit Matris, qualiter

2. Thes. 3.  
Prou. 10.

Phil. 2.

absque murmure fiat. Omnia quæcunque opera facitis, quando lectio non legitur, de diuinis scripturis semper aliquid ruminare. Nemo cum murmuratione aliquid faciat, ne simili murmuratorum iudicio pereat; secundum illud Apostoli: *Omnia facite sine murmurationibus*. Humiles semper inuicem sitis, non solum senioribus, sed & coequalibus & iunioribus, ne Deus superbis resistat: ne inflata per viam angustam transire non possint. Quicquid vobis à senioribus fuerit imperatum, sic accipite tamquam si de cælo sit ore Dei prolatum. Nihil reprehendas, nihil despicias, in nullo penitus non murmurare præsumas: quia in Monasterio seruire venisti, non imperare: obedire potius, quam iubere. Totum sanctum, totum iustum, totum vtile iudica, quicquid aut tibi, aut aliis videris imperari.

CAP. XXI. *Si omnes æqualiter debent necessaria accipere.*

AA, 4.

SCRIPTUM est: *diuidebatur singulis prout cuique opus erat*: ubi nunc dicimus, ut personarum, quod absit, acceptio sit, sed infirmarum consideratio: ut quæ minus indiget, agat Deo gratias & non contristetur: quæ verò plus indiget, humilietur pro infirmitate, non extollatur pro misericordia; & ita omnia membra erunt in pace. Ante omnia ne murmurationis malum pro qualicumque causa in aliquo qualicumque verbo vel significatione appareat: quod si deprehensa quæ fuerit, districtiori disciplinæ subdatur.

CAP. XXII. *Qualis debet esse ancilla Dei dum castigatur.*

QUÆ pro qualibet culpa ammonetur, castigatur, corripitur, arguenti respondere non præsumat: quod si fecerit, regulari subiaceat disciplinæ. Quæ aliquid ex his quæ iubentur implere noluerit, à communione orationis, vel à mensa, secundum qualitatem culpæ, sequestrabitur.

CAP. XXIII. *Qualiter ad confessionem omnibus diebus veniant.*

Ecclef. 1.

INTER cæteras Regulæ obseruantias hoc magis super omnia tam iuniores quam etiam seniores monemus sorores, ut assidue & indefinente studio tam de cogitatu, quam etiam de verbo inutili, vel opere, seu aliqua commotione animi, confessio omnibus diebus, omnibus horis, omnibusque momentis semper donetur; & matri spirituali nihil occultetur, quia statutum est hoc à sanctis Patribus, ut detur confessio ante mensam, siue ante lectulorum introitum, aut quandocunque fuerit facile, quia confessio pœnitentiæ de morte liberat. Ergo nec ipsa parua à confessione sunt negligenda cogitata, quia scriptum est: *qui parua negligit, paulatim desinit*.

CAP. XXIV. *De his quæ ad lectum suum aliquid occultare præsumperint.*

QUÆ soror ad lectulum suum, quæ ad manducandum, vel ad bibendum pertinent, præsumperit occultare, publicè coram omnibus arguatur;

arguatur: & tunc demum palam cunctis præsensibus obiurgata suppositionem sustinere cogatur.

CAP. XXV. *De his que non custodierint benedictionem ad mensam, & cetera similia.*

**S**I comederit vel biberit non petens benedictionem, & non respondens, Amen, sex percussioibus: & quæ non signauerit cochlear quo lamibit, sex: & quæ locuta fuerit comedens, non in necessitate alterius sororis, sex: vel pertuderit cultello mensam, sex: & si dixerit suum proprium aliquid, sex percussioibus emendet.

CAP. XXVI. *De his que in coquina aliquid effuderint.*

**Q**Uæcumque de sororibus cui sollicitudo coquinandi vel ministrandi commissa est, quantum quid effuderit, oratione in Ecclesia post expletum cursum, ita ut sorores pro ea orent, emendare statuitur. Similiter pœniteat quæ humiliationem in synaxi, id est, in cursu oblita fuerit, hæc est humiliatio in Ecclesia post finem vniuscuiusque psalmi. Simili modo quæ perdidit micæ, oratione in Ecclesia emendari cogatur. Ita tamen hæc parua pœnitentia iudicetur, si paruum quid effuderit; quod si ex negligentia, vel obliuione, seu transgressione securitatis, tam in liquidis quam in aridis amplius solito perdidit, longa venia in Ecclesia; dum duodecim psalmos ad duodecimam canunt, prostrata nullum membrum mouens pœniteat, & quæ non custodierit ordinem ad sacrificium, sex percussioibus emendetur.

CAP. XXVII. *De his que sine oratione egrediuntur domo.*

**Q**Uæ egrediens domum ad orationem poscendam non se humiliauerit, & post acceptam non se signauerit, & crucem non adierit, duodecim percussioibus; & quæ orationem ante opus aut post oblita fuerit, duodecim percussioibus: aut quæ regrediens domum, orationem petens non se curauerit intra domum, duodecim percussioibus emendetur: vel quæ facit cursus non necessarios, duodecim percussioibus emendetur.

CAP. XXVIII. *Quæ proferit fabulas otiosas ad aliam, & quæ se excusauerit, & dicit consilium contra consilium.*

**F**Abulas otiosas proferens ad alteram, & statim semetipsam reprehendens, venia tantum sufficit: si autem non se reprehenderit, tractantes eas suppositione silentij aut quinquaginta percussioibus pœniteant: excusationem proferens cum simplicitate, quando in aliquo discutitur, & non dicit statim veniam petens, mea culpa, pœnitet me: consilium contra consilium cum simplicitate promens, quinquaginta percussioibus pœniteat.

CAP. XXIX. *De his que reprehendunt aliarum opera & cetera similia.*

**R**eprehendens aliarum sororum opera aut detractans: proferens correctionem contra correctionem, hoc est castigans castigantem se, tribus suppositionibus pœniteat. Quæ soror abscondit aliquod crimen

in sorore sua usque dum corrigatur de alio vitio vel de ipso, & tunc prius profert illud aduersum sororem suam, tribus suppositionibus: vel quæ detrahit alicui sorori, aut audit detrahentem non corrigens eam, tribus suppositionibus: & quæ aliquid cum contradictione aut tristitia promittit, simili modo tribus suppositionibus pœniteat. Quæ aliquid reprehendens Præpositæ non vult indicare, usque dum matri seniori indicet, similiter pœniteat. Quæ soror vituperat alicui sorori obsequium dandum, murmurat & dicit, non faciam nisi dicat senior aut secunda, similiter tribus suppositionibus. Quæ consanguineam suam docet aliquam decentem artem, & aliud quodlibet à seniore fuerit impositum, dixerit, melius ut lectionem discat, tribus suppositionibus pœniteat.

CAP. XXX. *De his quæ cum Præposita sua superbe contendunt.*

**Q**uæ ad Præpositam suam audet dicere; non tu iudicabis causam meam, sed nostra senior aut ceteræ sorores, quadraginta diebus pœniteat: nisi ipsa humiliter dicat, pœnitet me quod dixi.

CAP. XXXI. *De his quæ non postulant veniam correctæ & cetera similia.*

**Q**uæ non postulat veniam correctæ, suppositione: quæ visitauerit alias in cellis earum sine interrogatione, simili modo pœniteat: aut in coquina post nonam ierit, suppositione: aut extra vallum, id est extra septa Monasterij sine interrogatione ierit, suppositione pœniteat.

CAP. XXXII. *Vt nulla alterius teneat manum, nec iuencule se inuicem appellent.*

**P**rohibetur ne pro dilectione aliqua vlla alterius teneat manum, siue steterit, siue ambulauerit, siue sederit. Quod si fecerit, duodecim percussibus emendetur. Iuenculæ, quibus imponitur terminus, ut non se appellent inuicem: si transgressæ fuerint, quadraginta percussibus pœniteant.

CAP. XXXIII. *Vt sedentes ad mensam taceant.*

**S**edentes ad mensam taceant, & animo lectioni intendant. Cum autem selectio cessauerit, meditatio sancta de corde non cesset. Si verò aliquid opus fuerit, quæ mensæ præest sollicitudinem gerat, & quod est necessarium nutu magis quam voce petat. Nec solæ vobis fauces sumant cibum, sed & aures audiant Dei verbum. Nam quæ loqui præsumperit; vel viginti vel triginta percussiones accipiat. Pœnitentias verò minutas iuxta mensam si fecerit Præposita mensæ imponat, amplius quam viginti quinque percussiones simul non dentur.

CAP. XXXIV. *Qualiter aut quibus temporibus genua flectantur.*

**P**œnitentes sorores, & indigentes pœnitentia psalmorum; hoc est, quibus necesse est ut psalmos adhuc pro visione nocturna decantent: quia pro illusione diabolica, ac pro modo visionis viginti sex psalmos in ordine, aliz quindecim, aliz duodecim indigentes pœnitentia psalmos decantare debent: quamuis ergo in nocte Dominica, & tempore Quinquagesimæ genua flectant. In commune autem omnes sorores omni-

bus diebus & noctibus tempore orationum in fine omnium psalmodum genua ad orationem, si non infirmitas corporis offecerit, flectere æquo moderamine debeat, sub silentio dicentes: *Deus in adiutorium meum intende; Domine ad adiuuandum me festina.* Quem versiculum postquam in oratione tacite decantauerint, æqualiter à flexu orationis surgant, excepto diebus Dominicis, & à prima die sancti Pasche, vsque ad Quinquagesimum diem, in quo moderate tempore psalmodiæ humiliautes, genua non flectent. Et quando ad communionem altaris accedunt, ter se humilient.

CAP. XXXV. *Ut iurare omnino non liceat.*

**I**uramentum vel maledictum, velut venenum diaboli sugere & vitare contendat, quod si fecerit, duabus silentij suppositionibus, & centum percussionibus poeniteat.

CAP. XXXVI. *De Quadragesima obseruatione.*

**I**cet omni tempore vita Monachæ Quadragesimæ debet obseruationem habere, tamen quia paucorum est ista virtus, ideo suademus istis diebus Quadragesimæ omni puritate vitam suam custodire; omnes pariter sordes, & negligentias aliorum temporum his diebus sanctis diluere. Quod tunc digne fit, si ab omnibus vitiis temperamus; orationi cum fletibus, lectioni, & compunctioni cordis, aut abstinentiæ operam damus. Ergo his diebus augeamus nobis aliquid solito penso seruitutis nostræ orationes peculiare, ciborum & potus abstinentiam; ut vnaquæque super mensuram sibi indictam aliquid propria voluntate cum gaudio sancti Spiritus offerat Deo; id est, subtrahat corpori suo de cibo, de potu, de somno, de loquacitate, de scurrilitate; & cum spiritali desiderio gaudium sanctum Paschæ expectet. Hoc ipsum tamen quod vnaquæque offert, Abbatissæ suæ suggerat, & cura eius faciat oratione & voluntate. Quicquid sine matris spiritalis permissione fit, præsumptioni deputabitur & vanæ gloriæ, non mercedi.

CAP. XXXVII. *Quot sunt gradus humilitatis,*

**P**rimus humilitatis gradus est, obedientia sine mora. Hæc conuenit his, quæ nihil sibi à Christo carius aliquid existimantes, propter seruitutinem sanctum quod professæ sunt, seu propter metum gehennæ, vel gloriam vitæ æternæ, mox ut aliquid imperatum à maiore fuerit, ac si diuinitus imperetur, moram pati nesciunt in faciendo, de quibus Dominus dicit: *Obauditu auris obaudiuit mihi.* Et idem dicit doctoribus: *Qui vos audit, me audit.* Ergo tales relinquunt statim quæ sua sunt, & voluntatem propitiæ deserentes, mox exoccupatis manibus, & quod agebant imperfectum relinquunt, vicino obedientes pede, iubentis vocem factis sequuntur, vel vno momento prædictæ senioris iussione etiam contraria sustinere debere. Dicit ex persona sufferentium: *propter te mortificamur tota die, estimata sumus ut oues occisionis; & securæ de spe retributionis diuinæ, subsequuntur gaudentes, & dicentes: Sed hæc omnia superamus propter eum, qui dilexit nos, & eadem alio loco scriptura dicit: Probasti nos Domine, igne nos examinasti sicut examinatur argentum: & induxisti nos in laqueum, posuisti*

Psal. 117.  
Matt. 10.

Psal. 43.

Rom. 8.

Psal. 65.

- tribulationes in dorso nostro.* Et ut ostendat sub Priore debere nos esse; subsequitur dicens: *Imposuisti homines super capita nostra.* Ideo angustam viam arripiunt, vnde Dominus dicit: *Angusta via est, quæ ducit ad vitam.* Ut non suo arbitrio viuentes, vel desiderijs suis & voluptatibus obediētes, sed ambulantes alieno iudicio & imperio, in Cænobio degentes seniotem sibi præesse desiderant. Sine dubio hæc tales illam Domini imitantur sententiam, quæ dicit: *Non veni facere voluntatem meam, sed eius qui misit me.* Sed hæc ipsa obedientia tunc acceptabilis erit Deo, & dulcis hominibus, si quod iubetur non trepidè, non tardè, aut cum murmurio, vel cum responsione nolentis efficiatur: quia obedientia quæ maioribus præbetur, Deo exhibetur, ipse enim dixit: *qui vos audit, me audit.* Nam si talis non fuerit obedientia, non erit acceptabilis Deo, qui ait: *Qui non accipit crucem suam, & sequitur me, non est me dignus.* Et ideo dicit de digno discipulo: *ut ubi ego sum, ibi & minister meus mecum erit.*
- Matt. 7.  
Ioan. 5.  
Matt. 10.  
Luc. 14.  
Ioan. 11.

## CAP. XXXVIII.

- Secundus humilitatis gradus est, propriam quæque non amare voluntatem, & desideria sua non debet implere: sed vocem illam Domini factis imitetur, dicentis: *Non veni facere voluntatem meam, sed eius qui me misit,* item dicit scriptura: *Voluntas habet penam, & necessitas parit coronam.*
- Ioan. 6.

## CAP. XXXIX.

- Tertius humilitatis gradus est, ut quæque pro Dei amore omni obedientia se subdat maiori: imitans Dominum, de quo dicit Apostolus: *factus obediens usque ad mortem.*
- Phil. 2.

## CAP. XL.

- Quartus humilitatis gradus est, si in ipsa obedientia dutis & contrariis rebus, vel etiam quibuslibet irrogatis iniurijs, tacita conscientia pœnitentiam amplectatur; ut sustinens non lascescat vel discedat, dicente sancta scriptura: *Qui perseverauerit usque in finem, hic saluus erit,* & item; *Confortetur cor tuum, & sustine Dominum.*
- Matt. 10.  
Psal. 26.

## CAP. XLI.

- Quintus humilitatis gradus est, si omnes cogitationes malas cordi suo aduenientes, vel mala à se absconsè commissa per humilem confessionem seniori suæ non celauerit: hortans nos de hac re scriptura dicit: *Revela Domino vitam tuam, & spera in eum.* Et iterum dicit: *Confitemini Domino quoniam bonus, quoniam in seculum misericordia eius.* Et item Propheta. *Delictum meum cognitum tibi feci, & iniustitias meas non abscondi. Dixi, pronuntiabo aduersus me iniustitias meas Domino, & tu remisisti impietatem peccati mei.*
- Psal. 36.  
Psal. 105.  
Psal. 31.

## CAP. XLII.

- Sextus humilitatis gradus est, si omni utilitate vel extremitate contenta sit Monacha, & ad omnia quæ sibi iniunguntur, velut operaria malam se iudicet & indignam: dicens sibi cum Propheta: *Ad ni-*
- Psal. 91.

*hilum redacta sum, & nesciui: ut iumentum facta sum apud te, & ego semper tecum.*

## CAP. XLIII.

**S**eptimus humilitatis gradus est, si omnibus se inferiorem & viliorero. Non solum sua lingua pronunciet, sed ex intimo cordis credat affectu humilians se, & dicat cum Propheta: *Ego autem sum vermis, & non homo, opprobrium hominum, & abiectio plebis. Exaltata sum, & humiliata, & confusa, & item: Bonum mihi quia humiliasti me, ut discam mandata tua.* Psal. 117. Psal. 87. Psal. 118.

## CAP. XLIV.

**O**ctauus humilitatis gradus est, si nihil agat Monacha, nisi quod communis Monasterij Regula, vel maiorum cohortantur exempla.

## CAP. XLV.

**N**onus humilitatis gradus est, ut linguam ad loquendum prohibeat. Monacha, & taciturnitatem habens usque ad interrogationem non loquatur: dicente scriptura, *quia in multiloquio non effugietur peccatum;* Prou. 10. & quia *vir linguosus non dirigetur super terram.* Psal. 119.

## CAP. XLVI.

**D**ecimus humilitatis gradus est, si non sit facilis ac prompta in risu, quia scriptum est. *Stultus in risu exaltat vocem suam.* Eccl. 21.

## CAP. XLVII.

**V**ndecimus humilitatis gradus est, si cum loquitur Monacha, leniter & sine risu, humiliter & cum grauitate vel pauca verba & rationabilia loquatur, & non sit clamosa in voce, sicut scriptum est: *Sapiens verbis innotescit paucis.*

## CAP. XLVIII.

**D**odecimus humilitatis gradus est, si non solum corde, sed etiam corpore Monacha humilitatem videntibus se semper indicet: id est, in opere, in oratorio, in Monasterio, in horto, in via, vel ubicumque sedens, ambulans, vel stans inclinato sit semper capite, defixis in terra aspectibus, ream se omni hora de peccatis suis existimans, iam se tremendo iudicio Dei representari existimet: dicens sibi in corde semper illud, quod Publicanus ille Euangelicus fixis in terram oculis dixit: *Domine non sum dignus ego peccator leuare oculos meos ad celum.* Luc. 18. Et item cum Propheta: *incuruatus & humiliatus sum usquequaque.* Psal. 118. Ergo his omnibus humilitatis gradibus ascensis Monacha ad caritatem Dei perueniat illam, quæ per festam foras mittat timorem: per quam vniuersa, quæ prius non sine formidine obseruabat, absque villo labore velut naturaliter ex consuetudine incipiet custodire: non iam timore gehennæ, sed amore Christi, & consuetudine ipsa bona, & dilectione virtutum: quam Dominus iam in operarium suum mundum à vitiis & peccatis Spiritu sancto dignatus est demonstrare. 1. Ioan. 4.

## CAP. XLIX. De taciturnitate.

**S**ilentij regula diligenter custodienda decernitur; quia scriptum est: *Cultus autem iustitiæ silentium & pax;* & ideo ne reatus de verbositate. Isa. 32.



Prou. 10.  
Psal. 38.

tate conquiratur, exceptis vilitatibus ac necessariis, opus est vt taceatur. Quia iuxta scripturam, *in multiloquio non deeris peccatum*; & alibi ait: *Posui ori meo custodiam: obmutui & humiliatus sum, & silui à bonis*. Hic ostendit Propheta, si à bonis eloquiis interdum propter taciturnitatem debet tacere, quanto magis à malis verbis propter poenam debet cessare: Tacendum igitur est, & cum caute!a & ratione loquendum: ne aut detractiones, aut tumida contradictiones in loquacitatem vitiosam ac superfluam prorumpant. Ergo quamuis de bonis & sanctis ædificationum eloquiis, perfectis Christi sororibus propter taciturnitatis grauitatem rara loquendi concedatur licentia. Quia vt superius diximus; *in multiloquio non effugies peccatum*; & alibi: *Mors & vita in manibus lingue*. Et si altiori voce præsumpserit, duabus silentij suppositionibus, aut quinquaginta percussionibus poeniteat: & si iterare præsumpserit, centum. Scurritates vero, vel verba otiosa & risum mouentia æterna clausura in omnibus locis damnamus, & ad tale eloquium famulæ Christi aperire os non permittimus.

Prou. 10.  
Psal. 14.

#### CAP. L. De custodia oculorum.

**N**Vlla in vobis concupiscentia oculorum cuiuscunque viri diabolo instigante consurgat. Ne dicatis vos animos habere pudicos, si oculos impudicos habeatis: quia impudicus oculus impudici cordis est nuntius. Nec peccare debet quæ in virum non simpliciter conuertit aspectum, ab aliis se non videri cum hæc facit. Videtur omnino à quibus videri se non arbitrari. Sed etsi lateat, vt à nemine hominum videatur, quid faciet de illo superinspector. cui latere omnino non potest? Timeat ergo displicere Deo, cogitet ne malè placeat viro. Quando ergo simul statis, si aut Provisor Monasterij, aut aliquis cum eo virorum superuenerit, inuicem vestram pudicitiam custodite. Deus enim qui habitat in vobis, etiam isto vos modo custodit. Non sit notabilis habitus vester, nec affectetis vestibus placere, sed moribus, quod vestrum decet propositum.

#### CAP. LI. Vt peccatum alterius non celetur.

**S**I quam verò liberius quam decet agere videritis, matri in notitiam sponite. Nec vos iudicetis esse maleuolas, quando hoc sancto animo indicatis; magis enim innocentes non estis, & peccati ipsius participes vos facitis, si sororem vestram, quam castigando corrigere potuistis, tacendo perire permittatis. Si enim vulnus haberet in corpore, aut esset à serpente percussa, & vellet hoc occultare, dum timet secari, nonne hoc crudeliter taceretur, & misericorditer proderetur? Quanto magis ergo consilia diaboli & insidias illius manifestare debuistis: ne in deterius vulnus peccati augeatur in corde, & concupiscentiæ malum diutius nutriatur in pectore? Et hoc facite cum dilectione sororum, & odio vitiorum.

#### CAP. LII. Vt inter se litigare, vel conuitia dicere non debeant.

**E**T quamuis non solum cogitari, sed omnino ite credi debeat, quod sanctæ Virgines duris sermonibus per conuitia mordeant se: tamen si fortè, vt se habet humana fragilitas, in tantum nefas aliquæ de sororibus

ausæ fuerint diabolo instigante prorumpere, vt aut furtum faciant, aut in se inuicem manus mittant, instum est, vt legitimam disciplinam accipiant, à quibus Regulæ instituta violantur. Necesse est enim, vt in eis impleatur illud, quod de indisciplinatis filiis per Salomonem prædixit Spiritus sanctus: *Qui diligit filium suum, asiduatur illi flagellum.* Et iterum: *tu virga eum cedis, animam illius de inferno liberabis.* Disciplinam tamen ipsam in præsentia Congregationis accipiant, pro illo Apostoli: *Peccantes coram omnibus corripere.* Lites nullas habeatis, secundum illud Apostoli: *Seruum Domini non oportet litigare.* Si seruum Domini litigare non conuenit, quanto magis ancillam Dei non expedit? cuius quo verecundior est sexus, tanto animus debet esse modestior. Aut si fuerint, quam celerius finiantur: ne ira crescat in odium, & festuca conuertatur in trabem, & efficiatur anima homicida. Sic enim legitis: *Qui odit fratrem suum homicida est.* Et, *leuantes sanctas manus suas sine ira & disceptatione.* Quæcunque conuiit, vel maledicto, vel etiam crimine obiecto læserit sororem suam, meminerit culpam satisfactione purgare. Quod vitium si iterare præsumpserit, distractione seuerissima feriat, vsquequo per satisfactionem recipi mereatur. Iuniores præcipuè senioribus deferant. Si autem, vt fieri solet, stimulante diabolo inuicem se læserint, inuicem sibi veniam petere, & debita relaxare debebunt: propter orationes, quas vtique quantum crebriores, tantum puriores habere debent. Quod si illa, cui veniam petierit, indulgere forori suæ noluerit, à communione separetur, & timeat illud: *Quod si non dimiserit, non dimittetur ei.* Quæ autem nunquam vult petere veniam, aut ex animo non petit; aut cui petitur, si non admitat, sine causa in Monasterio esse videtur. Attamen vsquequo satisfaciatur pœnitendo, & forori suæ relaxet, nunquam in Congregatione societur. Proinde vobis à verbis durioribus parcite: quæ si emissæ fuerint, non pigeat ex ipso ore proferre medicamentum, vnde facta sunt vulnera. Quando autem vos, quæ Præpositæ estis, necessitas disciplinæ pro malis moribus coercendis dicere verba durâ compellit, si etiam in ipsis modum vos excessisse fortasse sentitis, non à vobis exigitur vt veniam postuletis; ne apud eas, quas oportet esse subiectas, dum nimium seruatur humilitas, regendi frangatur auctoritas. Sed tamen petenda venia est ab omnium Deo, qui nouit etiam, quam plus iuste corripitis, quanta beneuolentia diligitis.

CAP. LIII. *Vt nulla à parentibus suis sine iussione aliquid accipiat.*

N Vllatenus liceat forori à parentibus suis, neque à quoquam hominum, nec sibi inuicem literas, eulogias, vel quælibet munuscula accipere aut dare sine præcepto Abbatissæ. Quod si etiam à parentibus suis ei quicquam directum fuerit, non præsumat suscipere illud, nisi prius indicatum fuerit matri; quod si iusserit suscipi, in ipsius sit potestate, aut ei, si necesse est, aut cui illud iubeat dare. Quæcumque autem, quod Deus non pariat, in tantum progressu fuerit malum, vt occulte literas ab aliquo, aut quælibet mandata aut munuscula accipiat, si hoc vltro confessa

Eccles. 30.

Prout. 23.

1. Tim. 5.

2. Tim. 2.

1. Ioan. 3.

1. Tim. 2.

Mat. 6.

fuerit, indulgentiam mereatur, & oretur pro ea. Si autem celans proditur vel conuincitur, secundum instituta Monasterij Regulæ grauius emendetur. Simili etiam districtioni subiaceat, si vel ipsa cuicumque literas, aut munuscula transmittere sacrilegio ausu præsumpserit. Pro affectu tamen parentum aut cuiusque noticia, si aliquas transmittere voluerit literas, aut eulogias panis, matri suggerat, & si ipsa permiserit, per Potesticiarias det; & ipsæ de nomine illius transmittant cui voluerit ipsa; sine Præposita, aut Posticiaria per se nulla præsumat nec dare, nec accipere à quoquam, quod si præsumpserit, tribus suppositionibus pœniteat.

C A P. LIV. *Nt nulla cuiuslibet alicuius filiam in Baptismo excipiat.*

**N**ulla cuiuslibet filiam in Baptismo neque diuitis neque pauperis præsumat excipere. Neque ad enutriendum, neque ad docendum nobilium vel pauperum filiarum recipiantur, nisi quæ in Monasterio sub habitu religionis, sicut & reliquæ, perseuerent.

C A P. LV. *Qualiter Prouisores Monasterij, vel reliqui viri intra Monasterium debeant introire.*

**A**n te omnia propter custodiendam famam vestram nullus virorum in secretam partem Monasterij, aut in oratorium introeat, excepto Episcopo, Prouisore, & Presbytero, & Diacono, & vno vel duobus Lectioribus, quos & ætas & vita commendat, qui aliquoties Missas facere debeant. Cum verò aut lecta retractanda sunt, aut ostia, aut fenestræ sunt componendæ, aut aliquid huiusmodi reparandum artifices tantum & serui ad operandum, si aliqua necessitas extiterit, cum Prouisore introeant; sed nec ipsi sine scientia aut permisso matris. Ipse vero Prouisor in interiorē partem Monasterij, nisi pro his utilitatibus quas superius diximus, nunquam introeat; & aut nunquam aut difficile sine Abbatissa, aut alio honestissimo teste: vt sanctæ secretum suum, sicut decet & expedit, habeant.

C A P. LVI. *Nt neque matrone seculares ingredi permittantur, vel puella.*

**M**atronæ etiam seu puellæ seculares, siue viri nobiles, atque ignobiles in seculari habitu constituti, qui vel ob visitationes parentum, vel orandi seu inuiscendi gratia ad Monasterium veniunt, intus aliter introire non permittantur, nisi hi, qui religiosi & Deum timentes esse videntur, & quos Mater Monasterij ob vitæ meritum dignos iudicauerit. Cumque partes quas ipsa voluerit circumierint, protinus aut in salutatorium, aut ad portam redeant; vbi deinceps, si Abbatissæ visum fuerit, illa si voluerit præsentē vel reliquis, eulogias accipiant, aut reliquum quod offerre decreuerint. Hæ vero quæ ministrant & omnes non alibi nisi in refectorio, vbi decretum est, aliquid accipere præsumant.

CAP. LVII. *Qualiter Abbatisſa in ſalutatorium ad ſalutandum exeat, vel qualiter ancille Domini ſuos parentes debeant ſalutare.*

**O**bfervandum eſt etiam ne Abbatiſſa ad ſalutandum in ſalutatorium ſine digno honore ſuo, hoc eſt, ſine duabus aut tribus ſororibus ſenioribus procedat. Similiter & reliquæ ſorores ad ſalutandum parentes vel quolibet Religioſos, ſine duabus aut tribus teſtibus, quas Abbatiſſa iuſſerit, non procedant. Nec ſola cum ſolo loqui vel momento temporis permittatur, nec veſtimenta eorum ad lauandum vel tingendum, aut cuſtodendum, vel ad conſuendum accipiant. Si quæ tamen de alia ciuitate ad requirendam filiam ſuam, aut ad Monasterium viſitandum venerit, ſi Religioſa eſt, & Abbatiſſæ viſum fuerit, debet ad conuiuium vocari; reliquæ verò penitus nuiquam. Quia ſanctæ Virgines & deuotæ magis Chriſto vacantes pro vniuerſo populo orare debent, quam corporalia conuiuii præparare. Si quis vero gerinanam aut filiam ſuam, vel quamlibet parentem aut ſibi cognatam videre voluerit, præſente Præpoſita vel qualibet ſeniore ei colloquium non negetur. Epiſcopi, Abbates, vel reliqui Religioſi, quos magna vita commendat, ſi petierint, debent cauſa orationis introire. Obſervandum eſt etiam, vt ianua Monasterij opportunis horis ſalutantibus pateat.

CAP. LVIII. *Ut conuiuium nulli præparetur.*

**C**onuiuium etiam his perſonis, hoc eſt, Epiſcopis, Abbatibus, Monachis, Clericis, ſecularibus viris; mulieribus in habitu ſecularium, nec Abbatiſſæ parentibus nec alicuius ſanctimonialis, nunquam nec in Monasterio, nec extra Monasterium præparetis. Nec Epiſcopo huius ciuitatis, nec Prouiſori quidem ipſius Monasterij conuiuium faciatis, neque Abbatiſſa, aut quælibet vlla ex ſororibus conuiuium Epiſcopi, aut parentis, vel cuiuſlibet perſonæ, nullo vnuam tempore interius ſiue exterius Monasterij adire præſumat. Sed ſi aliquis tam de parentibus propinquis, vel quicunque eis voluerit impendere aliquid, quantum decreuerit per Portarias in Monasterium tranſmittat; & ipſæ per ſe ſecundum ſanctam conſuetudinem ſibi, vt expedit, præparent.

CAP. LIX. *Ne Abbatiſſa extra congregationem reſciat.*

**A**bbatiſſa, niſi inæqualitate aliqua aut infirmitate, vel occupatione compellente, extra congregationem ſuam penitus non reſciat.

CAP. LX. *Quales ad poſticium eligi debeant.*

**A**d portam Monasterij ponatur ſoror ſenex & ſapiens, quæ ſciat accipere reſponſum aut reddere: cuius maturitas eam non ſinat vagari. Quæ Portaria cellam debet habere iuxta portam, aut duas aut tres iuniores in ſuo ſolatio; vt venientes ſemper præſentem inueniant, à qua reſponſum accipiant. Pro qua re omnes quæ poſticium obſeruauerint confeſſor coram Deo & Angelis eius, vt nihil de Monasterio permittant dari, vel à foris in Monasterium intus acquieſcant excipi, extra conſcientiam vel conſilium Abbatiſſæ. Tamen vt aſolet, Abbatiſſa cum à ſalutatoribus occupata fuerit, Poſticiariæ præpoſitæ oſtendant quodcunque exhibitum fuerit,

Quam rem si implere neglexerint, & illæ Posticariæ, & illæ quæ excipiunt, propter transgressionem sanctæ Regulari distinctionem Monasterij grauissimam sustinebunt.

CAP. LXI. *De Celleraria Monasterij qualiter esse debeat.*

**C**elleraria Monasterij eligatur de Congregatione sapiens, maturis moribus, sobria, non multum edax, non elata, non iniuriosa, non tarda, non prodiga, sed timens Deum: quæ omni Congregationi sit vt mater, curam gerat de omnibus: sine iussione Abbatissæ nihil faciat; quæ iubentur custodiat: sorores non contristet. Si qua soror fortè aliqua irrationabilia postulat, non spernendo eam contristet; sed rationabiliter cum humilitate malè petenti deneget. Animam suam custodiat: memor semper illud Apostolicum: *Quia qui bene ministrat, gradum sibi bonum acquirit.* Infimarum, infantrum cum omni solitudine curam gerat: sciens sine dubio quia pro his omnibus in die iudicij rationem redditura est. Omnia vasa Monasterij curamque substantiam, ac si altaris vasa sacrata conspiciat. Nihil ducat negligendum: neque auaritiæ studeat, neque prodiga sit, vel extirpatrix substantiæ Monasterij: sed omnia mensuratè faciat, & secundum iussione Abbatissæ. Humilitatem ante omnia habeat; & cui substantia non est, quod tribuatur, sermo responsionis potrigatur bonus; vt scriptum est: *Sermo bonus super datum optimum.* Omnia quæ ei iniunxerit Abbatissa, ipsa habeat sub cura sua: à quibus eam prohibuerit, non præsumat. Sororibus constitutam annonam sine aliquo typho aut mora offerat, vt non scandalizentur; memor diuini eloquij, quid mereatur, qui scandalizauerit vnum de pusillis. Si congregatio maior fuerit, solatia ei dentur, à quibus adiuta & ipsa æquo animo impleat officium sibi commissum. Horis competentibus & dentur quæ danda sunt, & petantur quæ petenda sunt; vt nemo conturbetur neque contristetur in domo Dei.

CAP. LXII. *De ferramentis, aut alijs rebus Monasterij, vel vestibus.*

**S**ubstantiæ Monasterij in ferramentis vel vestibus, seu quibuscumque rebus, provideat Abbatissa sorores de quarum vitæ moribus secuta sit: & ei singula, vt utile iudicauerit, consignet custodienda atque recolligenda. Ex quibus Abbatissa breuem teneat: & dum sibi in ipsa assignata sorores vicibus succedunt, sciat quid dat, aut quid recipit. Quæ cellario siue cauauæ, siue vestibus, vel codicibus, aut posticio, vel lanipendio præponuntur, super Euangelio clauæ accipiant, & siue murmurio seruant reliquis. Si quæ verò vestimenta, calceamenta, utensilia negligenter expendenda vel custodienda putauerit, tamquam interuersor rerum Monasterij seuerius corrigatur. Indumenta verò cum ipsa noua accipiunt, si vetera necessaria non habuerint, Abbatissæ refundant, pauperibus aut incipientibus iunioribus dispensanda.

CAP. LXIII. *Vt ornamenta, vel varia opera in Monasterio non fiant.*

**M**oneo specialiter, vt vestimenta lucida, vel cum purpura, vel bebrina nunquam in vsu habeatis, nisi tantum laia & lactina. Plumaria orna-

menta & omne polymitum nunquam in Monasterio fiant, nec vlla tinctura, nisi nigra tantum, si necessitas fuerit; propter illud Apostoli: *Nemo militans Deo, implicat se negotijs secularibus, ut ei placeat cui se probauit.* Lectualia verò ipsa simplicia sint. Nam satis indecorum est, si in lecto religiosæ stragula secularia, aut tapetia picta resplendant. Argentum in vfu vestro non habeatis, absque ministerio oratorij.

CAP. LXIV. *Ut capita qua mensura ligentur.*

Capita nunquam altiora ligentur, nisi quomodo in hoc loco mensuram de incausto fecimus.

CAP. LXV. *Quomodo dormire debent.*

Singulæ per singula lecta dormiant: lectisternia pro modo conuersationis secundum dispensationem matris accipiant. Si potest fieri omnes in vno loco dormiant: si autem multitudo non finit, denaræ aut vicinarum cum senioribus, quæ super eas sollicitæ sint, pausent. Luminaria iugiter in eadem cella ardeant vsque mane. Vestitæ dormiant & cinctæ cingellis, ut præparatæ sint ad opus diuinum semper, & facto signo alique mora surgentes festinent inuicem se præuenire ad opus Dei: cum omni tamen grauitate, & modestia. Adolescentes sorores iuxta se non habeant lectos; sed permixtæ cum senioribus. Surgehtes vero ad opus Dei inuicem se moderatè cohortentur, propter somnolentiarum excusationes.

CAP. LXVI. *De ordine Congregationis.*

Ordines suos in Monasterio ita conseruent, ut conuersionis tempus, ut vitæ meritum discernit: atque senior non conturbet gregem sibi commissum, neque libera vtens potestate iniuste disponat aliquid; sed cogitet semper quia de omnibus iudiciis & operibus suis redditura est Deo rationem. Ergo secundum ordines, quos constituerit, vel habuerit, ipsæ sorores sic accedant ad pacem, ad vnionem, ad psalmum componeundum, in choro standum; & in omnibus omnino locis ætas non discernatur in ordine, nec præiudicet: quia Samuel & Daniel pueri Presbyteros iudicauerunt. Ergo extra has, quas ut diximus altiori consilio Mater prætulerit, vel degradauerit certis ex causis, reliquæ omnes ut conuertuntur, ita sint; ut verbi gratia, quæ secunda hora diei venerit in Monasterium, iuniorum se non erit esse illa quæ prima hora venerit diei, cuiusque ætatis aut dignitatis sit. Iuuenulæ per omnia ab omnibus disciplina teneantur. Iuniores igitur Priores suas honorent: Priores iuniores suas diligant. In ipsa appellatione nominatim nulli liceat aliam puro nomine appellare: sed Priores iuniores suas Sorores nominent; iuniores Priores suas Nonnas vocent; quod intelligitur materna reuerentia. Vbiunque autem sibi obuiant sorores, iunior à Priore benedictionem petat: transeunte maiore minor surgat, & det ei locum sedendi, nec præsumat iunior confedere, nisi ei præcipiat senior: ut fiat quod scriptum est: *Honore inuicem præuenientes.*

Rom. 12.

CAP. LXVII. *De septimanarijs coquina.*

Sorores sibi inuicem seruiant. In omni ministerio corporali, tam in coquina, vel quicquid quotidianus exegerit vsus, vicibus sibi, excepta

Matre seu Præposita, succedere debent. Nulla excusetur à coquina officio, nisi aut ægitudine, aut in causa grauis utilitatis aliqua occupata fuerit, quia exinde maior merces conquiritur. Imbecillibus autem procurentur solatia, vt non cum tristitia hoc faciant: sed habeant omnes solatia, secundum modum Congregationis, aut positionem loci. Egressura de coquina vasa ministerij munda & sana Cellerariæ consignet, quæ Celleraria iterum intranti consignet, vt sciat quod dat, aut quod recipit. Septimanariæ autem ante vnā horam refectionis accipiant singulos biberes & panem, vt hora refectionis sine inurmuratione & graui labore seruiant sororibus suis. In diebus autem solemnibus vsque ad Missas sustineant.

CAP. LXVIII. *Si sorori impossibilia iniungantur.*

**S**I sorori aliqua forte grauius aut impossibilia iniunguntur, suscipiat quidem iubentis imperium cum omni mansuetudine & obedientia. Et si omnino virium suarum mensuram viderit pondus oneris excedere, impossibilitatis causas ei quæ sibi præest patienter & opportunè suggerat, non superbiendo, aut resistendo, vel contradicendo. Quod si post suggestionem suam in sua sententia Prioris imperium perdurauerit, sciat iunior ista sibi expedire, & ex caritate confidens de adiutorio Dei obediat.

CAP. LXIX. *Qualis debet esse modus excommunicationis.*

**S**ECONDUM modum culpæ, & excommunicationis vel disciplinæ debet extendi mensura. Qui culpatum modus in Abbatissæ pendeat iudicio. Si qua tamen soror in leuioribus culpis inuenitur, à mensæ participatione priuetur. Priuatæ autem à mensæ consortio ista erit ratio, vt in oratorio psalmum aut Antiphonam non imponat, neque lectionem recitet, vsque ad satisfactionem: refectionem autem cibi post sororum refectionem sola accipiat; vt si, verbi gratia, sorores reficiunt sexta hora, illa nona: si vero sorores nona, illa vespéra, vsque dum satisfactione congrua veniam consequatur.

CAP. LXX. *De grauioribus culpis.*

**S**I qua autem soror grauioris culpæ noxa tenetur, suspendatur à mensa simul & ab oratorio: & nulla ei soror in vllò coniungatur consortio, neque in colloquio; sola sit ad opus sibi iniunctum persistens in penitentia luctu; sciens illam terribilem Apostoli sententiam, dicentis: *traditum huiusmodi hominem satanæ in interitum carnis, vt spiritus saluus sit in diem Domini.* Cibi autem perceptionem sola percipiat, mensura vel hora quæ prædixerit Abbatissæ ei competere; neque à quaquam benedicatur transeunte, nec cibus qui ei datur.

CAP. LXXI. *De his que iunguntur sine iussione excommunicatis.*

**S**I qua soror præsumperit sine iussione Abbatissæ sorori excommunicatæ quolibet modo se iungere, aut loqui cum ea, vel mandatum ei dirigere, similem sortiatur excommunicationis vindictam.

CAP. LXXII. *Qualis debet esse sollicitudo circa excommunicatas.*

**O**MNEM sollicitudinem & curam gerat Mater circa delinquentes sorores: quia non est opus sanis medicus, sed male habentibus; & ideo vti debet.



omni modo vt sapiens medicus : immittere quasi occultas consolatrices , id est seniores & sapientiores sorores , quæ quasi secretè consolentur sororem fluctuantem , & prouocent illam ad humilitatem & satisfactionem ; & consolentur eam , *ne abundantiore tristitia absorbeatur* . sed sicut ait Apostolus : *consummetur in ea caritas* , & oretur pro ea ab omnibus . 2. Cor. 2.

CAP. LXXIII. *De his quæ sapientia correpta non emendauerint.*

**S**I qua soror pro qualibet culpa frequenter correpta , si etiam excommunicata non emendauerit , acrior ei accedat correctio ; id est , vt verberum in eam iudicta procedat . Quæ si nec ita correxerit , aut fortè quod absit in superbiam elata etiam defendere voluerit opera sua , tunc mater faciens vt sapiens medicus , si exhibuit fomenta , si vnguenta adhortationum , si medicamenta scripturarum diuinarum , si ad vltimum vltionem excommunicationis , vel plagas virgarum ; etiam si viderit nihil suam prauelare induritiā , adhibeat etiam quod maius est , suam & omnium sororum orationem pro ea : vt Dominus qui omnia potens est operetur salutem circa infirmam sororem . Quæ si nec isto modo sanata fuerit , tunc iam vtatur ferro abscissionis , vt ait Apostolus : *Auferite malum ex vobis ipsis* . Et iterum : *infidelis si discedit , discedat* , vt ne vna ovis morbida totum gregem contaminet . Aut tamdiu in cella retrudatur , quousque bona voluntas illius cognoscatur . 1. Cor. 5.  
Ibid. 7.

CAP. LXXIV. *Vt non præsumat altera aliam defendere.*

**C**Aueatur omnino , ne qualibet occasione præsumat altera aliam defendere sororem in Monasterio , aut quasi tueri , etiam si qualibet consanguinitatis propinquitate iungantur : nec quolibet modo id à sororibus præsumatur : quia exinde grauissima occasio scandalorum oriri potest . Quod si qua hæc transgressa fuerit , tribus suppositionibus pœniteat .

CAP. LXXV. *De ordine quo psallere debeant.*

**D**E Synaxi , id est , de cursu psalmodiarum & orationum modo Canonico iuxta normam Regulæ nostræ quidam in breue sunt distinguenda . Ab octauo Kalend. Octobris crescit cursus vsque ad summum eius viginti quinque choris : quas tota hyeme , quæ à Kalendis Nouembris incipit , & finit in Kalendis Februarij , cantandas in nocturnis vigiliis per noctem Sabbati & Dominicæ patres nostri sanxerunt . Duodecim verò choræ in hyeme omni nocte cantandæ sunt , vsque ad octauo Kalendas Aprilis : & post hyemem quindecim choræ in sacris Martyrum vigiliis . Et sicut crescit , ita etiam decrescit quinque choris : quæ in primo Sabbato quinque choræ augendæ sunt , vt sint viginti , per alium autem Sabbatum vna chora augenda est vsque ad Kalendas Nouembris , vsque totus cursus compleatur , id est , viginti quoque choræ psalmodiarum : qui per tres menses hyemis , numerus complendus est in duabus supradictis noctibus , & post hos decrescit per Sabbatum . Primo Sabbato quinque choræ , & singula per altera Sabbata : quia longius spatium est ad finem hyemis vsque ad æquinoctium veris , in cursu decrescendo , quam crescendo , ideo per altera Sabbata singulæ decidunt choræ , vsque octauo Kalendas Aprilis .

Duodecim namque choræ tempore æstatis in sanctarum noctium cursu, id est Sabbati & Dominicæ, cantandæ sunt. Octo verò semper reliquis noctibus de æquinoctio veris in æquinoctium cantandæ sunt, id est, per sex menses. De æquinoctio veris in æquinoctium autumnus, viginti quatuor psalms canendi sunt. In omni loco & opere silentij regula magnopere custodire censetur, ut omni, quantum valuerit humana fragilitas, quæ ad vitia præcipitare solet cursu oris, mundetur vitio: ædificationemque porius proximorum suæ proximarum, pro quibus Saluator noster Iesus Christus sanctum effudit sanguinem; quam dilacerationem absentium in pectore conceptam, & quam otiosa passim verba ore promamus, de quibus iusto sumus retributori rationem reddituri.

CAP. LXXVI. *Quibus horis reficiant sorores.*

**A** Sancto Pascha vsque ad Pentecosten ad sextam reficiant sorores, & ad seram cœnent. A Pentecoste autem tota æstate, si labores manuum graues non fuerint, aut nimis seruior æstatis non perturbat, quarta & sexta feria ieiunent vsque ad horam nonam; reliquis diebus ad sextam prandeant: qua mensura prandij in Abbatissâ sit prouidentia & arbitrio, & sic omnia temperet atque disponat, qualiter animæ saluentur, & quod faciunt sorores absque vlla murmuratione faciant. A Kalendis autem Februarij vsque ad Kalendas Nouembris secunda, quarta, sexta ieiunandum est. A Kalendis autem Nouembris vsque ad Natalem Domini, exceptis festiuitatibus, omnibus diebus ieiunare oportet. A sancta verò Epiphania vsque ad caput Quadragesimæ, quarta & sexta feria ieiunandum est. A Quadragesima verò vsque in sanctum Pascha ad vespertum reficiant. Ipsa autem vesperta sic agatur, ut lumine lucernæ non indigeant reficientes, sed luce adhuc diei omnia consummentur.

CAP. LXXVII. *De electione Abbatissæ.*

**Q**uoties sancta Abbatissa ad Deum migraverit, nulla ex vobis carnali affectu, aut pro natalibus, aut pro facultatibus, aut pro parentela aliquam minus efficacem fieri velit; sed omnes inspirante Deo vnanimiter sacram ac spiritualem eligite, quæ & Regulam Monasterij possit efficaciter custodire, & superuenientibus responsum cum ædificatione & compunctione, & cum sancto affectu sapienter valeat reddere. Ut omnes homines, qui vos cum grandi fiducia pro sua ædificatione expetunt, Deum vberius benedicant, & de vestra electione, & de illius quam elegistis conuersatione spiritualiter gratulentur. Illud etiam, quod non credo, nec Deus pro sua misericordia fieri patiatur, si quocumque tempore quilibet Abbatissa de huius Regulæ institutione aliquid immutare aut relaxaretentauerit; vel pro parentela, vel pro qualibet conditione subiectionem vel familiaritatem Pontificis huius ciuitatis habere voluerit, Deo vobis inspirante ex nostro permissu in hac parte cum reuerentia & grauitate resistite, & hoc fieri nulla ratione permittite. Te verò sanctam ac venerabilem Monasterij Matrem, & te Præpositam sacre Congregationis coram Deo & Angelis eius admonemus & contestamur, ut nullius vn-

quam vel minæ, vel oblocutiones, & *in* *monasteria* molliant animam  
vestram, & aliquid de sanctæ ac spiritualis Regulæ institutis.  
Credo tamen de Dei misericordia, quod non pro aliqua negligentia  
reatum incurrere, sed pro sancta & Deo placita obedientia ad æternam  
beatitudinem possitis feliciter peruenire. Amen.

*Explicit Regula à Donato collecta.*



# CVIVSDAM PATRIS REGVLA AD VIRGINES.


DE CVIVSDAM PATRIS REGVLA  
veterum testimonia.

*S. BENEDICTVS Aniane Abbas in Concordia Regularum  
singulis ferme capitulis REGVLAM CVIVSDAM, vel vt  
cap. LV. §. 26. REGVLAM CVIVSDAM PATRIS  
laudat.*

*SMARAGDVS Abbas in expositione Regula Sancti Benedicti  
capp. XXIII. XXVII. & XXIX. ex eadem Regula Cuiusdam Patris testimo-  
nia afferit.*

IOANNES TRITHEMIVS lib. de propr. Mon. cap. v. hanc  
Regulam ita citat.

*Item in Regula SERVI DEI ad Sorores capitulo XVII. scribi-  
tur: Proprij aliquid in Monasterio, &c.*



## INCIPIVNT CAPITVLA REGVLÆ CVIVSDAM S.

1. *Abbatissa Monasterij qualis esse debeat.*
2. *Qualis debeat esse Præposita Monasterij.*
3. *De Monasterij Portaria.*
4. *Qualis debeat esse Celleraria Monasterij.*
5. *De se inuicem diligendo, vel sibi inuicem obediendo.*

6. *De assidue receptione.*
7. *Qualiter manifestandis sororum confessionibus.*
8. *Qualiter ad signum Dominicum surgendum est.*
9. *Qualiter in Monasterio silentij regulam vel diurno opere, vel ad mensam debeant custodire; vel ad mensam quomodo sit legendum.*
10. *De ratione mensę qualiter administrandum vel obseruandum sit.*
11. *Quibus congruentibus horis hyeme vel aestatis tempore sit reficiendum.*
12. *Quomodo quotidianis diebus manibus sit operandum.*
13. *De utensilibus vel suppellectilibus.*
14. *Qualiter in schola debeant dormire.*
15. *De curā infirmantium qualis esse debeat.*
16. *De casibus qui per negligentiam aut euentu superueniunt.*
17. *De eo quod nulla Monacha in Monasterio debet proprium aliquid vindicare.*
18. *De culparum excommunicatione.*
19. *Qualis debeat esse excommunicatio.*
20. *De his quę per sedulam correptionis coram sapias correptę emendare nolunt.*
21. *De receptione sororis.*
22. *Qualiter inuicem se humilient, vel ordines seruent; vel in minutis actibus qualiter sint seruanda pręcepta.*
23. *De non defendenda proxima vel consanguinea in Monasterio.*
24. *De nutriendis infantibus.*

Expliciunt Capitula.

## INCIPIT REGVLA CVIVSDAM AD VIRGINES.

CAP. I. *Abbatissa Monasterij qualis esse debeat.*



**A**BBATISSA Monasterij non tam genere quam sapientia & sanctitate nobilis esse debet: vt quę sermonem ad erudiendas animas iuxta eruditione lucubrat, propriis actibus non contradicat: plus etenim subiugatę pręlatorum actuum formam imitantur, quam doctrinę illatę auream accommodant. Debet enim sacris eloquiis opera nocterne sacra: vt quę eius imitatur doctrinam ex voce, imitetur cultum ex opere: ne si in aliquo voci opus contradixerit, fructus vocis non obtinere valeat effectum. Sic ergo sit & voce ornata & opere, vt & opus voci.

& vox

& vox consentiat operi, sit continentia & castitatis flore compta, & omnium ore laudabilis, omnium desideris imitabilis exemplo. Sit caritatis beneuolentia ornata, ut omnium fidelium lætificet corda. Erga peregrinorum & hospitiū sollicitudinē præslo: erga infirmantium curam sollicita: erga inopum & egenorum iuuamen opulenta. Sic delinquentium ignauiam corrigit, ut ad cultum religionis lasciuas & fessas mentes reducat. Sic misericorditer bonitatis dona distribuat; quatenus ex nimia bonitate facinorum fomenta non nutriet. Sit ergo bonis bona per meritum; sit malis mala per flagellum, quod mediante scientia agendum est, iuxta Psalmistæ orationem dicentis: *bonitatem & disciplinam & scientiam doce me Domine.* In utroque etenim Abbatissæ cauendum est, ne aut nimia bonitate in subiectarum cordibus vitia nutriet, aut nimia disciplina austeritate ea quæ leni increpatione sananda fuerant, rigida correptione diripiantur. Incautis etenim sic blanda persuasione subueniat, ut eorum saniei antidoti quodammodo medendo curam infundat: sanis vero moribus ea hortando præbeat, ut quæ agere cœperunt, meliorando usque ad finem perducant. Nihil etenim prodest cœpisse, si in opere bono quod cœperant non studeant perseverare. Habeat ergo tot animos mater, quot habet in suo regimine filias; ut iuxta omnium mores omnium noverit vitia coercere. Tanta sit in omnes prouidentia, ut nec pietas disciplinæ, neque disciplina pietati locum tollat. Agat omnium curam, ut de omnium profectu mercedis recipiat lucra; ut ex corruptione præsentis vitæ quandocunque erepta tantum laboris recipiat præmium, quantis ad vincendum inimicum prædiis præbuit supplementum.

Psal. 138.

CAP. II. *Qualis debeat esse Præposita Monasterij.*

**P**Ræposita Monasterij non ætate senili, sed moribus constituenda est. Multas etenim prolixitas annorum attollit, sed dedecus torpentis vitæ ad infantia immaturitatem tepescendo reducit. Constituenda ergo est Præposita moribus grauis, sermone solers, ingenio fortis, consideratione vigil, cursu impigra, correptione pia, disciplina moderata, actu casta, moribus sobria, dispensatione æqua, humilitate ornata, patiens, mitis, non turbulenta, non iracunda, non superbix vel arrogantix vitio maculata, non prodiga, non garrula, sed omni actu religionis ornata, quæ sciat languentium moribus subuenire, & tepescentium ignauiam excitare: super quam Abbatissa requiescat, ut in nullo ab eius præceptis deuiet; sed in omnibus subdita, & in iussis senioris detenta, nihil quod Abbatissæ voluntati sit contrarium aut faciat, aut ordinet faciendum, sed omnia per eius interrogationem; iuxta illud quod scriptum est: *Interroga patrem tuum, & annuntiabit tibi; maiores tuos, & dicent.* Interrogandum semper est, ut in nullo à seniorum consilio animæ subdix discrepent; in nullo oues à pastoris voluntate declinent. Spreuit namque seniorum consilia Roboam, iuuenum vltus consilio. Quæ res qualis dispendij fuerit occasio scripturæ veritas attestatur, qui omnia

Deut. 32.

dominatione vādecim tribuum vix cum vna tribu inter tot pressuratum dispendia absque mortis crudelitate reliquum vitæ peregit. Debet namque esse omnium necessitatum tam corporis quam animæ prouida : vt & subsidia præsentis necessitatis porrigat , & corda subditarum ad laudem creatoris intonandam ex sedula admonitione excitando erigat ; humiles & propter Christum subiectas honorando in sublime prouehat : sese vero attollentes castigationis flagello ad gradus humilitatis retrahat. Curam in rebus Monasterij, seu vasis , seu supellectibus ita habeat intentam , vt in nullo negligentia tenebris reperiatur fuscata : vt dum sacri laboris omnem curam adhibet , ab omnipotente fructum laboris recipiat. Omnibus Sabbatis post horam orationis nonam tam senior quam iuniores Præpositæ lectos omnium sororum visitent , & faciant propter earum negligentias inquirendas , aut si aliquid inueniatur illicitè & sine comiteatu retentum. Itemque post Completam lectos omnium cum luminaribus visitent , vt omnium expergiscentem sensum vel tepescentem ex oratione agnoscant. Similiter ad omnes cursus nocturnos hoc est faciendum , vt sciant quæ cum seruiore , vel quæ cum tepiditate ad cursum assurgunt : & eas quas tarditate vel segnitia culpabiles reppererint , prout culpa vel ætas fuerit , aut increpatione aut flagello cortipiant.

CAP. III. *De Monasterij Portaria.*

**P**ortaria seu ostiaria Monasterij tales esse debent , quæ omnium simul mercedem adificent , ætate senili , quibus mundus silet ; quæ iam ex præsentibus pompis nihil desiderant : sed in voto cordis affectu creatori inhærentes singulæ dicant : *Mibi autem adharere Deo bonum est , ponere in Deo spem meam.* Quid enim ex præsentibus phaleramentis desiderant , quæ perfunctoriis contemptis Christum amare cœperunt ; in quem summum bonum contemplatione mentis manere conspexerunt ? Sint ergo mentis suæ statu firmissimæ ; vt Domino cum Propheta orando dicant , *Auerte oculos nostros , ne videant vanitatem , in qua tua viuifica nos.* Tale semper superuenientibus ostendant exemplum , vt & foris ab extraneis nomen Domini glorificetur ; iuxta quod Dominus ait : *Sic luceat lux vestra coram omnibus hominibus , vt videant opera vestra bona , & glorificent Patrem vestrum qui in cælis est :* & intus à consodalibus suis mercedis præparent lucra , dum omnium vice foris gerunt curam. Sic cautæ moribus cum virtutum Magistra humilitate existant , vt omnis patientiæ blandimenta ex colloquio affabili ostendant. Nunquam singulæ vel binæ sine tertia teste loquantur. Nunquam oculos in sublime attollentes laicos vel clericos intentè aspiciant : sed remissio cum humilitate vultu inclinatis oculis necessaria colloquantur. Pauperum , peregrinorum , & hospitem curam inter omnia habentes : quia in his Christus recipitur , sicut ipse ait : *Quæcumque his minimis fecistis , mihi fecistis.* Foras aliquid dare , vel cui-libet ministrare , vel à foris aliquid accipere , nullatenus sine comiteatu Abbatisæ facere præsumant. Et quodcumque à foris accipiunt ex donis vel eleemosynis aliorum , nullatenus antea ad cæsarium portent , quam ante oratorium deferentes omnis simul Congregatio pro eo orent , qui hoc

Psal. 71.

Psal. 119.

Matth. 5.

Matth. 25.

exhibuit. Fabulis, quas ad portam vel à secularibus, vel à quibuscumque audierint, nullatenus autem accommodent: & si nolentes audierint vel intellexerint, nullatenus consodalibus suis referant. Si horum aliquid, quæ diximus, transgressæ fuerint, regulari pœnitentia castigentur. Si humili satisfactione patefaciant, prout humilitas confitentis cernitur, ita delinquentis culpa iudicetur. Si verò contumaciæ crimen occurrat, & modum pœnitentiæ augebit. Clauēs ostiorum vel portæ nullatenus penes se nocte retineant, sed ad Abbatissam nocte deferentes præsentent, & mane post secundam recipiant. Idipsum & Cellarariæ, & pistrices, & cocæ implore studeant; ut ab occasu solis, vel cum fuerit opus necessitatis perfectum, usque ad secundam Abbatissæ clauēs retineant; nisi necessitas euenerit, ut per comineatum Abbatissæ nocte retineantur, & post secundam denuo tribuantur. A signo vespertino usque ad secundam impletam, nullatenus portarum fores aperiantur: neque ullus à foris introitus patefiat; sed si necessitas talis aduenerit, ut post vespem sit deliberandum, per fenestram quæ in eadem porta fuerit eorum deliberetur. Si talis necessitas hospitum vel peregrinorum aduenerit, ut hora refectionis cum sororibus esse non possint, post cum cocis vel ministris, vel cum reficiendi spatium habuerint, reficiant. Vasa vel reliqua utensilia, quæ ad opus hospitum baiulant, ac si sacrata Deo gubernent atque custodiant: ne per ipsarum neglectum ab ipso mercedem non recipiant, cuius res diripiendo non reseruant. Intra septa Monasterij vel ostia, nullum virorum omnino vel feminarum edere vel bibere permittant: sed omnibus aduenientibus foris in hospitali, prout honor exigit, per Abbatissæ ordinationem ministrent. Intus verò tantummodo quæ sacram Deo vouerunt religionem, & in vniuersitate obedientiæ sub vna Regula sunt ligatæ, edere vel bibere censemus. Sic semper ostiaræ agant, ut in omnibus zelum Dei habentes Regulæ tenorem conseruent; ut pro studij sui vel curæ labore incorruptam recipiant mercedem.

CAP. IV. *Qualis debet esse Cellararia Monasterij.*

**M**onasterij Cellararia sapiens & religiosa ex omni Congregatione eligenda est: quæ nec sibi, nec suis voluntatibus, sed toti Congregationi æquanimiter & piè placeat dispensando. Nec inde placere studeat, unde & se in ruinam peccati, & alias transgressionis noxam consentiendo introducat: id est, nihil extra debitam mensuram pro qualibet familiaritate, pro gratia meriti dispensando distribuat: sciens, quia *iustus Dominus Psal. 40. iustitiam à seculo dilexit, æquitatem vidit vultus eius.* Sit ergo omnibus iusta dispensatione grata: sit moribus matura, sit sobria, non edax, non elata, non turbulenta, non iniuriosa, non tarda vel pigra, sed in omnibus actibus benè composita: quæ Congregationi omni, id est, tam senioribus quam etiam iunioribus pro affectu & materno ordine debeat ministrare. Curam de omnibus sibi commissis rebus habeat: nihil tamen sine comineatu Abbatissæ facere præsumat. Sorores tam seniores ætate quam iunioribus nullatenus conturbet; & si aliqua sororum ab ea irrationabiliter



aliquid poposcerit, leni responsione cum voce humilitatis contra rationem petenti denegat. In infirmitate positus sororibus diligenti cura & promptissimo affectu ministret. Similiter pauperum curam gerat: in omnibus timorem Domini proponens, & sciens se illi exinde rationem reddituram, si non pro eius præceptis implendis hæc omnia faciat, memor semper illius qui dixit: *Qui mihi ministrat, me sequatur*. Omni ergo operi bono quod facimus, Domini timorem iungamus. Sic in omnibus curam agat, ut in nullo negligentia damna incurrat. Avaritia & cupiditatis pestem omnino fugiat. Similiter sicut non avara, sic non sit prodiga, id est, sicut dono omnipotentis Dei sub avaritiæ vitio occultando subtrahere non debet, sic sine iusta dispensatione nimis fœnerando communem substantiam non debet diripere; sed omnia per discretionem temperando pensare. Et si non habeat quod ab ea quaritur, quod tribuat, sermone leni sine vlla asperitate in responsione procedat; vtdulcedo cordis & vocis responsione pateat: iuxta quod scriptum est: *Fauns mellis sermones boni*. Et illud: *sermo bonus super datum bonum*. Ita sibi commissum opus ad mercedem nouerit pertinere, si omnia cum humilitate & pietate studuerit facere. Et quamuis quod petitur non sit vnde tribuatur, nullatenus respondeat se non habere, sed dicat fideli voce, *Dominus dabit*. Ea vero quæ danda sunt, sine mora tribuantur; ne scandali occasio, aut offensionis casus ex ipsa tarditate generetur; memor semper præceptorum Domini, qui neminem suorum patitur scandalizari.

CAP. V. *De se inuicem diligendo, vel sibi inuicem obediendo.*

**D**iligere se ad inuicem in Christo Monache in Monasterio quanta cura debeant, per Euangelium Ioannis Dominus demonstrat, cum dicit: *Hoc est præceptum meum, ut diligatis inuicem. Maiorem dilectionem nemo habet, quam ut animam suam ponat quis pro amicis suis*. Et illud: *In hoc cognoscent omnes, quia mei discipuli estis, si inuicem diligatis*. Diligere ergo præcipimur ad inuicem, ut inuicem saluemur: ut per mutuam dilectionem eam imitemur, qui nos dilexit, iuxta Apocalypsin, *Et lauit nos à peccatis nostris in sanguine suo*. Sic ergo soror sororem propter Christum diligat, ut Christum à se per temporalem dilectionem non repellat. Quia vera & secundum Christum dilectio est, proximæ malum non operari. Diligatur ergo proxima non carnis affectu, sed pietatis ministerio: diligatur puritate, diligatur religione, diligatur mansuetudine, diligatur caritate: ut in omni semper amore Christus inueniatur; & non secundum sæculum, sed secundum Deum maneat amor. Sic enim à Dominno præcipitur: *Diliges proximum tuum sicut teipsum*. Si soror sororem diligat sicut semetipsam, nunquam peccati maculam incurreret, sed cultu pietatis ac dilectionis ornata æterna præmia accipiet. Maneat ergo semper in corde dilectio, ut antiqui hostis liuoris vitus extinguat; per quem in primordio protoplasto decepto mortis patefecit introitum, quem scriptum est: *Inuidia autem diaboli mors introiuit in orbem terrarum*. Diligatur proxima, ne odij macula cruenta homicidij crimen incurrat, sicut Ioannes Apostolus testa-

Ioan. 11.

Prou. 16.

Eccl. 18.

Mart. 12.

Ioan. 15.

Ibid. 13.

Apoc. 1.

Matt. 22.

Sap. 2.

tus est dicens: *Qui odit fratrem suum homicida est. Diligatur proxima,* 1. Ioan. 1.  
 ne per aliqua discordiæ fomenta retenta proprii facinoris vinculo non sol-  
 uatur: sicut Dominus in Euangelio testatus est, dicens: *Si non dimiseritis* Matt. 6.  
*bonis peccata eorum, nec Pater vester celestis dimittet vobis peccata ves-*  
*stra.* Remittamus proximis, ut ab omnipotente remittatur nobis. *Date,*  
*inquit, & dabitur vobis.* O quam iusta commutatio! ô quam pia misera-  
 tio, dando accepisse, accipiendo donasse! Nulla iurgiorum incrementa, nul-  
 lae nutrimenta retineantur. Sic & Apostolus hortatur dicens: *Estote in-* Col. 3.  
*uicem benigni, misericordes, donantes inuicem, sicut & Deus in Christo do-*  
*navit vobis.* Nihil aliud dare præcipimur, nisi quod nobis dari petimus. Sic  
 & orando dicimus: *Dimitte nobis debita nostra, sicut & nos dimittimus de-* Matt. 6.  
*bitoribus nostris.* Debitoribus dimittendo nos relaxamur à debito. Solua-  
 mus ergo per dilectionem & amore proximis, ut nos à nostris criminibus  
 pietate & misericordia soluat Deus. Amen.

## CAP. VI. De assidue danda confessione.

**C**onfessio quam crebra & sagaci cura danda sit, multorum Patrum  
 iuxta scripturarum seriem traditio demonstravit. Danda ergo con-  
 fessio semper est, ut veterescentem mentis statum, & peccatorum te-  
 nebris quotidianis illecebris fuscatur, rudem semper custodiat: sicut scri-  
 ptura docuit dicens: *Omni custodia servata cor tuum: quia ex ipso vita* Pro. 4.  
*procedit.* Sic quippe beatus David orando Domino dicebat. *Delictum co-* Psal. 31.  
*gnitum tibi feci, & iniustitias meas non operui: Dixi confitebor aduersum*  
*me iniustitiam meam, & tu remisisti impietatem peccati mei.* Quantum va-  
 let pura & non tarda Confessio, ut sic secuta eam subsequatur impetratio!  
 Confessus se aduersum, ut facinorum molem pelleret; de se ingenuit con-  
 fitendo, glorificauit remissionem recipiendo: dolendo patefecit crimen, tan-  
 do redintegravit spem. Non enim præcessit spei fiduciam quia meminerat se  
 olim per Spiritum sanctum à Domino illuminatum dixisse: *Quia apud te* Psal. 129:  
*est propitiatio, & propter legem tuam sustinui te Domine.* Et iterum: *quia*  
*apud Dominum misericordia est, & copiosa apud eum redemptio.* Apud  
 quem misericordiam perennem agnoscit, apud eum copiosam & redem-  
 ptionem. Quæramus ergo ibi misericordiam, ubi redemptionem ma-  
 nere iam nouimus copiosam. Crescat dolor post ruinas, ut culpæ  
 inueniatur medicina. Confitemini inuicem delicta, ut nostra nobis  
 omnipotens dimittat peccata. Sic nos scriptura dicendo hortatur: *Confite-* Iac. 5.  
*mini alterutrum peccata vestra, & orate pro inuicem.* Quanta clementis iu-  
 dicis pietas erga nos diffusa dignoscitur, ut quod actibus ærumnosis facinus  
 contractum fuit, mutua prece soluat! Detur ergo mutua orationis solatium;  
 ut inuicem orando cupiatur præsidium. Magis etenim copia fructuum ha-  
 betur, quando ex reuelatione delictorum salus acquiritur. *Reuela,* inquit  
 Psalmista, *Domino viam tuam, & ipse te eruet.* Si reuelando peccata nu-  
 tritur anima, quotidiano ergo studio per confessionem reueletur, ut quoti-  
 diana medicina vulnera sanentur. Sed quibus horis congruentibus quo-  
 tidiana delicta sunt ablunda, à nobis inferendum est. Quicquid post

completorium per opacæ noctis spatia mēs vel caro per facilitatē deliquerit, post secundam per confessionem curandum est expiari. Quicquid vero diurno actu, vel visu, auditu, cogitatu, tepescendo deliquit, nonæ horæ expleto cursu ut purgetur censendum est. Post vero quicquid ab hora nona mens maculæ attraxerit, ante completam confitendum est. Illud tamen Abbatissa studere debet, ut post secundam scholam iagrediens peracta oratione nullam foras egredi permittat, nisi prius detur confessio. Similiter & post nonam, vel ante completorium faciendum est. Hæ verò sorores, quæ pro graubus culpis in pœnitentia detinentur, in Ecclesia cum cæteris quæ communicant non stent; sed in alia Ecclesia secretè cursum cantent: & expleto cursu egredientes ante fores Ecclesiæ, in qua communicantes cursum expleant, stare præcipiantur: & egrediente Congregatione supra humum prostratæ rogent pro se Dominum exorari, ut graua commissa contritione deleantur cordis; meminentes illud: *Cor contritum & humiliatum Deus non spernit.* Et, in humilitate nostramemor fuit nostri Dominus. In oratione posita semper pœnitens dicat: *Auerte faciem tuam à peccatis meis, & omnes iniquitates meas dele:* ut ira arguentis iudicis, & in proximo vindictam reddentis, per piæ mentis affectum hanc humili oratione sedetur.

Psal. 50.  
Psal. 135.  
Psal. 50.

CAP. VII. *De non manifestandis sororem confessionibus.*

**A**bbatissa vel Præposita, vel quælibet seniorum sororum cui ab Abbatissa fuerit commissum ut confessiones recipiat, crimina minora vel maxima nullatenus manifestent, nisi solo iusto iudici, qui omnium confitentium crimina lauat. Illa enim quæ confessa est sua vulnera vertecundè, non ad opprobrium recipiendum, sed ad salutem redintegrandam confessa est, iustum habens testem Deum, à quo & mederi expectat. Ea verò senior quæ recipit, cum grauitate & moderatione penes se occultando honestissime teneat, ne dum alterius vulnere medicinam infundit, suæ mentis corruptat nitorem. Nulla tamen Monacharum vel confessionem recipere, vel pœnitentiam dare sine ordinatione Abbatissæ præsumat; ne vitium commissum Abbatissæ celetur, sed omnia per eius notitiam agantur. Si verò inuenta fuerit, quæ hoc propositum Regulæ violare conetur, graui pœnitentiæ scientia corripiatur; quia delicti fomitem Abbatissæ voluit occultare.

CAP. VIII. *Qualiter ad signum Dominicum surgendum est.*

**Q**uandocunque vel diurnis vel nocturnis horis ad opus diuinum signum insonuerit, mox cum summa festinatione surgendum est, ac si præco regis insonet, omni opere quod in manibus habebatur postposito; ut nihil operi Dei præponatur: sed mens ad sonitum præconis intenta, & operi Dei innixa, cum omni grauitate & mansuetudine ad intonandam gloriam inuestitis eius, & pietati eius gratias referendas festina currat. Et si morosè & segniter veniat post primi psalmi qui in cursu canitur finem, nouerit se à suo ordine dum cursus expletur reuocari, & in loco ultimo positam, id est, in eo loco qui talibus negligentibus fuerit deputatus, astare, & ibi cum ve-

recundiæ metu expectare, & post expletum cursum proluxa venia ante cæ-  
 tum fororum egredientium satisfacere. Nam foris omnino non segregen-  
 tur, ne à somno detentæ dormiant, aut in aliquo maligno hosti adeundi de-  
 tur occasio. Intus etenim posita nec totum perdit quod cæperat, & vere-  
 cundia ac metu frangitur, dum ab omnibus videtur. Et quando cæteræ ex-  
 plecto officio foras egredimur, illa in Ecclesia pro ipsa tarditate posita duo-  
 decim psalmos super cursum seriem canet. Si verò ex toto cursum suum  
 perdidit, præcipuè nocturnis horis, in quibus nullum aliud opus impen-  
 dit, suppositione damnetur. Horas verò ad cursum procurare iuxta dispen-  
 sationem Abbatis debet, cuicumque ordinatum fuerit; id est, quæ men-  
 te sollicita & impigra fuerit ad hoc opus idonea inuenta, ut opus Dei non  
 tardetur. Si verò qualibet occasione à iusto ordine deviaturum fuerit, ut  
 non secundum suum ordinem horæ custodiantur, suppositione damnetur.

CAP. IX. *Qualiter in Monasterio silentij regulam vel diurno opere,  
 vel ad mensam debeant custodire: vel ad mensam quomodo  
 sit legendum.*

**R**egulam silentij omni tempore seruandam sanctarum scripturarum  
 series declarauit, dum per Prophetam dicitur: *Cultus iustitia silen-* 1sa. 32.  
*tium est pax.* Tacendum namque est ab otiosis & frivolis, & scurrilibus,  
 & prauis & maliciosis fabulis; de quibus Propheta orabat dicens: *Pone* 1sa. 140.  
*Domine custodiam ori meo, & osium circumstantie labiis meis. Non decli-*  
*nes cor meum in verba mala.* Cessandum quippe est à fabulis superfluis,  
 ne damnationis per inefficacem mentis ignauiam anima fructum capiat:  
 quia non solum de scurrili & iniurioso sermone, sed etià de otioso, iuxta Do-  
 mini præceptum, rationem sumus reddituri. Quid aliud debeat Monacha  
 studere, quam soli Deo, in quo semel desiderium fixit, & oris sermone  
 & animæ desiderio vacare? Omnibus ergo horis diurnis, præterquam ad  
 mensam, ab hora secunda vsque ad completam quicquid utilitas sacræ Re-  
 gulæ poposcerit, per Abbatis commeatum loquendum est. Ab hora verò  
 completionis, cum oratio ad somnum capiendam datur, nulla omnino lo-  
 qui præsumat, nisi grandis necessitas Monasterij poposcerit. Cui ab Ab-  
 batissa fuerit ordinatum, loqui studeat, vel etiam à Præposita, quæ curam  
 aliarum portat. Ad mensam verò nulla penitus præter Abbatis, vel cui  
 Abbatis præceperit, pro communi necessitate fororum loqui præsumat: sed  
 omnes intento animo gratias reddentes creatori in cordibus suis cibi ac po-  
 tus solidæ mensuræ largitione fruantur. Portaria verò quæ pro necessariis  
 causis alioquin experierit Abbatis, loqui permittatur: quia forsitan  
 talis superuenerit necessitas, quæ moram habere non debeat. Ante men-  
 sam vero semper Capitulum Regulæ vnum aut amplius, si Abbatis pla-  
 cuerit, legatur: ut cum cibus carnem reficit, lectio animam satiet. Hæc  
 omnia cum grauitate animi & moderatione leni fiant, quatenus in his omni-  
 bus Dominus delectetur. <sup>res</sup> Verò Domini diebus, id est, Natiuitate Do-  
 mini, vel Paschæ solempnitatē, ac Theophaniā, vel Pentecostes, vel si qua

sunt alia Domini vel sanctorum Martyrum præcipua sacra celebranda, si ex permissio Abbatis fuerit, ad mensam loqui non negamus: sic tamen, ut pressa non dissoluta voce loquantur; ne garrula voce in sonum prorumpentes, magis delidia quam lætitia iudicetur. Et ipsa confabulatio talis sit ex colloquio scripturarum, quæ animæ lucrum faciat, non damnum. Silentium vero in pœnitentia accipientes omnimodis studeant custodire, ut de vera mortificatione mereantur fructum recipere. Duæ vero, in quocunque loco fuerint positæ, nullatenus sine tercia teste loqui præsumant: sed tres semper positæ necessaria colloquantur.

CAP. X. *De ratione mensæ qualiter administrandum vel obseruandum sit.*

MENSÆ administratio vel obseruatio quanta æqualitate vel sobrietate percurrere debeat, Abbatissæ scientia est trutinandum: ut in omnibus, sicut decet Dei ministras, religionis vigeat fomes. Ministrandum namque est omnibus æquali liberatione tam potus quam cibus, prout tempus, siue solemnitates, siue abstinentiæ, siue quotidiani vsus popolicerint. Quotidianis etenim diebus sufficere decernimus duo fercula, exceptis pomorum donis: de leguminibus vel de oleribus confecta, seu farinæ qualibet conspersione. Omnibus etenim æqua mensura ministrandum; præter si ætas infirmior, quæ sustinere non valeat, aut ægritudo corporis, aut nouellæ conuersationis nouitas improbata sufferre non queat, quod Abbatissæ iudicio pensandum est. Potus vero si siceræ liquoris, id est, ceruisiæ mensura solita tribuatur: si voluntas Abbatissæ fuerit, si labor, vel festus dies, vel hospitis aduentus pia precatio exagitauerit, vini potio augenda est. Et si duabus vicibus reficiendum sit, præter vini potionem similis Regula seruetur. Festis verò diebus, pro reuerentia sacræ solemnitatis, pluribus cibus, id est, ternis vel quaternis ferculis sunt corpora reficienda: sic tamen, ut si plura sunt cibaria numero, sint minora; ut corpora necessario cibo reficiantur, non nimia saturitate damnentur. Sedentes verò ad mensam sorores nulla alteram comedentem sublimatione oculorum respiciat, nec alterius mensuram cibi vel potus iniqua consideratione intueatur. Quando in mensam cibus administratur, nulla prius cibum comedat, quam signum ad benedicendum insonet. Abbatissæ verò vigilet, ut confestim cum cibus ministratus fuerit, signum tangere procuret; & omnes cum signum audierint, vna voce benedictionem rogent, quarum vocem Abbatissa subsequatur dicens: *Dominus dignetur benedicere.* Hoc ad omnia fercula, vel pomorum ac potus administrationem obseruandum est. Illud præcipuè decernimus, ut nulla alteri dare ex mensura sua, vel accipere ab altera præsumat, præter Abbatissam, vel Præpositam, cui ab Abbatissa commissum est. Si verò aut nouitate, aut temeritate aliqua hæc, quæ supra diximus, fuerit transgressa, disciplina Regulæ corrigatur pro præsumptæ temeritatis audacia.

CAP. XI. *Quibus congruentibus horis hyeme, vel æstatis tempore sit reficiendum.*

**A**B aduentu sacratissimæ sollemnitatæ, id est, ab introitu sancti Paschæ, quo immaculati Agni resurrectio celebratur, vsque ad sacram sollemnitate Pentecostes, qua Apostolis Spiritus sanctus fuit diffusus, id est, quinquaginta dierum spatio, ad sextam horam est reficiendum; similiter & vesperti erit cœnandum. Quia sacri temporis ratio exigit, vt nullus nec in Ecclesia positus tristitiam demonstret. A Pentecoste verò, si grauis labor non exigit, aut hospitum non cogat aduentus, vsque ad Quadragesimæ inchoationem, ad nonam, id est, semel reficient; exceptis magnarum sollemnitatum euentibus, aut si labor grandis exegerit, vt duabus reficiant vicibus. Ab inchoatione Quadragesimæ vsque ad sacratissimam sollemnitate Paschæ, exceptis Dominicis diebus, ad vespertinum reficiendum est; vt ante noctis inchoationem cum statione lucis refectionis impleatur hora. Quando verò administrandum est, singulæ ex singulis mensis assurgant, & sic ad coquinæ fenestram cum sobrietate venient, vt nullum strepitum pedum, vel vasorum, vel cuiuslibet soni excitent, & primum ad seniorum mensam simul omnes ministrent, sic demum ad suam mensam qua sederint deferant fercula. Præposita mensæ gubernet, quomodo ex ipsa mensa mutuati vicibus, vel ætate iuniores si fuerint, debeant ministrare.

CAP. XII. *Quomodo quotidianis diebus manibus sit operandum.*

**O**perandum namque est omni tempore præter dies festos; vt habeatur vel propriæ necessitatæ vsus, vel egenis vnde detur suffragium. Sic tamen operi manuum insistendum est, vt lectionis fructus non omittatur, sed statuto tempore operi dētur intentio, ac deinceps lectioni diuini vacetur. Operatio manuum ab hora secunda sumat exordium, & in horam nonam finem accipiat: ab hora verò nona lectio vsitetur, & si aliquando proprium aliquod opus faciendum aut vestimenti consuendi vel lauandi, aut quodlibet aliud opus, per Abbatissæ vel Præpositæ conuinciatum faciet. Et si fortè opus fortius superuenerit, vt maturius arripiant operari, vel propter feruentem æstum, hoc Abbatissæ arbitrio considerandum est, vt secundum quod tempus exigit, aut fortioris laboris pondus, vel ad sextam, vt iustè iudicauerit, ab opere sit quiescendum, & post quietem vel refectionem vsque ad vespertinum sit operandum. Illud inter omnia vel Abbatissa si præsens fuerit coërceat, aut Præposito quæ eius vice relinquitur, vt nullam penitus Monacham fabulis otiosis præter necessariam interrogationem vacare permittat; sed in ipso opere manuum operis Dei recordatio teneatur: id est, vt dum exterius per temporalem opportunitatem manus operibus occupantur, interius mens cum linguae meditatione psalmorum ac scripturarum recordatione dulcescat. Ac si violatrix huius Regulæ fabulatione delectetur, silentij pœna castigetur. Focos verò in schola penitentes, si fuerint, binæ & binæ per hebdomadas facient. Similiter ad caput sororum lauandum per singula Sabbata, vel bal-

nearum vsus per festas solemnitates præparent, aut si sunt alia extrema faci-  
cienda, pœnitentes facient: vt dum mente humili & contrito corde hæc pro-  
pter timorem Domini faciunt, ab omnipotentis Dei misericordia celerius  
a suis delictis lauentur. Quando ad opera eundum est, istud capitulum psal-  
latur: *Sit splendor Domini Dei nostri super nos; & opera manuum nostra-  
rum dirige super nos; & opus manuum nostrarum dirige.* Quando ve-  
rò finitur opus, istud dicatur capitulum: *Benedicat vobis Deus, Deus nos-  
ter, & benedicat vos Deus, & metuant eum omnes fines terre.* Pis-  
trices verò alternatim per vices opus commune faciant: sic tamen, vt  
minus tribus non sint propter loquendi necessitatem. Et si necesse fuerit  
vt ibidem maneat, minus quatuor non sint, & vna ex eis senior sit Præ-  
posita, cuius religioni credatur, quæ & loquendi licentiam habeat. Et pa-  
nem quem faciunt per vices senior quæ ex eis est, Cellariæ repræsentet;  
vt omni custodia tutæ in nullo reprehensibiles reperiantur. Similiter &  
quæ in braciatorium ad ceruisiam faciendam inhabitauerint, vna ex eis  
senior sit Præposita, quæ secundum Regulam pistricis omnia custo-  
diat. Cocæ verò per hebdomadas coquunt, vt in vnaquaque hebdomada  
tres vel amplius, si necesse fuerit, ad coquinandum deputentur; ne impossi-  
tus sine discretionem labor, vnde mercedem mercari debuit, inde murmurij  
fructum reportet. Ingredientes autem pro se orari rogent omnem cœtum  
sororum, orantes in oratione dicant: *Adiutorium nostrum in nomine Do-  
mini, qui fecit calum & terram, & Adiuua nos Deus salutaris noster.* Ex-  
cuntes verò lauent omnium sororum pedes; & omnia vasa quæ ad necessa-  
rium vsum habuerunt, lauata Præpositæ repræsentent. Similiter pro se orari  
rogent, & hunc versum in oratione dicant: *Quoniam tu Domine adiui-  
sti me, & consolatus es me.* Propter singulas negligentias tam cocæ quam  
Cellariæ viginti quinque palmarum percussionibus quotidianis diebus  
emendentur, ne minimas paru pendentes cuius in maioribus procliuio-  
res reperiantur.

CAP. XIII. De utensilibus vel suppellectilibus.

**V**Tensilia Mōnasterij, & quæcunque sunt ad commune opus necessaria,  
Abbatissæ curæ disponantur. Et tales in Congregatione quarantur,  
quarum & sollicitudo animi viget, & conscientie firmitas sit probata; & ipsi  
cura committatur, vt quæ cuique necessaria fuerint, opportunitate exigente  
tribuantur. Et sic ipsa utensilia, seu quæcunque eis ab Abbatisa commissa  
fuerint, cum sollicito timoris studio gubernentur, vt mercedem commissæ  
curæ recipiant, & non iudicium damnationis incurrant, anteponentes illud  
mentis oculis: *Maledictus qui facit opus Dei negligenter.*

Ierem. 48.

CAP. XIV. Qualiter in schola debeant dormire.

**C**um semper religiose & Deo dicatæ animæ, tam diurnis quam no-  
cturnis horis paratam Deo mentem præparent, vt quamuis sopore  
inembra torpescant, anima vigore creatoris intentæ præconijs peruigil ma-



neat, iuxta illud; *Ego enim dormio, & cor meum vigilat*: tamen solerti custodia specialiter utiendum, ne per negligentiam maternæ sollicitudinis subiecta membra damna capiant imbecillitatis. Proinde ergo decernimus, ut binæ & binæ, præter infirmas & seniores, in lectulis dormiant, sic tamen, ut ad inuicem non loquantur, neque se ad inuicem, id est, facie ad faciem respiciant; sed vna post aliam quiescens dormiat, ne antiquus hostis, qui ore libenti animas vulnerare cupit, aliquid fraudis iaculando immittat; ut colloquendo mortalia excitet delideria. Sic tamen fiat, ut vna ex illis semper senior sit: de cuius religione non dubitetur. Iuenculas vero nulloatenus simul quiescere censemus, ne in aliquo carnis aduersitate æstu delicto rapiantur. Omnes enim, si fieri potest, vna domus ad dormiendum capiat, præter si infirmitas aut senilis ætas poposcerit, aut culpa damnaverit, aut nouitas probata non fuerit, ut in cella separentur. Omnes vestitæ & cinctæ dormiant. In schola qua dormitur per totam noctem lucerna ardeat. Ad cursum verò cum festinatione surgentes, signum Crucis fronti inferatur: simulque sub silentio dicatur: *Pene in adiutorium meum intende, Domine ad adiuuandum me festina.*

CAP. XV. De cura infirmantium qualis esse debeat.

**H**Arum cura quæ infirmitatibus detinentur qualis esse debet, proprietas auctoris declarat, cum dicit: *Quæcunque vultis ut vobis faciant boni Matt. 7. mines, & vos facite eis similiter.* Licet hoc in omnibus sit agendum, præcipue tamen in infirmantium cura hæc præceptio est exhibenda; quia Dominus dixit: *Infirmus fui, & venistis ad me.* Ita ergo cura infirmis querenda est, ac si præsentis Christo ministrare putetur. Reuera etenim quæcunque pro Christo infirmis curam impendit, Christo in infirmis ministrat. Sit tamen Abbatissæ curæ, ut separatim cellam habeant cum omnibus opportunitatibus; ut nullum exteriorum laborem sentiat, quæ in infirma carne penam portat. Et si tempus poposcerit, sicut tempus Quadragesimæ, ut ceteræ vitam immutent, infirmis semper cedendum est; ut tam potius quam cibaria vberius ministrentur. Balnearum usus, vel cura medendi summo adhibeatur studio. Sanis verò, præcipue verò iuenculis, tardius concedatur. Abbatissa talem curam de infirmis habeat, qualem se recipere à Domino sperat; ut nec à Cellararia, nec à ministra aliquam negligentiam infirmæ sequantur. Decrepita verò ætate fessis talis sit cura, quatenus nulla in eis negligentia, sed iuxta arbitrium Abbatissæ, prout cuiusque necessarium esse viderit, consideratione pia earum imbecillitati concedatur. Non enim hæc possunt Regulæ tenori subiacere, sed potius pietatis in eas impendendus est affectus.

CAP. XVI. De casibus qui per negligentiam aut euentu superueniunt.

**N**egligentiæ culpa, qua per multos casus in multis delinquitur, Abbatissæ iudicio pensanda est, id est, in refectorio, in coquina, in dormitorio, vel in qualibet vtilitate aut fregerit, aut perdidit, aut negligeret dimiserit, omnia secundum suum modulum sunt pensanda, & iuxta

ritatem vel teneram, vel senilem, vel viridem sunt corrigenda. Quia si in minimis negligentiae vitium non corrigitur, mens vitiata in minoribus culpis, in maiora dilabitur delicta. Si soror, quae in his casibus lapsa, statim Abbatissae vel Praepositae puram dederit confessionem; & compertum fuerit non suae voluntatis fuisse, quod casu accidit; hoc tantummodo sufficiat, ut hoc quod deliquit & perpetravit, si possibile fuerit, non denegat, & emendet cum venia satisfactione. Si vero non sua confessione, sed alterius prodicione cognitum fuerit, prout culpa magnitudo poposcerit, poenitentiae subiacebit; quia culpam per puram confessionem non manifestavit. Si vero ex maioribus culpis, quod ad animae maiorem pertinet damnationem, aliquam commiserit, hoc secretius per puram Confessionem volens suae manifestet Abbatissae: ne dum tempore animi culpam detegere verecondat, cum reatu culpa faciem diaboli interius recondat.

CAP. XVII. *De eo quod nulla Monacha Monasterio debeat proprium aliquid vindicare.*

Proprij aliquid in Monasterio nihil habendum: sed potius propter nomen Domini omnia contemnenda. Quid enim proprium aliquid suum fidelis anima de rebus mundi vindicet, cui mundus crucifixus est, & ipsa mundo? Quae semel mundo mortua, cur per aliquam temporalium rerum cupiditatem, vel desiderium arduosum de quo incipiet vivere mundo, quae contempnere iam coeperat iam vivere Deo? Ampurandum ergo est hoc vitium radicis ab omni Monacha, ut nullam rem vel in vestimentis, seu in calceamentis, vel in quibuscumque rebus sibi vindicet, vel suum esse dicat, nisi quantum ex Abbatissae iussione penes se praecipitur retinere, ac si custos alterius, non propriae rei domina. Et ea quae sibi ab Abbatissa fuerint commendata, id est, ad necessitatem praesentem, aut in vestimento, aut in qualibet re, nihil exinde aut dare aut commodare cuiquam praesumat, nisi tantum ab Abbatissa illi fuerit ordinatum. Quid enim de rebus mundi alteri sorori conferat, quae suas in omnibus voluntates propter Christum in Abbatissae tradidit potestatem? Omnia ergo quae in Monasterio habentur sint omnibus communia; iuxta quod in Actibus Apostolorum legimus: *Eterant, inquit, eis omnia communia.* Sic tamen communia sunt habenda, ut nulla aut dare aut accipere, nisi Abbatissa ordinante, praesumat: ne cupiditatis aut temeritatis malum incurrere in laqueum, Iudae proditoris consortio numeretur, qui solus in numero Apostolorum oculos habuisse refertur, ubi commutantium ac vendentium commercia ponebantur. Quod si huic vitio aliqua sororum delectari fuerit deprehensa, & post primam, secundam vel tertiam correctionem emendare noluerit, disciplinae regulari subiacebit.

CAP. XVIII. *De culpae excommunicatione.*

Si qua vero soror instigante diabolo contumax, vel superba, seu inobediens, vel murmurans apparuerit; vel etiam in quocumque casu lapsa seniorum praecepta vel sanctae Regulae notitiam violare tentaverit; haec secundum praeceptum Domini, secreto à senioribus semel vel bis corripitur.

Si emendare noluerit, tunc simul ab omni Congregatione obiturgetur. Et si sic emendare noluerit, tunc prout culpæ magnitudo poposcerit, secundum Regulam iudicetur: id est, aut excommunicationi subiaceat, si eius antea intellectus vigit: aut si obstinata & duræ mentis tenacitas culpæ & improbitatis perseueret, tunc corporali disciplinæ subiacebit.

CAP. XIX. *Qualis debeat esse excommunicatio.*

**F**Excommunicationis menura qualis esse debeat, iustum scientibus libere iudicium culpæ modus ostendit. Leuioribus enim culpis leuior est adhibenda correctio; grauioribus verò feruentior est adhibenda damnatio. Proinde Abbatisa studio est pensandum, vt si aliqua soror in leuioribus inueniatur obnoxia culpis, vsque ad indictam sibi horam mensa priuetur. De grauioribus vero seu dierum vel hebdomadarum vel mensium definitio in longius protracta correctione finiatur: ea tamen Regula, vt si amplius quam septem dierum spatium excommunicationis percurrit, quamdiu pœnitentiæ sub statuto tempore ordo retentus fuerit, sicut à mensa loco suo priuetur, ita & in Ecclesia segregetur; vt in loco in quo ante fuit, nec psalmum canter, nec vllum ordinem teneat, vsque dum satisfactione humili cum cordis contritione ab Abbatisa vel à senioribus veniam mereatur. Excommunicata vero soror, quæ culpis grauioribus existentibus aut cellula recluditur, aut à consortio Congregationis separatur, à nullo penitus colloquia aut visitationis munus fruatur, nisi tantummodo cui præceptum ab Abbatisa fuerit. Si qua transgressa hanc Regulam fuerit regulari pœnitentiæ subiacebit.

CAP. XX. *De his quæ per sedulam correctionis curam sæpius correpte emendare noluerunt.*

**S**OROR si sæpius correpta emendare noluerit, excommunicatione pro modo culpæ corrigatur. Si nec sic aliquid proficiat increpantis correctio, tunc verberum vindictæ subiacebit. Quod si sic emendare voluerit, sed magis in tumorem superbiæ elata, opera vel actus, de quibus corrigitur, defenderit, tunc Abbatisa scientiæ regimine corrigatur: quia scriptum est: *Qui abiicit disciplinam, infelix est.* Moderante ergo scientia sancti medendi cura adhibeatur. Si lethale vulnus per fomenta castigationum, & pietatis ac leuitatis vnguenta sospitati non redditur, saltem incisionibus amputetur. Et si sic sanies defecta tumorem non amiserit, tam excommunicationis sententiam, vel disciplinæ corporalis pœnam incurrat. Et si nec excommunicationis metu, nec flagelli pœna frangitur, augeatur adhuc pietatis fomes; ita vt ab omni Congregatione pro ea communis Dominus orationum officio deprecetur: vt quæ laqueo diaboli irretita tenetur, Domini misericordia ac pietate curetur. Quod si nec sic corrigi voluerit, intra septa Monasterij sub pœnitentiæ tenore ab omnibus, præter custodibus, segregata, tam diu castigetur diuersis correctionibus, vsque dum eius humilitas omnibus vera credulitate pateat: quoniam & iniuriis sæpè salus præstat. Nam rideo separanda est à Congregatione, vt

Sap. 3.

fuo vitio non maculet innocentes. Tenera verò ætas, quæ excommunicatus vim nescit, non excommunicatione, sed flagello corrigenda est.

C A P. XXI. *De receptione sororis.*

**S**In vilo tempore, quod absit à Christiana Religione, soror à septis Monasterij discesserit, & foras fugiens postea recordata pristinae religionis, & æterni iudicii percussa timore reuersa fuerit; prius omnem Monasterio emendationem polliceatur: postea si probabilis eius penitentia agnoscat, tunc demum intra septa Monasterij recipiatur. Et si bis aut tertio hoc fecerit, simili pietate foueatur; sic tamen vt in extremo loco inter penitentes recepta tam diu examinetur, v.que dum probabilis eius vita inueniatur. Si vero post tertiam receptionem fugæ culpa maculata fuerit, sciat omnem reuersionis aditum esse in postmodum denegandum.

C A P. XXII. *Qualiter inuicem se humilient, vel ordines seruent: vel in minutis actibus qualiter sint seruanda precepta.*

**Q**uanto se affectu, vel caritatis ministerio in Monasterio animæ positz debeant diligere, sanctorum Patrum instituta sanxerunt: sed in quibus sit actibus vel officiis demonstrandum, à nobis pro parte indicandum est. Habet denique latissimum virtutum copia ambitum, q̃to circumsepta faciliè hostem sibi superet aduersantem. Sunt etenim nonnulla, quæ in actu videntur exigua, & tamen vel custodita vel neglecta, aut tepescente, aut seruente animi motu demonstrantur: vt est humilitatio capitis, vel sermonum affabilis saluatio; quæ aut rigidæ mentis vel concordiæ, aut si certè piæ, purissimum patefacient affectum. Seruandum ergo est famulis vel famulabus Christi, vt semper intra mentis statum ea nutriant, quæ à vera humilitate & caritate non discedant: in quibus summa constat virtutum. Nam sicut nunquam sine vera humilitate vera manet caritas; ita nunquam absque vera caritate vera manet humilitas. Arripiamus ergo instruere fundamentum, vt ad culmen perueniamus virtutum. Sic prius humilitas monstranda tam actu quam affectu, vt post caritatis copiam ædificetur. Et quando sibi mutuatim in via vel in quocunque loco occurrerint, cum omni humilitate ab inuicem flectentes benedictionem rogent. Et si ex eis vna senior fuerit, prius iunior benedictionem postulet; tunc demum senior prosequatur. In cursu verò positz, prout ab Abbatissa fuerint ordinatz, vel ad psalmum canendum, vel lectiones recitandas, vel etiam ad communicandum euntes, suum ordinem custodiant: ne constitutum sibi locum transilientes in ambitionis vel arrogantiz vitio deinergantur. Abbatissæ verò studendum est, vt per ordinem sicut conuersæ in Monasterio fuerint, ita in suo ordine constituantur: præter si vberius conuersatio religionis meruerit, vt inantea promoueatur, vel si grauis culpa exegerit, vt retro regradetur. Si veto aliqua ex fororibus cognoscat, seniore affectare locum, cum verecunda castigatione refellatur: quia non debiti honoris locum præsumpsit, nec religionis commercio, sed ambitionis honorem indebitum conata est arripere. In confessione sororum, si alia superuenerit, quæ iuniores sunt ordine, assurgant, &

seniori locum præbeant. Iuniores vero seniori nullatenus superbiendo contradicant; sed cum omni humilitate vel interrogatæ, vel correptæ respondæant. Si labentem in quolibet delictum iunior seniore aspexerit, non exprobrando, sed magis dolendò ad confitendum Abbatissæ vel Præpositæ dirigat: similiter senior iuniori faciat. Ad confessionem veniens, prius prostrata supra humum, suam culpam esse dicat: sic postquam surgere iubetur, suam confessionem manifestet. Quando ad aliquod opus fieri commeatu rogatur, veniam prius petatur, & sic de opere quod faciendum est commeatu rogetur. Quando ad Abbatissam venit, cum omni humilitate veniam petendo accedatur; similiter quando egreditur, cum veniæ petitione benedictio quærat. Nulla Monacharum per semetipsam de propria necessitate Abbatissæ suggerat, sed omnes per Præpositam quicquid necessitatum fuerit Abbatissæ studeant inire. Si Sacerdos vel quilibet Religiosus venerit, ut ei per Abbatissæ commeatum sit occurrendum, à longè astantes, cum humilitate flectentes genu sub silenti voce benedictionem rogent. Et si ordinatum fuerit ab Abbatissâ, ut cum his aliqua sororum loquatur, cum omni humilitate & modestia ac sobrietate loquendum est: ut in omnibus his virtutibus humilitatis ac sobrietatis inveniatur.

CAP. XXIII. *De non defendenda proxima vel consanguinea in Monasterio.*

**D**efendere proximam vel consanguineam in Monasterio nullo modo permitti censemus. Quid enim aliam defendat, quæ iam sibi non vivit, sed Christo, quem imitata manet crucifixa? quæ propriam animam, ut uberius salutem iungeret, prius perdidit? Quæ ergo proprias perdidit voluntates, ut Christi in se voluntatem impleat, cur aliarum delicta defendat, quæ propria crucifixi? Et si in veritate crucifixi, & non mundo iam, sed Christo vivit, cur in mundo facinoribus labentes pro qualibet familiaritate defendat? Sit ergo ei æquus amor tam in consanguinea, quam in cetera sorore, quæ ei sanguinis affinitate non iungitur. Maneat ergo in omnibus amor corde clausus, nec quamquam sub disciplinæ moderamine positam rueri studeat. Ne vitium defendendi in alias dimittat. Sit ergo in arbitrio corrigentis, ut quas corrigit sub amoris studio, non propriam implendo voluntatem, sed vitia corrigendo, inferat disciplinam.

CAP. XXIV. *De nutriendis infantibus.*

**I**nfantibus in Monasterio quanta cura & disciplina sine enutrienda, multis didicimus documentis. Debent enim nutrirî cum omni pietatis affectu, & disciplinæ ministerio: ne desidii vel lasciviæ vitio sub tenera ætate maculatæ, aut vix, aut nullatenus possint postea corrigi. Sit ergo in eis tanta cura, ut nunquam sine seniore huc atque illuc liceat decurrere: sed semper ab eius disciplina retentæ, & timoris Dei ac amoris doctrina imbutæ, ad cultum instruantur Religionis. Habeant lectionis usum; ut sub puerili ætate discant, quod ad perfectum deductis proficiat. In refectorio per se mensam habeant iuxta seniorum mensam positam. Seniores tamen vel dux, vel amplius, de quarum religione non dubitatur, cum eis sedent,

ut semper timore anteposito, sub metu seniorum nutriantur. Quibus vero horis reficiant, vel somnum capiant, Abbatissæ arbitrio pensandum est: ut in omnibus virtutum custodia discretio reperiatur.

*Explicit Regula Cuiusdam S. ad Virgines.*

## LECTORI.

*In veteri Codice, qui sanctorum Patrum Monasticas sanctiones continet, etiam sequentes duæ Constitutiones, altera nescio cuius Regule denotarum, altera Concilij Hispanensis secundi, post Regulam S. Isidori legebantur. Eas quoque, quia ad Virginum sanctimonialium curam ac disciplinam veterem pertinent, hoc loco placuit exhibere, ut omnes sacre antiquitatis reliquias quam fieri potest religiosissime, etiam cum ramenta & pulvisculo, repræsentarem.*



## SENTENTIA DE REGVLIS

### DEVOTARVM.

**N**emo ad eas vadat visitandas nisi qui habebit ibi matrem, vel sororem, aut filiam, & propinquas, & consobrinas, siue matrem filiorum suorum. Si autem necessitas fuerit ut videant eas, ut antequam renuntiarent sæculo, & intrarent in Monasterium, paterna debetur eis hereditas, aut aliqua causâ manifesta est, mittent cum eis probatæ virum ætatis ac vitæ: videbunt eas, ut pariter reuertentur. Nemo vadat ad illas, nisi quos supra diximus. Si eas videre voluerint, primum facient resiliantem Patri Monasterij, & ille mittet ad seniores, qui in ministerium virginum delegati sunt, qui occurrentes eis, & cum ipsis videbunt quas necesse habuerint, cum omni disciplina & timore Dei. Cumque eas viderint, non eis loquentur de rebus secularibus. Quicumque de his mandatis præterierit, absque vlla retractatione negligentis atque contemptus, eget publicè penitentiam, ut possidere valeamus regna cælorum.

### CONCILIUM HISPALENSE Cap. XI.

**V**ndecima actione cum consensu communi decreuimus, ut Monasteria Virginum in Prouincia Bætica condita Monachorum administratione ac præsidio gubernentur. Tunc enim salubria Christo dicatis virginibus prouidemus, quando eis patres spirituales eligimus, quorum non solum gubernaculis

gubernaculis tueri, sed etiam doctrinis ædificari possint. Hæc tamen circa Monachos cautela seruata, vt remoti ab earum peculiaritate nec vsque ad vestibulum habeant accedendi familiaritate permissum, sed neque Abbati, vel ei qui præficitur extra eam quæ præest loqui virginibus Christi aliquid, quod ad institutionem morum pertinet, licebit. Nec cum sola quæ præest frequenter eos colloqui oportet; sed cum testimonio duarum aut trium sororum: ita vt rara sit accessio, brevis locutio. Absit enim vt Monachos, quod etiam dictu nefas est, Christi virginibus familiares esse velimus: sed iuxta vt iussu Regularum vel canonum admonent, longè segregatos atque sc̃iunctos, eorum tantum easdem gubernaculis deputamus: constituentes, vt vnus Monachorum probatissimus eligatur, cuius curæ sit prædia earum rustica vel vrbana intendere, fabricas instruere, vel si quid aliud ad necessitatem Monasterij providere: vt Christi famulæ pro animæ suæ rei tum vtilitate sollicitæ, solis diuinis cultibus viuant, operibusque suis inseruiant. Sanè is qui ab Abbate præponitur, iudicio sui Episcopi comprobetur. Vestes autem illæ ipsædem Cœnobiis faciant, à quibus tuitionem expectant, ab ipsædem denuo, vt prædictum est, laborum fructus & procurationis suffragium recepturæ.

*Explicit.*



# SANCTI LEANDRI

## HISPALENSIS EPISCOPI REGVLA,

### SIVE DE INSTITVTIONE VIRGINVM

& contemptu mundi ad Florentinam Sororem Liber.

---

DE SANCTO LEANDRO HISPALENSI  
eiusque Regula ad Florentinam Sororem  
veterum testimonia.

MARTYROLOGIUM ROM. die xxvii. Febr. item Bedæ,  
Vsuardus, Ado, & alij.

*Hispali in Hispania natalis S. LEANDRI eiusdem ciuitatis Episcopi, cuius predicatione & industria Visigothorum gens, adiuuante Reccaredo eorum Rege, ab Ariana impietate ad Catholicam fidem conuersa est.*

*Cod. Reg. P. III.*

M



IDEM MARTYROLOG. Rom. die xx Iunij.

*Hispali in Hispania depositio sanctæ FLORENTINÆ virginis, sororis Sanctorum Leandri & Ididori Episcoporum.*

ISIDORVS Hispal. de script. Eccles. cap. xxviii.

LEANDER genitus patre Seucriano Carthaginensis Prouincia Hispaniæ, professione Monachus, & ex Monacho Hispanensis Ecclesiæ Prouincia Batica constitutus Episcopus: vir suauis eloquio, ingenio præstantissimus; vita quoque tantum atque doctrina clarissimus, ut etiam fide eius atque industria populi gentis Gothorum ab Ariana insania ad fidem Catholicam reuerterentur. Hic namque in exilij sui peregrinatione composuit duos aduersus hæreticorum dogmata libros, eruditione sanctarum scripturarum ditissimos, &c. Præterea edidit vnum ad FLORENTINAM sororem de institutione virginum, & contemptu mundi libellum, titulorum distinctionibus prænotatum. Floruit sub Reccaredo, viro Religioso ac Principe glorioso: cuius etiam temporibus mirabili obitu actualis vita terminum clausit.

S. GREGORIUS MAG. PP. Dial. lib. III. c. xxxi.

*Sicut multorum, qui ab Hispaniarum parentibus veniunt, relatione cognouimus, nuper Ermigildus Rex, Liuigildi Regis Visigothorum filius, ab Ariana hæresi ad fidem Catholicam viro Reuerendissimo LEANDRO Hispalitano Episcopo, dudum mihi in amicitijs familiariter iuncto, prædicante conuersus est.*

IDEM Præfatione in librum Iob.

Reuerendissimo & sanctissimo fratri suo LEANDRO Coepiscopo Gregorius S. S. D. Dudum te, frater beatissime, in Constantinopolitana vrbe cognosceni, cum mo illuc Sedis Apostolicæ responsa constringerent, & te illuc minncta pro causis fidei Visigothorum legatio perduxisset; omne in tue auribus, quod mihi de me displicebat, exposui, &c. Tunc eisdem fratribus, etiam cogente te, placuit, sicut ipse meministi, ut librum beati Iob exponere importuna me petitione compellerent.

IDEM lib. I. Epist. xli. ad LEANDRVM Episcopum.

Ea quæ in beati Iob expositione dicta fuerant, & vobis dirigenda scribitis, nisi portitoris præsentium me festinatio coangustasset, cuncta vobis transmittere sine aliqua imminutione voluissem; maxime quia hoc ipsum opus ad vestram reuerentiam scripsi: ut ei quem præ cæteris diligo, in meo iudicer labore desudasse. Præterea si vobis indulgeri tempora ab Ecclesiastica occupatione cognoscetis, quid sit iam faciendum scitis: quamuis etiam absentem corpore, præsentem mihi te semper intueor, quia vultus tui imaginem intra cordis viscera impressam porto.

IDEM lib. iv. Epist. xvi. ad eundem.

Quanto ardore videre te sitiam, quia valde me diligis, in tui tabulis cordis leges. Sed quia longoterrarum spatio disiunctum te videre nequeo, vnum quod mihi de te dictauit caritas feci, ut librum Regule pastora-

lis, quem in Episcopatus mei exordio scripsi, & libros quos in expositionem beati Iob iamdudum me fecisse cognovisti, Sanctitati vestra transmittere curavi.

IDEM lib. vii. Epist. cxxvi. ad eundem.

Sanctitatis tue suscepi Epistolam, solius caritatis calamo scriptam. Ex corde enim lingua tinxerat, quod in chartae pagina refundebat. Boni autem sapientesque viri cum legeretur affuerunt, quorum statim viscera in compunctione commota sunt. Cæpit quisque amoris manu in suo corde te rapere: quia in illa Epistola tue mentis dulcedinem non erat audire, sed cernere. Accendebantur & mirabantur singuli, atque ipse ignis audientium demonstrabat qui fuerat ardor dicentis. Nisi enim prius in se faces ardeant, alium non succendunt. Ibi ergo vidimus quanta caritate tua mens arserit, quæ sic & alios accendit. Vitam vero vestram, cuius ego semper cum magna veneratione reminiscor, minime nonerant, sed eis altitudo vestri cordis patuit ex humilitate sermonis.



INCIPIT IN CHRISTI NOMINE

S. LEANDRI HISPALENSIS EPISCOPI

de Institutione Virginum & contemptu mundi

ad Florentinam Sororem Liber.

LEANDER Dei misericordia pergrate in Christo mibi filie & sorori FLORENTINÆ.

**R**equirenti mihi, soror carissima Florentina, quibus te diuitiarum cumulis heredem facerem, qua te patrimonij sorte ditarem; multarum rerum fallacium occurrebant imagines: quas cum ego vt importunas muscas manu mentis abigerem, tacitus aiebam: Aurum & argentum de terra est, & in terram reuertitur; fundus & patrimoniorum reditus vilia & transitoria sunt, præterit enim figura huius mundi. Quidquid enim sub sole eohispexi, nihil te dignum, soror, arbitratus sum; nihil muneri tuo credidi esse gratissimum: omnia mutabunda, caduca, & vana fore conspexi. Vnde veram esse attendi Salomonis sententiam, dicentis: Magnificauit opera mea, ædificauit mibi domos, plantauit vineas, feci hortos & pomaria, & conserui cunctis generibus arborum, instruxi mibi piscinas aquarum, vt irrigarem siluam germinantium lignorum. Possedi seruos & ancillas, multamque familiam habui; armenta quoque & agnos ouium, greges quoque caprarum, vltra omnes qui fuerunt ante me in Ierusalem. Coaceruavi mibi argentum & aurum, & substantias Regni ac prouin-

1. Cor. 7

Eccl. 3:

2

*ciarum: feci mihi cantores & cantatrices, & delicias filiorum bonorum: scyphos & vrcos in ministerio ad vina fundenda. Et supergressus sum opibus omnes qui fuerunt ante me in Ierusalem. Quam igitur omnem mortalium pompam tali termino conclusit, ut diceret: Cumque me conuerissem ad omnia quae fecerant manus meae, & labores in quibus frustra sudaueram, vidi in omnibus vanitatem & afflictionem animi, & nihil permanere sub sole. Et iterum ipse dicit: Detestatus sum omnem industriam meam, quam sub sole studiosissime laboravi, habiturus heredem post me, quem ignoro, utrum sapiens aut stultus futurus sit, dominabitur in laboribus meis quibus desudaui & sollicitus fui, & est quidquam tam vanum? Unde cessavi renunciauitque cor meum ultra laborare sub sole. Tali quoque informato oraculo, non esse me parentem verum existimares, soror, si te iis ditatis rebus, quae stabilitate nulla consistunt: quae mundanis subiectae casibus te destituerent, nudamque relinquerent. Aeternis quoque te cumularem, & timori metuique subijcerem, si ea quae fur auferre poterat, fulcare tineae, ærugo vorare, ignis absumere, terra obruere, aqua delere, sol torrere, imber scædare, glacies stringere, tuæ germinati conferenda esse putarem. His certè rebus humanis implicatus animus à Deo auertitur, & ab illa immobili ac permanentis veritatis forma recedit. Nec potest ad se admittere diuini verbi dulcedinem, aut Spiritus sancti suauitatem, pectus quod tot mundanis agitur molestis, tot curarum temporalium stimulis verberatur. Si ergo te his nexibus alligare, talibusque onerare ponderibus, & mole terrenæ cogitationis opprimerem, inimicum me, non parentem deberes æstimare, interemptorem, non fratrem esse sentires. Eia soror carissima, quoniam quidquid aë cæli concluditur, terrena sustinent fundamenta, & telluris super faciem voluitur, nihil dignum quo ditari posses inuenimus; supra cælos, querendum est, unde munus virginittis auxisti; ut ibi præmium & patrimonium virginittis inuenias. Ex compensatione enim integritatis meritum agnoscitur, & de sua retributione pensatur. Quanto enim vilis putaretur, si transitoris terrenisquæ ditaretur muneribus; tanto præclara est virginittas & excellens, quæ calcatis abdicatisquæ mundanis voluptatibus, dum in terris Angelorum seruat integritatem, Dominum Angelorum sortita est portionem. Quæ ergo est virginittis hereditas? nonne ea, quam dicit Psalmista? *Dominus pars hereditatis meae*? Et iterum: *Portio mea Dominus*? Vide soror quantum profeceris: vide quam summum te neas apicem: ut multorum gratiam beneficiorum in vnum eundemque inuenieris Christum. Sponsus est, frater est, amicus est, hereditas est, pretium est, Deus & Dominus est. Habes in eo sponsum, quem diligas: *Speciosus est enim forma præ filiis hominum*. Est verus frater quem te neas: adoptione enim & tu eius filia, cuius filius est ille natura. Est amicus de quo non dubites: ipse enim dicit: *Vna est amica mea*. Habes in eo hereditatem quam ambias: pars enim hereditatis tuæ ipse est. Habes in eo pretium quod agnoscas: quia sanguis eius redemptio tua est. Habes*

Psal. 15.  
Psal. 118.

Psal. 44.

Cant. 6.

in eo Deum à quo regatis : Dominum quem metuis & honores. Totam sibi in Christo prerogatiuam virginitas vindicat : vt ante quem tremunt Angeli , cui seruiunt potestates , cui virtutes obtemperant , cui cœlestia & terrestria genuflectunt ; hunc sibi virgo sponsum vindicet ; ad huius thalamum ornata virtutibus properet : hunc cubili cordis , casto cubili consueat . Et quid amplius ei conferre potuit , cui se Christus sponsum tribuit , sanguinem suum dotis ac muneris titulo compensauit ? Solent ergo qui vxores ducunt dotes tribuere , conferre prœmia , & ad vicem perdendi pudoris sua tradere patrimonium ; vt emisse potius quam duxisse videantur vxores . Tuus , virgo , sponsus dotem tibi sanguinem suum dedit ; eo te redemit ; eo te suæ copulæ sociauit : vt pudorem non perdas , & habeas prœmia . Quanto enim munificentius est dotis prœmium , tanto est amor immensior . Multum enim diligit , quam proprio sibi sanguine desponsauit . Et ob hoc suum corpus vulneris ictu & telo gladij maluit aperiri , vt tuam sibi integritatem emeret , pudicitiam conferuaret . E contrario enim curauit hominem : vt sicut mors eius vita est nostra , eiusque humilitas nostræ est superbiæ medicina ; sic & vulneribus ipsius nostra integritas empta est : qui ideo ferri se vulnere voluit , ne malleo vniuersæ terræ nos ferire lineret . *Pretio enim empti estis* , ait Apostolus ,  *nolite fieri serui hominum* . Cur virgo dare vis corpus viro , quod iam est redemptum à Christo ? Alius te redemit , & alij nubere cupis ? alterius pretio libertatis militas , & spontanea te seruitute condemnas ? Si mundus omnis titulo dotis scribitur , quid pretiosius sanguine Christi , quo redemptus est mundus ? Appende mercedem & pretium , vt videas plus valere qui redemit , quam id quod redemit . Quanto itaque prauè intelligit virgo , quæ contempto emptore mercem sequitur : & sanguine Christi postposito , mandum qui redemptus est amplexatur . Non sum idoneus eloqui , soror amantissima , prœmia virginitatis : est enim ineffabile donum , absconsum oculis , celatum auribus , intelligentiæ obseruatum . Quod omnes esse sperans Sancti , & post resurrectionem cuncta præstolatur Ecclesia fieri , vos iam estis . *Corruptibile hoc* , ait Apostolus ,  *induet incorruptionem* . Sed reuera post resurrectionem corporis . Ecce vos incorruptionis gloriam iam scitis . Vos istam iam in præsentī seculo partem gloriæ possidetis . Quanta est enim beatitudo , quæ vobis reponitur in futurum ? quæ vobis corona manet in æternum ; quæ incorruptionis gratiam , ad quam multi peruenire desiderant , hic habetis ? Gaude ergo talem te esse , qualis Dei formata es manibus . Ille ergo integram condit vique , quam integritate ditauit ; quam ad integritatis prœmia præparauit . Pueri enim naturalem corrumpunt homines , quam Deus formauit integram . Et hæc offensa humani generis prima : hæc damnaræ originis causa ; dum protoplasti esse noluerunt , quod fuerant conditi : idcirco meruerunt in se & in prole damnari . Reparata castimoniam in vobis retentaculum , ô virgines , quod perdiderunt in paradiso primi homines . Vos enim conditionem seruastis primigenarum hominum , quæ tales perseuerastis , quales illi sunt instituti . Sed caute exempla eorum . Heu prohi-

1. Cor. 7.

1. Cor. 15.

dolor, soror carissima, fuge primorum hominum exempla: horresce serpentis antiquissimi sibilus; ne incipiat tibi germinare spinas & tribulos victa terra, & quæ pro insigni virginitatis lilia rosasque parturire debet, vriticam & paleam producat: istam, quæ vrat, illam, quæ laceret. Vos enim estis prima delibatio corporis Ecclesiæ. Vos itaque ex tota Christi corporis massa oblationes Deo acceptæ, & in supernis altaribus consecratæ. Pro vestro enim proposito, & pro fide sua, omnis Ecclesia nomen virginitatis indepta est, dum in ea melior pars & propensior vos estis, quæ animæ corporisque vestri integritatem Christo dedicastis. Et licet in omnibus suis generaliter membris fide maneat virgo, tamen suorum parte membrorum, quod estis vos, non incongruè virgo etiam corporea: genere scilicet illius locutionis, quo aut totum à parte, aut pars nominatur à toto. Meditate ut columba, sanctissima virgo, & mente pertracta, quæ in futuro tibi maneat gloria; quæ non adquisivisti carni & sanguini; neque corpus illud sanctissimum prostrasti corruptioni. Age ergo, cogitare præsume, intellige, quibus te amplexibus cupiat Christus, quæ mundi calcasti illecebras: quo te desiderio chorus ille expectet virgineus, quam ipsis gradibus properantem cælorum ardua vident, quibus chorus ipse virginalis petuenit ad Christum. Gaudet & Maria mater Domini, apex & specimen virginitatis, incorruptionis mater, quæ vos exemplo suo genuit, & manet integra: vos documento suo peperit, & dolores nesciuit: genuit sponsum, & virgo est. Felix ille venter, qui novit gignere, non corrumpi. Beata illa fecunditas, quæ pariendo implevit mundum, hæreditavit cælos, nec amisit velamina virginitatis. Ardeat cor tuum soror, igne illo, quem Christus misit in terram. Excitet te flamma ignis eius, & chorus ille virgineus prosequens Mariam. Ipsam ergo oculo mentis suscipe: ipsos comitare choros: ipsis te animi desiderio iunge, ibi festina; ibi propera: ibi *reposita est corona iustitiæ, quam reddet tibi Dominus iustus iudex in illa die.* Senti fratris animum tuos desiderare profectus, senti fratris concupiscentiam velle te esse cum Christo. Qui etsi in me non habeo, quod in te perficere volo, perdidisse me doleam, quod te tenere desidero: erit mihi interini quædam portio remissionis, si tu quæ pars melior nostris corporis, in via peccatorum non steteris; si quod tenes, firmissimè teneas. Hæc mihi, si alius accipiat coronam tuam. Tu apud Christum tutamen meum; tu carissima meum pignus: tu hostia mea sacratissima, qua expiari à colluvione peccati non dubito. Si tu accepta es Deo; si tu casto cubili cum Christo cubaveris; si tu Christi amplexibus fragrantissimo virginitatis odore inhaeris, profecto peccatoris nemor fratris obtinebis pro reatu germani indulgentiam, quam poposceris. Non te contristabit, qui te suæ copulavit societati. Sinistra eius, in qua est honor & gloria, sub capite tuo: & dextera eius, in qua est longinquo vitæ, amplexabitur te. Talibus sponsi oblata amplexibus, meam veniam postulans obtinebis. Amor tuus in Christo erit indulgentia mea: & quantulamcunque spem remissionis habeo, si soror quam diligo, ad nuptias Christi transierit; atque in illo terribili me-

2. Tim. 4. *corona iustitiæ, quam reddet tibi Dominus iustus iudex in illa die.*

CRUC. 2.

utendoque iudicio respiramentum aderit, vbi de factis, actibus, vel de commissis discussio fuerit: vbi de meis dispendiis, heu mihi, sum cogendus reddere rationem, tu solatium meum, tu respiramentum meum. Et vindicta quæ mihi debetur pro negligentia mea, fortè castitatis tuæ sedabitur intercessione. Defendes, ne profectu tuo à meo reatu operis, si tu Christo adhæseris, & si tu illi placueris, ego vnde ei displiceo non grauabor, dum tibi indulget, mihi parcat: nec perire fratrem sinet, cuius spondit sororem. Per te fortè mihi donabitur chirographum quod contraxi: dum te Christus fouet caritate, me non punit pro crimine. Miserere soror non tantum tui, sed & mei; vt vnde tibi restat gloria, saltem mihi vel venia concedatur. Multæ in tuo erunt virgines comitatu: cum iis facile impetrabis pro me quod poposceris. Immo ipsa mater & dux virginum Maria suum interpellabit pro tuo merito filium: & ne te contristet pro me orantem, me eriget fortè iacentem, & conscientie reatu merentem consolabitur. Non confundatur spes mea per te ad Deum. Meo igitur hortamento, meo ministerio, Dei quidem dono, sed meo obsequio, hanc tenes professionem. Sit ergo mihi integritas tua causâ veniæ, quæ tibi erit causâ coronæ. Averte quæso oculos à mundi falsis inanibus. Cælos aspice, vbi est sponsus tuus, Illuc animum dirige, *vbi Christus est in Dei dextera sedens, Omne enim quod in mundo est, concupiscentia carnis, & concupiscentia oculorum est.* Quæ Col. 3. 1. Ioan. 2. sursum sunt quære: vbi est vitæ æterna, illic sunt & desideria tua: vbi est sponsus tuus, ibi sit & thesaurus tuus. Nolo te moueri voluptate sæculi: nolo te fulgore carnis decorari. Cito mo iet alienam libidinem caro ornata: & aspectus iuuenum in se prouocat, quæ se componit vt ornata procedat. Placere velle oculis alienis, affectus est meretricis: & ad sponsi cælestis refertur iniuriam, si ita incedas vt oculis libidinosi placeas. Esto quæso iudex inter nubentes & virgines: spem vtriusque considera: quis quam teneat viam æstima. Virgo studet placere Deo; nupta sæculo. Virgo seruat integritatem qua nata est; nupta corrumpitur. Et quale est, vbi non permanet integra, vt capit esse natura? Primum diuino operi irrogatur iniuria, dum quod ille formauit integrum, libidine corrumpitur, libidine maculatur. In vos Deus cognoscit opus suum; quas tenet sæculum, & non corrumpit; quas tales Deus recipit, quales fecit. Omnia itaque restauranda sunt in resurrectione, quæ nunc pereunt de corpore. Virginitas semel perditâ, nec hic reparatur, nec in futuro recipitur. Verum est quod Deus præceperit nuptias; sed idcirco, vt inde nasceretur virginitas: vt multiplicata virginum successione, lucraretur in prole, quod perdiderant nuptiæ. Et radix & fructus nuptiarum virginitas est. De coniugio certè nascitur virgo: quæ si non corrumpitur, ad nuptiarum additur præmium. Habent nuptiæ vnde lætentur, si sui fructus cælesti horreo reponantur. Tu quoque communium parentum cumulabis merita: tuis vtriq; honoribus munerabuntur: te prole Christo adhærente, ipsi recipient in fructu, quod in cespite perdidertunt. Recole, mea soror, humanarum nuptiarum ærumnas, & claude oculos, ne videas vanitatem. Prima pericula nuptiarum hæc sunt: corruptio, corruptio-

nis fastidia, pondus veteri grauidati, dolor partus plerumque ad discrimen mortis perueniens: vbi & munus nuptiarum perit & fructus; dum simul mater cum prole deficit, & omnis illa pompa nuptialis mortis frustratur termino. Quam putabant causam esse lætitiæ, quis eam occasionem interinendi inuenit? Quid ager post mortem, quæ totam lætitiæ nuptiis deputauit? Quæ viro placere voluit, non Deo, quid ager dum exit a sæculo? Quæ sollicita fuit quomodo placeret mundo, quam poterit habere partem cum Christo: Quæ primum non bene viris se distrahunt, simulque cum pudicitia libertatem perdunt, quando captiuam virginatatem sulcepra dore addicunt. Quid miseræ illi remanet, quæ pudorem venditat? Quod si forte mundi, vt fieri solet, casu perdat donationem, tunc & pudore caruit, & amisit pretium. Vides quam nuda & destituta in vtroque remansit! Pro viro certè gemino timoris addicta periculo, timet bonum perdere, timet malum habere. Quis ergo inter hæc medius est locus lætitiæ? Quæ formas lenocinij meditatur vt placeat oculis? quibus peregrinis odoribus inficit vestem? & vt oblectet sensus, cutem mentitur alienam. Quæ fucis illitam vario adulterat figmento faciem: ne sit ipsa quæ nata est; & decipiat virum specie aliena, non propria. Vide si non nuptij genus est, excogitare artem qua prouocet libidinem alienam. Et quæ sic corrumpit faciem, quam putas corruptam habet mentem? Triplex commisit adulterium: mentis, quæ talem meditata est fraudem: corporis, quæ figmento mutauit speciem: vestitus, quæ non proprio, sed alieno fragrat odore. His malis virgo nescia, sexum habet, & sexus necessitatem ignorat. Fœmineæ fragilitatis oblita rigore virili subsistit, atque infirmum sexum virtute solidauit: nec addixit seruituti corpus, quod lege naturæ viro subiacet. Fœlix virgo, quæ corpus trahit ex Eua, non penam! Illa peccati merito audit; *Sub viri potestate eris, & in doloribus paries.* Tu virginatatem adeptæ, à tali iugo excussisti ceruicem, nec pressa iugali necessitate curuaberis ad terram, sed in sublimi erecta cœlos suspicis; vt vnde illa vetitum præsumendo cecidit, ibi tu licita contemnendo conscenderes. Eua gustauit de illicito, & virginatatem perdidit. Licebat nubere virgini, sed quæ non nupsit, Angelis adhæsit. *In resurrectione enim non habuit, neque uxores ducunt: sed erunt sicut Angeli Dei.* Vide, virgo quæ non nubit, Angelis comparatur. Licet enim gignere filios: sed quæ hanc spreuerunt necessitatem, Christum dicentem audiunt: *Beate steriles quæ non genuerunt, & vbera quæ non lactauerunt.* E contrario illic dicitur nuptiis: *De prægnantibus & nutriendis in illa die.* Itaque virginæ sensus pro filiis reputantur. Quid ergo quærit quos pariendo doleat, quæ pios habet sensus, quibus meditando congaudeat? *Propter timorem tuum Domine, inquit, in vtero accepimus, & parturiuimus Spiritum salutis.* Ecce fœlix conceptio, incorrupta progenies, utilis partus: vbi & proles bonæ cogitationis editur, & ignoratur dolor. Tot felicia germina, quot sanctæ cogitationes, totiens concipit, quotiens sancta meditatione Spiritum diuinum capit. Conceptio enim superna virtutes parit. Et ne



putes te esse sterilem, tot filios habebis, quot virtutes protuleris. Vna sancti Spiritus conceptione inultos edes partus. Primus partus virginis, verecundie virtus; secundus patientie, tertius sobrietatis, quartus temperantiae, quintus caritatis, sextus humilitatis, septimus castitatis, ut impleatur quod legitur; quia *sterilis peperit septem*. Ecce una septiformis Spiritus conceptione septem partus edidisti. *Non dicas, ecce ego lignum ar-* 1. Reg. 1.  
Isa. 56.  
*dum, quia haec dicit Dominus eunuchis: qui custodierint requiem meam, & elegerint quae volui, & tenuerint fœdus meum, dabo eis in domo mea & in muris meis locum, & nomen melius à filiis & à filiabus; nomen sempiternum dabo eis, quod non peribit.* Vides, amantissima soror, quod principalem in Regno Dei virgines tenent locum? Et non immerito. Mundi enim contempnerunt habitum, ideo peruenierunt ad caeleste regnum. Vitæ caelestis beatitudinem hic incipiunt, quæ generate in doloribus filios nesciuerunt: & quæ contagia libidinis, & fœda coniugum figmenta respiciunt, rectè Christi nuptias impetrarunt. Nolo mouearis pompaticis nuptiarum incessibus, clientumque stipato comitatu. Hos incurrunt plerumque insidiatores pudicitiae, quos custodes castitatis putabant. Et cum se ambiri tot virorum formis vident, hoc in mentem venit, quod cum viris in lectulis agunt propriis: & quod expertæ sunt in singulis, hoc in plurimis meditantur. Non verebor inuidiam, si locutus fuero veritatem. Feriant me liuore, quas momorderit conscientia, dummodo proficientibus loquar, quid cauere debeant in eis, quæ solo nitent opere carnis. Certum est, mi soror, quæ nitorem vestium composuerit, odore peregrino fragrauerit, fūco mutauerit oculos, faciem candore alieno obduxerit, brachia circumculis intruxerit aureis, digitis annulos inseruerit, & distinctione gemmarum sidereo radiauerit fulgore manibus, aures metallo adgrauauerit, colla margaritis & vario gemmarum absconderit tegmine, caput ponderauerit auro: certum, inquam, est, hanc non esse castam: quæ ad hoc se ita composuit, ut multorum feriat oculos, multorum animos moueat, illiciatque mentes. Quæ etsi metu viri non gerat stupram in aperto, fornicatur tamen interius animo. Illa verò casta est, quæ de simplici habitu bonisque moribus placet viro, & de bono castimonie Deo. Harum habitum exprimit Petrus Apostolus, & cultum vestium, vel æquitatem morum sua pingit præceptione, cum dicit: *Sit in muliere non exterior ornamenti aut auri, aut* 1. Pet. 3.  
*vestis cultus, sed cultus cordis.* Eadem ergo & Paulus Apostolus intulit, dicens: *Similiter & mulieres cum verecundia & sobrietate ornantes se,* 2. Tim. 2.  
*non in tortis crinibus, aut auro, aut margaritis, vel veste pretiosa: sed quod decet mulieres, promittentes pietatem per opera bona.* Quas discernere ab iis præceptionibus & discrepare compereris, velut gehennæ duces, & inferni comites fuge. Hoc enim suadebunt quo plenæ sunt, quæ etsi non verbo, ipso tamen habitu loquuntur flagitia. Et quæ auro coruscauerit, & radiauerit gemmis, tanquam simulacra declina; idolumque æstimato, non hominem, quæ à Deo benè conditam formam vario præsum-

Prov. 3.

psit stuprare figmento. Vnde & scriptura dicit: *Fallax imago, & vana est pulchritudo, mulier timens Deum ipsa laudabitur.*

CAP. I. *Ut vitentur laice mulieres.*1. Cor. 15.  
Psal. 17.

**P**Recor te, soror Florentina, ut scēminæ quæ tecum non tenent professionem vnam, ad tuam non accedant societatem. Quod enim amant, hoc suggerunt: & eas res tuis insinuabunt auribus, quæ in eorum versantur desideriis: Heu mihi soror, *corrumpunt mores bonos colloquia mala. Cum sancto sanctus eris: longe à te sit soror, & cum peruerso peruerteris.* Quid in vnum agit nupta, & virgo? Illa te non sequitur, quæ virum diligit. Propositum tuum fugit: quod etsi amare se finxerit, mentitur ut decipiat. Quid tecum agit, cum qua communi collo Christi iugum non ducis? dispar habitu, dispar affectu. Organum satanæ hoc tibi canet, quod illecebris sæculi moueat, & semitas diaboli impingat. Fuge Sirenum cantus, mi soror: ne dum prurientibus auribus oblectamenta delectaris audire terrena, anettaris à recto itinere: & aut in dexteram illidaris scopulo, aut in sinistram Charybdis deglutiaris rictu. Fuge Sirenum cantus, & à lingua maleficientis sepi aures tuas. Muni cor tuum scuto fidei, dum tui propositi disparē videris; & frontem tuam trophæo arma crucis contra eam quæ professioni tuæ dispar est.

CAP. II. *Ut viri sancti vitentur.*

**I**Am quali fuga viros fugias, soror Florentina, tu iudica, si tam sollicitè scēminas sæculi declinabis. Quisque vir, si sanctus est, nullum tecum gerat familiaritatem; ne videndi iugitate aut infametur vtriusque sanctitas, aut pereat. Decidet enim à caritate Dei, quæ perpetrandi mali operis occasione præbuerit, decidet à caritate proximi, quæ etsi malum non agit, opinione tamen pessimam famam nutrit. Dispar enim sexus in vnum locutus, eo titillatur instinctu quo nascitur: & naturalis mouetur flamma, si incompōsita attigerit. Quis colligauit ignem in sinu suo, & non comburetur? Ignis & stupa sibi vtraque contraria, in vnum redacta flammæ nutriunt. Viri sexus & scēminæ diuersus, si coniungitur, quod lex naturæ prouocat, commouetur.

CAP. III. *Ut declinare virgo debeat iuuenes.*

**E**T si taliter viri declinandi sunt sancti, ne vtrorumque bonis moribus offensio subrepat; qualiter fugiendi sunt iuuenes, & tenebrosas vias temporalis vitæ sequentes? quos ad hoc diabolus obijcit, & virgineis opponit oculis, ut formas eorum, quos per diem viderit, virgo medietur in nocte. Quod si & contradicatur mentis ratio, talesque imaginationes ab animo respuat, recens tamen visio & corporalis inspectio exhibet memoriæ formas: quas videndo didicit, ut etsi paululum talis imaginatio oblectet mentem, occurreret etiam per somnium, quod viderit oculis. Sic diaboli sagittis pectus virginis vulneratur, & infigitur cordi amor noxius; ut quod in nocte recordata est, cum amore velit iterum videre in crastinum. Er sic intrat sathanæ sagitta vsque ad intimum cordis per ianuas oculorum: sicut dicit Propheta: *Intravit mors per fenestras nostras.* Nec enim subrepat dia-

Ier. 9.

bolus ad interiora mentis, nisi per sensus cordis. Si pulchrum aliquid videas, quod concupiscentiam moueat; si oblectet aures turpis cantus; si odoratum nidor attigerit fragrans, si gustum illecebrofus sapor commouerit; si tactus mollem & nitidam contigerit formam, tunc oblectatione sensibili carnis mouetur illecebra. Dei enim opus vterque est sexus. Amandi sunt certè viri, ut opus Dei; sed absentes, pro operibus bonis, & propter Deum qui eos fecit; non propter pulchritudinem corporis.

CAP. IV. *De abstinentia.*

**Q**uid ad te de cibus, soror Florentina, puto loquar; quæ fragilitate corporis nec tantum accipis, quantum ratione doceris? Maneat tamen in animo, ut etsi infirmo corpori aliquid relaxandum est à rigore, interim non soluatur animus, si corpus infirmum meretur aliquid indulgentius. Nullus est enim vsus edendi culpabilis, sed concupiscentia, sed immoderatio: si plus quam opus est sumpseris; si desideres sine quo viuere possis. Triplex certè est gulæ intemperantia: si quod non licet auidius appetas; si licita quæque exquisitis impendiis præparata accuratius quæras; si tempus edendi licitum non sustineas. Primi generis homines ob hoc Paradisi delicias & immortalitatis præmia perdiderunt, quia illicita concupierunt. Esau verò pro eo quod auidius ambiit licita, primogeniti perdidit primitiua. Et quia edendi tempus non seruant animalia, ideo sunt irrationabilia. Probauimus ergo triplicem excessum intemperantiæ: dum primi homines gustauerunt de illicito; dum Esau lenticulæ appetitu perdidit primogenita; dum edendi tempus non seruant animalia, & sunt irrationabilia. Non est igitur abstinens, auidè vorans etiam viles cibos. *Sepulchrum patens est guttur eorum*, ait Psalmista. Namque & ille molli & dissolutus est, qui contemptis præsentibus, pretiosis ac peregrinis epulis delectatur. Piscis per illecebram hamo capitur. Auis obiecta escæ in decipulam cadit. Bestiæ quæ naturali virtute sunt rigidi, cupiditate cibi in foueam prouunt; & quas non emollit natura, decipit esca. Tu verò temperantiam, & parsimoniam, seu oraculo, seu exemplis discere maiorum. Oraculo: quia dicit Dominus: *Non grauentur corda vestra in crapula & ebrietate*. Exemplis; quia Dauid cupitam aquam noluit bibere, quam periculum alieni esse sanguinis intellexit: vel quia Daniel contemptis dapibus regis, leguminibus vixit. Sint tibi accepta quæ sunt comitibus tuis communia, & aliorum non sis intemperantis causa; & quibus forma esse debes hortamento ac vitæ bonæ documento, scandali non efficiaris occasio.

Psalm. 51.

Luc. 21.  
2. Reg. 14.  
Dan. 14.CAP. V. *Ut virgo singula non loquatur cum singulo.*

**N**illus te singularem alloquatur: nec tu præter duarum aut trium testimonium alloquaris aliquem singularem. Memento sponsi tui Saluatoris nostri, qui certè non verebatur labem peccandi, attamen in mortibus cum Moyse & Helia coram tribus, Petro & Iacobo & Ioanne, locutus est testibus. Sic & cum suscitaret archisynagogi filiam, eos adhibuit testes, ut falsi rumoris non daret occasionem. Mirabantur autem & discipuli, quod

ad puteum Iacob loqueretur cū muliere. Et tenera non mirarentur, nisi quid viderent inusitatum : & nisi illi abiissent cibos emere, non loqueretur citra eos Christus cum muliere.

C A P. VI. *Ut iugiter virgo oret & legat.*

**L**ectio tibi sit assidua, iugisque oratio. Diuidantur tibi tempora & officia, ut postquam legeris ores, postquam oraueris legas. Sic alternes perpetui hæc duo bona, ut ab iisdem nullo sis tempore otiosa. Quod si aliquid manibus operandum est, vel certè sustentaculis ciborum corpus reficiendum, alia tibi legat : ut dum manus vel oculi intenti sunt operi, pascas aures gratia sermonis diuini. Si quidem oramus & legimus ; & lubricam mentem à surreptionibus diaboli vix retrahimus ; quanto proclius humanus animus reptat ad vitia, si lectionis & orationis assidue reitaculo non franeatur. Lectio te doceat, aliquid orando petas : postquam vero oraueris, iterum legendo inquire quod postules.

C A P. VII. *Ut carnaliter non legi debeat vetus testamentum.*

**V**etus testamentum legens non temporis illius nuptias, sed proles numerositatem considera ; non esum carniū & sacrificia sanguinolenta, crimina morte carnis expiata, vni viro multarum vxorum permilla consortia. Licuit enim illo tempore, quod isto non licet, & sicut per legem concessæ sunt nuptiæ, sic per Euangelium virginitas prædicata. Gens enim erat Hebræa ab omni discreta consortio populorum, & ad prophetandum Christum Ecclesia deputata. Ne periret, cunctis permixtæ sunt nuptiæ, causa proles propagandæ. Et quia carnalis erat populus, carniū crapula pascbatur. Sacrificia certè idcirco pecudum libabantur, quia verum sacrificium, hoc est, Christi corpus & sanguinem figurabant. Venit veritas, umbra discessit : venit verum sacrificium, & cessauit hostia pecudum. Venit virgo virginis filius, & virginitatis præbuit documentum. Omne enim quod in veteri testamento legeris, quamuis opere gestum fuerit, spiritualiter tamen intellige, & de historię veritate intelligentię spiritualis sensum cape. Iam pro peccato non occiditur homo corpore : sed necem quam illi carni dabant per gladium, nos carnalibus vitiis imponimus per pœnitentię vsum. Cantica canticorum iuxta auditum aurium ne sentias ; quia carnalem illecebram terreni amoris insinuant, quæ per species actionis corpus Christi, & Ecclesiæ caritatem figurant. Merito a veteribus isti libri prohibiti sunt legere carnalibus : hoc est, Heptateuchum, & Cantica canticorum : ne dum eos spiritualiter nesciunt, libidinis ac voluptatum incitamento soluantur.

C A P. VIII. *De ieiunii modo.*

**I**eiunia certè valido corpori imponenda sunt : & quos rebellis caro lege vitiorum impugnat, ieiunio attenuandi sunt iugi. Subiuganda est ieiuniis caro rigida, & eatenus refrænanda, ut legi mentis & imperiis animæ subiaceat ut ancilla. Et quam debilitauit iugis infirmitas, si eam ieiuniis temperes, tantumque sumas, quantum salutis sufficiat, non peccabis. Meliorem tamen iudica eam, quæ salutis robore infirmitatis non eget

remedio. Nec debet scandalizari quæ sana est, si remissius vel indulgentius quæ infirma est alitur: sed magis eo se meliorem sanctioremque esse consideret, quod fragilibus rebus non indiget, quibus eget infirmitas. Illa autem quæ infirmitatis obtentu meretur aliquid lenius, sit præ cæteris humilis: doleatque se non posse, quæ aliæ possunt; & abstinentiam tempore laxatam non reputet virtuti, sed infirmitati.

## CAP. IX. De usu vini.

**V**ino secundum Apostoli vtere regulam. Ait enim Timotheo: *Modico vino vtere propter stomachum tuum, & frequentes tuas infirmitates.* Dum enim dicit modicum, medicinaliter bibendum fore monstratur, non ad ebrietatem. Nam alio loco idem sic dicit Apostolus: *Vinum dixisti, omne vitium dixisti.* Ebrietas enim mortale est crimen: inter homicidia, & adulteria, vel fornicationes reputatur. Sic eijcit à Regno Dei vini temulentia, quemadmodum facinus adulterij, vel homicidij, vel aliorum criminum flagitia. Confirmat hoc dum dicit Apostolus: *Nolite errare: neque fornicarij, neque idolis seruientes, neque adulteri, neque molles, neque masculorum concubitores, neque fures, neque auari, neque ebriosi, neque maledici, neque rapaces Regnum Dei possidebunt.* Vide quantum sit execranda ebrietas, vt etiam à Regno Dei suos amatores eijciat. Quam etiam terribiliter Propheta increpet vino deditos vide, dicit enim: *Vae qui potentes estis ad bibendum vinum, & viri fortes ad miscendam ebrietatem. Vae qui consurgitis mane ad ebrietatem festandam, & potandum vsque ad vesperam, vt vino aestuetis.* Bibit vinum Noë, atque ebrietate sopitus, parte corporis verecundiori denudatus est: vt noueris sic consternari animum humanum vino, & rationem humanæ mentis obtundi, ne seipsum quidem meminerit, multo minus etiam Deum. Et licet illa Noë ebrietas ac nudatio mysterium Christi Passionis & mortis contineat, tamen ad literam errorem facti insinuat. Loth vino crapulatus incestum intulit filiarum, nec sensit errorem: de quo incentiuo concubitu nascuntur Moabitæ & Ammonitæ. Et Dominus dicit, *Moabita & Ammonita non intrabunt in Ecclesiam meam vsque in decimam generationem.* Senti quantum sit fugienda vini satietas, vt etiam Patriarchis scandali & culpæ causâ extiterit. Ergo & virgo quæ virtute corporis vigeat, bene facit si omnino se à vino abstinerit. Inualidam vero & imbecilem pro medicina decet vti vino, non pro temulentia.

## CAP. X. Quatenus vti virgo lauacro debeat.

**B**alneo non pro studio vel nitore vtaris corporis, sed tantum pro remedio salutis. Vtere inquam, lauacro quando poscit infirmitas, non quando suaserit voluntas. Quod enim necesse non est, si egeris, peccabis. Scriptum est: *Et carnis curam ne feceritis in concupiscentiis.* Cura carnis veniens ex concupiscentia habetur in vitio; non ea quæ saluti reparandæ conuenit. Quapropter non te illiciat lauare sæpius carnis voluntas, sed infirmitatis imperet necessitas. Carens enim culpa, si quod necesse est egeris.

CAP. XI. *Quod peccatum sit virginis ridere.*

**E**Sto in Deo gaudens lætitia animi tranquilla & moderata: iuxta quod ait Apostolus: *Gaudete in Domino semper, iterum dico gaudete.* Et alio loco dicit: *Frustrum autem Spiritus est gaudium.* Talis iucunditas non perturbat mentem ridendi sœditate, sed subleuat desiderijs animam ad supernam quietem; vbi possis audire: *Intra in gaudium Domini tui.* Quale sit cor virginis plerumque risu monstratur. Neque enim impudenter virgo rideret, si cor castum haberet. Speculum cordis facies est hominis: non ridet læsciue, nisi quæ corde læsciua est. *Ex abundantia enim cordis,* ait Dominus, *os loquitur,* ergo ex abundantia vanissimi pectoris ridet facies virginis. Quid de hoc legitur vide: *Risum reputavi errorem; & gaudio dixi, quid frustra decipis?* Et iterum ibidem: *Risum dolore miscetur: & extrema gaudij luctus occupat.* Et Dominus ait: *Beati qui lugent, quoniam ipsi consolabuntur.* Verum & Apostolus insanè lætantibus dicit: *Risus vestester vertatur in luctum.* Risum ergo, soror, vt errorem fuge, & temporalem lætitiã commuta in læctum; vt beatificeris, si peregrina in mundo luxeris: quoniam qui secundum Deum lugent, beati sunt, & ipsi consolabuntur. Peregrinari te in mundo scito; nec hic habere patriam, sed in cœlo. Si tali desiderio ardebat Christi seruus, vt diceret: *Cupio dissolui, & esse cum Christo:* quanta amoris flagrantia virgo debet accendi, quam vberes lacrimas desiderio sponsi sui effundere, donec ad amplexum Christi valeat peruenire? & vberum flere non desinat, vsquequo Christum, quem videre cupit, attingat. Lugebat ille se peregrinum in hac vita, qui mœrens dicebat: *Heu me, quod incolatus meus prolongatus est à me.* Nam exulrans te cœlestis sponsus & carissimis excipiet amplexibus, si te sui desiderio flagrare didicerit, & si absente eo fleueris, ille te præsens consolabitur.

CAP. XII. *Qualiter babeantur ancilla virginitatem professæ.*

**Q**Uas tibi fecit, aut fecerit ancillas conditio, & sorores professio, iam non pro nexu seruitutis exulceres, sed pro paritate professionis honores. Quæ ergo tecum in Christo virginitalis stipendiis militat, pari tecum libertate exultat. Nec sic vos protuocamus ad humilitatem, vt illas superbia erigamus: quas dum tu accipis vt sorores, gratius illæ tibi sint famulæ, præbeantque obsequium non seruitute addictæ, sed liberæ caritate. Quoniam quidem non est personarum acceptio apud Dominum, scilicet, in distribuenda fide, vbi pariter consulitur dominæ & ancillæ; vbi non eligitur domina, & reprobatur ancilla; æqualiter baptizate, simul Christi corpus & sanguinem sumunt. Nam & Patriarchæ dum essent sanctissimi, quantum ad res terrenas & temporales, discernebant inrer seruos & filios; illos famulos, hos dominos iudicabant; quod vero ad spei futuræ munus attinet, ex æquo filijs & vernaculis consulebant, quos vna circumcisiõe signabant.

CAP. XIII. *De discretione senioris erga personas singulas.*

**Q**UOD quidem sub vna professione manentibus omnia erunt communia omnibus, verum est, & legitur: scilicet, si omnes æqualiter va-

leant. Attamen interest quædam discretio senioris, prouidentis quid vnaquæque possit. Sic enim diuidendum est prout unicuique opus est. Quæ potuit honorari in mundo, & diues fuit in sæculo, blandius fouenda est in Monasterio: & quæ reliquit in sæculo vestem pretiosam, cultiorem in Monasterio meretur. Quæ vero sub penuria vixit in sæculo, & tegumento victuque eguit, gratè ferat si in Monasterio nec algeat, nec esuriat: nec murmuret, si ea tractetur indulgentius, quæ vixit in sæculo delicatius. Nam si prout cuique opus est non diuiditur, fit superba in Monasterio, quæ fuit vilis in mundo; & quæ erat potens in sæculo, humiliatur in Monasterio. Sic agit, qui discretè non sapit, vt superbire faciat ex vili censu conuersas, & dolore stimulet honesto loco natas. Et si sufficit vnde omnibus tribuatur æqualiter, nulla est vnde murmuret: quoniam discretio senioris diuidet unicuique prout opus est. Sed dicis: cur conuersa est, nisi vt fiat humilis ex potente? Si ergo ista ex inclito ad humilitatem descendit, illa ex paupere quod humiliaretur non habuit, forsitan si superbit. Caritas autem omnia temperat, atque ad eundem pacis pertrahit limitem; vt nec illa inflectur, quæ reliquit potentiam; nec illa frangatur, quæ fuit pauper, vel ancilla. Laudanda tamen est senior, si discretè cum singulis se gesserit, & unicuique prout opus est, diuiserit. Ista sint dicta de veste, cibo, potu, vel opere pro inualidis ac delicatis: vt quæ durius ferre non potest, tractetur lenius. Cæterum si circa eas quæ ferre potuerint, factura est senior prout viderit, & quibus consulit pro vsu delicatæ vitæ, vel corporis fragilitate, non eas præferat honore seniorum, si posteriore conuersæ sunt tempore. Dum ergo ad te meus, soror Florentina, sermo dirigitur, deriuauimus orationem studiis plurimum; nulli tamen ingum imponimus, sed quod honestum est suademus.

CAP. XIV. *Vt virgo æqualis sit & in paupertate & in abundantia.*

**N**Vnc ad te loquendo reuertar, soror Florentina, pro qua me familiaris cura sollicitat. Hortor itaque æqualem te & vniformem habere semper animum: vt nec aduersitate frangaris, quæ patientiam & penuriam Iob sapit: nec eleueris prosperitate, quæ Patriarchas diuites opibus, sed humiles animo fuisse legis. Beata enim eris, si & in aduersis & prosperis semper Deo gratias egeris; & vitæ istius prosperitatem fumum vaporemque illico euanescentem credideris. Dauid certè regnabat, & cum abundaret thesauris, ac manu forti infinitis populis imperaret, humilem se caput, & dicit: *Pauper sum ego, & in laboribus & in iuuentute mea.* Et ipse iterum ad filiam Saül dicit: *Vilis incedam, & vilis apparebo ante Deum qui elegit me, potius quam patrem tuum.* Similiter idem dicit: *Incola ego sum in terra & peregrinus, sicut omnes patres mei.* Terrenis ergo nunquam delectata rebus, etiamsi se vitæ commoda ingerant, non eis animo innitaris, nec de mundanis gaudéas lucris; & non contristaberis damnis. Etenim scriptum est: *Diuitia si affluant, nolite cor apponere.* Cum anno enim possellat cum dolore vtentis pereunt: & inde tribulari quemquam

Psal. 87.

2. Reg. 6.

Psal. 117.

Psal. 55.



Matth. 20.

Phil. 2.

1. Tim. 6.

Matth. 6.

necesse est, vnde carnaliter gaudet. Tu adiungas cœlestis sponsi honorari in sæculo fuge. Ne velis ab aliis dici, aut esse prælatior, quæ legis: *Si quis vult inter vos esse maior, sit vester seruus*, quoniam & ipse Saluator, dum à turbis vt rex fieret quæreretur, seipsum abscondit. Quomodo enim ab homine regnum acciperet, cui cum Patre regnum perpetuum manet? Sed quia venerat docere humilitatem, hominum declinauit honorem. In forma enim Dei manens semetipsum pro nobis humiliavit: & cui cœlestia seruiunt ac terrestria, pro mortalibus factus est pauper; vt eius inopia nos ditaremur. Tu ergo insiste vestigiis, quibus præcessit sponfus; & passibus indefessis ducem sequere cœlestem: ne dum factis suis probat esse dissimilem, in cœlestibus regnis nolit habere consortem. Etenim ista dicimus, vt paruipendas, aut ne pro magno cupias lucra terrena: vel ne estimes magnos, quos in sæculo prospicis diuites. Quod enim habere possunt & mali, libenter debent contemnere boni. Dat enim malis Deus temporales diuitias, quibus negat æternas, dat eas certè & bonis, sed quos nouit non superbisse ex eis. Boni propitio Deo fiunt diuites, propitio Deo fiunt pauperes: in vtroque Deo gratias agunt, qui voluntatem Dei libenter accipiunt. Malis quando tribuuntur diuitiæ, pœnaliter tribuuntur, vt male de eis gaudeant: & quando subtrahuntur, pœnaliter auferuntur, vt male de eis doleant, vtraque iusto ad gloriam; vtraque impio ad vindictam. Quid ad te, quæ habes Regulam quam sequaris? Virginitatem itaque & paupertatem Mariæ prospice: quæ tam diues in Domino fuit, vt Mater Domini esse mereretur, & tanto rebus paupercula, vt partus tempore hec obstetricis, nec ancillæ vteretur solatio, ipsum quoque diuersorium tam angustum, vt præsepe assumeret pro cunabulo. Sed & Ioseph, cui fuerat desponsata, cum esset iustus, erat tamen & pauper: ita vt victum & vestitum artificio quæreret. Certè faber ferrarius fuisse legitur. Habes exempla, normam sequere: ne te velis diuitiarum periculis committere. *Quoniam qui volunt diuites fieri, incidunt in tentationem & laqueum diaboli*, & desideria multa inutilia & nociua, quæ mergunt hominem in interitum. Has à se sponte auferunt, quibus in Domino deuotus est animus. Et plerumque contemptores suos magis appetunt diuitiæ, quam sequaces. *Querite*, inquit, *Regnum Dei, & hæc omnia apponentur vobis.*

## CAP. XV. De indulgentia &amp; prohibitionem carniū.

2. Tim. 5.

**E**Sum carniū infirmitatis tuæ obtentu nec prohibere tibi audeo nec permittere. Cui tamen suppetit virtus, à carnibus se abstinat. Nam dura est conditio, nutrire contra quem dimices: & carnem propriam sic alere, vt senias contumacem. Quod si talibus vitur virgo, qualibus & seculares vtuntur, dat sensum, vt ea agat, quæ à secularibus aguntur. Quid poterit caro nutrita carnibus nisi erumpere ad libidinem, miseramque animam crudelitate luxuriæ debaccare? Vnde & quidam auctor ait, *Deliciarum finis corruptio*. Et Apostolus voluptuosam viduam sic notat: *vt dicat: Quæ autem in deliciis est, viuens mortua est*. Quod si abstinentia

nentia marcidum corpus vix à lege peccati, quæ habitat in membris nostris, prohibemus; quid faciet quæ sic obruit terram carnis suæ, vt ei possit spinas & tribulos germinare? Fomenta vitiorum, esus carnum: nec solum carnum, sed & nimia satietas aliorum ciborum. Quoniam non culpatur esæ qualitas, sed quantitas reputatur in vitio. Quicquid enim accipitur nimis, hoc aggrauat animam: & abundantiori cibo extensus stomachus obtundit animæ sensus. Virgo tantum sana debet esse, non rigida: pallida gestare ora, non rubentia: quæ suspiria cordis emittat ad Deum, non ructet cruditiæ ciborum. Quibus ergo vires corporis opus sunt, habeant carnis usum: scilicet, qui metalla effodiunt; qui in agone texeno certant; qui construunt celorum culmina ædificiorum; vel in diuersis opificiis labore desudant corporis; his reparandarum virium aptus est usus carnis. Virgo quæ magis defectus sustinet corporis, bona virgo est. Ad quos usus carnes sumet, nisi vt miserum corpus facie vitiorum inundet? Verum si cogit infirmitas, medicinaliter sumendæ sunt carnes. Medicinaliter enim est, quod non grauat, sed releuat: quoniam & ipsam medicinam ita artis ipsius periti impendunt, vt sensim adhibita non onerent infirmum, sed alleuent. Vnde & illa vera est sententia Philosophorum; *Ne quid nimis.*

CAP. XVI. *Vt in Monasterio permaneat, quæ capite virgo permaneat.*

**V**T enim in Monasterio permaneat, sollicitè admoceo, multatum enim societate proficiet; & virtutes aliarum videndo erit virgo virtutum. Et si interdum pro varietate voluntatum oriatur quædam Congregationi simulas; & nonnunquam murmuris carnalium trisulentur spirituales: non tamen deerunt quas in bonis actibus imiteris. Et certè tolerare carnales, probatæ virtutis est: imitari verò spirituales, spei est maximæ. Erudunt carnales spiritualium patientiam, & dant quæ sanctæ sunt bonarum documenta virtutum: ac sic animæ proficienti vitæque sunt viles; & quas patienter tolerat, & quas imitatur suauiter. *Libenter*, inquit Apostolus, *sustinetis insipientes, cum sitis sapientes.* Et ipse idem dicit: *Debetis autem vos qui firmiores estis, imbecillitates infirmorum sustinere, & non vobis placere.* Vnusquisque autem proximo suo placeat in bonum ad edificationem. Non enim te carnalium scandalizent murmura; sed consoletur proficientium vita: & quæ nescis quantum demoreris in sæculo, debes esse patiens pro cælestis gloriæ dono.

2. Cor. 11.  
Rom. 15.

CAP. XVII. *Qualiter vita fugiatur priuata.*

**F**Vge quæso priuatam vitam; nec velis imitari eas virgines, quæ in viribus per cellulas demorantur: quas multimoda cura constringit; prius placendi sæculo, ne fædo prodeant amictu; & domestica oppressæ solitudine, dum pro vitæ subsidio satagunt, minus quæ ad Deum pertinent querunt. Priuatam enim vitam de usu gentilium traxit Ecclesia, quos dum non quierunt Apostoli ad normam suæ vitæ traducere, Ecclesiæ venienti ex gentibus permiserunt priuatè viuere, propriisque rebus uti. Cæterum qui sub Apostolis crediderunt ex Hebræis, eandem normam, quam nunc tenent Monasteria, seruauerunt. Quare quod legitur in Actibus Aposto-

AA. 4. lorum, & verum esse quod dico probabis: *Multitudinis*, inquit, *credentium erat cor unum, & anima una. Nec quisquam eorum quæ possidebat, suum aliquid esse dicebat, sed quotquot possessores agrorum erant, vendebant, & pretia eorum ponebant ante pedes Apostolorum: & distribuebatur prout unicuique opus erat.* Vide, quod viuente: In Monasterio regulariter, Apostolorum teneant vitam: nec dubitent eorum assequi merita, quorum imitantur exempla.

CAP. XVIII. *Ne peculiare virgo in Monasterio quid possideat.*

**P**Eculiare, quod in Cœnobiis pro magno habetur crimine, tu pro grandi vitæ contagione. Adulterium certè est; quia conscientia integritatem vsurpatæ rei prauitate maculat. Furti crimen est: quoniam dum omnia quæ habentur in Monasterio, omnibus sunt communia, habere vna latenter præsumit, quod à cæteris ignoratur, & aliud publicè cum omnibus vitur, aliud furtiue abscondit. Fraus est manifesta: quia non reponit in commune, quod possidet; sed exiguam paruitatem priuatim occultat fraude. Vnum crimen, sed plura contagia. Tantæ nequitia malum velut gehennæ euita præcipitium; & quasi iter caue ducens ad infernum. Inde vsque ad malum proditiōis & Domini traditionem ludas erupit, quod furti crimen tractus cupiditate commisit. Denique cum haberet cum Apostolis quicquid illis esset commune, non fuit contentus communionis sufficientia. Sed quid dicit de eo Euangelium? *Fur erat, & loculos habens, ea quæ mittebantur portabat.* Nec non Ananiz & Saphiræ exempla recole; qui offerentes Apostolo partem pretij, partem vero celantes, præsentī sunt iudicio damnati; & pro terrore sequentium non est dilata facinoris ultio. Quæ autem à communione Monasterij priuata secernitur, necesse est vt à cœlestis vitæ consortio separetur. Quicquid manus tua attigerit, seniori ostende; in commune repone. Noli quidquam transportare seorsum: quia nimium Iudæ proditoris exempla cauenda sunt.

CAP. XIX. *Ne virgo iurare debeat.*

**N**Vnquam iurare, sed semper verum dicere, pari obserua studio. Nam sicut carnalibus pro terrore fraudis iurare permissum est, sic prohibita sunt spiritualibus, etiam dum sibi bene conscij sunt, sacramenta. *Sic*, inquit, *sermo vester, Est, est; Non, non: quod autem plus est, à malo est.* Caue itaque iurare in bono, quia de malo est. Et propterea dicitur esse à malo, eo quod iurandi necessitas ex infideli sit conscientia. Eius autem hominis iurandi extorquetur necessitas, cuius fides manet in dubio. Tu vero, quæ simplicitatem cordis debes ostendere labijs, cur te spontaneo alliges Sacramento? Tolle iurandi vsuin in bono, & non per-iurabis in malo. Loquere veritatem ex corde, & aberit iurandi necessitas. Legimus enim: *Ne assuescas iurationi, quoniam multi casus in illa.*

Ioan. 11.  
AA. 5.

Iac. 5.

Ecl. 25.

CAP. XX. *Ne sola virgo cum sola loquatur.*

**N**Oli assumere vnam loquendi familiaritatem, & declinare alias. Sed quod scire vni utile est, sciatur ab omnibus. Audi Dominum quid dicat: *Quod dico vobis in tenebris, dicite in lumine: quod in aure auditis, predicare super testa.* Hoc est, si quid vobis in secreto mentis fuerit reuelatum, palam dicite: & quod corde concepistis, omnibus manifestate. Si bonum est quod loqueris, cur vna tantum, & non omnes potius informentur? Si turpe est, nec cogitare, nec loqui debes, quod alias erubescis scire. Non iam de bono est quod singulariter virgo loquitur. *Omnis enim qui male agit, odit lucem.* Vnde & ille Philosophorum prudentissimus dixit: *Omnia recte facta in luce se amant collocari.* O virgo ideo occulte loqueris, quia non est vnde publice glorieris. Sed si aures & oculos humanos fallis, numquid Dei cognitionem fallere poteris? Pulchrè & alius ait: *Quod vis Deum nescire, nec agas, nec cogites.* Sit ergo tibi conscientia innocua, sermo liber à culpa. Respuenda nec audire te, nec cogitare delectet; multo minus loqui, vel agere.

Ioan. 3.

CAP. XXI. *Ne velis virgo reuerti ad seculum.*

**I**Am ad portum nauem orationis dirigimus, & emenso dictorum pelagus in littore quiescendi anchoram ponimus: statu tamen caritatis tuæ iterum in fluctibus verborum reuehor. Te quaeso, soror Florentina, per beatam quoque Trinitatem vnica diuinitatis obtestor: vt quæ de terra tua & de cognatione tua cum Abraham egressa es, cum vxore Loth non respicias retro; ne efficiaris exemplo malo documentum aliarum ad bonum: & ne in te aliz videant, quod in se caueant. Illa vero aliis facta est condimentum sapientiæ, sibi vero simulacrum stultitiæ, sibi enim nocuit malefactum, aliis profuit exemplum contrarium. Ne te vnquam reuerti ad genitale solum sollicitè cogitatio: vbi si te Deus habitare voluisset, non inde eiiceret. Sed quia utile proposito tuo fore prospexit, bene sicut Abraham à Chaldæis, & tanquam Loth te abstraxit Sodomis. Denique errorem meum ipse fateor, ne communem matrem saepe allocutum, nosse cupiens si vellet reuerti ad patriam: illa autem, quæ se nouerat Dei voluntate causâ inde salutis exiisse, sub diuina obtestatione dicebat, nec velle se videre, nec vnquam visuram illam patriam esse, & cum magnis dicebat fletibus: Peregrinatio me Deum fecit agnoscere: peregrina moriar; & ibi sepulchrum habeam, vbi Deum cognitionem accepi. Teste Iesu hoc in eius experijsse desideriis memor sum, vt etiam si diu viueret, patriam illam non reuideret. Tu, quaeso, caue, soror Florentina quod mater timuit, & malum quod illa experta fugit, tu prudenter euita. Miserum me doleo, qui ibidem communem fratrem transiisi Fulgentium, cuius pericula iungi formidine perumesco. Tutior tamen erit, si tu securior & absens pro illo oraueris. Ea inde ætate abstracta es, vt vel si ibidem nata fueris, non memineris. Nulla est recordatio quæ moueat desideriis animam; & beata es, quæ ignoras quod doleas. Ego tamen expertus loquor, sic perdidisse statum & speciem illam patriam, vt nec liber quisquam in ea supersit,

nec terra ipsa solita sit vbertate sæcunda, & non sine Dei iudicio. Terra enim cui ciues erepti sunt, & concessi extraneo, mox vt dignitatem perdidit, Earuit & sæcunditate. Vide, soror Florentina, quod te paucens mærensque conueniam, ne te serpens præripiat à Paradiso, & in eam ponat terram, quæ spinas & tribulos germinat, de qua rursus si velis manum extendere, & lignum vitæ edendum assumere, non permittaris attingere. Tostor enim te cum Propheta, & conscio Iesu Christo admoneo, dicens: *Audi filia & vide: & inclina aurem tuam, & obliuiscere populum tuum, & donum patris tui, quia concupiuit Rex speciem tuam: & ipse est Dominus Deus tuus. Nemo mittens manum suam in aratrum, & respiciens retro, aptus est Regno Dei.* Noli ab eo auolare nido, quod inuenit turtur, vbi reponat pullos suos. Simplicitatis filia es, quæ turture matre nata es. In eadem vna persona complurium necessitudinum vteris officio. Turturem pro matre respice. Turtutem pro magistra attende, & quæ te Christo quotidie affectibus generat, cariorem quia nata es reputa matrem: ab omni procella, ab omni mundano turbine in eius te sinibus conde. Sit tibi suaue eius lateri adhærere. Sit tibi dulce eius gremium iam prouectæ, quod erat infanti gratissimum. Postremo carissimam te germanam quæso, vt mei orando memineris, nec iunioris fratris Isidori obliuiscaris: quem quia sub Dei tuitione, & tribus germanis superstitiibus parentes reliquerunt communes, læti, & de eius nihil formidantes infantia ad Dominum commeantur. Quem cum ego, vt verè filium habeam, nec tempotale aliquid eius caritati præponam, atque in eius prònus dilectione recumbam, tantò eum cariùs dilige, tantoque Iesum exora pro illo, quantò nosti eum à paten-  
tibus terrenis fuisse dilectum. Certus sum quod fleat pro nobis aures diuinas tua virginalis oratio. Et si pactum quod cum Christo pepigisti seruaueris, bene agenti tibi debetur corona, & exhortanti Leandro præstabitur venia; & si perseueraueris vsque in finem, salua eris. Amen.

*Explicit Regula S. Leandri ad Florentinam Sororem.*


## EPITAPHIVM BEATORVM

*Leandri, Isidori & Florentina.*

**C**Rvx hac alma gerit sanctorum corpora fratrum,  
Leandri Isidorique piorum ex ordine vatum.  
Tertia Florentina soror deuota perennis  
Et posita amborum consors sic digna quiescit.  
Isidorus medio disiungit membra duorum.

Hi quales fuerint libris inquirito Lector,  
 Et cognosce illos bene cuncta fuisse locutos,  
 Dogmate sanctorum cernens creuisse fideles  
 Æterno Domino, quos impia iura tenebant.  
 Vtque viros credas sublimes viuere semper  
 Aspiciens fursum pietos contende videre.

OBIIT fœlicis memoriæ LEANDER Episcopus  
 die III. Kalend. Martias æra DCXLI.



# BEATI AELREDI

## ABBATIS RIEVALLENSIS REGVLA

### SIVE INSTITVTIO INCLVSARVM.

DE BEATO AELREDO EIVSQUE  
 Regula.

CENTVRIATOR ANGLVS libro de Scriptoribus Britannicis  
 cent II. num. xcix.

*AELREDVS Rieuallensis (Eshelredum plures vocant) Cisterciensium Monachorum in Rbieuallæ Eboracensis Diœcesis Abbas, genere, doctrina, & inculpata vita moribus, vt Capgrauius habet, præclarus emicuit. Solitaria vita ardore totus inflammatus, talis actantus euasit, vt breui socios suæ professioni omnes, omnibus vitæ ornamentis superaret. Accessit ad hæc literarum cognitio, quæ tanto illi ad omne genus doctrinæ incitamento fuit, vt nullum scientiæ genus intactum relinqueret. Dauidi Scotorum Regi familiarissimus olim, cum adhuc adolescens esset, Episcopatum, & alios mundi honores recusabat, vt ad exercitia virtutum, maxime ad Euangelij prædicationem expeditior haberetur. Varios ad tumultuaria certamina principum motus, potissimum ubi nulla spes pacis expectabatur, mira solebat industria compescere, atque ad optatum perducere finem. Vir erat idem, atque alter Bernardus, ingenio mitis, actione pius, & consilio modestissimus: dinique Aurelij Augustini confessiones pro immenso semper habebat thesauro. Composuit*

*inter cetera*; De institutione inclusarum librum 1. qui incipit: Iam pluribus annis.

Eadem hæc postea transcribere Possevinus, Pitseus, & Bibliotheca Cisterciensis auxetor nuperrimus.



## BEATI AELREDI ABBATIS

### RIEVALLENSIS REGVLA,

sue institutio inclusarum ad sororem,

#### PRÆFATIO.



AM pluribus annis exigit à me, soror, ut secundum modum viuendi quem arripuisti pro Christo, certam tibi formulam tradam, ad quam & mores tuos dirigere, & vitam religionis, & vitæ religiosæ possis exercitia ordinare. Utinam à sapientiore id peteres & impetrares: qui non coniectura qualibet, sed experientia didicisset quod alios doceret. Ego certè, quid carne & spiritu tibi frater sum, quoniam negare non possum quicquid iniungis, faciam quæ hortaris, & ex diuersis patrum institutis aliqua quæ tibi videntur necessaria excerptens, ad componendum exterioris hominis statum certam tibi regulam tradere curabo: pro loco & tempore quædam adiiciens; & spiritualia corporalibus, vbi vtile visum fuerit, interserens.

#### CAP. I. Quomodo est instituta eremitica vita.

PRIMUM oportet te scire, qua causa, quæue ratione vita hæc ab antiquis vel instituta sit vel usurpata. Sunt quidam quibus inter multos viuere perniciosum est. Sunt & alij quibus etsi perniciosum non est, tamen dispendiosum est. Sunt & nonnulli, quibus & nihil horum timendum est; sed potius habitare magis æstimant fructuosum. Itaque antiqui, vel ut vitarent periculum, vel ne paterentur dispendium, vel ut liberius ad Christi anhelarent & suspirarent amplexum, singulariter viuere elegerunt. Hinc est quod plures in eremo soli sedebant, vitam manuum suarum opere sustentantes. Illi vero, qui nec hoc securum sibi inter solitudinis libertatem & vagandi potestatem arbitrabantur, includi potius, & intra cellulam obstruso exitu contineri tutius æstimabant.

#### CAP. II. Quod non sufficit reclusio corporis & membrorum, nisi adsit reclusio mentis & sensuum.

QVid tibi visum fuit, cum te huic institutioni voueres? Nam multi rationem huius ordinis vel ignorantes, vel non curantes, membra tantum intra parietes cohibere satis putant esse; cum mens non solum per vagatio-



nem dissoluatur : curis & sollicitudinibus dissipetur, immundis etiam & illicitis desideriis agitur, sed etiam lingua tota die per vicos & ciuitates, per foros & nundinas oriose discurrent.

CAP. III. *De periculo & casu reclusarum ex confabulatione  
veterum.*

**V**Ix aliquam inclusarum huius temporis solam inuenies, ante cuius fenestram non anus garrula, vel nugigerula mulier sedeat, quæ eam fabulis occupet, rumoribus aut distractionibus pascat, illius vel illius Monachi, vel Clerici, vel alterius cuiuslibet ordinis viri formam, vultum, moresque describat: illecebrosa quoque interferat, puellarum lasciuiam, viduarum, quibus licet, quicquid libet, libertatem; coniugum in viris fallendis explendisque voluptatibus astutiam depingat: os interea in risu cachinnosque dissoluit, & venenum cum suauitate bibitum per viscera membraque diffunditur.

CAP. IV. *Qualiter imprimitur in imaginatione quod præcepit  
in confabulatione.*

**S**ic cum discedens ab inuicem hora compulerit, inclusa voluptatibus, sanis cibariis onerata recedat. Reddita quieti misera es quas audirus induxerat, in corde versat imagines, & ignem præmissa confabulatione conceptum vehementius sua cogitatione succendit: quasi ebrius in psalmo turbat, in lectione cadit, fluctuat in oratione. Refusa mundi luce citantur mulierculæ addentes noua veteribus, non cessant donec captiuam liberius dæmonibus illudendam exponunt. Nam manifestior sermo non iam de accendenda, sed potius de sananda voluptate procedens, ubi, & quando, & per quem possit explere quod cogitat, in comune exponunt. Cella vititur in prostibulum, & delicato qualibet arte foramine, aut illa egreditur, aut adulter ingreditur. Infelicitas hæc, ut sæpe probatur, pluribus causa viris in hoc nostro sæculo communis est.

CAP. V. *De loquacitate, & auaritia aliquarum reclusarum congregantium  
ut distribuatur pauperibus.*

**S**vir alix, quæ licet turpia declinent, loquaces tamen loquacibus assidue sociantur, nimium curiositati linguam & aures tota die orio rumoribusque dedentes. Aliæ non multum ista curantes, quod fere vitium per omnes huius temporis serpit inclusas, pecuniæ congregandæ, vel multiplicandis pecoribus inhiant; tantaque cum hac sollicitudine in his extenduntur, ut eas matres vel dominas familiarum æstimes, non Anachoretas. Querunt aliquibus pascua pastores, qui procurent, qui custodiant greges: fructus vel pretium, vel pondus, vel numerum à custodibus expetunt. Sequitur emptio, & venditio; ut nummus nummo cumulum exigit, & auaritiæ sitim accendat. Fallit enim tales spiritus nequam, pro impertinendis elemosynis, vel orphanis alendis, pro aduenientium parentum vel amicorum caritate, & religiosarum feminarum susceptione, hoc vile ac necessarium suadens. Non

est hoc tuum: ad quam magis pertinet, vt pauper cum pauperibus stipem accipias, quam relictis omnibus tuis pro Christo aliena querere, vt eroges. Magnæ infidelitatis signum est, si inclusa de crastino sit sollicita: cum Dominus dicat: *Primum querite Regnum Dei, & hæc omnia adiicientur vobis.* Quapropter providendum est, vt mens omni rerum temporalium cura exuatur & exoneretur sollicitudine.

CAP. VI. *Quod reclusa de proprio labore vivat, vel aliunde antequam recludatur sibi procuret provideri, nec doceat, nec hospites recipiat, nec puellas, sed habeat probatam matronam & ancillam.*

**Q**uod si fiat, videat inclusa, vt fieri potest, de labore manuum suarum vivat, hoc enim perfectum est. Si autem aut infirmitas, aut teneritudo non permittat, antequam includatur, certas personas querat, à quibus singulis diebus quod vii diei sufficiat, humiliter recipiat; nec causa pauperum, vel hospitem quicquam adjiciat. Non circa cellulam eius pauperes clament, non orphani plorent, non vidua lamentetur. Sed quis, inquit, hoc poterit prohibere? Tu siede, tu tace, tu sustine: mox vt scient te nihil habere, seque nihil accepturos, vel fatigari discedent. Inhumanum hoc clames. Cæterum si præter necessarium videris & vestitum aliquid habes, Monacha non es. Quid ergo erogabis? Præcipitur tamen inclusa vt quicquid de labore manuum suarum victui superfluit, mittat cuidam fidei, qui pauperibus eroget. Nolo vt insidiatrix pudicitie vetula mixta pauperibus accedat propius, deferat ab aliquo Monachorum vel Clericorum eulogias, non blanda verba in aures susurret, ne pro accepta eleemosyna osculans manum in aure insibilet. Cavendum præterea est, vt nec ob susceptionem religiosarum sceminarum quodlibet hospitalitatis onus inclusa suscipiat. Nam inter bonas plerumque etiam pessimæ veniunt, quæ ante inclusæ fenestram discumbentes præmissis valdè paucis de religiosi sermonibus ad sæcularia devoluuntur, inde subtexere amatoria, & noctem fere totam insomnem ducere. Sane tu tales devita, ne cogaris audire, quod videre horreas; fortè enim videbuntur amara cum audiuntur vel cernuntur, quæ sequuntur dulcia cum cogitantur. Si scandalum times, eo quod nec pauperibus erogas, non suscipis hospites; cum omnes tuam nuditatem didicerint, non erit quireprehendat. Si vero nec pro pauperibus nec pro hospitibus te velit pecuniosam esse, multo utique minus occasione grandioris familiaris. Itaque eligatur tibi aliqua anus, non garrula, non vaga, non litigiosa, non nugigerrula; sed quæ bonos mores excoluerit, & ab omnibus habuerit testimonium veritatis. Hæc ostium cellulæ custodiat, & quod debuerit vel admittat, vel conseruet. Habeat sub cura sua fortiorem ad onera sustinenda puellam, quæ aquam & ligna comportet, coquat fabas aut olera; aut si hoc infirmitas exegerit, præparet potiora. Hæc sub virgæ disciplina custodiatur, ne fortè eius lascivia tuum sanctum habitaculum pollnatur, propositum blasphemetur. Pueris & puellis nullum ad te concedas accessum. Sunt quædam incluse quæ in docendis puellis occupantur, & cellam suam

suam vertunt in scholam; illa sedet ad fenestram, illæ in porticu resident, illa intuetur singulas, & inter puellares motus nunc irascitur, nunc rider, nunc minatur, nunc percutit, nunc blanditur, nunc osculatur, nunc flentem vocat pro verberare propius, palpat faciem, stringit collum, & in amplexum ruens nunc filiam vocat, nunc amicam. Qualiter inter hæc memoria Dei, ubi secularia & carnalia, etsi non perficiantur, mouentur tamen, & quasi sub oculis depinguntur. Tibi utique duæ illæ sufficiant ad colloquium & ad obsequium.

CAP. VII. *Quod qualibet religiosa, maxime virgo & reclusa debet parum, & illud ordinatè loqui.*

Silentij gravitatem inclusæ seruandam præcipuè suadet. Est enim in Sea quies magna, & fructus multus. Nam cultus institutæ silentium, sicut ait Hieremias: *Bonum est cum silentio expectare salutare Dei.* Et iterum: *Bonum est viro cum portauerit iugum, ut sedeat solus & taceat,* vnde scriptum est: *Audi Israël & tace.* Fac ergo, quod ait Prophetæ: *Dixi custodiam vias, ut non delinquam in lingua mea, posui ori meo custodiam.* Sic inclusa timens casum linguæ, quam secundum Apostolum Iacobum, *nemo hominem domare potest,* ponat custodiam ori suo, sola sedeat, & taceat ore, spiritu loquatur: & credat se non esse solam, quando sola est; tunc enim cum Christo est, qui non dignatur in turbis esse cum ea. Sedeat ergo sola, taceat Christum audiens, & cum Christo loquens. Ponat custodiam ori suo, primum ut raro loquatur; deinde quid loquatur, quibus & quomodo loquatur, attendat. Raro loquatur, id est, certis & constitutis horis, de quibus postea dicemus. Quibus loquatur, id est, quod ad animæ salutem vel necessitatem corporis facit. Quid loquatur, certis personis, & quales ei fuerint designatæ. Quomodo loquatur, id est humiliter, moderatè, non alta voce, nec dura, nec blanda, nec mixta risu. Nam si hoc ad quemlibet virum honestum non pertinet, quanto magis ad scēminam? quanto magis ad virginem? quanto magis ad inclusam? Sede ergo soror mea & tace, si compelleris loqui, parum loquere, humiliter & modestè; siue de corporalium rerum necessitate, siue de animæ salute sermo incubuerit.

CAP. VIII. *Quod non debet loqui nisi probato Confessori, seni, & raro: nec cum tangat, nec de manu conferat, nec solus sibi loquatur aliquis, nec munuscula tribuat.*

Am nunc personas quibus loqui debet, designemus: Felix illa quæ nec maritum admisit, nullum virorum videre volens, nec alloqui. Sed, quæ nunc reclusarum hoc sequitur exemplum? Sufficiunt illis quæ modo sunt, si hanc corporalem castitatem conseruent, si non onusto ventre non extrahantur, si non fletus infamis partum ediderit. Quibus perpetuum, ne cum viris loquantur indicare non possumus silentium, cum quibus honestius loqui possunt videamus. Ergo si fieri potest, prouideatur

in magno Monasterio vel Ecclesia Presbyter aliquis senex, maturus moribus, cui raro nisi de confessione, & animæ ædificatione loquatur: à quo consilium accipiat in dubiis, in tribulationibus consolationem. Verum quia inclusum membris malum illud quod timemus plerumque suscitatur, & emollicentiortuam senectutem, nec ipsi manum suam tangendam præbeat, vel palpandam. Nulla vobis de macie vultus, de exilitate brachiorum, de cutis asperitate sit cura.

CAP. IX. *Quod non propter sororem, sed propter alias adolescentulas hæc scribis præcauenda esse reclusarum.*

**H**Æc tibi, soror, gratias Deo, dicenda non fuerant. Sed quia nec solum propter te, sed etiam propter adolescentiores, quæ similem vitam tuo consilio arripere gestiunt, hanc tibi formulam tradi voluisti, hæc interferenda putavi. Si aliqua magni nominis vel bonæ æstimationis persona, Abbas scilicet vel Prior, cum inclusa loqui voluerit, aliquo præsentate loquatur.

CAP. X. *De personarum colloquio evitando.*

**N**Ullam certè personam te frequentius visitare vellent, nec cum aliqua te crebrius visitante familiare vellein te secretum habere. Persecutatur enim fama virginis crebra certæ alicuius personæ salutatione, periclitatur & conscientia. Nam quanto sæpius eundem videris vultum, vel vocem audieris, tanto expressius eius imago tuæ memoriæ imprimitur. Et ideo inclusa etiam facie velata loqui debet cum viro, & eius cauere conspectum, cui cum timore solum debet præstare auditum. Nam eandem viri vocem sæpè admittere quibusdam periculosum esse non dubito. Adolescentium & suspectarum personarum deuota colloquium: nec vnquam tecum, nisi tu audientiam illius quæsisisti propriè loquatur: & hoc si certa necessitas poposcerit. Cum nullo itaque aduenientium, præter Episcopum aut Abbatem, vel magni nominis priorem, sine ipsius Presbyteri licentia vel præcepto loquaris: vt difficultas loquendi tecum tibi præstet quietem. Nunquam inter te & quenlibet virum, quasi occasione exhibendæ caritatis, vel nutriendi affectus, vel expetendæ familiaritatis aut amicitie spiritualis, discurrant nuntij: nec eorum munuscula literasque suscipias, nec illis tua dirigas, prout moris est, puta zonas, marsupia, quæ diuerso stamine & subtegmine variata sunt, & cætera quæ huiusmodi adolescentioribus Monachi per Clericos mittunt: quod fomentum est amoris illiciti, & magni materia mali.

CAP. XI. *Quod reclusa debeat propriis manibus laborare, vt inde viuat, vel pauperibus erogat.*

**O**perare proinde ea quæ vel necessitas poscit, vel præscribit utilitas, & eorum pretium tuis vsibus cedat; quibus si non egeris, aurnecessaria Ecclesiæ, aut pauperibus, sicut diximus, tribuas. Ornet etiam omnes motus, omnes sermones inclusæ verecundia, quæ linguam compescat, iram mitiget, iniuriam caueat. Quam enim pudere decet honestè honesta

loqui, quantæ impudentiæ est vt inhonesta, licet laceſſita iniuriis aut ſtimulata furore, loquatur?

CAP. XII. *Quod non debet improperiis reſpondere.*

**I**Ncluſa igitur litiganti non reſpondeat; detrahenti non improperet, laceſſenti non contradicat: ſed in omnibus, quæ in publico vel in occulto aut obijciuntur, aut ſuſurrantur, ex conſcientia ſenioris arte contemnat, dicens cū Apoſtolo: *Mibi autem pro minimo eſt vt a vobis iudicer.* Super omnia enim incluſa ſtudere debet, vt tranquillitatem ſpiritus & pacem cordis iugiter retinens, illum ſui peſtoris æternum habeat inhabitatorem: de quo ſcriptum eſt: *In pace factus eſt locus eius.* Et alias Dominus per Prophetam: *Super quem, inquit, requieſcet ſpiritus meus, niſi ſuper humilem.* *Et quiſcumque, & ſimilentem ſermones meos?* Hunc ſacratiffimum mentis ſtatum; non ſolum ſtultiloquia euertunt, ſed & peruertunt. Nihil tam eſſe tibi conſeſtandum quam ſilentium.

1. Cor. 4.

Pſal. 73.

Eſa. 66.

CAP. XIII. *De tempore loquendi & tacendi.*

**I**Am nunc tempus loquendi, ac tacendi tempus diſtinguamus. Igitur ab Exaltatione ſanctæ Crucis vſque ad Quadreſimam poſt completorium vſque ad auroram ſilentium teneat: & tunc dicta prima, ſi aliud de diurnâ neceſſitate voluerit ſuggerere ſeruienti, paucis hoc faciat verbis: nihil cuiquam poſtea vſque ad tertiam loquatur. Inter tertiam vero & nonam his qui ſuperuenerint, prius ſi admittendi ſunt, competenter reſpondeat, & miniſtris, quod placuerit, iniungat. Poſt nonam ſumpto cibo omne colloquium & diſſolutionis materiam caueat; impingatur ei illud quod ſcriptum eſt: *Sedit populus manducare & bibere; & ſurrexerunt ludere.* Porto veſpertina laude ſoluta, cum miniſtra vſque ad tempus collationis de neceſſariis conferat. Tempore vero Quadreſimæ incluſa ſemper ſilentium tenere deberet: ſed quia hoc durum impoſſibileque putatur, cum Confelſore ſuo & miniſtra rarius quam aliis temporibus loquatur, & cum nullo alio: niſi fortè aliqua reuerenda perſona ex aliis Prouinciis ſuperuenerit. Poſt Paſcha vero vſque ad tempus prædictum à completorio vſque ad ſolis ortum ſilentio cuſtodito, cum horam primam in diuinis obſequiis celebrauerit, cum miniſtris ſuis loquatur ſi oportuerit: cum ſuperuenientibus iuter nonam & veſperam. Finita hora veſperarum diſponat cum miniſtris quod opus fuerit vſque ad collationem.

Exod. 31

CAP. XIV. *Quod vitandum, & habendum exercitium.*

**H**is inſpectis operi manuum, lectioni & orationi cetta tempora deputentur. Otioſitas quippe inimica eſt animæ, quam præ omnibus cauere debet incluſa, eſt enim omnium malorum parens, libidinis artifex, peruagationum alitrix, matrix vitiatorum, fomentum acedia, triſtitia incencium. Ipſa peſſimas cogitationes ſeminat, affectiones illicitas quærit, ſuſcitât deſidia. Ipſa quietis faſtidium parit, horrorem incutit celæ. Nunquam te improuidam, nunquam te ſpiritus inueniat otioſam. Sed quia mens noſtra, quæ in hac vita ſubdita eſt vanitati, nunquam in eodem ſtatu permanet, otioſitas exercitiorum varietate fuganda eſt, & quies no-

stra quadam operum vicissitudine fulcienda. Itaque à Kalendis Nouembriſ vsque ad Quadrageſimam, ſecundum æſtimationem ſuam, plus media nocte repaulet: & ſic ſurgens cum qua poteſt deuotione, ſecundum formam Regulæ Beati Benediſti, nocturnas vigilias celebret; quibus mox ſuccedat oratio, quam ſecundum quod eam Spiritus ſanctus adiuuerit, aut protelare debet aut abbreviare; caueat autem ne prolixior oratio faſtidium pariat, vtilius eſt enim ſæpius orare breuiter, quam ſemel nimis prolixè: niſi forte orationem deuotio inſpirata, ipſo neſciente qui orat, prolongauerit. Poſt orationem in honore Virginis debitum ſoluat officium, ſanctorum commemorationem adiiciens. Cæue autem ne de numero pſalmorum, vel commemoratione aliquam tibi legem imponas: ſed quamdiu te pſalmi delectant, vtire illis: ſi tibi cæperint eſſe oneroſi, tranſi ad lectionem: quæ ſi faſtidium ingerit, ſurge ad orationem. Sic ad opus manuum his fatigata pertranſiens, vt ſalubri alteratione ſpiritum recrees, & pellas acediam. Finitis commemorationibus, quarum numerum non propoſitioni, vel voci neceſſitas extorqueat, ſed inſpirans deuotio dicet, tempus quod reſtat vsque ad auroram operi manuum cum pſalmorum modulatione deferuiat. Albeſcente aurora matutinas laudes cum horæ primæ hymnis perſoluat: & ſic in alternatione lectionum, orationum, pſalmorum quoque, prout ea deuotio variauerit, tertiam expectet: qua dicta in opere manuum vsque ad horam nonam occupetur. Cibo autem ſumpto, & gratiarum actionibus Deo ſolutis, ad præſcriptam manſuetudinem redeat ſpiritualibus exercitiis, opus corporale intermittens vsque ad vesp̄as. Facto autem paruo intervallo aliquam lectionem de vitis Patrum, vel inſtitutis vel miraculis eorum, ſibi ſecretis legat: vt orta ex his aliqua compunctione, in quodam feruore ſpiritus completorium dicat: vt cum pleno pectore deuotionis lectulo membra componat. Illa ſane quæ literas non intelligit, operi manuum diligentius inſiſtet: ita vt cum paulatim fuerit fatigata ſurgat, & genua flectat, & breuiter oret Dominum ſuum, & ſtatim opus quod intermiſerat reſumat: & hoc faciat ſcilicet tempore vtroque lectionis & laboris; Dominicam orationem crebrius inter opera eadem repetens, & ſi quos pſalmos voluerit interſerens.

*CAP. XV. De tempore Paſchali in quo ad vigilias ſurgere debet.*

**A** Paſcha verò vsque ad prædictas Kalendas, ſic ſurgat ad vigilias, vt finitis nocturnis hymnis & orationibus, paruiſſimo intervallo præmiſſo, matutinas incipiat. Quibus expletis vsque ad plenum ſolis ortum, orationibus vacet & pſalmis: & tunc dicta prima ſacrificium diurni operis inchoet vsque ad horam tertiam: in lectione & oratione vsque ad ſextam ſpiritum occupet, poſt ſextam ſumpto cibo pauſet in lectulo ſuo vsque ad nonam: & ſic vsque ad vesp̄eram manibus operetur. Poſt vesp̄eram vero orationibus vacet & pſalmis; horam collationis ita temperans, vt ante ſolis occaſum lectulus membra recipiat. Cauendum enim eſt omni tempore, ne totum diei lucem nox aut equam dormitum ear ſuis obducatur tenebris, & dormire cogatur cum vigilare debet.

CAP. XVI. *De tempore Quadragesimali qualiter est ieiunandum, & de virtute ieiunij.*

**D**E tempore Quadragesimali locuturi, primo excellentiam eius credimus commendandam. Cum multa sint Christianorum ieiunia, omnibus excellit Quadragesimale ieiunium, quod diuina auctoritate non singulis quibuscunque personis, non illius vel illius ordinis hominibus, sed omnibus indicitur Christianis. Habet autem testimonium excellentiæ à lege, à Prophetis, & ab Euangelio. Nam Moyses famulus Dei ieiunauit quadraginta diebus, & quadraginta noctibus, vt legem Domini accipere mereretur. Helias autem Propheta cum manducasset de pane subcinericio, aquamque bibisset, quam Angelus ei ministrauerat, ieiunauit quadraginta diebus & quadraginta noctibus, & tunc vocem Domini audire promeruit. Dominus & Saluator noster cum ieiunauit quadraginta diebus & quadraginta noctibus, superauit tentatorem, & accesserunt Angeli & ministrabant ei.

CAP. XVII. *De virtute ieiunij.*

**E**st ergo ieiunium contra omnia tentamenta & peccabilem statum in omni tribulatione vtile refugium, omnibus nostris irrefragabile succulentum. Quanta autem virtutis sit ieiunium ipse Christus non tacuit, cur dæmonem, qui lunaticum inuaserat, eijcere non potuerint: *Hoc genus, Matt. 17. inquit, dæmoniorum non potest eijci, nisi in oratione & ieiunio.* 20.

CAP. XVIII. *De significatione Quadragesimæ.*

**L**icet autem religionis comes semper debeat esse ieiunium, sine quo castitas tuta esse non potest; hæc tamen Quadragesimalis observatio magnum in se continet Sacramentum. Primus locus habitationis nostræ paradysus fuit: secunda mundus iste plenus ærumnis: tertius in cælo cum Angelis & spiritibus. Significant autem isti quadraginta dies totum tempus ex quo pulsus est Adam de paradiso, vsque ad vltimum diem, in quò plene liberabuntur ab hoc exilio. Hic autem sumus in timore, in labore, in dolore proiecti à facie oculorum Dei, exclusi à gaudiis paradisi, ieiuni ab alimento cælesti: semper autem debemus hanc miseriam nostram considerare & deplorare, & ostendere in operibus nostris, quod sumus aduenæ & peregrini in mundo. Sed quia hoc facile non potest humana fragilitas, constituit Spiritus sanctus tertium tempus quo id faciamus, & quasdam observationes in Ecclesia fieri ordinauit, quibus ipsius temporis causam animaduertere valeamus. Nam vbi ostendit nos pulsos esse, addictos morti, propter verbum quod dixit Dominus ad Adam, cum expelleret de paradiso, cum cinerum aspersione dicitur vobis: *Pulvis es, & in puluerem reuerteris.* Vt sciamus etiam quod in hoc exilio negatur nobis visio Dei, oppanditur velum inter nos & sancta sanctorum. Verum vt te reducamus ad memoriam, quod lōge sumus ab eorum societate de quibus scriptum est: *Beati qui habitant in domo tua Domine, in secula, sæculorū laudabunt te: vlsitatum verbum laudis intermittimus.* Quod verò nos ipso hoc altiori ieiunio constringimur,

Gen. 3.

Psal. 83.



recordari nos facit, quod in hac vita cœlesti pane non satiatur. In hoc ergo tempore omnis Christianus aliquid reddere dicitur solitis obsequiis, & diligentius atque frequentius circa cordis & oris custodiam occupari. Sed inclusa maximè institutionis temporis huius rationem multò meliùs intelligit, quantò eam in propria vita sua expressius recognoscit. In his proinde sacris orationibus Christo præcipuè placere desideramus, totam se Deo voueat atque sanctificet: omnes delicias respuat, omnes confabulationes abiuret, & quasi die nuptiarum hoc tempus existimans, ad amplexus Christi omni aviditate suspiret. Frequentius solito incumbat orationi, crebrius se pedibus Iesu prosternat, crebra nominis illius repetitione compunctionem excitet, lacrimas prouocet, cor ab omni vagatione compescat. Finitis itaque sacris vigiliis interuallum, quod à nocturnis laudibus diuidit matutinas, orationi, meditationi obseruiat. Dictaque post matutinas prima vsque ad plenam tertiam psalmis ac lectionibus vacet. Tertiæ verò horæ laude completa operi manuum vsque ad horam nonam deuota insistat, breues per interualla orationes inferens. Dicta post hoc vespéra corpus reficiet, & sic tempus completorij psallens expectet.

CAP. XIX. *De cibi & potus qualitate & quantitate.*

**I**Am de cibi & potus qualitate vel quantitate ex abundanti quidem tibi legem imponere, soror, quæ ab ipsa infantia vsque ad senectutem, quæ nunc tua membra debilitat, parcissimo cibo vix corpus sustentas: pro aliis cum quibus id vtile futurum arbitraris, certam de his præscribere regulam tentabo. Beatus Benedictus libram panis & heminam potus concedit Monacho: quod nos inclusis delicatioribus non negamus: adolescentibus tamen in corpore robustis ab omni quod inebriare potest abstinere vtilissimum est. Panem nitidum & cibos delicatos quasi impudicitiz venenum euitet. Sic necessitati consulat, vt & famem repellat, & appetitum non fatiet. Itaque quæ ad perfectiorem abstinentiam progredi non valent, libra panis & hemina lautioris potus contentæ sint, siue bis comedant, siue semel. Vnum habeant de oleribus vel leguminibus pulmentum, vel certè de farinaciis; cui modicum olei, vel butyri, vel lactis iniiciens, hoc condimento fastidium repellat. Et hoc ei, si ea die cœnatura est, sufficiat. Ad cœnam verò parum lactis sibi vel piscis modicum, vel aliquid huiusmodi si præsto fuerit apponat: vno genere cibi contenta cum pomis & herbis crudis, si quas habuerit. Hæc ipsa si semel comederit in die prælibato pulmento possunt apponi. In vigiliis sanctorum tamen & quatuor temporum ieiuniis, omnium etiam feriarum quarta & sexta, extra Quinquagesimam, in cibo Quadragesimali ieiunet. In Quadragesima verò vnum quotidie ei sufficiat pulmentum. Et nisi infirmitas impediât, feria sexta in pane & aqua ieiunet. Ab Exaltatione sanctæ Crucis vsque ad Quadragesimam semel in die hora nona reficiat. In Quadragesima dicta vespéra ieiunium soluat. A Pascha vsque ad Pentecosten ad sextam prandeat, & ad prandium silentium teneat: quod etiam tota æstate faciet, præter ferias, quarta & sexta & solennibus ieiuniis, Diebus autem quibus ieiunat, liceat

ei in æstate pro somno meridiano, & inter matutinas & primam modicum quietis indulgere corpusculo.

CAP. XX. *De vestimentis & calciamentis.*

**P**orro talia ei vestimenta sufficiant, quæ frigus repellant, grossioribus pellicii vtatur & pellibus propter hyemem: propter ætatem autem vnam habeat tunicam vtroque vero tempore duas de stupacio camisias vel staminas. Velamen capitis non sit de panno subtili vel pretioso, sed mediocri nigro: ne videatur colore vario affectare decorem. Calciamenta, pedules, caligas, quantum satis fuerit habeat. Et paupertatis suæ custos sollicitè consideret, vt etiam aliquantulum minus habeat quàm indulgere sibi possit iusta necessitas. Hæc, soror carissima, de exterioris hominis conuersatione, non pro antiquitatis seruire, sed pro huius nostri temporis spatio, te compellente, conscripsi; infirmis temperatum quendam modum viuendi proponens; fortioribus ad perfectiora progrediendi libertatem relinquens.

CAP. XXI. *Quare solitudo est hominum consortio præferenda propter conseruationem thesauri virginitalis.*

**S**ed iam nunc audiat & intelligat verba mea quæcumque abrenunciens mundo vitam hanc solitariam elegerit, abscondi desiderans non videri, & quasi mortua sæculo in spelunca Christo consepeliri. Primum tibi solitudinem hominum debeas præferre consortio diligenter attende. *Virgo*, inquit 1. Cor. 7. Apostolus, *cogitat quæ sunt Dei, quomodo placeat Deo, vt sit sancta cor-* 14. *pore ac spiritu.* Voluntarium hoc sacrificium est, oblatio spontanea, ad quam non lex impellit, vel necessitas cogit, non vrget præceptum. Vnde Dominus in Euangelio: *Qui potest capere capiat.* Quis potest? Ille certè, cui Dominus hanc inspirauerit voluntatem, & præstiterit facultatem. Matt. 19. 12. Primum igitur, o virgo, bonum propositum tuum ipsi inspirauit cum summa deuotione cordis cominenda; intensissima oratione deposcens, vt quod impossibile est per meritum, facilè sentiat per gratiam. Cogita semper quam pretiosum thesaurum in quam fragili vasculo portes; & quam mercedem, quam gloriam, quam coronam virginitalis seruata ministret. Quam insuper pœnam, quam confusionem, quam damnationem importet amissa, indefuenter animo reuolue. Quid hoc pretiosius thesauro, quo cælum emittur, quo Angelus delectatur, cuius ipse Christus cupidus est, quo illicitur ad amandum, & ad præstandum prouocatur? Quid? audeo dicere, seipsum & omnia sua. Itaque nardus virginitalis tuæ etiam in celestibus dans odorem suum, faciat vt *concupiscat Rex decorem tuum, & ipse est* Psal. 46. 12. *Dominus Deus tuus.* Vide qualem tibi sponsum elegeris, qualem tibi amicum attuleris. Ipse est *Speciosus forma præ filiis hominum.* Speciosior Ibid. etiam sole & super omnem stellarum pulchritudinem. Spiritus eius super mel dulcis, & hereditas eius super mel & fauum. Longitudo in dextera eius, & in sinistra eius diuitiæ & gloria. Ipse te iam elegit in sponfam: sed non coronabit nisi probatam. Et dicit scriptura: *Quod non est tentatus, non* Ecccl. 34. *est probatus.* Virginitalis aurum est, cella fornax, conflator diabolus, ignis

tentatio, caro virginis vas luteum in quo aurum reconditur, nec vas vltcrius à quolibet artifice reparatur.

CAP. XXII. *De contemplatione virginis in consideratione sponsi, sine beata Maria, & sanctarum virginum, ne corrumpatur libidine, nedum aliena, sed etiam propria.*

Apoc. 14.

**H**Æc virgo iugiter cogitans pretiosissimum virginittis thesaurum qui tam vtiliter possidetur, tam irrecuperabiliter amittitur, summa diligentia, summo cum timore custodiat. Cogitet sine intermissione ad cuius ordinatur thalamum, ad cuius præparatur amplexum. Proponat sibi agnum, quem sequi habet quocumque ierit. Contempletur beatissimam Mariam præcedentem & præcinentem dulce illud cum virginittis tympano choros virginum canticum, quod nemo potest canere nisi viri- usque sexus virgines: de quibus scriptum est: *Hi sunt qui cum mulieribus non sunt coinquinati; virgines enim sunt.* Nec sic hoc dictum æstimes, quasi non vir sine muliere, aut mulier sine viro possit fædari: cum detestandum illud scelus, quo vir in virum vel fœmina in fœminam, omnibus flagitiis damnabilius iudicetur. Sed & absque alienæ carnis confortio virginittas plerumque corrumpitur, castitas violatur: si vehemē- tior ætus carnem concutiens voluntatem sibi subdiderit, & rapuerit membra. Cogitet virgo semper omnia sua sanctificata Deo, incorrupta Christo, Spiritui sancto dedicata. Indignum iudicet quod Christi est tradere sanitæ, & virginea eius membra erubescat vel simplici motu maculari.

CAP. XXIII. *Quomodo esuriens debet famem delicias reputare, & paupertatem diuitias.*

**I**Taque proinde in virginittis suæ custodiam totum animum tendat, cogitationes expendat, vt virtutis huius perfectionem esuriens, famem delicias putet, diuitias paupertatem. In cibo, in potu, in somno, in sermone semper timeat dispendium castittis: ne si plus debito carni reddiderit, vires præbeat aduersario, & occulto nutriat hostem. Sedens igitur ad mensam, decorem pudicitie mente reuoluat, & ad eius perfectionem suspirans, cibum fastidiat, potum exhorreat: etiam quod sumendum necessitas iudicauerit, aut ratio dictauerit, cum dolore aut pudore, aliquando cum lacrimis sumat. Si ei sermo fuerit cum aliquo, semper me- tuat aliquid audire, vel quod modicum serenitatem castittis obnubilat: deferendam se à gratia non dubitet, si vel vnum verbum contra honestatem proferat.

CAP. XXIV. *Quod lectum intrans debet cogitare si in aliquo offendit, & dolere.*

**P**ROstrata lectulo pudicitiam tuam commenda Deo, & sic signo Crucis armata reuolue animo quomodo die illo vixisti: si verbo, si opere, si affectu Domini tui oculos offendisti: si leuior, si otiosior, si negligē- tior debito fuisti: si pius cibo crudior, potu dissolutior metas necessittatis excessisti.

excessisti. Si subreptum tibi aliquid horum deprehendis, suspira, pectus tunde; & hoc sacrificio vespertino tuo reconciliatam sponso sponsus ex-  
cipiat.

CAP. XXV. *Quod contra carnis tentationem recurrat ad Beatam Vir-  
ginem, & sanctam Agnetem & Angelum eius pro adiutorio.*

**S**I vigilanti subito, aut quiete soporis, aut arte tentatoris calor corpo-  
ris fuerit excitatus, & insomnium callidus hostis iniunxerit, diuersis-  
que cogitationibus quietem pudicitiae infestauerit, proposueritque delicias,  
vitae durioris horrorem incusserit, veniat tibi in mentem Beatae Virginis,  
quae in tenera aetate tam crebro reportauit de impiissimo hoste triumphum.  
Cogita Agnetem beatissimam, à qua aurum; argentum, vestes pretiosissi-  
mae, lapides pretiosi, & tota secularis gloriae pompa, quasi quaedam ster-  
cora sunt reputata. Vocata ad tribunal non abfuit; blandiebatur iudex,  
contempsit; minabatur, irrisit; magis metuens ne parceret, quam ne puni-  
ret: sedumque lupanar vertit in oratorium: quod cum virgine ingrediens  
Angelus lucem infudit tenebris, & insectatorem pudicitiae morte mulcta-  
bat. Si igitur & tu oraueris, & contra libidinis incentorem lacrimarum  
tuarum arma leuaueris, non certe Angelus tuo casto deerit cubiculo, qui  
prostitulo non defuit. Merito Beatam Agnetem ignis iste materialis nequiuit  
adurere, cui carnis flamma repuerat, quam ignis succenderat caritatis.  
Quotiescumque nequam spiritus illicita quaeque suggesserit, vehemen-  
tior incubuerit ætus: illum qui scrutatur corda & renes scito esse prae-  
sentem, & sub eius oculos esse quicquid agis vel cogitas. Habe proinde re-  
uerentiam Domino, quem tibi assistere non dubites, & deprædatori re-  
sponde *Angelum habeo amatorem, qui nimio zelo custodit corpus meum.*  
Adiuuet conatum tuum in tali necessitate discreta abstinencia: quia ubi  
multa carnis afflictio, aut nulla aut parua aliqua potest esse delectatio.

CAP. XXVI. *Quod castitas ab adolescentibus sine magno desiderio &  
maceratione seruari non potest, cum in agris & senibus  
frequenter periclitatur.*

**N**emo se palpet, nemo blandiatur sibi, nemo se fallat. Nunquam ab  
adolescentibus sine magna cordis contritione & carnis afflictione ca-  
stitas conquiratur, vel seruatur, quae plerumque in agris vel senibus peri-  
clitatur. Nam licet continentia donum Dei sit, & nemo possit esse conti-  
nens, nisi Deus det, nec ullis nostris meritis donum hoc, sed eius gratui-  
tae sit gratiae adscribendum; illos tamen tanto dono indignos iudicat, qui  
aliquid laboris pro eo subire detrectant. Volentes inter delicias casti esse,  
inter epulas continentes, inter pueros & puellas conuersari & non tentari:  
in commensationibus & ebrietatibus fædis distendi humoribus & non co-  
inquinari: ligare visum suum cum flammis & non exuri; difficile hoc utrum-  
que aut impossibile tu videris.

*Cod. Reg. P. III.*

Q

CAP. XXVII. *De Monacho se propter castitatem in aquis immorgente, & rursus affligente & orante, stimulum carnis extinguere nequente.*

**N**Oui ego Monachum, qui cum initio suæ conuersionis, tam naturalibus incontinentiis, tam violentia vitiosæ consuetudinis, tam suggestionis callidi hostis & tentatoris, pudicitiam suam periclitari timeret, & crexit se contra se, & aduersus suam carnem sæuissimum concipiens odium, nihil magis quam quod eam affligeret expeteret. Itaque inedia macerabat corpus, & quæ ei de se debebantur subtrahens, etiam motus eius simplices comprimebat. Sed cum iterum nimia debilitas sibi plus indulgere compelleret; ecce caro rursus caput erigens, aduersus, ut putabatur, infestabat quietem, plenisque se frigidis aquis iniiciens, tremens aliquamdiu psallebat & orabat. Sæpè etiam illicitos sentiens motus, vtricis fricabat corpus, & nudæ carni aperiens incendium incendio superabat. Et cum hæc omnia non iussicerent, nihilominus eum spiritus fornicationis vrgeret; tunc quod solum superfuit, prostratus ante pedes Iesu orat, plorat, suspirat, rogat, adiurat, obtestatur, ut aut occidat vel sanet: clamat crebro, non abibo, non quiesco, nec te dimittam nisi benedixeris mihi. Præstatur ad horam refrigerium, sed negatur securitas. Quiescentibus enim paululum carnis stimulis, affectiones illicitæ pectus inuadunt. Deus meus, quas cruces, quæ tormenta tunc pertulit miser ille, donec tanta infusa est ei dilectio castitatis, ut omnes, quæ sentiri possunt vel cogitari, qualuis injiceret voluptates, & tunc quoque recessit ab eo, sed usque ad tempus: & nunc senectuti morbus accessit, nec sic tamen sibi de securitate blanditur.

CAP. XXVIII. *Contra illos, qui dicunt se esse frigidos, vel impotentes, & in lecto se cum mulieribus ponunt, duplex malum cumulant.*

**V**Nde non parum pudet quorundam impudicitia, qui cum in sordibus senuerunt, nec si suspectarum personarum volunt carere consortio: cumque, quod dictu nefas est, eodem lectulo cubantes, inter amplexus & oscula de sua castitate se dicunt esse securos, quos frigescente corpore ad cælos repescencia membra deficiant. Infœlices isti & præ cunctis mortalibus miseri, quibus cum desit sceleris perpetrandi facultas, adhuc manet in ipsa fœditate facultas. Non quiescit turpe desiderium, quamuis frigiditas neget effectum. Videt tamen verum dicat aut mentiatur iniquitas sibi, & dum nititur velare vnum, duplex in se prodat flagitium, cum & fere decrepitos nocturnum aliquando plasma deludat, & emortuam senectutem intestinum hoc malum sæpius inquietet.

CAP. XXIX. *Quod virgo nunquam debet se reputare securam, sed semper debet cogitare de scriptura divina.*

**T**E, soror, nunquam volo esse securam, sed timere, semperque tuam fragilitatem habere suspectam, adinstar pauidæ columbæ fræquentare riuos aquarum, & quasi in speculo accipitris cernere superuolantis effigiem & cauere. Riuus aquarum sententiæ sunt scripturarum, quæ de limpidissimo

sapientiz fonte profluentes, diabolicarum suggestionum produnt imaginem & sensum, quo caueantur & excludantur. Nihil enim magis cogitationes excludit inutiles, vel compescit lasciuias, quam meditatio verbi Dei: quod sic ad animum suum virgo debet assuescere, vt aliud nolens, non possit aliud meditari. Cogitanti de scripturis somnus obrepit: euigilanti primum aliquid de scripturis occurrat: dormientis somnia memoria aliqua de scripturis sententia condat.

CAP. XXX. *Quod rigor abstinentie non debet omitti timore futuræ languoris vel infirmitatis, cum ob hoc corpus dometur.*

Sed quidam à salutaribus exercitiis retrahuntur timore, ne videlicet propter nimiam abstinentiam vel vigiliis immoderatas incidant in languorem, & ita efficiantur aliis oneri, sibi autem dolori. Hæc excusatio nostra in peccatis nostris. Quam pauci sunt hodie, quos talis seruo igniuit, omnes sapientes sumus, omnes prouidi, omnes discreti: procul oderamus bellum, & sic morbum corporis, antequam sentiat, formidamus vt languorem animæ, quam præsentem sentimus, terri negligamus: quasi tolerabilius sit, flammam libidinis quam ventris tolerare rugitum; aut non multo melius sit continuo languore carnis vitare lasciuiam, quam sanum & incolumem in eam redigi seruitutem. Quid enim interest, vtrum abstinentia an languore caro superbiens comprimatur, castitas conseruetur? Sed remissio, inquit, cauenda est; ne forte occasione infirmitatis incurramus illecebras voluptatis. Certè si languet, si ægrotat, si torquentur viscera, si arescit stomachus, quælibet delicie oneri magis erant quam delectationi.

CAP. XXXI. *De adolescente, qui fuerat incontinens, veram penitentiam agente, & cum dolore stomachi Christum in hora mortis vidente.*

Vidi hominem, qui cum penitentiam suam vi consuetudinis oppressus continere non posset; tandem in se reuersus supra modum erubuit: & mox concauit cor eius intra cum, & in meditatione eius exarsit ignis. Deinde salubriter irascens sibi, inuentione granißima irrit in seipsum, & bellum indicens corpori, etiam ei quæ necessaria videbantur ademit. Successit grauitas leuitati, loquacitati silentium. Nemo enim postea vidit iocantem, ridentem nemo conspexit: nemo ex ore eius otiosum sermonem audiuit. Temporales consolationes, & quicquid carni suae putabatur, ita contempsit & exhorruit, vt nullam sibi requiem, nullam in cibo vel potu consolationem indulgere ei pateretur. Cogitationum suarum ita sollicitus & scrupulosus erat, vt in hoc solo nimius videretur. Ita demisso vultu oculisque deiectis stabat, sedebat, vt timens & tremens diuinis tribunalibus videretur assistere. Talibus armis gloriosum reuit de tyranno triumphum. Nam grauissimum stomachi incurrens incommodum, post diuturnum languorem, cum iam dormitionis eius hora instaret. Sine, inquit, ecce Iesus venit.

CAP. XXXII. *Quod discretio, quæ est mater virtutum, non est abijcienda.*

**H**Æc dico, vt discretionem, quæ omnium virtutum & mater & nutritrix est, detegam: sed vitiorum materias gulam comprimamus, requiem corporis, sceminarum & effeminatorum familiaritatem atque conuictum infra metas necessarias cohibeamus; quia sæpè falso nomine discretionis palliamus negotium voluptatis. Vera enim discretio est animam carni præponere, & vbi periclitatur vtraque, nec sine huiusmodi incommodo illi potest salus consistere, pro illius vtilitate istam negligere. Hæc diximus, vt quanta tibi debeat in considerata pudicitia esse sollicitudo, aduerteres: quæ cum omnium virtutum flos sit & ornamentum, sine humilitate tamen areret atque marcescit.

CAP. XXXIII. *De humilitate seruanda à virginē, ne deveniat in superbiam carnalem vel spirituales, vel vanitatem.*

Eccl. 10.

**H**oc est certum haud securum peccatorum omnium fundamentum, quæ Angelum de cælo, hominem de paradiso expulit. Huius pessimæ cum multi sint rami, omnes tamen in duas species diuiduntur, in carnalem scilicet & spirituales. Carnalis superbia est de carnalibus, spiritualis est de spiritualibus superbire. Carnalis postea in duas subdividitur species: in iactantiam scilicet & vanitatem. Vanitas est, si ancilla Christi intus in antro suo gloriatur se nobilibus ortam natalibus, si se diuitiis paupertatem prætulisse pro Christo delectetur; si se pauperibus & ignobilioribus præferre conetur; si se contempsisse diuitem nuptias quasi aliquid magnum admiraretur.

CAP. XXXIV. *De vanitate & inani gloria, nobilitate vel diuitiis, vel aliis delectabilibus rebus vitandis.*

**E**t etiam quædam species vanitatis in affectata aliqua pulchritudine etiam intra cellulam delectari, parietes variis picturis & celaturis ornare, oratorium pannorum & imaginum varietate decorare. Hæc omnia quasi professioni tuæ contraria caue.

CAP. X. XV. *De ornamentis celle vitandis.*

**Q**ua enim fronte de diuitiis vel natalibus gloriaris, quæ illius vis sponsa videri, qui pauper factus est cum esset diues; pauperem matrem, pauperem familiam, domum etiam pauperulam, & præsepj vilitatem elegit? Itane gloriandum tibi est, quod Dei Filium hominum filiis prætulisti? quod sædam carnem pro virginitatis decore spreuisti? quod æternas cæli diuitias atque delicias martyris sanctorum commutasti?

CAP. XXXVI. *De ornamentis virtutum acquirendis.*

Psal. 45.

**S**i gloriaris in Domino, seruias ei cum timore. Sed illam te nolo quasi sub specie deuotionis sequi gloriam in picturis, vel sculpturis, in pennis auium vel bestiarum, aut diuersorum florum imaginibus variatis. Sint hæc illorum, qui nihil intus in quo glorientur habentes, exterius sibi comparant in quibus delectentur. *Omnis gloria eius filia regis ab intus, in fimbriis*



*aureis circumamicta varietatibus.* Si autem tu iam filia Regis es, ut pote filij Regis sponsa, patrisque vocem audistis dicentis: *Audi filia, & vide, & inclina aurem tuam:* sit tua omnis gloria abintus. Vide ut gloria tua sit testimonium conscientiae tuae. Ibi sit pulcherrima virtutum varietas; ibi diuersi colores sic conueniant & sic coniungantur sibi, ut alterius pulchritudinem alter augeat; & qui in sua natura minus lucet, alterius collatione lucidior appareat.

CAP. XXXVII. *Nota copulam castitatis & humilitatis, prudentiae & simplicitatis, misericordiae & iustitiae, fortitudinis & modestiae.*

**I**ngatur castitati humilitas, & nihil erit splendidius. Prudentiae societur simplicitas, & nihil erit lucidius. Copuletur misericordia iustitiae, & nihil erit suauius. Adde fortitudini modestiam, & nihil erit utilius. In hac varietate tuae mentis oculos occupa. Hanc in anima tua omni studio forma: cui si fimbrias aureas addas, vestem polymitam, in qua te sponsus cum summa dilectione conspiciat, texuisti. Fimbria extrema pars, quasi finis est vestimentum. *Finis autem praecepti caritas est de corde puro, & conscientia bona & fide non ficta.* 1. Tim. 3.

CAP. XXXVIII. *Quod ornamento altaris sicut corporalia debent esse li-  
nea & alba, sic & corpus vestrum.*

**I**N his glorieris, in his delecteris, intus non foris, in veris virtutibus, non in picturis & imaginibus. Panni linei candidi tuum adornent altare, qui castitatem suo candore commendent, & simplicitatem praemonstrent. Cogita quo labore, quibus tensionibus terrenum in quo creuit linum, colorem exuerit, & ad talem candorem peruenerit, ut ex ea ornetur altare, Christi corpus veletur. Cum terreno colore omnes nascimur: *Quoniam in iniquitatibus conceptus sum: & in peccatis concepit me mater mea.* Psal. 56. Primum igitur, carissima, linum aquis immergitur, nos in aquis baptismatis Christo conspelimur: ibi deletur iniquitas, sed necdum sanatur infirmitas. Aliquid candoris recepimus in peccatorum remissione, sed necdum plenè terreno colore exuimur pro naturae, quae restat, corruptione. Post aquas linum siccatur: quia necesse est, post aquas baptismatis corpus per abstinentiam maceratum illicitis humoribus vacuetur. Deinde linum malleis tunditur, & caro nostra multis tentationibus fatigatur. Post hoc linum ferreis aculeis discerpitur, ut deponat superflua; & nos disciplinae vngulis rasi vix necessaria retinemus. Adhibetur post hoc lino suauior stimulorum leuiorque purgatio; & nos victis cum magno labore pessimis passionibus, à leuioribus & quotidianis peccatis simplici confessione & sanctificatione mundamur. Iam tunc à nentibus linum in longum producit, & nos in anteriora longanimitate extendimur. Porro ut ei perfectior accedat perfectio & pulchritudo, ignis adhibetur & aqua: & nobis transeundum est per ignem tribulationis & aquam compunctionis, ut perueniamus ad refrigerium castitatis. Hæc tibi oratorij tui ornamenta representent, non oculos tuos varietatibus mentis pascant. Sufficiat tibi in altari tuo Saluatoris in cruce pendens imago, quæ Passionem suam tibi representet, quam

imiteris : expansis brachiis ad suos te inuitet amplexus, in quibus delecteris : nudatis vberibus lac suauitatis infundat, quo confoletis.

CAP. XXXIX. *De consideratione virginitatis & humilitatis Beate Mariae & Beati Ioannis Euangeliste, & de ipsorum commendatione.*

ET si hoc placet ad commendandam tibi virginitatis excellentiam, Virgo Mater in sua, & virgo discipulus in sua iuxta crucem cernantur imagine, vt cogites quam grata sit Christo vtriusque sexus virginitas, quam in matre & præ cæteris sibi dilecto discipulo consecrauit. Vnde eos pendens in cruce tanto fœdere copulauit, vt illam discipulo matrem, illum matri filium delegaret. O beatissimum hoc testimonio Ioannem, cui totius humani generis decus, opes mundi, gloria cæli, miserorum refugium, afflictorum solatium, pauperum consolatio, desperatorum erectio, peccatorum reconciliatio, postremo orbis domina, cæli regina, testamenti auctoritate committitur. Hæc tibi præbeant incentiuum caritatis, non spectaculum vanitatis. His enim omnibus ad vnum necesse est vt contendas: *quoniam vnum est necessarium.* Illud est vnum, quod non inuenitur, nisi in vno, apud vnum, cum vno: *apud quem non est transmutatio nec vicissitudinis obumbratio.* Qui adhaeret ei, vnus cum ipso spiritus efficitur, transiens in illud vnum, quod semper est, & cuius anni non deficiunt. Adhæsiō ista caritatis quasi specialis est ornatus finis & fimbria.

Luc. 10.

Iacob. 1.

1. Cor. 6.

CAP. XL. *De caritate habenda in dilectione Dei & proximi sibi non nocendo; nec noceat cupiendo & benefaciendo.*

VEstis quippe nuptialis ex virtutum varietate contexta oportet vt fimbriis aureis, id est, caritatis splendoribus ambiatur, quæ omnes virtutes contineat & constringat in vnum, & suam singularem claritatem imperitans, de multis vnum faciat, & cum multis vni adhaereat: vt iam omnia non sint multa, sed vnum. Caritas autem in duo diuiditur, in Dei videlicet dilectionem & proximi. Porro dilectio proximi in duo subdiuiditur: in innocentiam & beneficentiam: videlicet vt nulli noceas, benefacias quibus poteris: scriptum est quippe: *Quod tibi non vis fieri, alteri ne feceris:* & hæc innocentia. Et Dominus in Euangelio: *Omnia, inquit, quaecumque vultis vt faciant vobis homines, & vos facite illis:* hæc beneficentia. Quantum ad te duo ista pertineant, diligenter aduerte. Primum, vt nulli noceas: deinde, vt nulli velis nocere. Primum illud facile tibi, cum nec id possis, nisi forte lingua percusseris. Secundum illud non erit difficile, si propositum attendas tuum: si professam dilexeris nuditatem. Non enim tibi poterit erga aliquam esse male voluntatis materia, vbi cupiditas nulla; vbi nihil diligitur, quod possit auferri: nihil tollitur, quod debeat amari. Deum bene velis omnibus, pro sis quibus possis. In quo, inquis, cum mihi non liceat vel modicum quod egenibus tribuam, possidere?

Mat. 7.

CAP. XLI. *De exemplo Mariæ & Marthæ, & vitæ actiue  
& contemplatiue.*

**A**gnosce conditionem tuam, carissima. Dux sorores erant Martha & Maria: laborabat illa, vacabat ista: illa erogabat, ista petebat: illa præstabat obsequium, illa nutrebat affectum. Denique non ambulans vel discurrens huc atque illuc, non de suscipiendis hospitibus sollicita, non cura rei familiaris distenta, non pauperum clamoribus intenta, sedebat ad pedes Iesu, & audiebat verbum illius. Hæc pars tua, carissima, quæ sæculo mortua atque sepulta, surda debes esse ad omnia sæculi blandimenta audienda, ad loquendum muta: nec debes distendi, sed extendi; impleri, non ex-hauriri. Exequatur partem suam Martha quæ non negatur bona, Mariæ tamen melior prædicatur. Nunquid inuidit Marthæ Maria? Illa potius isti. Ita etiam quotquot optimæ videntur in sæculo tuam vitam æmulentur, non illarum tu. Ad illos spectat eleemosynarum largitio, quorum est terrena possessio, vel quibus credita est rerum Ecclesiasticarum dispensatio.

CAP. XLII. *De dispensatione rerum Ecclesiasticarum.*

**Q**UÆ enim sacrosanctis Ecclesiis à fidelibus collata sunt; Episcopi, Sacerdotes & Clerici dispensanda suscipiunt, & non recondenda; non possidenda, sed eroganda. Quicquid habent, pauperum est, viduarum & orphanorum, & eorum qui altari deseruiunt, ut de altari vivant. Sed ea quæ in vsu seruorum Christi Monasteriis conferuntur, à certis personis dispensari oportet; ut quod necessitatibus superest fratrum; non includatur mar-supiis, sed hospitibus, peregrinis atque pauperibus erogetur.

CAP. XLIII. *Quod claustrales non debent habere curam  
de pauperibus.*

**E**T hoc illorum interest, quibus pars est Marthæ commissa, non qui salutari otio vacant cum Maria. Ita claustralibus nulla debet esse pro pauperibus sollicitudo, nulla pro hospitibus suscipiendis distensio: quippe quibus nulla debet esse de crastino cura, nulla cibi vel potus providentia: nutriantur potius in croceis, spiritualibus pascantur. Altius autem hi qui contemptibiles sunt constituti ad iudicandum, amplexantur stercora. Ipsi quippe sunt boues, quorum piger stercoribus lapidatur.

CAP. XLIV. *Quod contemplatiui non debent desiderare temporales  
administrationes.*

**S**UNT enim quidem qui circa spiritualia desides & pigri instar populi Speccatoris super manna cæleste nauseant, videntesque alios circa temporalia occupatos inuident, detrahunt, murmurant, & pro stercoribus, quibus ipsi fœdantur, zeli & amaritudinum stimulos ferunt: de quibus si fortè aliquam temporalium dispensationem fuerint adepti, conuenienter dici potest: *Qui nutriti erant in croceis, amplexari sunt stercora.* Cum Thren. 4. igitur nec illis, qui in Cænobiis sunt, quibus in Martha non parua communi-  
nio est, circa plurima occupati conceditur; quanto minus tibi, quæ te totam de sæculo exuisti: cui non solum possidere, sed nec videre, nec audire licet quæ sæculi sunt?

CAP. XLV. *Quod reclusa debes, si sibi aliquid superest, erogare.*

**S**I enim nihil tibi quisquam det ad erogandum, unde habebis quod eroges? si ex tuo aliquid habes labore, da non tua sed alterius manu. Si aliunde tibi provenit victus, unde tibi aliena distribuere; cum nihil tibi supra necessarium liceat usurpare? Quid ergo beneficij impendes proximo? Nihil ditius bona voluntate, ut ait quidam Sanctus: hanc largire. Quid humanis pietate? hanc impende. Quid vtilius oratione? hanc largire.

CAP. XLVI. *Qualiter debes in corde dolere de necessitatibus aliorum & pro eis orare.*

**I**taque totum mundum vno dilectionis sinu complectere, vbi simul omnes qui boni sunt considera, congratulare: vbi mali, intueri & luge. Ibi occurrant animo miseria pauperum, orphanorum gemitus, viduarum desolatio, tristium mœstitudo, necessitates peregrinantium, pericula navigantium, vota virginum, tentationes Monachorum, Prælatorum sollicitudo, labor militantium. Omnibus pectus tuæ dilectionis aperias. His tuas impende lacrimas: pro his tuas preces fundas. Hæc eleemosyna Deo gratior, Christo acceptior, tuæ professioni aptior, his quibus impenditur fructuosior. Huius munus beneficij tuum propositum adiuuat, non perturbat: dilectionem proximi auget, non minuit: mentis quietem servat, non impedit. Quod nihil est appetendum ut habeatur ad largiendum: cum nihil habere sit perfectum. Quid his plura dicamus? Cum sancti ut perfectè possent proximos diligere, studuerunt in hoc mundo nihil habere, nihil vel sine appetitu possidere. Agnosceis verba Beati Gregorij. Vide quæ contra multi sapiunt: ut enim caritatis impleant legem, querunt ut habeant quod erogent: cum eius perfectionem ipsis ascribat, qui nihil habendum, nihil vel sine appetitu possidendum arbitrantur.

CAP. XLVII. *De dilectione Dei, & contemplatione prædictionis & prophetationis aduentus Filij Dei, & unnnunciationis Angelice plenitudinis gratia, visitationis, & prophetationis Elizabeth & Ioannis, partus virginis, iubilationis Angelorum, adoratione pastorum.*

**H**is de proximi dilectione præmissis, de dilectione Dei pauca subiungam. Nam licet utraque soror Deum proximumque dilexerit; specialiter tamen circa obsequium proximorum occupabatur Martha: ex diuinæ vero lectionis fonte hauriebat Maria. Ad Dei vero dilectionem duo pertinent, affectus mentis, & effectus operis. Et opus hoc in virtutum exercitio; affectus spiritualis gustus dulcedine. Exercitium virtutum tamen certo viuendi modo, in ieiuniis, in opere, in dilectione, in oratione, in paupertate, & cæteris huiusmodi commendatur: affectus salutari meditatione nutritur. Itaque, ut ille dulcissimus amor Iesu in tuo crescat affectu, triplici meditatione opus habes: de præteritis scilicet, præsentibus, & futuris: id est, præteritorum recordatione, de experientia præsentium, de consideratione

consideratione futurorum. Cum igitur mens tua fuerit ab omni cogitatione forde virtutum exercitio purgata, iam oculos defecatos ad posteriora retorque. Ac primum cum Ecata Maria ingressa cubiculum, libros quibus virginis partus cum Christi prophetatur aduentu, euolues. Ibi aduentum Angeli præstolare, ut videas intransentem, audias salutantem: & sicut repleta stupore & extasi, dulcissimam dominam tuam cum Angelo salutante salutes, clama dicens: *Aue gratia plena Dominus tecum benedicta tu in mulieribus.* Hoc plenius repetens quæ sit hæc gratiæ plenitudo, de qua totus mundus gratiam mutuauit. Quoniam *Verbum caro factum est, & habitauit in nobis plenum gratia & veritatis.* Contemplare & admirare Dominum, qui terram impleuit & cælum, inter vnus puellæ viscera clauditur; quam Pater sanctificauit, Filius fecundauit, obumbravit Spiritus sanctus. O dulcis domina, quanta inebriabaris dulcedine, quo amoris igne accendebaris, cum sentires in mente & ventre tantæ maiestatis præsentiam? Cum de tua carne sibi carnem assumeret, & membra, in quibus corporaliter omnis plenitudo diuinitatis habitaret, è tuis sibi membris aptaret. Hæc omnia propter te, Virgo, ut virginem, quam imitari proposuisti, illas virginis fructum cui nupsisti. Iam nunc cum dulcissima domina tua in montana conscende, & sterilis & virginis suauem intueri complexum, & salutationis officium: in quo seruus Dominum, præco iudicem, vox verbum, intus in anilia viscera conclusus in virginis vtero clausum agnouit, & indicibile gaudium salutauit. Beati ventres in quibus totius mundi salus exoritur, pulsisque tenebris tristitiæ sempiterna lætitiæ prophetatur. Quid agis ô Virgo? accurre, quæso, accurre, & tantis gaudiis admiscere: prosternere ad pedes utriusque, & in vnus ventre tuum sponsum amplectere, amicum vero eius in alterius vtero venerare. Hunc cunctem in Bethleem cum omni deuotione prosequere, & in hospitium diuertens cum illa assiste, & obsequere parienti, locatoque in præsepio paruulo crumpe in vocem exultationis, clamans cum Esaia: *Parnulus natus est nobis, & filius datus est nobis.* Amplectare dulce illud præsepium: vincat verecundiam amor, timorem depellat affectus, ut sacratissimis pedibus figas labia, & oscula geminas. Exinde pastorum excubias mente pertracta, Angelorum exercitum admirare, cælesti melodiz tuas interpone partes: corde simul & ore decanta: *Gloria in excelsis Deo.*

Luc. 1.

Ioan. 1.

Col. 2.

Isai. 9.

Luc. 2.

CAP. XLVIII. *De Magorum adoratione, fuga Christi in Ægyptum, de latrone à latere Christi dextro crucifixo, qui per unum Iesum videbat cum diceretur in Ægyptum, & peti:ras; Memento mei Domine cum veneris in regnum tuum.*

**N**OLI in tua meditatione Magorum munera præterire: nec fugientem in Ægyptum incomitatum relinque. Opinare verum esse quod dicitur, eum à latronibus comprehensum in via, & adolescentuli cuiusdam beneficio acceptum. Erat, ut dicunt, principis latronum filius, qui præda potius cum paruulum in matris gremio comperisset, tanta ei in eius speciosissimo vultu splendoris maiestas apparuit, ut cum supra hominem esse non ambi-

gens, incallescens amore amplexatus est eum. Et ô, inquit, beatissime parvulorum: si aliquando se tempus obtulerit mihi misereui, tunc memento mei, & huius temporis noli obliuisci. Ferunt hunc esse latronem, qui ad Christi dexteram crucifixus est, cum alterum blasphemantem corripuisset dicens: *Neque tu times Deum qui in eadem damnatione es? & vos quidem iustè, nam digna damna facitis recipimus: hic autem nihil mali fecit; conuersus ad Dominum, eum in illa quæ in puerulo apparuerat inguens maiestate, pacti sui non inmemor: Memento, inquit, mei cum veneris in Regnum tuum.* Itaque ad incentiuum amoris non inutile arbitror hac vti opimione, remota omni affirmandi temeritate.

Luc. 23.

CAP. XLIX. *De contemplatione Christi in Nazareth, & in Ierusalem, in obsequendo Matri & Ioseph.*

**P**Rætereà nihil ne tibi suauitatis æstimas accessurum, si eum apud Nazareth puerum inter pueros contempleris? si obsequentem Matri, si operanti nutricio assistentem intuearis? Quid si duodennum cum parvulis Hierosolymam ascendentem, & illis redeuntibus, & nescientibus vrbe remanentem per triduum cum matre quasiëris? O quanta copia fluent lacrimæ, cum audieris matrem dulci quadam increpatione filium verberantem: *Fili quid fecisti nobis sic? Ecce pater tuus & ego dolentes querebamus te.*

Luc. 1.

CAP. L. *De consideratione baptismi, ieiunii & tentationis Christi.*

**S**I autem virginem vis sequi quocunque ierit, delecter altiora eius & secretiora scrutari: vt in Iordanis flumine audias in voce Patrem, in carne Filium, in columba videas Spiritum sanctum. Ibi tu ad spirituales initiatas nuptias sponsum suscipias datum à Patre, purificationem à Filio, pignus amoris à Spiritu sancto. Exinde solitudinis tibi secreta ditauit, sanctificauit ieiunium, ibi subeundum docens cum callido hoste, conflictum. Hæc tibi facta & pro te facta, & quomodo facta diligenter attendes. Dilige à quo facta sunt, & imitare quæ facta sunt.

CAP. LI. *De muliere in adulterio deprehensa.*

**O**Ccurrit iam nunc memoriæ mulier illa deprehensa in adulterio, & Iesus rogatus sententiam, quid egerit, quiduc dixerit, recordare. Cum enim scribens in terra terrenos eos non cælestes prodidisset, *Qui sine peccato est, inquit, primus lapidem in illam mittat.* Cum vero omnes sententia tessuisset & expulisset de templo, imaginare quam pios oculos in illam leuauerit, quam dulcem sua voce sententiam absolutionis eius protulerit. Puta quod suspirauerit, quod lacrimatus sit, cum diceret: *Nemo te condemnauit mulier? nec ego te condemnabo.* Fælix, vt ita dicam, hæc quæ in adulterio deprehensa mulier, quæ etiam de præteritis absoluitur, securâ efficitur de futuris. Iesu bone te dicente, non condemnabo, quis condemnabit? *Deus qui iustificat, quis est qui condemnet?* Audiatur de cætero vox tua, *Vade, & iam amplius noli peccare.*

Ioan. 8.

Ibid.

Rom. 8.



CAP. LII. *De muliere lacrimis pedes eius rigante.*

**I**Am nunc domum ingredi Pharisæi, & recumbentem ibi Dominum tuum attende. Attende cum illa beatissima peccatrice ad pedes eius, laua lacrimis, terge capillis, demulce osculis, & fove vnguentis. Nonne iam sacri illius liquoris odor perfunderis? Si tibi ad suos negat pedes, insta, ora, & grætibz lacrimis oculos attolle, imisque suspiriis & inenarrabilibus extorque quod petis. Luctare cum Deo sicut Iacob, vt ipse se gaudeat superare. Videbitur tibi aliquando quod auertat oculos, quod aures claudat, quod desideratos pedes abscondat. Tu nihilominus opportunè, importunè; clama: *Uſquequo auertis faciem tuam à me? Uſquequo clamabo & non exaudies? Redde mihi, Iesu bone, letitiam ſalutaris tui, quia dixit cor meum: quaſi ſui faciem tuam, faciem tuam requiram.* Certe non negabit pedes suos virgini, quos osculandz præbuit peccatrici.

Pſal. 117.

Pſal. 117.

Pſal. 80.

Pſal. 116.

CAP. LIII. *De Paralytico, per tegulas inueſto, non ſolum corporaliter, ſed ſpiritualiter curato, licet hoc non peteret, nam cui vult miſeretur.*

**S**ed domum illam non præteribis, vbi per tegulas paralyticus ante pedes eius ſubmittitur; vbi pietas & poteſtas obuiauerunt ſibi, *Fili*, inquit, *remittuntur tibi peccata tua.* O mira clementia! O indicibilis miſericordia! Recepit ſælix remiſſionem peccatorum, quam non petebat, quam non præceſſerat conſeſſio, non meruerat ſatisfactio, non exigebat contritio. Corporis ſalutem petebat, non animæ: & ſalutem recepit corporis & animæ. Verè, Domine, *vita in voluntate tua. Si decreueris ſaluare nos, non eſt qui audeat dicere: cur ita facis?* Phariſæe, intra te quid murmuras? *An oculus tuus nequam eſt, quia ipſe bonus ſum?* Certè miſeretur cui voluerit: ploremus & oremus vt velit. Bonis etiam operibus pingueſcat oratio, augeatur deuotio, dilectio excitetur. Leuentur puræ manus in oratione, quas non ſanguis immunditiæ maculauit, tactus illicitus non ſædauit, non exaſperauit auaritia. Leuetur & cor ſine ira & diſceptione, quod tranquillitas ſedauit, pax compoſuit, puritas conſcientiæ animauit. Sed nihil horum paralyticus iſte legitur præmiſiſſe, qui tamen legitur remiſſionem peccatorum meruiſſe. Hæc eſt ineffabilis eius miſericordiæ virtus, cui ſicut blaſphemum eſt derogare, ita & hoc ſibi præſumere ſtultiſſimum. Poſteſt cuiſcunque vult hoc ipſum efficaciter dicere, quod dixit illi Paralytico, *dimittuntur tibi peccata tua.* Sed quicunque ſine ſuo labore vel contritione, vel conſeſſione, vel etiam oratione, ſibi hoc dicendum expectat, nunquam ei remittentur peccata ſua.

Mat. 9. 1.

Pſal. 117.

Eſt. 13.

Matth. 10

Rom. 9.

Mat. 9. 1.

CAP. LIV. *De receptione Chriſti in domo Marthæ & Mariæ, & Marthæ miniſtrante, & effuſione vnguenti, & condemnatione Phariſæi.*

**S**ed exeundum eſt hinc, & ad Bethaniam veniendum, vbi ſacratiffima ſcœdera amicitiz auctoritate Domini conſecrantur. *Diligebat enim Ieſus Martham, & Mariam, & Lazarum,* quod hoſpitalis amicitiz, qua illi familiariori adhærebant affectu, detineri nemo eſt qui ambigat. Teſtes ſunt lacrimæ illæ dulces, quibus lactimatus eſt cum lacrimantibus, quas totus populus amoris interpretatur indicium,

Ioan. 11.



Ioan. 11.

Ioan. 12.

*Videte, inquit, quomodo amabat eum. Et ecce ponunt ei cenam ibi, & Martha ministrabat. Lazarus autem erat vnus ex discumbentibus. Maria autem sumpsit alabastrum vnguenti, & facto alabastro effudit super caput Iesu. Gaude, quæso, huic interesse conuiuio, singulorum distingue officia. Martha ministrat, Lazarus discumbit, vngit Maria. Hoc vltimum tuum est. Frange igitur alabastrum cordis, & quicquid habes deuotionis, quicquid amoris, quicquid desiderij, quicquid affectionis, totum effunde sponso tui caput, adorans in Deo hominem, & in homine Deum. Si fremit, si murmurat, si proditor perditionem vocat deuotionem, non sit tibi curæ. *Vt quid, ait, persequor hæc? posset hoc vnguentum venundari multo, & dari pauperibus.* Pharisæus murmurat inuidens penitenti: murmurat Iudas inuidens effusioni vnguenti. Si iudex accusationem non recipit, accusatam absoluit. *Sinite, inquit, illam. Bonum enim opus operata est in me.* Laborat, Martha, ministrat, parat hospitium peregrino, esurienti cibum, vestem argenti; ego solus Mariæ, & illa mihi totum præstet quod habet; à me quicquid optat expectet. Quid enim? Tu Mariæ consulis relinquendos pedes, quos tam dulciter osculatur? auertendos oculos ab illa speciosissima facie, quam contemplatur? amouendum auditum ab eius suauis sermone, quo reficitur?*

CAP. LV. *De obuiatione puerorum cum ramis palmarum, clamantium: Osanna in excelsis.*

Matt. 21.

Sed iam surgentes eximus hinc. Quò, inquis? Certè vt insidentem Salsello cæli terræque Dominum comiteris tanta fieri pro te obstupescens, puerorum laudibus tuas iungas, clamans & dicens: *Osanna filio David, Benedictus qui venit in nomine Domini.* Iam nunc ascende cum eo in cenaculum grande stratum, & salutaris cænæ interesse deliciis gratulare.

CAP. LVI. *De Cæna Domini, & de his quæ ibi gesta sunt, quare beatus Ioannes supra pectus eius recubuit.*

VLuat verecundiam amor, timorem excludat affectus; vt saltem de micis mensæ eleemosynam præbeat mendicanti. Vel à longe sta, & quasi pauper intendens in diuitem, vt aliquid accipias extende manum: famem lacrimis prode. Cum iam surgens a cæna linteo se præcinxit, posuitque aquam in peluim, cogita quæ maiestas, quæ potestas hominum pedes abluat & extersit: quæ benignitas proditoris vestigia sacris manibus tangit. Specta & expecta, & vltima omnium tuos ei præbe ablucendos: quia quem ipse non lauit, non habebit partem cum eo. Quid modo festinas exire? Sustine paululum: Videtne quisnam ille est, rogo te, qui supra pectus eius recumbit, & in sinu eius caput reclinat? Fælix quicumque ille est. O ecce video: Ioannes est nomen eius. O Ioannes, quid ibi dulcedinis, quid gratiæ & suauitatis, quid luminis & deuotionis ab illo hauriam fonte dicito. Ibi certè omnes thesauri sapientiæ & scientiæ: ibi fons misericordiæ, domicilium pietatis, & fauus æternæ suauitatis. Vnde, tibi ô Ioannes, omnia ista? Nunquid tu sublimior Petro, Andræa sanctior,

Col. 1.

cæteris omnibus Apostoli gratiori Speciale hoc virginis prædilecti privilegium est; quia virgo es electus à Domino antequam ires cum matre dilectus. Iam misericordiæ exulta virgo, accede propius, & aliquam tibi huius dulcedinis portionem vindicare non differas. Si ad potiora non potes, dimitte Ioanni pectus, ubi eum vinum lætitiæ in diuinitatis cognitione inebriet: tu currens ad vbera humanitatis, lac exprime quo nutiaris. Inter hæc sacratissima illa oratione discipulos commendans Patri dixerit: *Pater serua eos in nomine tuo.* Inclina tu caput, vt & tu merearis audire: *Volo vti vbi* Ibid. *sum ego, & illi sint mecum.*

CAP. LVII. *Qualiter post cenam ad orandum ad montem Oliueti accessit.*

**B**Onum est tibi hic esse. Sed excursum est: præcedit ipse ad montem Oliueti, tu sequere. Et licet assumpto Petro & duobus filiis Zebedæi ad secreta secesserit, vel à longe intueri quomodo in se nostram transfudit necessitatem. Vide quomodo ille cuius sunt omnia, pauere incipit & tædere, *Tristis est anima mea*, inquit, *vsque ad mortem.* Vnde hoc Deus Mat. 26. meus? compatere mihi exhibens hominem, vt quodammodo videaris nescire quod Deus es, prostratus in faciem oras; & *factus est sudor tuus*, Luc. 22. *sicut gutta sanguinis decurrentis in terram.* Quid stas? accurre, & suauissimas illas guttas lambe, & puluerem pedum illius linge. Noli dormire cum Petro, ne merearis audire; *Sic non potuisti vna hora vigi-* Mat. 26. *lare mecum?*

CAP. LVIII. *Qualiter proditor ad eum capiendum venit, qualiter Petrus gladio percussit, sed postea negauit.*

**S**Ed ecce iam proditorem prætereuntem impiorum turba subsequitur, & osculum præbente Iuda manus iniiciunt in Dominum tuum: tenent, ligant, & illas dulces manus vinculis astringunt. Quis ferat? Scio, occupat nunc cor tuum pietas: omnia viscera tua zelus inflamat. Sine, rogo, patiatur qui pro te patitur. Quid optas gladium? quid irascaris? quid indignaris? O si instat Petri cuiuslibet aurem abscideris, si ferro brachium tuleris, si pedem truncaueris, ipse restituet omnia. Qui etiam siquidem occideris, absque dubio suscitabit.

CAP. LIX. *Qualiter male tractatur, toram Pilato falso accusatur, & falso iudicatur, flagellatur, & corona spinea coronatur.*

**S**Equere potius eum vsque ad atrium Principis Sacerdotum, & speciosissimam eius faciem, quam illi sputis illinunt, tu lacrimis lava. Intuere quam piis oculis, quam misericorditer, quam efficaciter tertio negantem respexit Petrum, quando ille conuersus & in se reuersus *fleuit amare.* Veinam, bone Iesu, tuus me dulcis respiciat oculus, qui te totiens ad vocem ancillæ procacis carnis meæ pessimis operibus affectibusque negavit. Sed iam mane factò traditur Pilato, ibi accusatur, & tacet: quoniam *tantumquam ovis ad occisionem ducitur*, & *sicut agnus coram tondente* Iesai. 53. *se, sic non aperuit os suum.* Vide, attende, quomodo stat ante Præsidem inclinato capite, demissis oculis, vultu placido, sermone raro, pa-

ratus ad opprobria, promptus etiam ad verbera. Scio, non potes ulterius sustinere, nec dulcissimum dosum eius flagellis atteri, nec faciem alapis cædi, nec venerandum illud caput spinis coronari corona spinea; nec dexteram, quæ cælum & terram continet, arundine dehonestari, tuis oculis aspicere poteris. Ecce educitur flagellatus, portans spineam coronam, & purpureum vestimentum. Et dicit Pilatus; *Ecce homo*. Verè homo est, quis dubitet? Testes sunt plagæ virgarum, liuor vlcerum, scæditas sputorum. Iam nunc cognosco Zabule quia est homo. Verè homo est, inquis. Sed quid est, quod in tot iniuriis non irascitur vt homo, non mouetur vt homo, non suis tortoribus indignatur vt homo? Ergo plus est quàm homo, si quis cognoscit illum. Cognoscitur certè homo impiorum iudicia sustinens: sed *cognoscetur Deus iudicium faciens*. Sero animaduertisti Zabule.

CAP. LX. *De consideratione Passionis Christi, & deceptionis diaboli, qui cum hominem solum esse credebatur.*

**Q**uid tibi per mulierem visum est agere vt dimittatur? Tardè locutus es. Sedet pro tribunali iudex, prolata sententia iam portat propriam crucem, ducitur ad mortem. O spectaculum! Vidistine? Ecce *principatus* *super humerum eius*. Hæc est *virga equitatis, virga regni tui*. Datur ei vinum felle mixtum. Exiit vestimentis suis, & inter milites diuiduntur. Tunica non scinditur, sed forte transit ad vnum. Dulces manus eius & pedes clauis perforantur, & extensus in cruce inter latrones suspenditur.

CAP. LXI. *Quomodo pendit in cruce inter calum & terram, vt ima summis reconciliaret.*

**M**ediator Dei & hominum inter cælum & terram medius pendens ima superis vnit, & caelestibus terrena coniungit. Stupet cælum, & terra miratur. Quid tu? Non mirum si sole contristato tu contristaris: si terra tremiscente, tu contremisces: si scissis saxis cor tuum scinditur: si flentibus iuxta crucem mulieribus, tu lachrimaris.

CAP. LXII. *De mira patientia in passione, reddendo bonum pro malo.*

**V**erum in his omnibus considera illud dulcissimum pectus, quam tranquillitatem seruauerit, quam habuerit pietatem. Non suam attendit iniuriam, non penam reputat, non sentit contumelias. Sed illis potius à quibus patitur, ille compatitur: à quibus vulneratur, ille medetur: vitam procurat, à quibus occiditur. Cum qua mentis dulcedine, cum qua spiritus deuotione, in qua caritatis plenitudine clamat: *Pater ignosce illis?*

CAP. LXIII. *Oratio peccatoris ad Christum.*

**E**cce ego, Domine, tuæ maiestatis adorator, non tui corporis interfecto; tuæ mortis venerator, non tuæ passionis irrisor; tuæ misericordiæ contemplator, non infirmitatis contemptor. Interpellet itaque pro me tua dulcis humanitas, commendet me Patri tuo tua ineffabilis pietas. Dic ergo, dulcis Domine: Pater ignosce illi. At tu, virgo, tu maior es apud virginis filium confidentia, à mulieribus quæ longè stant, cum matre virgine & discipulo virgine accede ad crucem, & perfusum pallore vultum cominus

intuere. Quid ergo. Tu sine lacrimis, amantissimæ Dominae lachrymas videbis? Tu siccis oculis manes, *animum pertransit gladius doloris*? Tu Luc. 1. sine singultu audies dicentem matri: *Mulier ecce filius tuus*, & Ioanni: *Ecce mater tua*; cum discipulo matrem committeret, latroni paraditum promitteret? *Tunc vnus ex militibus lancea latus eius aperuit, & exiuit sanguis & aqua.* Ibid. Festina ne tardaueris: *comede panem cum melle tuo: bibe vinum tuum cum lacte tuo.* Cant. 5. Sanguis tibi in vinum vertitur, vt inebrieris: in lac aqua mutatur, vt nutriaris: facta sunt tibi in petra flumina, in membris eius vulnera: & in maceria corporis eius cauerna, in quibus instar columbarum latitatis & deoscularis singula, Ex sanguine eius fiant sicut *vitta corinea labia tua, & eloquium tuum dulce.* Cant. 4. 5c.

## CAP. LXIV. De Decurione.

SED adhuc expecta donec nobilis ille decurio veniens extractis clauis manus pedesque dissoluat. Vide quomodo felicissimis brachiis corpus complectitur, ac suo astringit pectori. Tunc dicere potuit vir ille sanctissimus: *Fasciculus mirræ dilectus meus mihi, inter vbera mea commorabitur.* Cant. 1. 12. Sequere tu pretiosissimum illum calti terræque thesaurum, vel pedes porta, vel manus brachiaque sustenta, vel certò defluentes minutatim pretiosissimi sanguinis stillas curiosius collige, & pedum illius puluerem linge. Cerne præterea quod dulciter beatissimus Nicodemus sacratissima vulnera eius tractauit digitis, fuit vnguentis, vt cum sancto Ioseph inuoluit sindone, collocauit in sepulchro.

## CAP. LXV. De Magdalena.

NOLI præterea Magdalena deferere comitatum; sed paratis aromatibus, cum ea Domini tui sepulchrum visitare memento. O si quod illa oculis, tu in spiritucernere merearis! nunc super lapidem reuoluto ab ostio monumenti Angelum residentem: nunc intra monumentum, vnum ad caput, alium ad pedes, resurrectionis gloriam prædicantes: nunc ipsum Iesum Mariam flentem & tristem tam dulci respicientem oculo, tam suauis voce dicentem, *Maria.* Quid hac voce dulcius? quid suauius? quid iucundius Maria? Rumpuntur ad hanc vocem omnes capitis catartæ, ab ipsis medullis eliciuntur lacrimæ, singultus atque suspiria ab imis trahuntur visceribus. *Maria.* O beata, quid tibi pro meritis fuit, quid animi, cum ad hanc vocem te prosterneret, & reddens vocem salutanti inelamares, *Rabbi*? Nam plura dicere lacrimæ prohibent, cum vocem ocludat affectus, omnesque animæ corporisque sensus nimius ardor absorbeat. Sed o dulcis Iesu, cur à sacratissimis ac desideratissimis pedibus tuis sic arces amantem? O verbum durum! *Noli*, inquit, *me tangere.* Vt quid Domine? Quare non tangam desiderata illa vestigia tua pro me perforata clavis, perfusa sanguine? non tangam? non deosculabor? An inimicior es eo, quia gloriosior? Ecce non dimittam te, non recedam à te, non parcam lacrimis, petus suspiriis, singultibusque rumpetur nisi tangam. Tille: *Noli me tangere, noli timere.* Non aufertur tibi bonum hoc, sed differtur. Vade tamen & nuntia fratribus meis quia surrexi. Currit, cito volens redire. Redit cum

Mat. 18. alius mulieribus. Quibus Iesus occurrens blanda salutatione, deiectas sic erigit tristes, sic consolatur. Aduerte. Tunc est datum quod ante fuit dilatum. *Accesserunt enim & tenuerunt pedes eius.* Hic quamdiu potes, virgo, morare. Non has delicias tuas somnus interpolet, nullus exterior tumultus impediatur.

CAP. LXVI. *De consideratione mundi & rerum presentium, & ut vilescent, quasi statim mors sequatur, quæ est principium futurorum & finis presentium.*

Mat. 6. Verum quia in hac misera vita nihil stabile, nihil æternum est, nunquam in eodem statu permanet homo: necesse est, ut anima nostra dum viuimus, quadam varietate pascatur. Vnde à præteritorum recordatione ad experientiam præsentium transeamus; ut ex his quoque, quantum à nobis sit Deus diligendus omnes intelligere valeamus. Hæc omnia reuolue animo; ut in eum totus tuus resoluatur affectus, vilescat tibi mundus, omnis amor carnalis sordefeat. Nescias te esse in hoc mundo, quæ ad illos, qui in cælis sunt & Deo viuunt, tuum amorem transtulisti. *Ubi est thesaurus tuus, ibi & cor tuum.* Noli cum argenteis simulacris vili marsupio tuum includere animum, qui nunquam cum nummorum pondere poterit transuolare ad cælum. Puta te quotidie morituram, & de crastino non cogitabis. Non te futuri temporis sterilitas terreat; non futuræ famis timor tuam mentem deiciat: sed ex ipso tota fiducia tua pendeat, *qui auis pascit, & lilia vestit.* Ipse sit horreum tuum, ipse apotheca, ipse marsupium, ipse diuitiæ tuæ: ipse solus sit tibi omnia in omnibus. Et hæc interim de præsentibus satis sint.

CAP. LXVII. *De mortis conditione, quæ à cunctis timetur, non timenda à fidelibus.*

Qui autem tanta suis præstat in præsentem, quanta illis seruat in futuro? Principium futurorum & finis præsentium mors. Hanc cuius natura non horret? cuius non expanseit affectus? Nam bestię fuga, latibulis, & aliis mille modis mortem cauent & vitam tenent. Iam nunc diligenter attende quid tua tibi respondeat conscientia, quid præsumit fides tua, quid spes promittat, quid expectet effectus: si vita tua tibi oneri est; si mundus fastidio corporeos labores assumit. Hoc vnum dico omnibus mundi huius præstare deliciis, honoribus atque diuitiis, si ob conscientię serenitatem, fidei firmitatem, spei certitudinem, mortem non timeas. Quod ille maxime poterit experiri, qualiquo tempore sub hac seruitute suspirans in liberioris conscientię auras euasit. Hæc sunt futuræ beatitudinis tuæ primitiæ salutares; ut morte superueniente naturalis horrorem fides superet, spes temperet, conscientia repellat.

CAP. LXVIII. *De securitate & consolatione iusti in morte, & qualiter Angeli cum eo assistunt.*

Apoc. 14. ET vide quomodo mors beatitudinis principium est, laborum meta, peremptoria vitiorum. Sic enim scriptum est: *Beati mortui qui in Domino moriuntur, amodo enim iam dñs spiritus ut requiescant à laboribus suis.* Vnde

Vnde Propheta reproborum ab electorum morte discernens: *Omnes, inquit, reges dormiunt in gloria in domo sua. Tu autem proiectus es de sepulchro tuo quasi stirps inutilis, pollutus & obuolutus.* Isai. 14.

CAP. LXXIX. *De anima egrediente, & ubi collocatur.*

**D**ormiunt quippe in gloria, quorum mortem bona commendat conscientia. Quoniam *pretiosa est in conspectu Domini mors sanctorum eius.* Psal. 119. Dormit facie in gloria, cuius dormitioni assistunt Angeli, occurrunt sancti, & concives suum præbentes auxilium, & impertientes solatium, hostibus se opponunt, obistentes repellunt, refellunt accusantes: & sic vsque ad sinum Abraham sanctam animam comitantes in loco pacis collocant & quietis. Non sic impij, quos de corpore quasi de fœtenti sepulchro pessimi spiritus cum instrumentis infernalibus extrahentes, pollutos libidine, obuolutos cupiditate iniiciunt ignibus exurendos, tradunt vermibus lacerandos, æternis fœtoribus deputant suffocandos. Verè *expectatio iustorum lætitia: spes autem impiorum peribit.* Prou. 10.

CAP. LXX. *De requie æterna & gloria sanctorum qualis sit.*

**S**ane qualis sit illa requies, quæ pax illa, quæ iucunditas de sinu Abraham, quæ illic quiescentibus promittitur, & expectatur, quia experientia non docuit, stilus explicare non poterit. Expectant fœlices, donec impleatur *numerus fratrum suorum*, ut in die Resurrectionis duplicis stolæ induti corporis pariter & animæ perpetua fœlicitate fruantur. Apoc. 6.

CAP. LXXI. *De consideratione diei iudicii, iudicis irati, damnatione malorum & saluatione iustorum.*

**I**am nunc intueretur diei illius terrorem, quando *virtutes calorū mouebuntur, elementa ignis calore soluentur*, patebunt inferi, occulta omnia nudabuntur. Veniet desuper iudex iratus, ardens furor eius, & ut tempestas currus eius: ut reddat in ira vindictam, & vastationem in flamma ignis. Beatus qui paratus est occurrere illi. Quis tunc miseris finis erit, quos nunc luxuria fœdat, auaritia dissipat, extollit superbia? *Exibunt Angeli, & separabunt malos de medio iustorum*: istos à dextris, alios à sinistris statuentes. Cogita te nunc ante tribunal inter utramque hanc societatem assistere, & necdum in partem alteram separatam. Deflece nunc oculos ad sinistram iudicis, & miseram illam multitudinem specta. Mat. 24. 1. Petri. 3. Mat. 13.

CAP. LXXII. *De confusione & pœna malorum.*

**Q**ualis ibi horror? quis timor? quis fœtor? quis dolor? Stant miseri & infœlices stridentes dentibus, nudo latere palpitantes, aspectu horribiles, vultu deformes, deiectione præ pudore: præ corporis turpitudine & nuditate confusi latere volunt, & non datur: fugere tentant, & non permittuntur. Si leuant oculos desuper, iudicis imminet furor: si deponunt, infernalis putei eis ingeritur horror. Non suppetit criminum excusatio, nec de iniquo iudicio aliqua poterit esse causatio. Cum quicquid decretum fuerit, iustum esse ipsum eorum conscientiam non latebit.



CAP. LXXIII. *De dilectione Dei, qui hic separat bonos à malavita & operibus impiorum.*

Cerne nunc quam amandus sit qui tè ab hac damnata societate prædestinando discernit, vocando separavit, iustificando purgavit. Retorque nunc ad dexteram oculos, & quibus te glorificando sit inserturus aduerte.

CAP. LXXIV. *De gloria bonorum.*

Qvis ibi decor? quis honor? quæ felicitas? quæ securitas? Alij die iudiciaria sede sublimes: alij martyrij corona splendentes: alij virginitatis flore candidi: alij elemosynarum largitione sæcundi: alij doctrina & eruditione præclari: vno caritatis fœdere copulantur. Lucet eis vultus Iesu Christi, non terribilis, sed amabilis: non amarus, sed dulcis: non terrens, sed blandiens.

CAP. LXXV. *De dubio hominis existentis in hoc sæculo, qualiter indicabitur, & quomodo se debet convertere ad Deum.*

Psal. 34. Sta nunc in medio nesciens quibus te iudicis sententia deputabit. O dura expectatio! *Timor & tremor venerunt super me, & contexerunt me tenebræ.* Si me sinistris sociauerit, non causabor iniustum: si dextris adscripserit, gratiæ eius hoc non meis meritis est imputandum. Verè

Psal. 29. Domine *vita in voluntate tua.* Vides ergo quantum in amore eius ruus extendi debeat animus, qui cum iuste possit in impios prolata in te quoque retroquere sententiam, nitibus te maluit ac saluandis inferere. Iam te

Mat. 28. puta sanctæ illi societati coniunctam vocis audire decretum: *Venite benedicti Patri mei, percipite regnum, quod vobis paratum est ab origine mundi.* Miseris audientibus verbum durum, plenum iræ & furoris:

Mat. 23. *Discedite à me maledicti in ignem æternum. Tunc ibunt hi in supplicium æternum: iusti autem in vitam æternam.* O dura separatio! ô miserabilis conditio!

CAP. LXXVI. *De visione Dei post iudicium, & quæ sit interim gloria hic potest colligi.*

SVblatis verò impiis ne videant gloriam Dei; iustis quoque singulis secundum gradum suum & meritum Angelicis ordinibus insertis, fiet illa gloriosa processio Christo præcedente capite nostro, omnibus membris suis sequentibus, & tradetur Regnum Deo & Patri: ut ipse regnet in ipsis: & ipsi regnent cum ipso, illud percipientes regnum, quod paratum est illis ab origine mundi.

CAP. LXXVII. *De gloria & gaudiis paradisi.*

CVius regni status nec cogitari quidem potest à nobis, multo minus dici vel scribi. Hoc sciendum, quod omnino nihil aberit, quod vel adesse; nec quidquam aderit, quod vel ab esse debeat. Nullus igitur ibi luctus, fletus nullus: non timor, non dolor, non diffidentia, non invidia, non suspicio, non ambitio, non adulatio, non detractio, non ægritudo, non senectus, non mors, non paupertas, neque renebræ: non edendi, vel bibendi, vel dormiendi vlla necessitas: nulla fatigatio, defectio nulla.



Quid ergo boni tibi est, vbi nec luctus, nec fletus, nec dolor est, neque tristitia? Quid potest esse nisi perfecta læticia, vbi nulla tribulatio, nulla tentatio, nulla temporum mutatio, vel aëris corruptio, æstus vehementior, nec hyems asperior? Quid potest esse, vbi summa quædam terum temperies, & mentis & carnis vera ac summa tranquillitas? Vbi nihil quod timeas, vbi nulla discordia, nulla inuidia, nulla suspicio, nulla ambitio, nulla adulatio, detractio nulla, quid potest esse nisi summa & vera dilectio? Vbi nulla paupertas, nulla cupiditas, quid potest esse nisi bonorum omnium plenitudo? Vbi nulla deformitas, quid potest esse nisi vera pulchritudo? Vbi nullus labor vel defectio, quid erit nisi requies summa & fortitudo? Vbi nihil est quod grauet vel oneret, quid est nisi summa facilitas? Vbi nec senectus expectatur, nec morbus timetur, quid potest esse nisi vera sanitas? Vbi neque nox, neque tenebræ, quid erit nisi lux perfecta? Vbi mors & omnis mortalitas absorpta, quid erit nisi vita æterna? Quid est ultra quod quæramus? Certè quod his omnibus excellit: id est, visio, cognitio, & dilectio creatoris. Videbitur in se, videbitur in creaturis suis regens omnia sine sollicitudine, sustinens omnia sine labore, impertiens se & quodammodo dispartiens singulis pro sua capacitate sine sui diminutione vel diuisione. Videbitur ille vultus amabilis & desiderabilis, in quem desiderant Angeli prospicere. De cuius plenitudine, de cuius lumine, de cuius suauitate quid dicetur? Videbitur Pater in Filio, Filius in Patre, Spiritus sanctus in vtroque. Videbitur non per speculum & in ælignate, sed facie ad faciem. Videbitur enim sicuti est, impleta illa promissione qua dicit: *Qui diligit me, diligetur à Patre meo, & ego diligam eum, & manifestabo ei meipsum.* Ex hac visione illa procedit cognitio, de qua ipse ait: *Hæc est vita æterna, vt cognoscant te vnum Deum, & quem misisti Iesum Christum.* Ex his tanta nascitur dilectio, tantus ardor paterni amoris, tanta dulcedo caritatis, tanta feruendi copia, tanta desiderij vehementia; vt nec satietas desiderium minuat, nec desiderium satietatem impediat. Quid est hoc? certè quod oculus non vidit, nec auris audiuit, nec in cor hominis ascendit, quod præparauit Deus diligentibus se. 1. Pet. 3. 13

CAP. LXXVIII. Conclusio in contemplatione diuini amoris ex beneficiorum præteritorum Christi memoria, & præsentium experientia, & expectatione futurorum.

**H**Æc tibi, soror, de beneficiorum præteritorum Christi memoria, de præsentium experientia, de expectatione futurorum quædam meditationum spiritualium semina præseminare curavi, ex quibus diuinus amoris fructus vberior oriatur & crescat, vt meditatio affectum exerceat, affectus desiderium pariat, lacrimas desiderium excitet, vt sint lacrimarum panes die ac nocte, donec appareas in conspectu eius, & suscipiaris ab amplexibus eius, dicasque illud, quod in Canticis scriptum est: *Dilectus meus mihi, & ego illi.* Habes nunc sicut petisti corporales constitutiones, quibus inclusa exterioris hominis mores componas. Habes Ioan. 14.  
Ioan. 17.  
1 Cor. 2. 9.  
Cant. 2. 16.

formam præscriptam, qua interiorem hominem, vel purges à vitiiis, vel virtutibus ornes. Habes in triplici meditatione quomodo in te dilectionem excites, nutrias, & accendas.

VERSVS NOTABILES.

*Dulcia sunt anime solatia, quæ tibi mando.  
Nam profunt minimè, nisi serues hæc operando.*

**S**I quis igitur in huius libelli lectione profecerit, hanc labori meo vel studio vicem impendat; ut apud Saluatorem meum, quem diligo, apud remuneratorem meum, quem exspecto, apud iudicem meum, quem timeo, pro peccatis meis intercedat.

*Explicit Regula B. Aelredi.*

